

宋

元 脱 脱 等撰

中華 書 局

卷四六一至卷四七七(傳)

宋史卷四百六十一

列傳第二百二十

方技上

史序 趙修己 蘇澄隱 周克明 丁少微 王處訥 子熙元 劉翰 趙自然 王懷隱 苗訓 子守信 趙自化 馬韶 馮文智 楚芝蘭 沙門洪蘊 韓顯符

又息。 避危,則巫醫不可廢也。 修煉、吐納、導引、黃白、房中,一切煮蒿妖誕之說,皆以巫醫爲宗。漢以來,司馬遷、劉歆又 黎司地以屬民,其患途息。厥後三苗復棄典常,帝堯命義、和修重、黎之職,絕地天通,其患 昔者少皞氏之衰,九黎亂德,家爲巫史,神人淆焉。 然而天有王相孤虚,地有燥濕高下,人事有吉凶悔吝、疾病札瘥,聖人欲斯民趨安而 後世占候、測驗、厭禳、禁止,至於兵家遁甲、風角、鳥占,與夫方士 顓頊氏命南正重司天以屬神, 北正

列傳

第二

百二十

方技

上

一三四九五

平、唐孫思邈呂才言皆近道,孰得而少之哉。宋舊史有老釋、符瑞二志,又有方技傳,多言 **禨祥。今省二志,存方技傳云。** 可鑒乎哉!然則歷代方技何修而可以善其事乎?曰:「人而無恆,不可以作巫醫。」 漢嚴君 亟 |稱焉。然而歷代之君臣,一惑於其言,害於而國,凶於而家,靡不有之。|宋景德、**宣和之世,**

爲司戶參軍,留門下。守貞每出征,修己必從,軍中占候多中。奏試大理評事,賜緋。漢 乾
就
中,
守貞鎭
清津,
陰懷異志,
修已
屢以禍
福諭之,
不聽,
遂辭疾歸鄉里。
明年,
守貞果 叛,幕吏多伏誅,獨修己得免。 朝廷知其能,召爲翰林天文。 趙修己,開封浚儀人,少精天文推步之學。晉天福中,李守貞掌禁軍,領滑州節制,表

殿中省尚食奉御,賜金紫。改鴻臚少卿,遷司天監。顯德中,累加檢校戶部尚書。 則明公之命,是天所與也。天與不取,悔何可追!」周祖然之,遂決渡河之計。 受戮,公位極將相,居功高不賞之地,雖欲殺身成仁,何益於事?不如引兵南渡,詣闕自訴, 周祖曰:「釁發蕭牆,禍難斯作。公摊全師,臨巨屏,臣節方立,忠誠見疑。今幼主信讒,大臣 周祖鎭鄴,奏參軍謀。會隱帝誅楊邠、史弘肇等,且將害周祖,修己知天命所在,密謂 即位,以爲 **嘗遣副翰**

林學士承旨陶穀,以御衣、金帶、戰馬、器幣賜吳越錢俶。

宋初,遷太府卿,判監事,上章告老,優詔不許。建隆三年卒,年七十一。

痛。 即位,擢爲司天夏官正,出補許田令,召爲國子尚書博士,判司天監事。 悟,後當爲人師。」又嘗夢人持巨鑑,星宿燦然滿中,剖腹納之,覺而汗洽, 月餘,心胸猶覺 因留意星曆、占候之學,深究其旨。晉末之亂,避地太原,漢祖時領節制,辟置幕府。 王處訥,河南洛陽人。少時有老叟至舍,煑洛河石如麵,令處訥食之,且曰:「汝性聰

以劉氏祚短事。對曰:「人君未得位,嘗務寬大,旣得位,卽思復讎。漢氏據中土,承正統, 祚不長。」周祖蹶然太息。適發兵圍漢大臣蘇逢吉、劉銖等家,待旦將行孥戮,遽命止之。 以歷數推之,其載祀猶永。第以高祖得位之後,多報讎殺人及夷人之族,結怨天下,所以運 逢吉已自殺,止誅劉銖,餘悉全活。 周祖嘗與處訥同事漢祖,雅相厚善,及自鄴舉兵入汴,遽命訪求處訥,得之甚喜,因問

<u>沃曆以獻,頗爲精密,處訥私謂|朴曰:「此曆且可用,不久卽差矣。」因指以示朴,朴深然之。</u> 廣順中,遷司天少監。 世宗以舊歷差舛,俾處訥詳定。曆成未上,會樞密使王朴作欽

國初,改司農少卿,並判司天事。 六年,又上新曆二十卷,拜司天監。歲餘卒,年六十八。子 爲應天曆。 至 建隆二年,以欽天曆謬誤,詔處訥別造新曆。 處訥又以漏刻無準,重定水秤及候中星、分五鼓時刻。 經三年而成,爲六卷,太祖自製序,命 俄遷少府少監。 太平興

熙元。

功。」且言:「昭益能專其業,人鮮及也。」 伏其精一。上常對宰相言及曆算事,曰:「曆象,陰陽家流之大者,以推步天道,平秩人時爲 眞拜少監。 初,上所修儀天曆,秋官正趙昭益言其二年後必差,又熒惑度數稍謬,後果驗。熙元頗 熙元,幼習父業,開寶中,補司天曆算。 景德中,同判監事。東封,隨經度制置使詣祠所,禮畢,授權知司天少監。祠汾陰, 奉詔於後苑纘陰陽事十卷上之,眞宗爲製序,賜名靈臺祕要,及作詩紀之。 端拱初,改監丞,累遷太子洗馬兼春官正,加殿

致仕。 玉清昭應宮成,以祗事之勤,授司天監。 天禧二年卒,年五十八。 坐擇日差謬,降爲少監。以目疾,改將作監,

推戴,訓皆預白其事。旣受禪,擢爲翰林天文,尋加銀青光祿大夫、檢校工部尚書。年七十餘 旭 北征,訓視日上復有一日,久相摩盪,指謂楚昭輔曰:「此天命也。」夕次陳橋,太祖爲六師 苗訓,河中人,善天文占候之術。仕周爲殿前散員右第一直散指揮使。 顯德末,從太

。子守信。

與明律曆者同校定,賜號乾元曆,頗爲精密,皆優賜束帛。確熙中,遷冬官正。端拱初,改 中,以應天曆小差,韶與多官正吳昭素、主簿劉內眞造新曆。及成,太宗命衞尉少卿元象宗中,以應天曆小差,韶與多官正吳昭素、主簿劉內眞造新曆。及成,太宗命衞尉少卿元象宗 太子洗馬、判司天監。 淳化二年,守信上言:「正月一日爲一歲之首。每月八日,天帝下巡 極刑事。」下有司議行。未幾,轉殿中丞、權少監事,立本品之下,俄賜金紫。 主錄人之善惡。又春戊寅、夏甲午、秋戊申、冬甲子爲天赦日,及上慶誕日,皆不可以斷 人世,察善惡。太歲日爲歲星之精,人君之象。三元日,上元天官,中元地官,下元水官,各 守信,少習父業,補司天曆算。尋授江安縣主簿,改司天臺主簿,知算造。太平興國 <u>|</u>至道二年,上以梁、瘫宿兵,彌歲凶歉,心憂之,令宰相召|守信問以天道咎證所在。|守

列傳第二百二十 方技上

犯、彗星見及水神太一臨井鬼之間,屬湊、瘫分及梁、益之地,民罹其災。水神太一來歲入燕

信奏曰:「臣仰瞻玄象,及推驗太一經歷宮分,其|荆楚、吳越、|交廣並皆安寧。 自來五緯陵

年四十六。子舜卿,爲國子博士。 分,歲在房心,正當京都之地,自茲朝野有慶。」詔付史館。 明年,眞授少監。 咸平三年卒,

白太宗。太宗命德玄以人防守之,將聞于太祖。及詰旦,太宗入謁,果受遺踐阼。韶以赦 恐甚,詰其所以來,留曰:「明日乃晉王利見之辰,留故以相告。」德玄惶駭,止韶一室,遽入 與太宗親吏程德玄善,德玄每戒韶不令及門。九年冬十月十九日,旣夕,韶忽造德玄,德玄 化五年,坐事,出爲博興令,移長山令。秩滿歸鄉里,卒於家。 子中允、祕書丞,出爲平恩令。歸朝復守舊任,與楚芝蘭同判司天監事,就遷太常博士。 獲免。 踰月, 起家爲司天監主簿。 太平興國二年, 擢太僕寺丞, 改祕書省著作佐郎。 馬韶,趙州平棘人,習天文三式。開寶中,太宗以晉王尹京,申嚴私習天文之禁,韶素 歷太

朝 <u></u>楚芝蘭,汝州襄城人。 初習三禮,忽自言遇有道之士,敎以符天、六壬、遁甲之術。 屬

宮四時祭祀儀及醮法。宮成,特遷尙書工部員外郎,賜五品服。淳化初,與馬韶同判監,俱 謁,有司便於祗事,何爲遠趨江外,以蘇臺爲吳分乎?」輿論不能奪,遂從其議,仍令同定本 帝王之都,百神所集。且今京城東南一舍地名蘇村,若於此爲五 坐事,芝蘭出爲遂平令。卒,年六十。錄其子繼芳爲城父縣主簿。 天春官正、判司天監事。占者言五福太一臨吳分,當於蘇州建太一祠。 一福太一建宮,萬乘可以親 芝蘭獨上言:「京師

|至道元年渾儀成,於司天監築臺置之,賜顯符雜綵五十匹。| 顯符上其法要十卷,序之云: 準,陰陽曆數之元,自古聖帝明王莫不用是精詳天象,預知差忒。或鑄以銅,或飾以 羲氏、和氏立渾儀,定曆象日月星辰,欽授民時,使知緩急。降及虞舜,則璇璣玉衡以 顯符專渾天之學,淳化初,表請造銅渾儀、候儀。詔給用度,俾顯符規度,擇匠鑄之。 韓顯符,不知何許人。少習三式,善祭視辰象,補司天監生,遷靈臺郎,累加司天冬官 玉,置之內庭,遣日官近臣同窺測焉。 齊七政。通近又云:「撫渾儀,觀天道,萬象不足以爲多。」是知渾儀者,實天地造化之 伏羲氏立渾儀,測北極高下,量日影短長, 定南北東西, 觀星間廣狹。 帝堯卽位,

列

衆星之次舍遠近,占逆順,明吉凶,然後修福俾順其度,省事以退其災,悉由斯器驗之。 墜,爰造渾儀,漏刻星躔,曉然易辨。若人目窺於下,則銅管運於上,七曜之進退盈縮 於一日,不深圖於久要,致使天象無準,曆算漸差,占候不同,盈虛難定。 今,明曆象之玄,知渾天之奧者,近十餘朝,考而論之,臻至妙者不過四五; 自 伏羲 甲寅年至皇朝大中祥符三年庚戌歲,積三千八百九十七年。 陛下講 自餘 五帝之後訖 徒誇 成水廢 重

本銅 占驗。 貞觀 又有梁令瓚造渾儀木式,一行謂其精密,思出古人,遂以銅鑄。今文德殿鼓樓下有古 驗不能究得失。 渾儀 初,淳風又言前代渾儀得失之差,因令銅鑄。七年,太宗起凝暉閣於禁中,俾侍臣 昔漢洛下閎修渾儀,測太初曆,云:「後五百年必當 旣在宮掖,人莫得見,後失其處所。 一,制極疎略,不可施用。且曆象之作,非渾儀無以考眞僞;算造之士,非占 渾儀之成,則司天歲上細行曆,益可致其詳密。 玄宗命沙門一行修大統曆, 蓋以渾儀爲證 重製。」至唐李淳風,果合前契。

其制 有九,事具天文志。 自是顯符專測驗渾儀,累加春官正,又轉太子洗馬

等參驗之。 次子保章正承規見知算造,又主簿杜貽範、保章正 、中祥符三年,詔顯符擇監官或子孫可以授渾儀法者。 顯符後改殿中丞兼翰林天文。六年卒,年七十四。 一楊惟德皆可傳其學。 顯符言長子監生 又詔監丞丁文泰嗣其事焉 詔 承矩 顯符與貽範 善祭躔

列 傳 第 二百二十 方 技 上

簿。 稍遷監丞,賜緋魚,隸翰林天文院。確熙二年,廷試中選者二十六人,而序爲之首,命 史序字正倫,京兆人。善推步曆算,太平興國中,補司天學生。太宗親較試,擢爲主

知算造,又知監事。

行去火尺餘。此國家欽崇天道,聖德所感也。」 北,有若相避,遂不相犯。」序又言:「木、火、金三星初夜在午,木在東,火在中,金最西,漸北 淳化三年,司天鄭昭宴言:「臣測金、火行度須有相犯。 今驗之天,而火行漸南,金度漸

書爲十二卷以獻,改殿中丞,賜金紫,俄權監事。 三年卒,年七十六。序愼密勤職,在監三十年,未嘗有過,衆頗稱之。 序後累遷夏官正、河西、環慶二路隨軍轉運、太子洗馬。修儀天曆上之,又嘗纂天文曆 景德二年遷權知少監,大中祥符初卽眞。

郎。 中和 周克明字昭文。 中, 僖宗在蜀,傑上書言治亂萬餘言。 曾祖德扶,唐司農卿。 祖傑,開成中進士,解褐獲嘉尉,歷弘文館校書 擢水部員外郎,三遷司農少卿。 一三五〇三 傑精於曆

謝病不 嶺表。 父也 常少卿,卒,年九十餘。 算,嘗以大衍曆數有差, 以梁貞明三年僭號,至開寶四年國滅,止五十五 天文占之,惟嶺南 「卦有二土,土數 崩 劉隱素聞其名,每令占候天文災變。 襲襲位,彊起之,令知司天監事,因問國祚脩短。 **企**五, 可以避地, 成於十,二五相比,以歲言之,當五百五十。」虁大喜,賞賚 傑生茂元,亦世其學,事龑至司天少監,歸宋授監丞而卒,卽克明之 因敷衍其法,著極衍二十四篇, 乃遣其弟鼎求爲封州錄事參軍。傑,天復中亦棄官攜家南適 傑自以年老,嘗策名中朝,恥以星曆事僭偽,乃 年。 蓋傑舉成數以避害爾。 以究天地之數。時天下方亂, 傑以周易筮之,得此之復, 大有中, (甚厚。 |傑以 遷太

以安天下心。」上嘉之,即從其請。 黃,其光煌煌然,所見之國大昌,是德星也。 兩朝國史,其天文律曆事,命克明參之。大中祥符九年,坐本監擇日差互,例降爲洗馬 爲兵凶之兆。 所著文十編,召試中書,賜同進士出身。 寶中授司天六壬,改臺主簿,轉監丞,五遷春官正。 克明精於數術,凡律曆、天官、五行、讖緯及三式、風雲、龜筮之書,靡不究其指要。 克明時使嶺麦,及還,亟請對,言:「臣按天文錄、荆州占,其星 拜太子洗馬、殿 三年,有大星出氐西,衆莫能 臣在塗聞中外之人頗惑其 中丞,皆兼翰林天文,又權 克明頗修詞藻,喜藏書。 辨; 事, 或言 名日 願許文武 判 景德初,嘗獻 監 周伯 國 皇 l',其色 妖星, 屬修

之職,頗勤愼,凡奏對必據經盡言。及卒,上頗悼惜,遣內侍諭其壻直龍圖閣馮元,令主喪 象,深可畏也。 天禧元年夏,火犯靈臺,克明語所親曰:「去歲太白犯靈臺,掌曆者悉被降譴,上天垂 今熒惑又犯之,吾其不起乎!」八月,疽發背,卒,年六十四。 克明久居司天

舊,采碑誌,孳孳著撰,裁十數卷,書未成而卒。 初,諸僭國皆有纂錄,獨嶺南闕焉。惟胡賓王、胡元興二家纂述,皆不之備。 克明訪者

事,賜賻甚厚。

十卷、論候十卷、今體治世集二十卷。 劉翰,滄州臨津人。 世習醫業,初攝護國軍節度巡官。 世宗嘉之,命爲翰林醫官,其書付史館,再加衞尉寺 周顯德初,詣闕獻經用方書三

在藩邸有疾,命翰與馬志視之。 自後,又詔諸州訪醫術優長者籍其名,仍量賜裝錢,所在廚傳給食,遣詣闕。開寶五年,太宗 技之士必精練。 太祖 北征,命翰從行。 乾德初,令太常寺考較翰林醫官藝術,以謝爲優,絀其業不精者二十六人。 建隆初,加朝散大夫、鴻臚寺丞。 及愈,轉尙藥奉御,賜銀器、緡錢、鞍勒馬 時太祖求治,事皆覈實,故方

列

四 神農本經三百六十種, 種 了,翰等又參定新附一百三十三種。旣成,詔翰林學士中書舍人李昉、戶部員外郞 被 紹詳 定唐本草,翰與道士馬志、醫官霍煦、 名醫錄一百八十二種, 唐本先附 、張素、 吳復珪、王光祐 百一十四 [種,有 陳昭 名 無 用 遇 同議 知 百 制 九 誥 +

、左司員外郎知制

誥

扈蒙詳覆畢

上之。

助等 序之 日

錄,互爲編纂。 爲之注釋,列爲七卷,南國行焉。 同; 舊注 漏 三墳之書, 缺 新注,其文互 則補之行言, 神農預其 至梁陶弘景乃以別錄參其本經,朱墨雜書,時謂 陶氏誤說則證之。 闕。 (1) 非聖主撫大同之運,永無疆之休,其何以改 逮乎有唐,別加參校,增藥餘八百味,添注爲二 百藥旣辨,本草序其錄。舊經三卷,世所流傳。名醫別 然而載歷年祀, 又踰 四百,朱字墨字, 明白。 而 丽 E 又考彼功用 之 無本得 一十卷

移附 本,或傳效於醫家,參而較之,辨其臧否。 腸、蘩蔞,陸英、蒴藋 由 今移附冤頭骨之下; 蟲 魚部 於 乃 命 獸 名 盡考傳誤, 而 移焉; 胡桐淚,改從於木類 橘柚,附於果實: 一,以類 刊爲定本。類例非允,從而革焉。至如筆頭灰,冤毫也,而 半天河、地漿、皆水也,亦在草部, 相 似, 從而 ; 紫鑛, 附之。 食鹽,附於 至如突屈白,舊說灰類,今是木根; 仍採陳藏器 亦木也, 光鹽; 自玉 拾遺、李含光音義, 生薑、乾薑 今移附土石類之間 石 品而 改焉; ,同歸一 伏翼 或窮源 類 天麻根 實禽 敗 在 至 車部 鼓 一於鷄 也

解似赤箭,今又全異。 去非取是,特立新條。 自餘刊正,不可悉數。

注,詳其解釋,審其形性。 義旣判定,理亦詳明。今以新舊藥合九百八十三種,并目錄二十一卷,廣頒天下,傳而 下採衆議,定爲印板。 證謬誤而辨之者,署爲今注;考文意而述之者,又爲今按。 乃以白字爲神農所說,墨字爲名醫所傳,唐附今附,各加顯

行:

供初,起爲尙藥奉御。 淳化元年,復爲醫官使。 卒,年七十二。 二年,滑州劉遇疾,韶翰馳往視之。 翰還,言遇必瘳,旣而卽死,坐責授和州團 翰後加檢校工部員外郎。太平興國四年,命爲翰林醫官使,再加檢校戶部郎中。 練副使。 雍 熙

太平興國初,詔歸俗,命爲尚藥奉御,三遷至翰林醫官使。三年,吳越遣子惟濬入朝, 王懷隱,宋州睢陽人。初爲道士,住京城建隆觀,善醫診。 太宗尹京,懷隱以湯劑祗

惟濬被疾,詔懷隱視之。

具家傳經驗方以獻,又萬餘首,命懷隱與副使王祐鄭奇、醫官陳昭遇參對編類。 初,太宗在藩邸,暇日多留意醫術,藏名方千餘首,皆嘗有驗者。至是,詔翰林醫官院各 每部以隋

上

列

太醫令巢元方病源候論冠其首,而方藥次之,成一百卷。 太宗御製序,賜名曰太平聖惠方,

仍令鏤板 · 頒行天下,諸州各置醫博士掌之。 懷隱後數年 卒。

昭遇本嶺南人,醫術尤精驗,初爲醫官,領温水主簿,後加光祿寺丞,賜金紫。

洛陽,習經方名藥之術,又以授二子自正、自化。 趙自化,本德州平原人。高祖常,爲景州刺史,後舉家陷契丹。父知嵓脫身南歸,寓 周顯德中, 偕來京師, 悉以醫術稱。 居

卒,自正試方技,補翰林醫學。

官副 自化怪其色變,爲切脈曰:「君將死矣。」不數日,適果卒。 使。 會秦國長公主疾,有薦自化診候者,疾愈, 時召陳州隱士萬適至,館于自化家。 會以適補愼縣主簿,適素彊力無疾,詔 表爲醫學,再加尙藥奉御。 淳化五 年,授醫 下日

繼恩就御史府鞫之,皆無狀,斬元輔於都市。 所得,心銜之。 至道中,有布衣鄭元輔者,嘗依自化之姻吏部令史張崇敏家。 乃詣檢上書,告自化 漏泄禁中語及指斥、非所宜言等 自化坐交遊非類,黜爲郢州 元輔 事。 時從自化丐索, 太宗 團 練 副 初甚 駭,命王 未幾, 無

復舊職。

咸平三年,加正使。

年,復舊官。 居太醫之長,不當復爲請求,令樞密院召自化戒之。癃王薨,坐診治無狀,降爲副使。 景德初,雍王元份洎晉國長公主並上言:自化藥餌有功,請加使秩,領遙郡。 是多卒,年五十七。遺表以所撰四時養頤錄爲獻,眞宗改名調膳攝生圖,仍爲 上以自化

方技至貴仕者,爲名醫顯秩傳三卷。 自化頗喜爲篇什,其貶郢州也,有漢沔詩集五卷,宋白、李若拙爲之序。 又嘗纘自古以 製序。

既愈,加尙藥 疾,文智診療獲愈,御卿表薦之,賜緋,加光祿寺丞。 端拱初,授少府監主簿,逾年轉醫官,加少府監丞。 主客員外郎。 奉御,賜金紫。 大中祥符五年卒,年六十。 六年,直翰林醫官院。 嘗隸丼代部署。 淳化五年,府州折御卿 東封,轉醫官副使。祀汾陰,又加檢校 咸平三年, 明德太后不豫, 文智侍醫,

自建隆以來,近臣、皇親、諸大校有疾,必遣內侍挾醫療視,羣臣中有特被眷遇者亦如 列 傳 第 = 百二十 方 技 上 三五〇九

外、貢院鎖宿,皆令醫官隨之。京城四面,分遣翰林祗候療視將士。 內侍分詣城門寺院散給軍民。 其有效者, 或遷秩、賜服色。 上每便坐閱兵,有被金瘡者,即令醫官處療 邊郡屯帥多遣醫官、醫學隨行,三年一代。 暑月,即令醫官合藥,與 出師及使境

咸平中,有軍士嘗中流矢,自頰貫耳,衆醫不能取,醫官閻文顯以藥傅之,信宿而鏃出。

上嘉其能,命賜緋。

幾三十年。景德初,上遣贇視長,贇傅以藥出之,步履如故。退請見,自陳感激,願得死所, 又極稱贇之妙。特賜贇白金,遷醫官。 又有醫學劉贇亦善此術。 天武右廂都指揮使韓晸從太祖征晉陽,弩矢貫左髀,鏃不出

以方藥謁見。咸平初,補右街首座,累轉左街副僧錄。洪藴尤工診切,每先歲時言人生死, 方袍,號廣利大師。太平興國中,詔購醫方,洪蘊錄古方數十以獻。」眞宗在蜀邸〔三〕,洪蘊嘗 無不應。湯劑精至,貴戚大臣有疾者,多詔遣診療。景德元年卒,年六十八。 三,詣郡之開福寺沙門智岊,求出家,習方技之書,後遊京師,以醫術知名。 沙門洪蘊,本姓藍,潭州長沙人。母禽,初以無子,專誦佛經,旣而有娠,生洪蘊。 太祖召見,賜紫 年十

二年,以雍王元份久被疾,召赴闕,至則元份已薨。 又有廬山僧法堅,亦以善醫著名,久遊京師,嘗賜紫方袍,號廣濟大師,後還山。 法堅復歸山而卒。

丹主兀欲立,求有名稱僧道加以恩命,惟澄隱不受。當時公卿自馮道、李崧、和凝而下,皆 嘗下詔召之,又令宰相馮道致書諭旨,歷淸泰、天福中繼有聘命,並辭疾不至。 在鎭陽,日造其室與談宴,各賦詩以贈。 蘇澄隱字棲眞,眞定人。爲道士,住龍興觀,得養生之術,年八十餘不衰老。後唐明宗 周廣順、顯德中,詔存問之。 開運末,契

得此道也。」上大悅,賜紫衣一襲、銀器五百兩、帛五百匹。年僅百歲而卒。 壯,善養生者也。」因問其術,對曰:「臣之養生,不過精思練氣爾,帝王養生卽異於是。 老 也。」上察其意,亦不彊之,賜茶百斤、絹二百匹。又幸其觀,問曰:「師年踰八十而氣貌益 道之士居之,師累辭召命,豈懷土耶?」對曰:「大梁帝宅,浩穰繁會,非林泉之士所可寄迹 子曰:『我無爲而民自化,我無欲而民自正。』無爲無欲,凝神太和,昔黃帝、唐堯享國永年, 太祖征太原還,駐蹕鎮陽,召見行宮,命中使掖升殿,謂之曰:「京師作建隆觀,思得有

年百餘歲,康強無疾。 居,與摶齊名。 丁少微,亳州眞源人。爲道士,持齋戒,奉科儀尤爲精至。 少微志尙淸潔,摶嗜酒適性,其道不同,未嘗相往還。 始, 卜居山上,起壇場淨室,通夕朝禮,五十餘年未嘗稍懈。 嘗隱華山潼谷,密邇陳摶所 少微善服氣,多餌藥,

病,飲食如故。 其事,太宗召赴闕,親問之,賜道士服,改名自然,賚錢三十萬。月餘遣還,住靑華 觀,許爲道士。後夢一人狀貌魁偉,綸巾素袍,鬢髮班白,自云姓陰,引之登高 命內侍武永全召至闕下,屢得對,賜紫衣,改青華觀日延禧。 國三年,召赴闕,以金丹、巨勝、南芝、玄芝爲獻。 人,皆不能識。 **食氣卽嘔,惟生果淸泉而已。歲餘,復夢向見老人,敎以篆書數百字,寤悉能記。** 有道氣,吾將敎汝辟穀之法。」乃出青柏枝令啗,夢中食之。及覺,遂不食,神氣淸爽,每聞火 趙自然,太平繁昌人,家荻港旁,以鬻茗爲業,本名王九。始十三,疾甚,父抱詣青華 或云:「此非篆也,乃道家符籙耳。」嘗爲元道歌,言修練之要。 大中祥符二年,詔曰:「如聞自然頗精修養之術。」委發轉使楊覃訪其行迹, 留數月,遣還山。 自然以母老求還侍養,許之。 七年多卒。 山,謂曰:「汝 知州 觀 王洞 寫 以示 後因

授以醫術救人。七年,賜名自凊,度爲道士,居上凊宮。所傳藥能愈大風疾,民多求之,皆 大中祥符中,又有鄭榮者,本禁軍,戍壁州還,夜遇神人謂曰:「汝有道氣,勿火食。」因

刺臂血和餅給焉。

間亦飲酒,貌如嬰兒。素不習文墨,口占辭句,頗成篇詠,有道家之趣。遂不親農事,野行 言其故。凡經夕,若俄頃。自是不喜熟食,凡火化者未嘗歷口。茹甘菊、柏葉、果實、井泉, 煙,其香可悅。俄至山崖絕頂,見數人會飲,音樂交奏,與人間無異。抱一駭而不測。 太一宮,與人言多養生事焉。 檢使過其下,聞樂聲,疑羣盜歡聚,集村民梯崖而上。至則無所覩,抱一獨在,援以下之,具 又有|秦州民家子|趙抱一者,常牧牛田間。一夕,有叩門召之者,以杖引行,杖端有氣如 大中祥符四年,至京師,循丱角,詔賜名,度爲道士。自是間歲或一至京師,常令居 會巡

校勘記

- 神農 預其 「神」字原脫,據李時珍本草綱目所引開寶本草序及孔安國尚書序補。
- 三 本經漏缺則補之 「缺」原作「切」,據開寶本草序改
- 眞宗 在 蜀 迅 按 眞 宗未即位前,於太平興國三年封韓王,端拱元年封襄王,淳化五 年進封壽王

列傳

第

百

=

校勘記

2

宋史卷四百六十二

列傳第二百二十一

方技下

林靈素 龐安時 賀蘭棲眞 皇甫坦 錢乙 柴通玄 僧智緣 王克明 甄棲眞 郭天信 莎衣道人 楚衍 魏漢津 僧志言 孫守榮 王老志 僧懷丙 王仔昔 許希

其暫別林谷,來儀闕庭,必副招延,無憚登涉。今遣入內內品李懷贇召師赴闕。」旣至,眞宗 靜以臨民,思得有道之人,訪以無爲之理。久懷上士,欲覿眞風,爰命使車,往申禮聘。 年,詔曰:「師棲身巖壑, 抗志煙霞, 觀心衆妙之門, 脫屣浮雲之外。 股奉希夷而爲教, 法清 酒,遊市鄽間,能啖肉至數斤。始居嵩山紫虛觀,後徙濟源奉仙觀,張齊賢與之善。景德二 賀蘭棲眞,不知何許人。爲道士,自言百歲。善服氣,不憚寒暑,往往不食;或時縱

列

傳

第二百二十一

方技下

作二韻詩賜之,號宗玄大師,賚以紫服、白金、茶、帛、香、藥,特蠲觀之田 幾,求還舊居。 大中祥符三年卒,時大雪,經三日,頂猶熱,人多異之。 租,度其侍者。 未

修身愼行爲說。 及所書道德經二碑。上作二韻詩賜之,丼賚以茶、藥、束帛。詔爲修道院,蠲其田租,度弟子 末 一人。明年春,通玄作遺表,自稱羅山太一洞主,遣弟子張守元、李守一詣闕,以龜鶴爲獻 事 ,歷歷可聽。太宗召至闕下,懇求歸本觀。眞宗卽位,屢來京師。 柴通玄字又玄,陝州閿鄉人。爲道士於承天觀。 祀汾陰,召至行在,命坐,問以無爲之要。所居觀即唐軒遊宮,有明皇詩石 年百餘歲,善辟穀長嘯,唯飲酒。 召對,語無文飾,多以 言 唐

號 金帛爲報,輒拒之。景德中,萬安太后不豫,驛召寧赴闕,未至而后崩。 頗驗,居華山王刁巖踰二十年,多夏常衣皮裘。 自給。 又召官僚士庶言生死之要。 正晦先生。上並作詩爲賜,加以茶、藥、繒帛。 時又召河中草澤劉巽、華山隱士鄭隱、敷水隱士李寧。 授大理評事致仕,賜綠袍、笏、銀帶。 夜分,盥濯,然香庭中,望闕而坐,遲明卒。 隱以經術爲業,遇道士傳辟穀鍊氣之法, 獨隱辭賜物不受。 寧精於藥術,老而 |異年七十餘,以經傳講授, 不衰, 常以藥施 大中祥符四年,賜 人,人以 修 躬耕

列傳第二百二十一 方技下

京師,因入建隆觀爲道士。 **敵精,以追虛名,無益也。」遂棄其業,讀道家書以自樂。** 棲眞字道淵,單州單父人。博涉經傳,長於詩賦。 周歷四方,以藥術濟人,不取其報。 初訪道於牢山 應進士舉,不中第,歎曰:「勞神 祥符中,寓居晉州,性和靜 華蓋 先生, 久之出遊

無所好惡,晉人愛之,以爲紫極宮主。

甃殯室。 童顏,攀高躡危,輕若飛舉。 及歲久,形如生,衆始驚,傳以爲尸解。 也。」因授鍊形養元之訣,且曰:「得道如反掌,第行之惟艱,汝勉之。」棲眞行之二三年,漸 年七十有五,遇人,或以爲許元陽,語之曰:「汝風神秀異,有如李筌。 室成,不食一月,與平居所知敍別,以十二月二日衣紙衣臥磚場卒。 乾興元年秋,謂其徒曰:「此歲之暮,吾當逝矣。」即宮西北隅自 雖老矣,尚可仙 人未之奇也。 反

棲眞自號神光子,與隱人海蟾子者以詩往還。 論養生祕術,目曰還金篇,凡兩卷。

楚衍,開封 胙城 少通 四聲字母,里人柳曜師事衍,里中以先生目之。 | 行於九章

與掌曆官宋行古等九人製崇天曆。進司天監丞,入隸翰林天文。 古、綴術、海島諸算經尤得其妙。明相法及津斯經,善推步、陰陽、星曆之數,間語休咎無不 十二卷。久之,與周琮同管勾司天監。卒,無子,有女亦善算術。 自陳試宣明曆,補司天監學生,遷保章正。天聖初,造新曆,衆推衍明曆數,授靈臺郎, 皇祐中,同造司辰星漏曆

語笑無度,多行市里,褰裳疾趨,舉指畫空,佇立良久;時從屠酤遊,飮啗無所擇。 狂,璲獨曰:「此異人也。」 |言忽造||璲,跪前願爲弟子。||璲見其相貌奇古,直視不瞬,心異之,爲授具戒。 僧志言,自言姓許,壽春人。落髮東京景德寺七俱胝院,事淸璲。 初,璲誦經勤苦,志 然動 止軒昂,

第十三子入繼,衆始悟。大宗正守節請書,言不顧,迫之,得「潤州」字。未幾,守節薨,贈丹 春秋漸高,嗣未立,默遣內侍至三所。三所書有「十三郎」字,人莫測何謂。後英宗以濮王 赴,然莫與交一言者。或陰卜休咎,書紙揮翰甚疾,字體遒壯,初不可曉,其後多驗。仁宗 舟始及岸,遽來取去。仁宗每延入禁中,徑登坐結趺,飯畢遽出,未嘗揖也。王公士庶召卽 人有欲爲齋施,輒先知以至,不召,款門指名取供。温州人林仲方自其家以摩衲來獻,

陽郡王。 見寺童義懷,撫其背曰:「德山、臨濟。」懷旣落髮,住天衣,說法,大爲學者所宗。其

前知多類此。

官隱居番禺。人傳棠與言數以偈頌相寄,萬里間輒數日而達。棠死,亦盛夏身不壞。 都下遇言,忽謂之曰:「非我,汝奈何?」客記其貌,眞引舟者也。 鱠者,幷食之,臨流而吐,化爲小鮮,羣泳而去。 普淨院施浴,夜漏初盡,門扉未啓,方迎佛而浴室有人聲,往視,則||言在焉。 海客遇風且沒,見僧操絚引舶而 與曹州士趙棠善,後棠棄 有具齋薦

眞身塑像置寺中,榜曰顯化禪師。 言將死,作頌,不可曉。已而曰:「我從古始成就,逃多國土,今南國矣。」仁宗遣內侍以 其後善厚者禮之,見額上熒然有光,就視之,得舍利。

既久而中級大柱壞,欲西北傾,他匠莫能爲。懷內度短長,別作柱,命衆工維而上。已而却 衆工,以一介自從,閉戶良久,易柱下,不聞斧鑿聲。 僧懷丙,眞定人。巧思出天性,非學所能至也。眞定構木爲浮圖十三級,勢尤孤絕。

盗鑿鐵,橋遂欹倒,計千夫不能正。 懷丙不役衆工,以術正之,使復故

列

懷丙以二大舟實土,夾牛維之,用大木爲權衡狀鈎牛,徐去其土,舟浮牛出。 河中府浮梁用鐵牛八維之,一牛且數萬斤。 後水暴漲絕梁,牽牛沒于河,募能出之者。 轉運使張燾以

聞,賜紫衣。

尋卒。

乎?」乃請以所得金興扁鵲廟。帝爲築廟于城西隅,封靈應侯。其後廟益完,學醫者歸趨 之,因立太醫局于其旁。 拜謝已,又西嚮拜,帝問其故,對曰:「扁鵲,臣師也。今者非臣之功,殆臣師之賜,安敢忘師 **祈以身試,試之,無所害。遂以鍼進,而帝疾愈。命爲翰林醫官,賜緋衣、銀魚及器幣。** 憂恐。|冀國大長公主薦希,希診曰:「鍼心下包絡之間,可亟愈。」左右爭以爲不可,諸黃門 許希,開封人。以醫爲業,補翰林醫學。 景祐元年,仁宗不豫,侍醫數進藥,不效,人心

|希至殿中省尚藥奉御,卒。著神應鍼經要訣行于世。 錄其子宗道至內殿崇班

魔安時字安常,蘄州蘄水人。兒時能讀書,過目輒記。父,世醫也,授以脈訣。

端,而予參以內經諸書,考究而得其說。審而用之,順而治之,病不得逃矣。」又欲以術告後 疾,著主對集一卷。古今異宜,方術脫遺,備陰陽之變,補仲景論。藥有後出,古所未知,今 等。故定陰陽於喉、手,配覆溢於尺、寸,寓九候於浮沉,分四温於傷寒。此皆扁鵲略開其 者,靡不通貫。嘗曰:「世所謂醫書,予皆見之,惟扁鵲之言深矣。蓋所謂難經者,扁鵲寓術 世,故著難經辨數萬言。觀草木之性與五藏之宜,秩其職任,官其寒熱,班其奇偶,以療百 符節。且察脈之要,莫急於人迎、寸口。是二脈陰陽相應,如兩引繩,陰陽均,則繩之大小 於其書,而言之不詳,意者使後人自求之歟!予之術蓋出於此。以之視淺深,决死生,若合 屈,父大驚,時年猶未冠。已而病聵,乃益讀靈樞、太素、甲乙諸秘書,凡經傳百家之涉其道 曰:「是不足爲也。」獨取黃帝、扁鵲之脈書治之,未久,已能通其說,時出新意,辨詰不可 不能辨,嘗試有功,不可遺也,作本草補遺。

不可爲者,必實告之,不復爲治。活人無數。病家持金帛來謝,不盡取也。 爲人治病,率十愈八九。踵門求診者,爲辟邸舍居之,親視飦粥藥物,必愈而後遣;其

覺腸胃微痛,呻吟間生一男子。其家驚喜,而不知所以然。安時曰:「兒已出胞,而一手誤 在傍舍,邀安時往視之。纔見,卽連呼不死,令其家人以湯温其腰腹,自爲上下拊摩。 **嘗詣舒之桐城,有民家婦孕將產,七日而子不下,百術無所效。**安時之弟子<u>李百全適</u> 孕者

列

一三五二

執母腸不復能脫,故非符藥所能爲。吾隔腹捫兒手所在,鍼其虎口,旣痛卽縮手,所以遽生,

無他術也。」取兒視之,右手虎口鍼痕存焉。其妙如此。

人請自視脈,笑曰:「吾察之審矣。且出入息亦脈也,今胃氣已絕,死矣。」遂屏卻藥餌。 有問以華佗之事者,曰:「術若是,非人所能爲也。 其史之妄乎!」年五十八而疾作,門

數日,與客坐語而卒。

請往迹尋,凡八九反。積數歲,遂迎父以歸,時已三十年矣。鄕人感慨,賦詩詠之。 東之海上不反。乙方三歲,母前死,姑嫁呂氏,哀而收養之,長誨之醫,乃告以家世。卽泣, 如事父,呂沒無嗣,爲收葬行服。 錢乙字仲陽,本吳越王俶支屬,祖從北遷,遂爲鄆州人。父穎善醫,然嗜酒喜游,一旦, 其事|呂

賜金紫。由是公卿宗戚家延致無虛日。 神宗召問黃土所以愈疾狀,對曰:「以土勝水,水得其平,則風自止。」帝悅,擢太醫丞, 乙始以顱頤方著名,至京師視長公主女疾,授翰林醫學。皇子病瘈瘲,乙進黃土湯而

廣親宗子病,診之曰:「此可毋藥而愈。」其幼在傍,指之曰:「是且暴疾驚人,後三日過

本中熱,脾且傷,奈何復燥之。將不得前後溲。」與之石膏湯,王不信,謝去。信宿寖劇,竟 視,心與肝俱受邪。過午者,所用時當更也。」王子病嘔泄,他醫與剛劑, 午,可無恙。」其家恚,不答。明日,幼果發癎甚急,召乙治之,三日愈。問其故,曰:「火色直 加喘焉,乙曰:「是

治。」其人祈哀,強予藥。明日,曰:「吾藥再瀉肝,而不少却;三補肺,而益虚;又加脣白, 法當三日死。今尙能粥,當過期。」居五日而絕。 士病欬,面青而光,氣哽哽。乙曰:「肝乘肺,此逆候也。若秋得之,可治;今春,不可

如言而效。

墮?」已而母子皆得全。又乳婦因悸而病,旣瘉,目張不得瞑。 乙曰:「煑郁李酒飲之使醉, 則 即愈。所以然者,目系內連肝膽,恐則氣結,膽衡不下。郁李能去結,隨酒入膽,結去膽下, 目能瞑矣。」飲之,果驗。 孕婦病,醫言胎且墮。乙曰:「娠者五藏傳養,率六旬乃更。誠能候其月,偏補之,何必

登東 而 :「吾能移之使在末。」因自製藥,日夜飲之。 左手足忽攣不能用,喜曰:「可矣!」所親 山,得茯苓大踰斗。 乙本有羸疾,每自以意治之,而後甚,歎曰:「此所謂周痺也。入藏者死,吾其已夫。」旣 以法噉之盡,由是雖偏廢,而風骨悍堅如全人。以病免歸,不復

出。

年攣痺寖劇,知不可爲,召親戚訣別,易衣待盡,遂卒,年八十二。 書,辨正闕誤。 乙爲方不名一師,於書無不闚,不靳靳守古法。時度越縱舍,卒與法會。 或得異藥,問之,必爲言生出本末、物色、名貌差別之詳,退而考之皆合。末 尤邃本草諸

子,亦何足怪哉!」 無此,安石曰:「昔醫和診晉侯,而知其良臣將死。夫良臣之命乃見於其君之脈,則視父知 咎, 診父之脈而能道其子吉凶, 所言若神, 士大夫爭造之。 王珪與王安石在翰林, 珪疑古 僧智緣,隨州人,善醫。 嘉祐末,召至京師,舍于相國寺。 每察脈,知人貴賤、禍福、休

化,而他族俞龍珂、禹藏訥令支等皆因以書款。 神宗召見,賜白金,遣乘傳而 熙寧中,王韶謀取靑唐,上言蕃族重僧,而僧結吳叱臘主部帳甚衆,請智緣與俱至邊。 [西,遂稱「經略大師」。 韶頗忌惡之,言其撓邊事,召還,以爲右街 智緣有辯口,徑入蕃中,說結吳叱臘歸

首坐,卒。

方技下

門通事舍人,許陪進士徑試大廷,擢秘書省校書郞。 有天下。」 郭 天信字佑之,開封人。以技隸太史局。 既而 即帝位,因得親暱。 不數年,至樞密都承旨、節度觀祭留後。 徽宗爲端王,嘗退朝,天信密遮白曰:「王當 未幾,天信覺已甚,乞還武爵,又從之。 其子中復爲悶

實,令康年選吏發棺驗視焉。 克公復論之,詔貶天信昭化軍節度副使,單州安置, 言,天信先發端,窺伺上旨,動息必報,乃從外庭决之,無不如志。 僧寺,帝始敬畏之,而近侍積不樂,間言浸潤,眷日衰。京黨因是告商英與天信漏泄禁中語 之,且云:「日中有黑子。」帝甚懼,言之不已,原由是黜。 司馬,竄新州,又徙康年使廣東,天信至數月,死。 商英亦欲借左右游談之助,陰與相結,使僧德洪輩道達語言。 政和初,拜定武軍節度使、祐神觀使,頗與聞外朝政事。見蔡京亂國,每託天文以據 京已再相,獨疑天信挾術多能,死未必 命宋康年守單,幾其起居。 張商英方有時望,天信往往稱於內 商英途罷。 商英勸帝節儉,稍裁抑 御史中丞張 再貶 (行軍

龍門,聞水聲,謂人曰:「其下必有玉。」卽脫衣沒水,抱石而出,果玉也。 皇祐中,與房庶俱 魏漢津,本圖黥卒也。自言師事唐仙人李良號「李八百」者,授以鼎樂之法。 嘗過三山

可得 也。 得黃帝、夏禹聲爲律、身爲度之說。謂人主稟賦與衆異,請以帝指三節三寸爲度,定黃鐘之 制作,而京託之於李良云。 以善樂薦 少者,濁聲,陰也,地道也。 而中指之徑圍,則度量權衡所自出也。又云:「聲有太有少。太者,清聲,陽也,天道 而調,萬物可得而理。」當時以爲迂怪,察京獨神之。或言漢津本范鎭之役,稍窺見其 時阮逸方定黍律,不獲用。 中聲在其間,人道也。合三才之道,備陰陽奇偶,然後四序 崇寧初猶在,朝廷方協考鐘律,得召見,獻樂議,

爲京言:「大晟獨得古意什三四爾,他多非古說,異日當以訪任宗堯。」宗堯學於漢津者也。 客劉昺主樂事,論太少之說爲非,將議改作。旣而以樂成久,易之恐動觀聽,遂止。漢津密 大晟樂成。徽宗御大慶殿受羣臣朝賀,加漢津虚和沖顯寶應先生,頒其樂書天下。而京之 於是請先鑄九鼎,次鑄帝坐大鐘及二十四氣鐘。四年三月鼎成,賜號沖顯處土。八月,

典樂,復欲有所建,而爲田爲所奪,語在樂志。 (津曉陰陽數術,多奇中,嘗語所知曰:「不三十年,天下亂矣。」未幾死。 後卽鑄鼎之所建寶成殿,祀黃帝、夏禹、成 京遂召宗堯

至通議大夫、徽猷閣待制。 有 馬賁者,出京之門,在大晟府十三年,方魏、劉、任、田異論時,依違其間,無所質正, 議者咎當時名器之濫如此。

王、周、召而良、漢津

俱配食。

謚漢津爲嘉晟侯。

吾所謂鍾離先生也,予之丹,服之而狂。遂棄妻子,結草廬田間,時爲人言休咎。 王老志,濮州臨泉人(1)。事親以孝聞。爲轉運小吏,不受賂謝。遇異人於丐中,自言

消變者。 禁絕之。 書,初若不可解,後卒應者十八九,故其門如市。|京慮太甚,頗以爲戒,|老志亦謹畏,乃奏 啓讀,乃昔歲秋中與喬、

劉二妃燕好之語也。帝由是稍信之,封爲洞微先生。朝士多從求 政和三年,太僕卿王亶以其名聞。召至京師,館于蔡京第。嘗緘書一封至帝所,徽宗 嘗獻乾坤鑑法,命鑄之。旣成,謂帝與皇后他日皆有難,請時坐鑑下,思所以儆懼

明年,見其師,責以擅處富貴,乃丐歸,未得請,病甚,始許其去。步行出,就居,病已失

歸濮而死。 詔賜金以葬,贈正議大夫。

曰:「恐泄機也。」臟敗,人乃悟。 初,王黼未達時, 父爲臨泉令, 問黼名位所至,即書「太平宰相」四字。 旋以墨塗去之,

未來事。政和中,徽宗召見,賜號沖隱處士。帝以旱禱雨,每遣小黃門持紙求仔昔畫,日又 於外。乃於禁中建圓象徽調閣以貯之。 宮妃療赤目者,用其說一沃,立愈。進封通妙先生,居上淸寶籙宮。獻議九鼎神器不可藏 至三),忽篆符其上,仍細書「焚符湯沃而洗之」。黃門懼不肯受,強之,乃持去。蓋帝默祝爲 王仔昔,洪州人。始學儒,自言遇許遜,得大洞、隱書豁落七元之法,出游嵩山,能道人

浩力最多。 靈素有寵,忌之,陷以事,囚之東太一宮。旋坐言語不遜,下獄死。仔昔之得罪,宦者馮 仔昔資倨傲,又少戆,帝常待以客禮,故其遇巨閹殆若童奴,又欲羣道士皆宗己。及 未死時,書示其徒曰:「上蔡遇冤人。」其後浩南竄,至上蔡被誅。

林靈素,温州人。少從浮屠學,苦其師笞駡,去爲道士。善妖幻,往來淮、泗間,丐食僧

寺,僧寺苦之。

君,陛下是也,既下降于世,其弟號青華帝君者,主東方,攝領之。己乃府仙卿曰褚慧,亦 「天有九霄,而神霄爲最高,其治曰府。 政和末,王老志、王仔昔旣衰,徽宗訪方士於左道錄徐知常,以靈素對。旣見,大言曰: 神霄玉清王者,上帝之長子,主南方,號長生大帝

中、童貫及諸巨閹皆爲之名。 下降佐帝君之治。」又謂察京爲左元仙伯,王黼爲文華吏,盛章、王革爲園苑寶華 貴妃劉氏方有寵, 日九華玉眞安妃。 帝心獨喜其事,賜號通 ·吏, 鄭居

眞達靈先生, 賞賚無算。

惟稍識 學,置郎、大夫十等,有諸殿侍晨、校籍、授經,以擬待制、修撰、直閣。始欲盡廢釋氏以逞前 劍夜降內宮之事,假帝誥、天書、雲篆,務以欺世惑衆。 憾,旣而改其名稱冠 再拜以請。 靡然趨之。 建上清寶籙宮,密連禁省。天下皆建神霄萬壽宮。 五雷法,召呼風霆,間禱雨有小驗而已。令吏民詣宮受神霄祕錄,朝士之嗜進者,亦 所言無殊異, 每設大齋,輒費緡錢數萬,謂之千道會。帝設幄其側,而靈素升高正坐,問者皆 服。 時時雜捷給嘲詼以資媒笑。 其徒美衣玉食, 其說妄誕, 不可究質, 浸浸造爲青華正畫臨壇,及火龍神 **)幾二萬人。遂立道** 實無所能

宣和 所怨,始不樂。 歪 與諸王爭道。 ·初,都城暴水,遣<u>靈</u>素厭勝。 方率其徒步虚城上,役夫爭舉梃將擊之,走而免。 帝知衆 靈素 益尊重,升温州爲應道軍節度,加號元妙先生、金門羽客、沖和殿侍晨,出入呵引, 都人稱曰「道家兩府」。本與道士王允誠共爲怪神,後忌其相軋,毒之死。

|靈素在京師四年,恣橫愈不悛,道遇皇太子弗斂避。 太子入訴,帝怒,以爲太虚大夫,

奏至,循以侍從禮葬焉。 斥還故里, 命江端 本通判温州,幾察之。 端本廉得其居處過制罪,詔徙置楚州而已死。 遺

解以 菴,且繪其像禁中。 之術,坦曰:「先禁諸欲, 殿治太后目疾,立愈。 坦聞。 皇甫坦,蜀之夾江人。 高宗召見, 帝喜,厚賜之,一無所受。 問何以治身, 勿令放逸。 善醫術。 世日:「心無爲則身安,人主無爲則天下治。」引至 丹經萬卷,不如守一。」帝歎服,書「淸靜」二字以名其 顯仁太后苦目疾,國醫不能瘉,詔募他醫,臨安守臣張 令持香禱靑城山,還,復召問以長 生 慈寧

荆南 坦又善相人, 帥李道雅敬坦,坦歲謁道。 嘗相道中女必爲天下母,後果爲光宗后。 隆興初, 道入朝, 高宗、 孝宗問之,皆稱皇甫先生而不

乏乳,餌以粥,遂得脾胃疾,長益甚,醫以爲不可治。 一克明字彥昭,其始饒州樂平人,後徙湖州 烏程縣。 克明白讀難經、素問以求其法,刻意處 紹興、乾道間名醫也。 初生時,母

有以爲非藥之過,過在某事,當隨其事治之。言無不驗。 予之藥。 藥,其病乃愈。 病雖數證,或用一藥以除其本,本除而餘病自去。 始以術行江、淮、入蘇、湖、鍼灸尤精。 診脈有難療者,必沈思得其要, · 士大夫皆自屈與游。 亦有不予藥者,期以某日自安。

徐度聘金,黑鹿谷適爲先排使,待克明厚甚。 時在軍中,全活者幾萬人。子蓋上其功,克明力辭之。 從呂正已使金,金接伴使忽被危疾,克明立起之,却其謝。 灑藥,置安道于上,須臾而蘇。 金使黑鹿谷過姑蘇,病傷寒垂死,克明治之,明日愈。 下之,俄起對食如平常。盧州行司守王安道風禁不語旬日,他醫莫知所爲。克明令熾炭燒地, 視之。時,東家方會食,克明謂秉曰:「吾愈恭人病,使預會可乎?」以半硫圓碾生薑調乳香 魏安行妻風痿十年不起,克明施鍼,而步履如初。 克明訝之,谷乃道其故,由是名聞北方。 胡秉妻病內祕腹脹,號呼踰旬,克明 張子蓋救海州,戰士大疫,克明 及從 後再

卒(夏),年六十七。 川,辟克明,不就。炎怒,劾克明避事,坐貶秩。後遷至額內翰林醫痊局,賜金紫。紹興五年 克明頗知書,好俠尙義,常數千里赴人之急。初試禮部中選,累任醫官。王炎宣撫四

由是遠近異之。 之,衣益敏,以莎緝之。嘗遊妙嚴寺,臨池見影,豁然大悟。 會有瘵者乞醫,命持一草去,旬日而愈。衆翕然傳莎草可以愈疾,求而不得者,或遂不起, 士不中。紹興末,來平江。一日,自外歸,倐若狂者,身衣白襴,晝丐食于市,夜止天慶觀。 久 莎衣道人,姓何氏,淮陽軍朐山人〔至〕。祖執禮,仕至朝議大夫。 道人避亂渡江,嘗舉進 人無貴賤,問休咎罔不奇中。

使者歸奏,帝甚異之,遂賜號通神先生,爲築庵觀中,賜衣數襲,皆不受。好事者強邀入庵, 贄,不言所以。道人見之掉首,吳音曰:「有中國卽有外夷:有日卽有月,不須問。」趣之去。 大笑而出,復於故處。衆日以珍饌餉之,每食于通衢,逮飽卽去。 復大計,累歲未有所屬,后位虛且久,乃焚香默言:「何誠能仙顧,必知朕意。」遂遣中官致 會后及太子薨,帝哀泣,內侍進前勉釋,幷道前夢。帝逎矍然,因遣使召之,不至。帝念恢 孝宗一夕夢莎衣人跣哭來弔者,訊之,曰:「蘇人也。」詰其故,不肯言。帝寤,以語內侍。

位,召之,又不至。慶元六年卒。 人亟起于臥, 搖手瞬目而招之曰:「亟來, 亟來!」是日內侍至平望, 衆益服其神。 帝歲命內侍卽其居設千道齋,合雲水之士,施予優普。一歲,偶踰期, 衆咸訝而請, 光宗即

自是富春子之名大顯,貴人爭延致之。 賀之曰:「作鄕郡者,必君也。」元春初不之信。 寶慶間,遊吳興,聞譙樓鼓角聲,驚曰:「旦夕且有變,土人當有典郡者。」見王元春,卽 越兩月,潘丙作亂,元春以告變功,果典郡。

令占之,曰:·「來日晡時,當有寶物至。」明日,李全果以玉柱斧爲貢。 袖中,詢其事,守榮曰:「此李全詐假布囊二十萬爾。」剝封,果如其說。 池,何得云爾。」 闇者驚異,入白丞相,丞相一見頗喜之。 淮南帥李曾伯薦諸朝。 旣至,謁丞相史嵩之,闍者以晝寢辭。 自是數出入相府。 守榮日:「丞相方釣魚園 嵩之又嘗得李全檄藏 日, 庭鵲噪,

終乎 士大夫咸詢履歷,守榮不盡答。 」後爲嵩之所忌,誣以他罪,貶死遠郡。 私謂所知曰:「吾以音推諸朝紳, 互有贏縮, 宋祿其殆

校勘記

下文同。

濮州臨泉人 按本書卷八五地理志濮州領臨濮縣而無臨泉縣, 疑此處「臨泉」乃「臨濮」之誤。

(三) 求仔昔畫日又至 「畫」,疑「書」、「一」兩字合刻之誤。長編紀事本末卷一二七作:「求任昔書,皆

(三) 盧州 宋無「盧州」,疑此誤。 薦雨也。 一日中使又至,出紙求書……。」

(国) 紹興五年卒 卷三六九張子蓋傳,子蓋救海州在紹興三十二年。疑此有誤。 按上文,克明爲「紹興、乾道間名醫」,克明又曾參與張子蓋救海州之役,據本書

(吾) 淮陽軍朐山人 按本書卷八八地理志,朐山為淮南東路海州屬縣,不屬淮陽軍。

宋史卷四百六十三

列傳第二百二十二

外戚上

杜審琦 弟審瓊 審肇 審進 從子彦圭 彦鈞 孫守元 曾孫惟序 賀今圖

孫永年 楊重進附 馬季良附 王繼勳 郭崇仁 劉知信 楊景宗 子承宗 劉文裕 符惟忠 劉美 子從德 從廣 柴宗慶 張堯佐

英、哲三朝,母后臨朝聽政,而終無外家干政之患,將法度之嚴,禮統之正,有以防閑其過 焉。 歟?抑母后之賢,自有以制其戚里歟?作外戚傳。 宋法待外戚厚,其間有文武才諝,皆擢而用之;怙勢犯法,繩以重刑,亦不少貸。 自 西漢有外戚之禍,歷代鑒之,崇爵厚祿,不畀事權; 然而一失其馭,猶有肺附之變

坊使。 五。 次審肇,次審 審玉前一年卒,年二十二。太祖開國,贈審琦左神武軍大將軍,以其子彥超爲西京作 杜 彥超卒,贈左領軍衞大將軍。 審琦,定州安喜人,昭憲皇太后之兄。太后昆仲五人,審琦最長,其次審玉,次審瓊, 進。 世居常山,以積善聞。 審琦仕後唐,爲義軍指揮使,天成二年卒,年三十

判右 召赴闕。 金吾街仗事。 審瓊,建隆初,授檢校國子祭酒。 太祖爲廢朝三日,發哀成服,贈太保、寧國軍節度使,益 審瓊改 **女左龍武** 四年春,步軍帥王繼勳坐事,詔審瓊兼點檢侍衞步 (軍大將軍,遷右衞大將軍。 二年,拜左領軍衞將軍。三年,與其弟審肇、審進皆 乾德初,領富州 恭僖。 刺史。 軍司 事。 三年,以本官權 是秋,卒,年

番瓊 太傅,妻吳氏陳留郡太夫人。是秋,改葬陪陵,又贈審瓊太師、中書令。 審 瓊性 「醇質,在公畏愼,宿衞勤謹,徼巡京邑,里閈淸肅,人皆稱之。 景德三年春,加贈 子彦圭。

刺 史。 審肇,建隆三年,起家授左武衞上將軍、 開寶二年,改左衞上將軍,仍致仕。三年,起爲右驍衞上將軍,俄出知澶州 檢校左僕射致仕,賜第於京師。乾德初,領 太祖以 維州

官,令致仕,特以潍州刺史月奉優給之。七年,卒,年七十二。太祖廢朝二日,素服發哀,贈 審肇未嘗歷郡務,乃命司封郎中姚恕通判州事,以左右之。 太保、昭信軍節度,諡温肅,遣中使護喪事。 郡,民田罹水害。 太祖怒其不卽時上言,遣使案鞫,遂論恕棄市,審肇冤官歸私第。 景德三年,加贈太傅,妻劉氏京海郡太夫人。 未幾,河大決, 東匯于鄆、濮數 俄 復舊

子彥遵,至南作坊使。

朝,頒賚甚厚。太宗嗣位,加檢校太傅。太平興國二年,會許昌裔刺虢州,捃拾使州闕失事 年,知陝州。三年,就改保義軍節度觀察留後。五年,加本軍節度。 上訴,詔右拾遺字幹〔〕鞫之。幹因上言,請支郡不復隸藩鎭,皆得專達,從之。 審 建隆三年,起家授右神武大將軍,改右羽林大將軍。乾德元年,領賀州刺史。二 太祖郊祀西洛,審進來

不當 進 州 肅 一者年 然。 專 練使周承晉(三、德州刺史孫方進、成州刺史慕容福起皆上言願率所部擊太原。上以審 煩以劇務 三年秋,以審進妻卒,廢朝。十一月郊禮畢,加檢校太尉。 ,不許。五年,來朝。 六年,復歸陝,親王宴餞,供帳甚盛。 ",授右 衞 上將軍,奉給如故。 是歲,契丹寇邊,出師捍禦。上幸大名勞軍,留審進警巡,都邑 其年,就加檢校太師。 四年,上親征河東,審進與嵐 九年夏,上以審進年高,

列傳

儀同 三司。 雍 熙 几 [年,復] 是歲,卒,年七十九。 授靜江軍節度。 上趣駕臨喪,哭之慟,廢朝三日,設次成服,親王公主以下 端拱元年,上親耕籍田,審進預其禮, 恩賜 爾渥, 加開府

並 詣 其第舉哀。 審 進 鎭 於二十餘年,勸農敦本,民庶便之。 贈中書令, 諡恭惠 雖居位節制,無驕矜之色,人推其醇厚。

德三年,追 封京兆郡王,妻趙氏南陽郡太夫人。後贈尚書令。 子彦鈞、彦彬。 彦彬至禮賓副

使而卒。

加領本州防禦使。 瓊、趙延 彦圭, 進率兵屯 起家六宅副使, 中山,坐市竹木矯制発算,責授洛苑使、饒州 從征 太原 遷翰林使。 ,與曹翰、 孫繼業攻城西 開寶五年,領信州刺史。 面 北 征 刺 班 史,裁數日 師,命彦圭與孟玄喆、藥 六年,改領饒州團練使,俄 牽 復。 餘年, 可

春,加贈中書令。是秋,又贈太師 致亡失,坐左 雍熙 中北 遷均州 伐, 命副 團 米信爲幽州 練 副 使。 雍熙 子守元。 西北道行營都部署。 三年,卒于貶所,年五十九,贈歸義軍節 彦圭不容軍 土埔 食, 度。 設陣不整, 景德三年 以

沙州觀察使,

出知

定州

慶、延、 鈴轄。 宣 |使,以彥鈞洎||王延德、王繼恩爲之。 鳳四州。 真宗嗣位,改領潁州防禦使,出知河中府,占謝便坐,求解內使之職,可之。 起家補供奉官、累遷崇儀使。端拱初、加莊宅使、領羅州刺史。 景德中,爲天雄軍 副都部署。 未幾,加領恩州防禦使。 車駕駐澶淵, 爲駕前東面貝冀路副都部署 西鄙用兵,命爲永興軍 淳化四年,特置昭 歷知州、 駐泊

年,復知莫州 天禧元年,卒,贈安化軍節度。錄其子贊文爲供奉官,贊寧爲殿直,孫宗壽爲三班奉職 彦鈞由戚 里進,保位而已。 馬知節爲潁州防禦使,彥鈞換秦州。 會有言政事不舉者,徙西京水南北都巡檢使。 九年,拜密州觀察使,出爲幷代 大中祥符五 副 都部

契丹騎兵攻月城,彥鈞率兵擊走之,以勞優加封邑。

召還,再任河中。

至道 粒鎭定。 將固 守城壁,出兵邀擊,獲生口羊馬,以功加崇儀副使。 三年,領梧州 守元,開寶中,補左班殿直,得侍便殿,帶御器械,遷供奉官、莫州監軍。契丹入邊,與州 頃之屬疾,詔遣其子殿直惟慶挾太醫乘驛診候,旣至而卒,年五十八。 刺史,連爲抖代、鎭、定、 高陽關鈴轄。 未幾,改正使秩。 大中祥符 二年,副趙稹使契丹,復 歷如京、洛苑使。

惟序字舜功,自三班奉 職累遷知惠州、莫州,以供備庫使爲梓夔路鈴轄,徙環慶路〔三〕,

知邠州 慶州 會任 福 敗,以騎兵數千繇懷安路破賊三砦, 斬首數百 級, 獲牛馬千計。

以功領忠州刺史,爲涇原鈴轄,敕巡警邊州。

先以 入朝,爲祁州 聞,徙知滄州,又徙定州。 久之, 改六宅使、 知雄州。 團練使,出知恩州,徙大名府路總管,改乾州 時契丹勒兵燕、薊間,遣使求割地。 再遷東上閣門使、知涇州。 團練使,卒。 改四方 館使、 未至,而惟序購得其草, 知瀛州,復知滄州。

賀令圖, 開封 陳留人。 父懷浦,孝惠皇后兄也,仕軍 中爲散指揮使。 太平興國 初, 出爲

岳州刺史,領兵屯三交。雍熙三年,從楊業北征,死於陣

雅熙二年,領平州刺史,充幽州行營壕砦使,以所部下固安、新城兩縣,克涿州。 令圖 上少謹愿,隸太宗左右,洎卽位,補供奉官,改綾錦副使、知莫州,遷崇儀使、 會父戰死, 知雄州。

起家爲六宅使,領本州團練使,護瀛州屯兵。

先是,合圖握兵邊郡十餘年,恃藩邸舊恩,每歲入奏事, 多言邊塞利害, 及幽薊可取之

狀。 上信之,故有岐溝之舉。 旣而 師敗,議者皆咎其貪功生事。

令圖輕而無謀, 契丹將耶律遜寧號于越者,使諜給令圖曰:「我獲罪本國,且夕願歸南

使君」,令圖嘗爲所紿,意其來降而終獲大功,卽引麾下數十騎逆之。 朝, 衆入寇,大將劉廷讓與戰于君子館,令圖爲先鋒,被圍數重。 無路自拔,幸君侯少留意焉。」令圖不虞其詐,私遺以重錦十兩。 于越傳言軍中「願得見雄州賀 將至其帳數步外,于 是年十二月,于越率

越據床駡曰:「汝常好經度邊事,乃今爰死來邪 令圖與其父首謀北伐, 歲中父子皆陷焉。 」塵左右盡殺其從騎,反縛合圖 令圖時年三十九。 是役也,武州防禦使、 而去。

高陽關部署楊重進死之。

|秘北 殿直 陣。 征,爲右廂排陣使,改武州防禦使、高陽關部署(1)。 年六十五。 都虞候。 重進,太原人。 太平興國初,改龍衛軍都校,領徐州刺 少有膂力,周祖鎭大名,以隸帳下。 史。 廣順. 會契丹兵至, 與之力戰, 遂沒於 從征太原,出爲 初,補衞士。 宋初, 累遷 史。 隨曹 至內

室中,遂生繼勳。 王繼勳,彰德節度饒之子,孝明皇后同母弟也。 及長,美風儀,性兇率無賴。以后故,爲內殿供奉官、都知,溪州刺史。 生時,其母見一人赤髮,狀貌怪異,

列傳

第二

下市白梃,將以相圖。 領彭州防禦使。 隆 都虞侯、權侍衞步軍司 二年,加領恩州 是秋,將討西蜀,命繼勳戒期,將大閱。 、国練使,又改龍捷右廂都指揮使,尋領永州防禦使。 太祖知之,爲出仁瑀密州。俄遷保寧軍節度觀察留後,領虎捷左右廂 事。 繼勳素與大校馬仁瑀不協,陰勒部 四年,收復湖南,改

有 上聞大驚,遣捕斬百餘人,人情始定。時后已崩,上追念后,故不之罪也。 願爲婚者,不須備聘財,但酒炙可也。」繼勳不能諭上旨,縱令掠人子女,京城爲之紛擾。 繼勳所爲多不法。 會新募兵千餘隸雄武,將遣出征,多無妻室,太祖謂繼勳曰:「此必

以失職,常快快,專以臠割奴婢爲樂,前後多被害。 上大駭,命中使就詰之,盡得繼勳所爲不法事。 俄又配流登州,未至,改右監門率府副率。 乾德四年,繼勳復爲部曲所訟,詔中書鞫之。 解兵柄,爲彰國軍留後,奉朝請。 一日,天雨牆壞,羣婢突出,守國門訴 詔削奪官爵,勒歸私第,仍令甲士守 繼勳自

四月至太平興國二年二月,手所殺婢百餘人。乃斬繼勳洛陽市, 而棺其骨棄野外。女儈及鬻棺者出入其門不絕,洛民苦之而不敢告。太宗在藩邸,頗聞其 及卽位,人有訴者,命戶部員外郎、知雜事雷德驤乘傳往鞫之。 開寶三年,命分司西京。繼勳殘暴愈甚,強市民家子女備給使,小不如意,卽殺食之, 及爲彊市子女者女僧八 繼勳具伏,自開實六年

人、男子三人。長壽寺僧廣惠常與繼勳同食人肉,令折其脛而斬之。洛民稱快。

其後家寓西洛潁陽,孫惟德不肖,不能自立,丐食以給。 真宗聞而憫之,授惟德汝州司

士參軍。

寶三年十月,卒。太祖廢朝發哀,追封齊國太夫人,陪葬安陵,贈遷太保。 暉禦邊有功,早卒。 劉知信字至誠,邢州人。父遷,晉天福末鳳翔帳前軍使,改滑州奉國軍校,從驍將皇甫 母卽昭憲太后之妹也,乾德初,封京兆郡太君,六年,進本郡太夫人,開

京武德、皇城、宮苑等使。 車駕出郊,又充大內留守。 五年,遷軍器庫使,掌武德司。六年,領錦州刺史。屬郊祀西洛,爲行宮使,駐洛中,又爲西 知信三歲而孤,宣祖憐其敏慧。建隆三年,起家授供奉官,丁內艱,轉六宅副使。開寶

武德使。會改武德爲皇城司,卽爲皇城使。七年,坐秦王廷美事,改右衞將軍。 靜難軍節度行軍司馬。九年,起爲左衞將軍,領營州刺史。 親信市竹木於秦、隴,矯制冤所過算緡,入官多取其直,左授軍器庫使,領錦州刺史,俄復爲 太宗卽位,進領本州團練使,拜武德使。從征河東,又爲行宮使。太平興國五年,坐遣 是秋,出爲

陣右 使符昭壽爲押陣 邕州 觀察使。 偏 雍 熙 初 日,宴犒將士,契丹騎乘間至,知信 改 四年,召入,改并州路 都監。 左 神武 師還, 軍將軍, 諸將失道, 尋領檀州團練使, 副都部署。 知信獨整所部 不介而出,追之數十 端拱中,代還,知杭州。 護屯兵于鎭州。 以歸。 俄知定州 里,斬獲甚衆,以功 會大舉北伐, 淳化四年,又知天雄 兼兵馬鈴轄,押大 與六宅 就 拜

軍府。太宗崩,充修奉永熙陵部署。

駕前 二年,以疾求還京,至鎭州卒,年六十三。 副都部署, 咸平初,拜建武軍節度觀察留後,知永平軍府。 歷知河陽、昇州。 景德元年,車駕幸澶淵, 廢朝,贈太尉、天平軍節度。 契丹犯邊,復知天雄軍。 命爲東京都巡檢使, 眞宗北巡,充 復知定州

知信以戚里致貴,尤被親任,中外踐歷,最爲舊故。 雖無顯赫稱,亦以循謹聞于時。

承宗、承渥。

路 未幾,爲河北緣邊安撫都監。大中祥符初, 邊安撫,又知保州。 承受公事,還,掌軍器庫。會眞宗臨幸,見其整肅, 承宗,幼善射,兼習書數,以蔭補殿直,寄班祗候。 俄拜東染院使、知定州。 就加內殿承制,歷如京、文思二副使,徙河東緣 副薛瑛使契丹,使還,歸本任,又兼鎭定路兵 面授閤門祗候。 咸平初, 轉供 、奉官、 知信卒,轉內殿崇班 鎭定高陽關三

河 馬 鈐 初 轄、俄 塞,擇守臣,以承宗 改宮苑使、 知雄州 為皇 一城使、 河北緣邊安撫使。 知滑州 未幾,復代還。 在郡. 有治 迹, 詔書嘉獎, 召歸。 時 靈昌決

否功 鈐 以 涇 E 轄。 原 驛 過 儀渭、秦州路巡撫使,詔令堯咨等所至 會西邊 以聞。 乾興 聞, 仍取繫囚躬親錄問,催促論: 言吐蕃唃廝囉作文法,頗爲邊 初,進東 或有 陳訴屈抑,經轉運、 上閤門使,徙鄜延 提 都鈴轄 决。 點 患。 旣行 軍 司 命副 州 加 腽 犒 卒。 斷 就命堯咨知秦州, 官 龍 不 中使護 當, 更將 圖閣 即按 校, 直 學士 柩 鞫詣實,杖以下依法區 諮 至京師,賜以 訪 陳堯咨爲鄜延、邠寧環慶 民間 承宗為 利 害、 葬 西 上閤門使,充 地 郡官使臣能 理 徒

承 渥蔭 補殿直 累任使,喜爲條奏,至供奉官、閤門祗 候。 承宗子永釗,右侍禁、 閣門祗

候。

在藩 文裕 簡 穆 皇后 邸, 劉 開寶四年, 文裕字以寧, 多得 卽 文裕 親接 起家 旭 姑 太平 保州 補 也 殿 興 保塞 直 審奇三子,長文遠, 國 二年, 八年,權管雲騎 祖正,晉 擢爲內弓箭庫副使, 幽州營田 建隆 員僚 中爲供 冰直, 預 使兼 討江南,中弩矢,神色自若。 特封其母張氏清 奉官, 平州 刺 與丼人戰萬善 史。 **父審奇**, 河縣太君, 加 武牢 關使。

列

傳

第

_

秦、隴巡檢。

州戮之,因據城叛,遂驅承瑨等行。 韜、馬知節及文裕領兵屯淸水縣,飛雄至,稱制盡縛之。承瑨等見姚承遂數輩同至,不覺其 率縣尉盧贊,皆從行。先是,秦州內屬,羌人爲寇,朝廷遣周承瑨、田仁朗、王侁、梁崇贊、韋 |南使者言||封州||李鶴不奉法,誣奏軍吏謀反,詔卽誅之。故飛雄引以爲言。將城承瑨等詣秦 封州殺李鶴邪?詔書汝豈得見!」先是,上卽位,分命親信於諸道廉官吏善惡密以聞。 者,夜抵廐置呼卒索馬。 卒秉炬出迎,飛雄以私市馬纓示之,卒不能辨,卽授以馬。 一卒乘 險易、兵籍多少。 來京師、魏博間, 一馬前導,以巡邊爲名,因矯詔率巡驛殿直姚承遂,至隴州率監軍供奉官王守定,至吳山 仁朗獨號泣求詔書,飛雄叱之曰:「我受密旨,以若輩逗撓不用命,令盡誅。汝豈不聞 有李飛雄者,太保致仕鳞之孫,秦州節度判官若愚之子。 與無賴惡少游處,縱酒蒲博爲務。以其父故,盡知案州倉庫所積,及 又有妻父張季英爲鳳翔盩厔尉,飛雄自京師往省之,因乘季英馬詐 性兇險,不爲其家所容,常往 I 爲使 地形

不營救之乎?」飛雄低語謂文裕曰:「爾能與我同富貴否?」文裕覺其詐,僞許之。 命左右釋文裕縛。文裕策馬前附耳語仁朗,仁朗佯墜馬,若卒中風眩狀。飛雄共前視之, 初,飛雄詐宣制時,自言我上南府時親吏,文裕因哀告飛雄曰:「我亦嘗依晉邸,使者豈 Ŀ

市 州 不悛改者,並 又 ,廐置卒亦 釋其縛。 獄 鞫 得 實, 飛雄、 許 夷其族。 朝奮起搏飛雄, 本家尊 承遂、 長 因下詔 守定、 人具名 聞 ::中外臣庶之家, 子弟或有 贊 與文裕共擒之。 州 坐要斬, 縣遣 吏錮 夷飛 送 雄家。) 闕下, 飛雄尚呼云:「田仁朗等謀反殺使者。」送秦 當配 捕先與飛雄善者 乖 記 隸 諸 檢, 處。 甚爲 鄉黨所 敢 有藏匿 何大舉等數輩,悉 知 不以名聞者, 雖 加戒勗曾 棄

坐 初 領 (), 徙 逗遛,命文裕代 儒 州 文裕 屯 刺 三交, 後 史。 遷 明年, 加領 軍 器 仁朝。 順 庫 爲高 使。 州 重 繼遷等遁去。 一練使。 陽關 四年,車駕征太原, 都監 會李繼 會契丹 遷 率 命文裕 折 萬餘騎 遇也寇邊, 與通 入, 文裕與大將崔彦 事舍人王侁分兵控石嶺關。 初 詔 田 朗與王侁等討之,仁朗 進 擊卻之。 六年, 雍熙

诗

醜

狀

彰露

功期

功以

上悉以其罪罪之。

至內 其弟文質 召 文裕 五 園使、 從潘美北 上 還。 (殿直 甚悼惜, 連州刺 俄 起爲· 征, 踰 史。 坐陷 贈寧遠軍 月, 右領 文裕 失驍將楊業, 軍 衞 節度,命中使護喪歸葬京 遷容州 大將軍 觀察使, 一,領端 削 籍, 州 配隸登州, 出 惠 爲 |練使, 鎭 州 師。 封 事 兵 馬 其 具業傳。 母清 部 弟文暠至供奉官、 署。 河 端拱 郡 歲餘,上知業之陷 太 夫人, 元 年, 卒於 **閻門祗候**, 賜 桑 冠 屯 所 霞 由 被,授 王侁, 年 几

中祥符 昇王 龐 興國 通 父通,宋初掌禁族,從潘美征廣南, 永 氏 徐國 府諮議參軍張士遜具鹵簿鼓吹,改葬于祥符鄧公原。 中,扈蹕太原,卒于師,贈潁州防禦使。 興軍節度兼中書令, 劉美字世濟, 五年,德妃正位中宮,又贈維嶽忠正 太 大夫人。 | 井||州 人。 追封曾祖母宋氏吳國太夫人, 四世祖質, 又累戰北 絳州 軍節度、檢校太傅,延慶彰德軍節度、檢校太尉, 天禧二年, 刺史。 長女爲眞宗德妃, 面, 積勞至 曾祖維嶽,不仕。 韶贈太師、尙書令, 祖母 一虎捷都指揮使,領嘉 皇后親臨奠,眞宗御製祭文置 河南縣君元氏許國太夫人,母 加贈定國 祖延慶,右驍衛將軍 軍節度 諡武懿, 州 兼侍中。 刺 史, 七月,遣

|平 中, 治 擁高貲, 廨舍,修城壁,不以聞,僮奴輩假威擾民。 美卽后之兄也。 傳潛失律流房州,擇美監軍,及徙潛潁州 列藩閩,營繕過度,拙於檢下,誠或有之,自餘保無他患。」上意乃解 初事眞宗于藩邸,以謹力被親信,卽位,補三班奉職,再遷右侍禁。 會有 言者,遣美廉其狀,美日:「保吉世受國恩, 又爲自京至陳、潁巡檢。 石保吉在陳州 歸朝,充閤 咸

大中祥符二年,護屯兵于漢州,歷遷供奉官,徙嘉州。 士卒有病皆給醫藥,親祭視撫循 祗

宋氏 中。 彭 也,亦贈衞尉卿,其妻追封南安郡君。 中書令兼 城 國太夫人,龐氏晉國太夫人,從德和州刺史,從廣內殿承制。 楚國太夫人,元氏韓國太夫人,龐氏魏國太夫人。 天聖二年,郊祀,加贈維嶽彰信軍節度兼中書令,延慶鎭安軍節度兼中書令,通鄭王, 郡王,曾祖母宋氏陳國太夫人,祖母元氏衞國太夫人,母龐氏鄆國太夫人,美亦贈侍 宗嗣位,尊皇后爲皇太后,贈維嶽鎭寧軍節度兼侍中,延慶建雄軍節度兼中書令,通 尚書令,延慶彰化軍節度、許國公,通開府儀同三司、魏王,宋氏安國太夫人,元氏 五年,再郊,又贈維嶽天平軍節度、 有襲知進者,即通之友壻

使,出 德衞 路結 擢熙 良、 衞州 西 諡 康 頭 州 母越國 懷。 納 輔京官。 供 從 縣 知 奉官,一 至 衞州 以爲三司度支判官。 吏李熙輔者善事從德,乃薦其才於朝。太后喜曰:「兒能薦士,知所以爲政矣。」卽 太后 子復本(至),父美卒,年十四,自殿直遷至供備庫副使(水)。 郎官,爲郡守。 夫人錢氏兄惟演子集賢校理曖 ,改恩州 遷內殿崇班。 從事 悲憐之尤甚, 鄭驤 兵馬都總管,知相州。從德齒少無才能,特以外家故,恩寵無比 因緣從德亦擢美官。 旣 太后臨朝,從德以崇儀使眞拜恩州刺史,改和州,又遷蔡州 而從德病,召還,道卒,年二十四。 錄內外姻 御史曹修古、 戚門人及僮 及蒙正皆遷二官。 楊偕、 從德妻,嘉州王蒙正女也。 郭勸、 一隸數十人。 推直官段少連上疏論之,皆坐貶。 從德娣壻龍圖 贈保寧軍節度使,封榮國公, 尚書 屯 田 弟從廣是歲始 員外郎戴融管佐從 蒙正家豪右,以 閣直學士馬季 生,亦補 其 專 厚 在 日 練

疆場, 使。 娶荆 從廣 坐 耗 王 字景元, 縣官, 元嚴 願上所 女。 少出入禁中, 爲 滁州 給公使錢、 防禦使, 侍仁宗左右, 帝嘉 時年十 納 之。 Ŧ; 太后愛之如家人子。 爲 **奉牧** 趙元昊反, 都監, 改 從廣 副 使 自 太后崩, 言待罪行間,不能 眞拜崇州團 扞患 練

從廣

自爲防禦使十年不遷,特拜宣州觀察使、同勾當三班院,

請補外自效,以知洺州。

子永年。

令。 良惠。 **潭水溢,從廣穿隋故渠以殺水勢,洛人便之。徙邢州,籍鄉軍之罷老者聽引子弟自代,著爲** 召還,復領三班院。 從廣性謹飭,然喜交士大夫,時頗稱之。 出知襄州,徙眞定府路馬步軍副都總管。卒,贈昭慶軍節度使,諡

辦 盗,永年密遣壯士夜渡河,殺其凶桀二十餘人,衆遂散。 「奇童子也。」常置內中,年十二,始聽出外。累遷康州團練使,爲陝州都監。 皇城司,改單州團練使、永興軍路總管。 帝誤投金杯|瑶津亭下,戲謂左右曰:「能取之乎?」|永年一躍持之而出,帝拊其首曰: |永年字||君錫,生四歲,授內殿崇班,許出入兩宮。 仁宗使賦小山詩,有「一柱擎天」之 遷鈴轄,代還召見,問破賊狀,擢幹 郭邈山等爲

永年素有力,手擲棄之,契丹驚以爲神 契丹遣使來請帝繪像,選副張昇行報使。 契丹以未得志,夜取巨石塞驛門,衆皆恐,

舉 判 聴事 在京諸司 出 ,請以他物代給,讙譁語不遜。 知涇州,帝賜詩寵之。 庫務。 凡三除防禦使,皆爲言者所論而寢。 郡兵歲以香藥爲折支, 永年召至庭下數其罪,斬爲首二人,餘不敢動。 三司不時輦致。 振武卒素驕, 突入通 同提

知代州 列 傳 第 契丹取 = 百 = 西山 十 木積十餘里, 外 戚 上 **輦載相屬於路**,前守不敢遏, 永年遣人焚之,一夕

虚。 上其事,帝稱善。 契丹移檄捕縱火盜,永年曰:「盜固有罪, 然發在我境,何預汝事?

乃不 敢復言。 帝嘗問禦戎策,對合旨,書「忠孝」字以賜。

贈 師 崇信軍節度使,諡 征安南,永年請先 英宗 立,遷沂州防禦使,復知代州。 日莊恪。 士卒,度 富良江 | 取賊以獻,不許。 歷步軍馬軍殿前都虞候、太原定州路副都總管。王 遷邕州觀察使、步軍副都指揮使。卒,

制。 禮院,再遷太子中允、判三司度支勾院,以太常丞、直史館提舉在京諸 書郎,知明州鄭縣,入爲刑部詳覆官。太后臨 !表季良遷二官,辭不就,而請以其子直方爲館閣 三丞充近職,非故 馬季良字元之,開封府尉氏人。 事也。 遷尙書工部員外郎、龍圖 家本茶商, 朝,遷光祿寺丞。 娶劉美女。 讀書。 閣直學士、同知審官院。 初補越州上虞尉, 頃之,擢 司 秘閣 ·庫務, 校 理 改秘書省校 擢 劉從德卒, 龍 同 圖 判 閣待 太常

諷言季良徼倖得官,降屯衞將軍, ,役,詔許季良自陳,以地給還。 會江南旱,出爲安撫使,再遷兵部 歲餘,徙壽州,致仕,還京 滁州 郎中。 安置。 太后 開封 崩,換濠州防禦使,赴本州。 府 · 劾奏季良冒立券,庇占富民劉守謙 師卒。 御 史中丞范

季良因緣以進,無他行能,在禮院嘗建言,攝祠事官致齋三日無供帳飲食,非所以重 洞

事也。自是翰林、儀鸞司供帳,大官給食於祠所云

改蔡州 祗侯。 特除莊宅使、康州刺史,再遷宮苑使、昭州團練使。 郭崇仁字永年,守文之子,章穆皇后弟也。淳化四年,補左班殿直,遷東頭供奉官、閤門 契丹入寇,齎密詔諭河北諸將,還奏稱旨,累遷崇儀副使兼閤門通事舍人。 擢捧日 1天武 四廂都指揮使、賀州防禦使、 高陽關路馬步軍副都總管。以疾落 丁母憂,起復雲麾將軍,拜解州 章穆崩, 團 i練使, 軍

不行,蓋性愼靜,不樂外官也。 崇仁 雖外戚,朝廷未嘗過推恩澤, 其爲解州團練使十年不遷,嘗除知相、衞二州,皆辭

改磁州防禦使。

卒,贈彰德軍節度觀察留後。

宮爲美人, 未久復官, 楊景宗字正 累遷東染院 奏補茶酒 臣,章惠皇太后從父弟。 班殿侍, 副 使。 累遷 章惠爲太后,進崇儀使, 西頭供 、奉官、 少蒲博無賴, 閤門祗侯,坐事 領連州 客京師, 刺史、揚州兵馬鈴轄。 降左侍禁、 以罪黜隸致遠務。 郢州 兵 馬都監。 章惠入 未幾,

三五五三

戚上

授秦州刺史,徙滑州鈐轄,遷舒州團練使,爲兵馬總管。

老而益甚,郡不可予也。」乃復以爲建寧軍留後、提舉四園苑,改提舉在京諸司庫務。卒,贈 均州安置,起爲汝州鈴轄。 舉萬壽觀,復建寧軍留後,復領軍頭引見。又坐從卒王安挾刃入皇城,謫左監門衞大將軍, 後、知潞州,給節度使奉。 故特拜景宗徐州觀察使,給留後奉。 又徙鄆州鈴轄。召還,同勾當景靈宮、提舉四園苑。 時呂夷簡守魏,常以官屬禮飭戒之,而景宗肆志不悛,遂以不法奏。貶齊州都監,徙衞州, 安武軍節度使兼太尉,諡莊定。 章惠 崩,遷成州防禦使,坐入臨皇儀殿被酒讙譟, 領皇城司,坐衞士入禁中謀爲亂,貶徐州觀察使、知濟州。 祀明堂覃恩,願還所改官,求爲郡。 逾年,領軍頭引見司,出知磁州,爲建寧軍節度觀察留 章獻、章懿二后升祔太廟,帝念章惠 出爲兗州總管,改天雄軍副都總管。 帝謂輔臣曰:「景宗性貪虐, 還,提

述仆地。 丁謂方盛,築第敦教坊,景宗爲役卒負土第中,後謂敗,仁宗以其第賜景宗,居三十年乃終。 景宗起徒中,以外戚故至顯官,然暴戾,所至爲人患。 帝深戒毋飮酒,景宗雖書其戒坐右,頃之輒復醉。 其奉賜亦隨費無餘。 復使酒任氣,在滑州嘗歐通判王 始,宰相

法,欠不滿四百者不坐,若以自盜論,則計直八百卽當坐徒矣。」 域怒曰:「敢抗三司使邪? 舍人、勾當東排岸司。三司使寇瑊繩下急,漕米數不足綱,吏卒率論以自盜。 符惟忠字正臣,彥卿曾孫也。 以外祖母賢靖大長公主廕,爲三班奉職,後擢閤門通 惟忠爭曰:「在

也。 長垣尉,惟忠厚遇奎,白府共薦之。 或風使薦之,惟忠不從,曰:「誥無善狀,安可以勢使我。」旣而誥果以贓敗。 以 西染院副使權提舉倉草場、提點開封府界縣鎭公事。 開封主簿樂誥,宰相王曾外孫 時吳奎爲

惟忠曰:「職有當辨,非抗也。」」減益怒,惟忠爭愈力,如所議乃已。

往報使,遷閣門使,至武疆縣,宜發背卒。 奏留 以接鄭河、圭河,自是無復有水害。 束以木岸。三司以爲不便,後卒用其議。 都大管勾汴河使,建議以爲渠有廣狹,若水闊而行緩,則沙伏而不利於舟,請卽其廣 惠民河與刁河合流,歲多決溢,害民田,惟忠自宋樓鎭碾灣、橫隴村置二斗門殺水勢, 陝西用兵,除涇原路兵馬鈴轄兼知涇州。 贈客省使、眉州防禦使。 再遷西上閤門副使。 契丹遣使求地,惟忠副富弼 三司使鄭戩

柴宗慶字天祐,大名人。 列 祖禹錫, 鎭寧軍節度使。 父宗亮, 太子中舍。 宗慶尙太宗女

魯國 長公主,升其行爲禹錫子,拜左衞將軍、駙馬都尉,領恩州刺史。 禹錫卒,眞拜康州防

禦使,改復州。

邪 ! 使。 拜彰德軍節度使。 於務中。 」旣而河東提點刑獄劾宗慶私使人市馬不輸稅,貸不問。授武勝軍節度觀察留後,歷 又自言陝西市材木至京師, 舊制,諸公主宅皆雜買務市物,宗慶遣家僮自外州市炭,所過觅算,至則盡鬻之, 自是詔雜買務罷公主宅所市物。 求蠲所過稅。 從祀汾陰,爲行宮四面都巡檢,進泉州管內觀祭 眞宗曰:「向諭汝毋私販以奪民利, 今復 復市

主累封楚國大長公主,先宗慶沒。 之,出判濟州,用御史中丞賈昌朝言,留不遣,盡停本使公使錢。卒,贈中書令,諡曰榮密 未行,改陝州、潞州。 仁宗卽位,徙靜難軍,又徙永淸、彰德軍,拜同中書門下平章事,徙節武成軍, 後判鄭州,以縱部曲擾民,召還奉朝請,歲減公用錢四百萬。久 出知澶

改 一積奉以裨軍用,蓋亦追補前過云。 (也。無子。及終,願以貲產送官,仁宗以其女尙幼,不許。 人謂宗慶選尙榮貴逾四十年,晚 宗慶歷官多過失,性極貪鄙,積財鉅萬,而薄於自奉,甚至優人以爲戲,宗慶雖知,莫能

得其寃。 1: 與商 張堯佐字希元,河南永安人,温成皇后世父也。 人夜飲,商人暴死,道士懼 改大理寺丞、知汜水縣,遷殿中丞、知犀浦縣。 而遁,爲邏者所獲,捕繫百餘人。 舉進士,歷 犀浦地狹民繁,多田訟。 憲州、筠州推官。 轉運使命堯佐覆治,盡 **堯佐正其** 吉州有

官,又爲副使。 諫官余靖言:「用堯佐不宜太遽,頃者郭后之禍起於楊尚,不可不監。」未幾,遷三司戶部判 疆 界,條衆敝以曉之,訟遂簡。 時温成· 方爲脩媛,欲以門閥自表異,故堯佐稍進用,權開封府推官,又提點府界公事 擢天章閣待制、吏部流內銓,累遷兵部郎中、權知開封府,加龍圖閣直學士, 知開州,還,判登聞鼓院。

遷給事中、端明殿學士,拜三司使。

興執政大臣也。蓋女謁、近習知陛下繼嗣 年,未有失道敗德之事 度使、羣牧制置使、宣徽南院使、景靈宮使,賜二子進士出身。 皆謂完佐主大計,諸路困於誅求,內帑煩於借助,法制刓敝,實自完佐。臣等竊惟 一人不免,惟處之有道,使不踐危機,斯爲得矣。」 明年, 諫官包拯、陳升之、吳奎言:「比年以來,水冒城郭,地震河溢,蓋小人道盛。 ,乃五六年來擢用堯佐,羣口竊議, 未立,既有所私,莫不潛有趨 仁宗祀明堂,改戶部侍郎,尋拜准 以謂: 以其過不 拯等復言:「陛 向; 在 陛下,在 執政大臣不能規 下卽 女謁 親昵之私, 位僅三十 康 近習 軍節

三五五七

列

傳

第

=

百二十

外

當黜。其令中書戒論之。自今言事官,相率上殿,先取旨。」是日,堯佐辭宣徽、景靈使,從之。 情矣。」御史中丞王舉正留百官班,欲廷議,不許。乃詔曰:「近臺諫官乞罷薨佐三司,及言不 塞,氛霧蒙孛,宜斷以大義,亟命追寢。必不得已,宣徽、節度擇與一焉。如此,則合天意,順人 諫,乃從諛順旨,高官要職惟恐撓佐不滿其意,致陷陛下於私昵後宮之過。制下之日,陽精晦 可用爲執政,若優與之官,於體爲善,朕用其言,遂有是命。今復以爲不可,前後反覆,於法 未幾,復以宣徽使判河陽,舉正又抗章論之,至于三。時吳育判西京留臺,河陽民訟有

不决者多詣育,育於狀尾判曲直。堯佐畏恐,卽奉行之。召還,徙鎭天平軍。卒,贈太師,

賜其家僦舍錢日三千。

子山甫,引進副使、樞密副都承旨。 **善院起寒士,持身謹畏,頗通吏治,曉法律,以戚里進,遽至崇顯,戀嫪恩寵,爲世所鄙。**

從弟堯封,孝謹好學,舉進士,爲石州推官卒。次女,卽温成皇后也。累贈至中書令、

校勘記

清河郡王, 諡日景思。

(二) 李幹 長編卷一八、編年綱目卷三作「李瀚」。

- Ξ 周承晉 按長編卷一九,有秦隴州巡檢「周承瑨」,後為秦州都巡檢使屯淸水縣禦戎人,與本卷
- 劉文裕傳略同。疑與此爲一人。
- 〔三〕環慶路 原作「懷慶路」,據長編卷一三一改。
- 高陽關部署 「關」下原衍「都」字,據本卷賀今圖傳、長編卷二七刪。
- (至) 從德子復本 本書卷九仁宗紀),與「父美卒,年十四」相合(美死於大中祥符五年,見上文);其子永年另有 按從德爲劉美子,年二十四死,曹修古等論其遺奏恩濫坐貶,時爲天聖九年(見

傳。「復本」不當爲從德子,疑此處「子」字爲「字」之訛。

- (六) 供備庫副使 正合。 此處「副」字疑行。 上文云「錄其子從德供備庫使」,與長編卷九七「錄其子殿中丞從德爲供備庫使」
- (七) 張昇 原作「張昇」,據本書卷三一八張昇傳改,參看該卷校勘記。

列

史卷四百六十

列 傳第二百二十三

外戚中

王貽永 端愿子評 曹佾 李昭亮 從弟偕 李用和 子評 誘 子璋 高遵裕 瑋 珣 弟遵惠 李遵勗 從姪士林 子端懿 端 愿 士林子公紀 端

殼

公紀子世則 向傳範 從姪經 綜 經子宗回 宗良 張敦禮 任 澤

信見而奇之,曰:「後當類我。」 王貽永字季長,溥之孫也。 性淸愼寡言,頗通書,不好聲技。 初生十餘歲時,其舅魏咸

州 大將軍、獎州團練使。 團 練使,徙徐州。 咸平中, 尚鄭國公主,授右衞將軍、駙馬都尉。 河決滑州,徐大水,貽永作隄城南以禦之。改衞州團練使,進懷州 求外補, 得知單州。 真宗戒之日:「和衆靜治, 從封泰山,領高州刺史,再遷右監門衞 卿所當先也。」眞 防禦 拜洛

一三五六一

列

熚

第

二百二十

Ξ

外 戚

中

使,知澶、定二州,徙成德軍。

章事,遂加兼侍中。 徙成德軍。 爲通衢,介梁山,春夏多水患,貽永相度地勢,爲築東西道三十餘里,民便之。復徙定州,又 留後,拜安德軍節度使。出知天雄軍,徙保寧軍節度使、知鄆州。 會有告曹汭變者,貽泳奏治之。遷耀州觀察使,復知澶州。 **擢同知樞密院事,改副使,加宣徽南院使,進樞密院使。 久之,拜同中書門下平** 歷彰化、武定軍節度使觀察 州自咸平中徙城,而故治

師、中書令,諡康媾。 <u>助</u>永自言寵祿過盛,願罷樞筦,解使相還第。帝冀其愈也,乃聽罷侍中,徙<u>彰</u>德節度使,同 居,許休於殿側。 平章事、樞密使如故。 徙節鎭海,以疾求罷,手詔撫諭,遣上醫診視。 至和初,復以疾辭,拜尚書右僕射、檢校太師兼侍中、景靈宮使。 卒,贈太 疾稍間,入見,命其子道卿掖登垂拱殿。仍賜五日一朝,遇朝參起 帝臨問,頒尙方珍藥,手取糜粥食之。

當時無外烟輔政者,貽永能遠權勢,在樞密十五年,迄無過失,人稱其謙靜。

子道卿,西上閤門使。

遣 昭亮持詔軍 亮字晦之,明德 中, 問方 太后兄繼隆 略及營 「陣衆寡之勢, 子 也。 四歲, 昭亮 補 東頭供奉官, 年 雖 少 ٠, 還 許 奏 稱 出 旨 入禁中。 累 遷 繼隆 四 Ŀ 閣 北 征

事 III 冒請 遷引 出為 官 路州 進使,領賀州團 、廩者數百 兵馬鈴轄,徙領 人,昭亮按發之。 l練使。 麟 府路 歷 知瀛定 軍 領高州 馬 三州 事 ,尋爲管勾軍頭引 、成州 刺史,知代州。 重 l練使、 寧州 以四 見 司 防禦使、 方館使復領麟府路 兼 \equiv 司 衙 延州 司。 觀察使、 軍. 1: 軍 有 感 馬 門 洮

德軍 節度 副 都 觀 指揮使、幷代州路副 察留後。 擢 殿前都虞侯、秦鳳路馬步軍副 都總管、安撫招討副使。 都總管、經略招 未幾,守代州,再徙眞定路 討 副 使。 徙 永興路馬

保州 兵叛,殺官 更, 詔遣王果招降之,叛者 「乘埤呼日:「得李步軍 ·來,我降矣。」於是遭昭 都 總管

州 **序**, 爾, 敕使存勞, 昭亮從輕騎數 幾無 **噍類矣。**] 卒稍 賜黃 十人,不 金三百兩, 稍縋城下。 ·持甲盾弓矢,叩 給節 明 i度使. 日, 奉,以褒其 相 城門呼城上 城 功。 門降。 日:「爾輩第來降,我保其無虞也。 都 轉運使歐陽脩言:「昭亮入保州 改准 康 軍 節 度觀察留後,復知定

以

叛卒女口分隸諸軍

丁有輒

私

入其家者。」置不

問

昭亮 爭勝負,徹屋椽相 本 明 將家子 年 一,拜武 ,雖以 寧軍 擊, 節 恩澤進,然習軍 土皆 度使,代李用和爲 惶駭,昭亮捕斬之,杖其主者,諸軍爲之股慄。 中 事 了,旣統 殿前副 宿 都指 政尙嚴 揮 使。 多所建 時承平久,將士多因 萬勝、 帝 而 南郊,有騎 龍猛 循樂縱 軍. 蒲 弛 卒 博

列

傳

亡所挾弓,會赦,當釋去,昭亮曰:「宿衞不謹,不可貸。」卒配隸下軍:禁兵自是頓肅

事,判大名府。 天平、彰信、泰寧軍節度使。 以宣徽北院使判河陽,徙延州。 仁宗以塗金紋羅書曰「李昭亮親賢勳舊」,命其子惟賢持以賜。 在定州數言老疾不任邊事,願還京師,乃以爲景靈宮使,又改 以南院使判澶州,徙幷州、成德軍,拜同中書門下平章 徙定州,改

早亡,內嬖三妾迭預家政,莫能制也。 昭亮爲人和易,練習近事,於東治頗通敏,善委任僚佐,以故數更藩鎭無他過。 昭亮妻

昭德軍節度使。卒,贈中書令,諡良僖。

皆絀爲下軍, 軍中帖然。 **積栗多,廩數多且積久,能無陳腐乎?欲盡取新,則陳者何所歸?」遂斬首惡一人,流十人,** 領高州刺史,知莫州,州倉粟陳腐,戍兵大譟,弗肯受,州人皆恐,惟賢馳往渝曰:「邊兵衆則 徙恩州,後遷四方館使,卒。 子惟賢,字寶臣,以父蔭爲三班奉職,後爲閤門祗侯、通事舍人。 累遷西上閤門使,尋 召還,提舉諸司庫務,領榮州團練使,知冀州。 惟賢曰:「武士何可責以廉節。且抵罪在昔,今不可以新令繩之。」 帝爲更其 惟賢善宣辭令,習朝儀,仁宗頗愛之。 會遷補禁軍,自隸籍後犯贓汚者

李用 和 字審禮, 章懿皇太后弟也。 少窮! 困, 居京師鑿紙錢爲業。 劉 美 水用和 於民間

奏爲 班 奉 職 累遷 右侍禁、閤門祗 候 權 提 點 在 .京倉草場、考城 、縣兵 馬 都 監

賀州 刺 太后 史。 崩,詔 改葬太后 赴喪。 于永安, 旣葬, 遷禮 領捧 賓副 日、天武 使, 兵 頟 〈護梓宮 八 作 司 遷 禮 賓 使,同 領 皇 城 司。 遷崇儀使、

府、 中。 改 軍 使。 彰 副 定州路。 信 都 旣 明 指 年 軍 而 節 擢 春, 揮 虚使、 殿前 使, 舊制, 叉詔 拜 都 同中書門下 建 i.虞侯、 乘傳行太后 刺 武 史以 軍 節 鄜 上所賜公使錢得私入, 延路馬 度使、殿前 - 平章事 陵。 步 還, 景 軍 副 授 副 靈宮使。 都 寧州 都 指揮使。 :總管。 刺 史。 以疾告,仁宗臨 而 未行, 用和 以老乞罷軍 歷遷 悉 拜永清軍節 澤州 用為軍 圑 職,拜宣徽 問, 練、 ·費。 慶州 賜 度 歷侍 銀 觀 察留後 防禦、 飾 北 衞 肩 院 親軍 興, 使。 鄜 改 州 進 步 逾月, 兼侍 真定 軍馬 觀

隴 其 次子 西 郡 初, |珣| 未有居第, 輟朝 閣 門使, 五 日,制服禁中,諡 詔寓館 賜所! 居第, 芳林園, 井 恭僖。 用和 日 給 官 固辭,又假以惠寧坊之官第。 l 含 僦 帝撰 八神道 錢 五 一碑,書曰「親賢之碑」。其妻卒,亦輟朝成 千。 旣卒, 帝哭之慟, 病革,帝 贈太師 入見 中書 臥 內,擢 令、

初,仁宗以 太 后 不 逮養, 故外家褒寵特厚。 用和列位將相,能 小心 静 默, 推遠權勢,論者

列

第

服

以此稱之。子璋。

何功復云云,敢諠者斬!」衆乃定。 衞相告乾興故事,內給食物中有金,旣而果賜食,衆視食中,璋曰:「天子未臨政已優賞,汝 節度使、殿前都指揮使。仁宗書「忠孝李璋」字丼秘書賜之。宴近臣羣玉殿,酒半,命大盞 二,飲韓琦及璋,如有所屬。帝崩,執政欲增京城甲士,璋曰:「例出累代,不宜輒易。」時禁 會河漲,訛言水且至,璋據廳事自若,人心乃安,河亦不溢。徙曹州觀察使,累遷武勝軍 璋字公明,以章懿皇后恩,補三班借職,積官爲天平軍節度觀察留後,知澶州。 護塞商

卒,年五十三。贈太尉,諡曰良惠。弟璋、珣。 修路數十里,夾道植柳,人指爲「李公柳」。知鄧州,坐失舉,改節振武軍,知郢州。 大雨 水,競以船筏邀利,多溺死者,璋一切籍之,約所勝載如黃河法。發卒城州西關,調夫 以武成軍節度使知鄆州。原東盜白日殺縣令,略人道中,璋信賞罰擒捕,盜爲衰止。 還朝,道 歲

中, 瑋皇恐自劾,坐罰金。 選尙兗國公主,積官濮州團練使。 後數年,終不協,主還宮。璋自安州觀察使降建州,落駙馬都尉, 以樸陋與主不協,所生母又忤主意,主入訴禁

赦還京師,至建武軍節度使、檢校太師。 知 衞州。 未幾,主徙封岐國,復暐都尉。 卒,哲宗臨奠,哭之,贈太師、中書令。 主薨,以奉主亡狀,貶郴州團練使,陳州安置。 遇

以與天下共也,儻盡用親戚,何以待勳舊乎?」後一年乃命之。 <u> 珣字公粹,以蔭爲閤門祗侯。時兄璋爲閤門副使,珣又求通事舍人,仁宗曰:「爵賞所</u>

制,御史范鎭復論之,命遂寢。 未幾,遷相州觀察使。時劉永年亦同除官, 車駕視|用和疾,自西上閣門副使累遷|均州防禦使,知|相州,賜御製詩、飛白字寵其行。 知制誥楊畋以爲不可開僥倖之門,詔他舍人草

州。卒,年七十四。 覃恩止移鎭,唯宗室乃遷官。 使契丹,預釣魚會,獲多。 熙寧中,遷宣州觀察使,知穎州。哲宗初,進泰寧軍留後、提舉萬壽觀。 至是,珣與李端懲皆特遷,戚里一覃恩遷官自此始。 契丹遺以金器,使還,悉上之,更賜黃金及「李珣忠孝」字。 故事,正任遇 復知相

李遵勗字公武,崇矩孫,繼昌子也。 列 第二百二十三 外戚 中 生數歲,相者曰:「是當以姻戚貴。」少學騎射,馳冰 一三五六七

雪間,馬逸,墜崖下,衆以爲死,遵勗徐起,亡恙也。

升其行爲崇矩子。授左龍武將軍行、駙馬都尉,賜第永寧里。 及長,好爲文詞,舉進士。 大中祥符間,召對便殿,尙萬壽長公主。初名勗,帝益「遵」 主下嫁,而所居堂甃或

瓦甓多爲鸞鳳狀,遵勗令鑱去;主服有龍飾,悉屛藏之:帝歎喜。

左龍 自劾,帝使輔臣慰諭之。 領澄州 武 許之。 、軍將軍,領宏州團練使, 眞拜康州團練使, 刺史,坐私主乳母,謫均州團練使,徙蔡州。 後繼昌守涇州,暴感風眩,遵勗馳省不俟命,帝遣使令乘驛赴之。旣還,上表 給觀察使祿。時繼昌官刺史,遵勗請班 踰年,起爲太子左衞率府副率, 復

溢,將壞浮梁,遵勗督工徒,七日 國軍,知許州。 遷澤州防禦使,又遷宣州觀察使。 水軍多不練習而隸籍,遵勗命部校按劾,拔去十七八。後以疾請援唐韋嗣立 而堤成。 求補郡自試,出知澶州,賜宴長春殿。在郡,會河水 遷昭德軍節度觀察留後,拜寧國軍節度使,徙鎭

故事,求山林號,韶不許。

制之也。」嘗上三說五事以論時政。 無他聞,但人言天子旣冠,太后宜以時還政。」太后曰:「我非戀此,但帝少, 初,天聖間,章獻太后屛左右問曰:「人有何言?」遵勗不答。 晉國夫人林氏,以太后乳母多干預國事,太后崩,遵勗 太后固問之,遵勗曰:「臣 內侍多, 恐未能

密請置之別院,出入伺祭之,以厭服衆論。 其補 助居多類 此

名 有間宴集二十卷、外館芳題七卷。子端懿。 相友善,筠卒,存恤其家。 士大夫與宴樂。 所居第園池冠京城。嗜奇石,募人載送,有自千里至者。 。師楊億爲文,億卒,爲制服。 通釋氏學,將死,與浮圖楚圓爲偈頌。 及知許州,奠億之墓,慟哭而 構堂引水,環以佳木,延一時 卒, 贈中書令, 諡曰和文。 返 义與劉筠

真宗東宮,尤所親愛,嘗解方玉帶賜之。 稍長,出入宮禁如家人。 端懿字元伯,性和厚,喜問學,頗通陰陽、醫術、星經、地理之學。 七歲,授如京副使。侍

爲政循法度,民愛其不擾。轉運使移州捕妖人李敎,徵已死。 汝州防禦使、提舉在京諸司庫務。 不死,在賊軍中。遂降單州團練使、知均州,改滑州兵馬鈴轄。賊平,實無李教者,乃以爲 七遷濟州防禦使,爲羣牧副使。杜衍爲樞密,擇外戚子弟試外官, 恩州王則據城叛,人有言教 乃以端懿知冀州。

水,民多饑,大發倉廩以賑之。置弓手局,敎以戰鬥,遂如精兵。治汝陽堤百餘里,以却水 後,願終制,許之,仍給全奉。服除,提舉集禧觀,出知鄆州兼京東西路安撫使。 遷蔡州觀察使、同勾當三班院。 徙華州觀察使。以母喪,起復爲鎭國軍 (三)節度觀察留 是歲、京東

患,民便之。

赴澶州, 尋除寧遠軍節度使、知澶州。 數月卒。 計聞, 帝方宴禁中,爲徹樂,贈其家黃金三百兩,贈感德軍節度使,諡 御史中丞韓絳奏端懿無功,不當得旄節,不拜。 以留後 良

定,再贈兼侍中。

端懿能自刻 厲,聞善士,傾身下之,以故士大夫與之遊,甚得名譽。 弟端愿。

殿慮囚,放宮女。 端愿字公謹,以穆獻公主恩,七歲授如京副使,四遷爲恩州團練使。 端愿上疏,謂:「縱釋有罪,小人之幸,放宮女爲宦者專制, 反失所歸, 仁宗以歲旱,御便 何

抑豪彊、制猾吏,故毁隨之。」所深然其言。 言常賦三折, 「肥上之政何以減於襄陽?」端愿曰:「初官喜事, 累進邢州觀察使、 其民不堪,即上其事。 鎭東軍留後, 帝怒, 知寒、 奪轉運使賞,申折變之禁。 野二州。 飾廚傳以干名,則譽者至; 本路轉運使獻羨財數十萬被賞, 移廬州, 更事旣 富丽 入,知 謂日: 端愿

人心,不宜退託,失天下望。」拜武康軍節度使、知相州 英宗初,同提舉在京諸司庫務。 帝以疾拱默,端愿求對,進曰:「陛下當躬攬權綱,以係 請歸,除醴泉觀使。

神宗卽位,遣使就其家錄取異時章奏, 賜詔褒之。 河東城囉兀, 端愿手寫趙普諫太宗

北伐疏以聞。

年,卒,帝輟朝臨奠,賻典加等,贈開府儀同三司。弟端慤,子評。 子太保。 連年請老,以太子少保致仕。 欽聖皇后以甥舅之故,嘗幸其第,致禮於獻穆祠堂,命近侍掖端愿勿拜。 凡大禮成, 賜金帶、器幣,品數視執政。 哲宗嗣位,進太 元祐六

院。 元祐中,以安德軍留後卒,贈昭德軍節度使,諡曰恭敏。 嘗侍宴羣玉殿,仁宗獨賜珠花、飛白字,寵顧特異。 端慤字守道,官左藏庫使,執獻穆喪,辭起復,詔特給奉。 知邢、冀、衞三州,至感州觀察使。 累遷東上閤門使、幹辦三班

對,袖舊稿上之,神宗歎曰:「近世之賢戚也。」由是端慤之名益著。 兄端懿,在嘉祐時嘗密請建儲,人無知者,卒於澶淵,端慤走護其喪以歸。 元豐間因進

河東, 使陝西、河東,還,言<u>鄜延之人皆謂城</u>囉兀非便,乞速毀撤,解一路之患。 師出安南,調兵及 |評字||持正,由東頭供奉官八遷皇城使。以父告老,授西上閤門使,爲樞密都承旨。出 又言王師南征,而取卒於西北,使蠻聞之,得以窺我。所論事頗多,或見施行。 然天

中

資刻 薄,招權 不忌,多布耳目,采聽外事自效以爲忠。 僥倖進用,中外仄目。

賜袍帶、 以榮州 刺 金帛以賞勞。 史出 知穎州,還,幹當三班院。 進成州團練使,知蔡州。卒,年五十二。 副韓縝報聘契丹、且分畫河東地界,凡二年乃 贈冀州 觀察使,賜白金千

止遷一官,愈不悅,至上書辨論。 |評少涉書傳,嘗以公主遺奏召試學士院,改殿中丞,意不滿,辭之。後二年再召試,復 及卒,人無憐者。

門下 許三 喜爲 詩 平章事、景靈宮使,加兼侍中,封濟陽 州,徙河陽。 曹佾字公伯,韓王彬之孫,慈聖光獻皇后至弟也。 自右班殿直累進殿前都虞侯、安化軍留後。 以建武軍節度使爲宣徽北院使, 郡王 知鄆州, 言者謂 性和易,美儀度, 改保靜保平軍節度使、 年未四 一十毋典軍, 通音律, 出 知 善奕射, 澶、青、 同中書

后, 善自保,真純臣 宜少憇內東門, 神宗 《每客訪以政,然退朝終日,語不及公事。帝謂大臣曰:「曹王雖用近親貴,而端拱寡 [也!」進對未嘗名。 朕當自啓。」已而召入,歷上下儒釋道五閣、大椿蟠桃亭, 元豐中以疾告, 既愈 入謝, 帝曰:「舅久不 再升殿乃退。 覿 太皇太

以 護國軍節度使、司徒兼中書令爲中太一宮使四、給朱衣雙引騎吏前馬。

王,用教坊樂工服色衣侑酒,以示尊寵。 獻玉帶,爲秋蘆白鷺紋極精巧,詔後苑工以黃金倣其製,爲帶賜佾。 即城南為園池,給八作兵虍役,疏惠民河水灌之,且將爲築三百楹第,固辭乃止。 慈聖喪終,請郡,帝曰:「時見舅如面慶壽宮,奈何欲遠朕, 得無禮遇有不至乎?」佾皇 生日,資予如宰相、親 高麗

哲宗卽位,加少保。坤成節獻壽,特綴宰相班,優詔減拜。 從弟偕,子評、誘。 卒,年七十二,贈太師,追封

迹。 堯臣稱之,爲序其詩。 累年,所以限契丹,廢之不可。」進華州防禦使,知相州,徙河陽總管,卒。 嘗從梅堯臣學詩, 累遷東上閤門使、帶御器械。 偕從容置酒,對客數流十罪,將擊殺之,流起拜謝,偕罵曰:「復不改,必殺汝。」流爲斂 l偕字光道,少讀書知義,以節俠自喜。 為

許州都監,幕客

史沈傾險

扨持爲不法,上下畏 知雄州,議者欲廢塘濼爲田,偕曰:「何承矩、李允則營此

|許字公正,以父任累官至引進使, 列 知審官西院,積遷温州防禦使。 元祐中, 提舉萬壽

一三五七四

遷相州觀察使,歷龍神衞捧日天武都指揮使、殿前都虞侯、馬步軍副都指揮使、寧遠軍留 觀,丐外,樞密院白爲眞定路鈴轄, 後、平海軍節度使、佑神觀使。 使契丹者四,館伴者十二。在閤門十二年,預修儀制,多所 哲宗曰:「先帝待慈聖家極厚,其以爲總管。」徽宗即位,

府儀同三司 夜或滅燭能中。 性 三喜文史,書有楷法。 伴契丹使者射,嘗雙破的,客驚竦。 慈聖命書屛以奉,神宗卽賜玉帶旌其能。 尤善射,左右手如 在戚里號爲湛厚。 卒,年六十六,贈開

元祐中,以東上閤門使爲眞定府、定州路兵馬鈴轄,遷文州刺史。 |誘字公善,以蔭至左藏庫副使。 熙寧中,父佾以疾告入謝,神宗面授誘閤門通事舍人。

妄生事。」卒乘馬入。使還,爲樞密副都承旨。徽宗時,進都承旨。歷慶州團練、恩州 晉州觀察使,保慶軍留後。 使契丹,至其宮門,館客者下馬邀誘同入,誘曰:「北朝使至,及朝堂門,兩朝積好 大觀中,進安德軍節度使、醴泉觀使。與兄評同日拜,立雙節堂 防禦、 人,無

性謹密,習熟典故。卒,年六十五,贈開府儀同三司,諡曰忠定。

於家,戚里榮之。

縱神武,毋身狂蹶,以干誅夷。」時諒祚覘於屛間,搖手使止。 吉服至, 遵裕切責之, 遂易服。旣而具食上宮, 語及大順城事, 盥曰:「剽掠輩耳。」 遵裕曰: |夏 「若主寇邊,扶傷而遁,斯言非妄邪!」夏人以爲辱,亟遣人代對,終食不敢發口,輒忿怒曰: 「王人蔑視下國,弊邑雖小,控弦十數萬,亦能躬執櫜鞬,與君周旋。」瓊裕瞋目曰:「主上天 人寇大順城,諒祚中矢遁。會英宗晏駕,遣遵裕告哀,抵宥州下宮,夏人遣王盥受命,以 **橫山豪欲向化,帝使瓊裕論|种諤圖之,|諤遂取|綏州。 帥怒|諤擅發兵,欲正軍法, 諤懼,** 高遵裕字公綽,忠武軍節度使瓊之孫也。以父任累遷供備庫副使、鎭戎軍駐泊都監 神宗聞而嘉之,擢知保安軍。

稱得密旨於瓊裕,故諤被罪,瓊裕亦降爲乾州都監。遷通事舍人,主管西路羌部,駐古渭砦,

分所部羌兵爲三等,敎以軍法。

逃去,遂據其城。 歸治師。 軍,命知軍事。明年,持附順羌部圖籍及繪青唐、武勝形勢入獻,擢引進副使、帶御器械,俾 熙寧初,朝廷用王韶復洮、隴,命爲秦鳳路沿邊安撫,以瓊裕副之。 師次慶平堡,夜行,晨至野人關,羌人旅拒,引親兵一鼓破之,進營武勝城下,羌衆 詔建爲鎭洮軍,又命知軍事。 尋以熈、河、洮、岷、通遠爲一路,進西上閤 尋以古渭爲通

列傳

第二

百二十三

外戚

中

門使、榮州刺史、充總管,復知通遠軍。

未備,一旦越數舍圖人之地,使彼阻要害, 」檄使守臨洮。 明 年,韶欲取河州,瓊裕曰:「古渭舉事 韶攻河州,果不克。帝善遵裕議,令專管洮、岷、疊、巖未款 ,先建堡砦,以漸而進,故一 我軍進退無所矣。」韶與李憲笑曰:「君何 舉拔武勝。 附 今兵 者 遽 和相 與糧

遵裕 **叱知不附己,潰去。** 捷聞,加岷州刺史。 曰:「青唐無罪,第爲生羌所脅耳。」遣裨將與龍珂率衆禦之。 青唐人見龍珂泣訴, 遵裕以俞龍珂地有鹽井,遂築鹽川砦。 從韶取岷州,下之,令士衆曰:「生獲老幼與得級同。」全活者以數萬 瞎吳叱率諸羌脅青唐,欲擾邊,詔遣張玉 一攻討。

敗走。 知 無州 明 時朝廷以此城遠難守,議棄之。詔至,賊已潰矣。以功進團練使、龍神衞都指揮使, 」此城軍缺(三),守者恐,瓊裕登西門,命將縱擊,別選精騎由南門譟而出,合擊之,羌 坐薦張穆之爲轉運使,而穆之有罪,罷知穎州。 未幾,徙慶州,又坐事黜知准陽

益 范 豐四年,復知慶州。 又令節制涇原兵,劉昌祚先至靈州,幾得城,瓊裕嫉之,故不用其計,遂以潰歸,語在 詔與諸路討夏國,請濟師,得東兵十一 將, 騎不 足用, 以羣 牧馬

軍

昌祚傳。貶郢州團練副使。

哲宗 卽位,復右屯衞將軍,主管中嶽廟。 卒,年六十, 贈永州團練使。 紹聖中, 崇贈奉

國軍節度觀察留後。從弟遵惠。

遵惠字子育,以蔭爲供奉官。 熙寧中,試經義中選,換大理評事。 歷三班院主簿、 軍器

丞。

府,加寶· 府卿,出知河中府。改 密直學士 元祐初,上疏言:「法度更張,事有當否,如先帝所施設,未可輕議。」擢太僕少卿,進太 文閣待制。 知 成德軍。 河北路都轉運使,未行,拜工部侍郎,以集賢殿修撰 召 爲戶部侍郎,以龍圖閣學士知慶州。 卒, 年五十八, 知 鄆州、河南 穎昌 贈

遠嫌自保,故不罹紹聖之禍 方宣仁后臨朝,繩檢族人一以法度,乃舉家事付遵惠,遵惠躬表率之,人無間言。 從姪 上林。 亦能

一能此 士 林字才卿, 則爲 [良吏矣。] 宣仁聖烈皇后之弟也。 每欲進擢,后屢辭輒 累官 止 內殿崇班 喜儒學,涉閱 殿直, 經 英宗書「謹守法 史, 通 大義, 律」四 尤有巧智。 字海

列

德州 嘗監 刺 揚州召伯牐 史。 神宗立,加贈昭德軍節度使。 稅,木舊用火印,士林改刃其印文,鑿以爲識,尤簡便,傍郡皆效焉。 紹興初,追封普安郡王。 子公紀。 卒,贈

性儉約,珍異聲伎無所好,奉祿多以給諸族,得任子恩,均及孤遠。 感德軍節度使,諡曰懷僖。 公紀字君正, 歷閤門祗侯、通事舍人,累進寧州刺 紹興初,追封新興郡王。 子世則 史、團練使、 永州防禦使、集慶留後。 持宣仁后喪未終,卒,贈

鄓。 以通經典,轉內殿承制。 世則字仲貽,幼以恩補左班殿直,至內殿崇班。 累遷康州防禦使,知西上閤門事。 復用父遺表恩爲閣門祗候, 後除親衞

以從。· 民請和,孝民邀宰執、親王詣軍前議事,高宗在康邸,請行。是日,世則入對,遂除計議副使 多命世則。。金人軍城下,又命世則使其軍,還,進秩二等,遷知東上閤門使。。金遣滅人吳孝 宣和末,金泛使至,徽宗命世則掌客。世則記問該洽,應對有據,帝聞,悅之,自是掌客 康王復使河北,世則改華州觀察使,充參議官。召對,賜金帶。

諸路,以定人心。進遙郡承宣使,不拜。高宗承制,轉越州觀察使。及即位,除保靜軍承宣 當高宗艱難中,世則嘗在左右,寢處不少離。大元帥府建,改元帥府參議官,因請布檄

提舉萬壽觀。 詔令編類元帥府事迹付史館,召爲樞密都承旨兼提舉京畿監牧, 再提舉

萬壽觀。

判温州。 據鞍,又以舊所御肩輿賜焉。 太傅,賜田三十頃,諡曰忠節 制以爲感德軍節度使,充萬壽 世則居温州,帝遣中使諭守臣以時給奉祿,凡積二萬緡,因請以裨郡費。 尋以病丐罷,復爲萬壽觀使。 帝每念宣仁聖烈皇后保祐三朝,中遭誣詆, 觀使,進開府儀同三司,奉朝請, 十四年,召入覲,進少保,懇求還。 賜第臨安。 外家班秩 卒,年六十五,贈 除景靈宮使, 常病瘍,艱於 無 顯者, 兼

崇班 向傳範字仲模,尙書左僕射敏中之子。以父任爲衞尉丞。 帶御器械,歷知相、恩、邢三州。入管幹客省、閤門、皇城司。 娶南陽郡王惟吉女, 知陝州 仁宗賜詩 改 以寵 內殿

其行。

求之源。」樞密使文意博 1L 他 日妄求者。」以密州觀察使卒,贈昭德軍節度使,諡曰惠節。 熙 寧初, 知剛州兼京東西路安撫使いる。 日:「傳範累典郡,非緣外戚。」神宗曰:「得諫官如此言, 諫官楊繪言:「傳範領安撫使, 無以杜外戚 遊善, 可以 饒

列傳第二百二十三 外戚中

傳範, 宰相子,聯戚里,所至有能稱。 以橐中貲千餘萬葬族人在殯者六十四喪。 從姪

|經、|綜。

經字審禮,以蔭至虞部員外郎。 神宗爲穎王,選經女爲妃,改莊宅使。 帝卽位,妃爲皇

后,進光州團練使。

敢言。 先以圭田租入振救之,富人爭出粟,多所濟活。 獨斥歸有司,唯以供享勞賓客軍師之用。 守陳,民窮蓋我責,我自爲此,不爾累也。」方鎭別賜公使錢,例私以自奉,去則盡入其餘,經 以維州防禦使知陳州,歲中閱囚,活重辟三人。 經得其情,卒窮治如法。歲大雪,輒弛公私僦錢以寬民,有司持不可,經曰:「上使我 知河陽, 會旱蝗,民乏食,經度官廩歲用無餘,乃 西華令掠人至死,誣以疾, 吏畏令, 莫

墓下,賜篆碑首曰「忠勤懿戚」。 其喪,皇后出哭于新昌第。喪至,慶壽、寶慈宮交遣謁者予醊,后臨于國門之外。贈侍中,諡 車徒,三宮皆遣使送之,車馬相屬於道。未踰歲,得疾還,卒于淄州,年五十四。 徙徐州,遷明州觀察使。召還,提舉景靈宮。 將葬,遣近臣典護穿復土,給太常鹵簿。帝出郊奠之,周視其柩。葬三日,后臨于 進定國軍留後,復出知青州。 旣行,官給 韶內侍迎

元殿下,后召經見行幄,勉以盡忠朝廷,經亦以善事三宮爲言,不及其家事。 經所至勤吏治,事皆自省決,頗欲以才見於用,故數請外補。 嘗因太祖忌日,百官班開 子宗回、宗良。

其高彊,罰其不進者,卒亦無事。性寬裕,善治劇,於姦惡不少恕。官累中散大夫,卒。 提舉,敎之急,衆不悅,監兵夜排闥告變,綜疑有他謀,就寢自若。明日大閱,申嚴號令,賞 潭、汾、密、棣、沂七州。 綜字君章,知歔縣,籍閭里惡少年,有盜發,用以推迹輒得。 |沂阻山多盜,|綜請用重法繩禁,歲斷大辟減半。 兵久惰, 通判桂州、常州,知隨、鼎、 會初置官

削官爵流郴州。行二日,聽家居省咎。踰年,盡還其故官。 韶開封府鞫實,御史中丞吳執中臨問,宗回惶懼,上還印綬,以太子少保致仕。言者不已, 節度使,檢校司空,封永陽、寧海、安康、漢東郡王,開府儀同三司。崇寧初,有告其陰事者, 宗回字子發,累官相州觀察使。 徽宗立,進彰德軍留後。 歷安國、保信、鎭南、保平軍

餞,發廩興力役,饑者得濟,而官舍帑廩一新。欽聖后服除,起奉朝請,繼命止朝朔望。卒, 年六十二,帝制服苑中,贈檢校少師,諡曰榮縱 宗回少驕恣,有小才,嘗權羣牧都監,數以蕃息被賞。 出知蔡州,擒劇賊,殲其黨類。歲

列

能恪共自守。 度使,永嘉郡王,開府儀同三司。 欽聖后臨朝時,嘗爲陳瓘論其與蔡京相結。 宗良字景弼,歷秀州刺史、利州觀察使、昭信軍留後,奉國、淸海、鎭東、武寧、寧海軍節 宣和中,卒,年六十六,贈少保。 及預政事,亦

酤初,疏言:「變法易令,始於王安石, 矣。」進武勝軍留後。 張敦禮,熙寧元年選尙英宗女祁國長公主,授左衞將軍、駙馬都尉,遷密州觀察使。 成於蔡確。近者退確進司馬光, 以臣觀之,所得多 元

崇,欲其黨儔盡見收用。」乃責授左千牛衞大將軍,勒止朝參。徽宗立,有司以敦禮在貴籍, 亦太重矣。」復和州防禦使,進保信軍留後。 奏審恩賜,帝與欽聖后皆以爲當與。惇等執前疏,欽聖曰:「戚里何必預知朝廷事,當時罰 章惇爲政,言:「敦禮忘德犯分,醜正朋邪。 密封章疏,詆毀先烈。 引譽罪首,謂當褒

親愛隆厚,禮遇優渥,而敦禮詆毀盛德,罪大謫輕。今復與之節鉞,無乃傷陛下『紹述』之志 崇寧初,拜寧遠軍節度使。諫官王能甫言:「敦禮以匹夫之賤,一日而富貴具焉。

乎 」乃奪節,仍爲集慶軍留後。 大觀初,復節度寧遠軍,徙雄武。 卒,贈開府儀问三司。

卒,贈崇信軍節度使,諡曰恭僖,賜墓寺,寺額爲「旌孝」。澤起田里,際會恩寵,能自安繩檢。 區, 帝欲廣其居,固辭。 寵賚甚厚。 任澤字天錫,仙遊夫人母弟也。 神宗時,累遷皇城使,領昌州刺史。 當任子,弗請,其篤謹如此。 英宗入繼大統,召至延和殿,授西頭供奉官, 護仙遊柩遷耐于濮園, 眞拜嘉州 刺史。

校勘記

(1) 左龍武將軍 「將」字原脫,據宋會要帝系八之四七、東都事略卷二五李崇矩傳附遵勗傳補。

 \exists 鎭國軍 歐陽修歐陽文忠公文集卷三二李公墓誌銘、隆平集卷九本傳、東都事略卷二五李遵勗

傳都作「鎭潼軍」。

慈聖光獻皇后 「獻」原作「憲」,據本書卷二四二本傳、卷二五八曹彬傳改。

(图) 中太一宮使 三〇八,曹佾領中太一宮使和封濟陽郡王都在兼中書令後。 「中」字原脫,據長編卷四二五、東都事略卷一一九本傳補。 又據長編卷三〇三、

列傳第二百二十三 校勘記

(三) 岷城軍缺 (*) 京東西路安撫使 「軍」,長編卷二五二、長編紀事本末卷八五都作「卑」。 「東」字原脫,據本書卷三二楊繪傳補。

宋史卷四百六十五

列傳第二百二十四

外戚下

孟忠厚 韋淵 錢忱 那煥 潘永思 吳益 弟蓋 李道

鄭興裔 楊次山

宮火,出居忠厚家,由是冤北遷。金兵退,張邦昌迎后聽政,后遣忠厚持書遺康王。王卽位, 故忠厚得以仕進。 將迎后,授忠厚徽猷閣待制,提舉一行事務,尋兼幹辦奉迎太廟神主事。 孟忠厚字仁仲,隆祐太后兄、追封咸寧郡王彥弼子也。 宣和中,官至將作少監。 靖康元年,知<u>海州</u>,召權衞尉卿。 后退居盛華宮,哲宗恩眷不衰, 金人圍城,后

授常德軍承宣使,幹辦皇城司。 帝幸揚州,除顯謨閣直學士,臺諫交章論列,帝以太后故,難之。后聞, 未幾,奉太后幸杭州。 苗傅亂平, 趙鼎謂張浚曰:「太后復 即命易武秩,遂

列傳第二百二十四 外戚下

解職。

辟,其功甚大,當推恩外家。」淺乃奏忠厚寧遠軍節度使。 專奉太后幸南昌,歸至越,以母憂

佑陵,秦檜當爲總護使,憚往,乃除忠厚樞密使以代其行。|檜與忠厚僚壻也,然心實忌之。 帝以太后攢會稽,乃命忠厚判紹興府兼修奉攢宮事,加少保。三梓宮歸,充迎護使。 充禮儀使,奉太后神御幸温州。 山陵事畢,忠厚欲歸樞密府,檀諷言路引故事論列,遂判福州。 頃之,后崩,以祔廟恩,起復鎭潼軍節度使〔〕,開府儀同三司。及后大祥,封信安郡王, 紹興九年,判鎭江府,改判明州兼安撫使,改判婺州。 及營

爲體泉觀使。檜死,召還行在,授保寧軍節度使,判平江府,再改判紹興府,過闕入見,復詔 充萬壽觀使,提舉秘書省。二十七年,卒,贈太保。 「本無時才,出爲世用」語。中丞詹大方希檜意,論忠厚表辭輕侮,謂今日不足與有爲,遂罷 時海寇猖獗,帝憂忠厚不能弭其患,改判建康府,又改判紹興府。 會郊赦加恩,謝表有

見,語所善王銍曰:「忠厚與檜雖有親好,每懷疑心,今欲求一不傷時忌對箚。」壁教之,但言 家恩澤,如有夤緣,令三省執奏。御史劾秦檜當國,親姻扳援以進,忠厚獨與之忤。自越入 乞免提舉學事而已,然亦見廢。帝以太后擁佑功,故眷忠厚特優。后在路華三十年,恩澤 忠厚奉昭聖太后訓,避遠權勢,不敢以私干朝廷。明受之變,太后垂簾,忠厚乞裁節本

例。 未嘗陳請, 及卒,三子皆除直秘閣,親屬六人各進以一官。 韶賜忠厚田三十頃以賞之。 旣奉內祠, 金使至, 特命押班, 且令月過局, 如宰執

遂命同管客省、四方館、閤門事。 退,張邦昌 「横行五司尙未邍元豐舊制,乞倂引進司歸客省,東西上閤門合而爲一,以省冗費。」從之。 章淵, 遣淵持書遺康王于濟南。王卽位,遷親衞大夫、寧州觀察使、知東上閤門事,言: 顯仁太后季弟也。靖康末,官至拱衞大夫、忠州防禦使、勾當軍頭引見司。 金人

從后歸,卽令致仕。 五十頃,房緡錢日二十千。帝久不予淵官,聞太后將入境,乃封平樂郡王,令逆于境上。 篤,留守||呂頤浩奏以|||代,帝不欲以戚里管軍,不許。 不許。久之,落階官,除德慶軍節度使。 淵乃言,自宣和及今,十二年未嘗磨勘,乞遷秩。吏部言,在法,橫行無以年勞磨勘者,帝遂 淵性暴橫,不循法度,帝慮其有過,難於行法,遂遷福建路副總管。 又詔奉朝請, 遷少師。 召赴行在,除開府儀同三司。 淵在內不得逞,乞致仕,任便居住。 淵陳乞恩數,帝詢太后家故 會建康軍帥邊順 淵引疾丐祠,許之。 從之。 例,賜 疾 田 旣

未幾,帝恐其肆橫於外,復詔落致仕,還居賜第。 太后朝景靈宮,淵見后,出言詆毀,詔

列傳

第

百

= +

24

外戚下

侍御史余堯弼卽其家鞫治,淵具伏誣罔,責授寧遠軍節度副使,袁州安置。 數年復故職,累

遷太保、太傅。 卒,贈太師。子三人:訊、謙、讜。

訊,紹興中,官至達州刺史,坐過,用太后旨降武德郎,與嶺外監當。 識好學能詩,官至

建康軍節度使。

使,十年不遷。 使欲用樂,璞不可,自朝至夜漏下三十刻,金人不能奪。及入見,其閤門令璞吉服入, 謙子蹼,淳熙末,仕至太府少卿。高宗崩,擢司農少卿,爲金國告哀使。 日將中,乃以凶服見。 寧宗嘉其恬退,授淸遠軍節度使,致仕。 紹熙初,除煥章閣,論者以爲非祖宗舊制, 卒,贈太尉。 **遂換授明州觀察** 金主錫宴,其館 璞又

|錢忱字||仙誠,吳越王||俶五世孫。 父景臻,尚仁宗第十女秦魯國大長公主,生忧,神宗命

賜名,除莊宅副使、騎都尉。

帝嘗論景臻曰:「主賢,宜有子,爲擇嘉配。」娶唐介孫女,又晁迥外孫。 忱從二家遊,伯

父勰在翰苑,因得識一時名卿。

哲宗愛之,常使侍左右。徽宗覃八寶恩,爲邕州觀察使,遷武寧軍觀察留後。 喜其靖

保,封榮國公。三十年,遷少師,仍舊節,致仕,給眞奉。明年卒,年八十餘,贈太師。子端禮 共,除瀘川節度使。 宮使,御書「忠孝之家」四字賜之,進開府儀同三司。 飲宗加檢校少保,尋納節。 高宗立,復拜檢校少保、 紹興十五 年,以秦魯主終喪,除少 瀘川節度使、中太

自有傳。

宣德郎、莫州司錄。移知開封府陽武縣,都大提舉開德、大名府堤埽。 邢煥字文仲,開封人。以父任調孟州汜水縣主簿,監在京藥局、平準務、 歷開封府士、工、儀 茶場,以勞改

制。 言事切當,宗澤忠勞可倚,黃潛善、汪伯彥誤國,其言多所裨益。 諫議大夫衛膚敏言,后父不當班從臣,遂改光州觀察使,除樞密都承旨。 詔納其女爲康王妃。 靖康初,主管<u>亳州</u>明道宮。 王卽位,升古文殿修撰,進徽猷閣待 焕屢奏馬伸

遷保靜軍承宣使。苗、劉之變,煥自度不能爭,廼病免。 兼提舉萬壽觀, 求去不已,改

江州太平觀,遂徙居忠州。

紹興二年,入對,首陳川、陝形勢利害,請幸荆南,分兵以圖恢復,凡數百言,帝甚嘉之。

列傳第二百二十四 外戚下

復以爲都承旨,引疾不拜。 擢慶遠軍節度使,提舉洞霄宮。

煥涉學有文,節儉自持,未嘗恃恩私請,識者取焉。是年,卒,贈開府儀同三司,諡恭簡

加贈少師,追封嘉國公。

潘永思,賢妃叔父也。 **蛇初進封,韶以梁師成第賜永思。** 建炎初,爲閤門宣贊舍人、帶

御器械。

論,范宗尹請出永思,帝曰:「未可,姑罷祿以困之,庶知悔過。」遂奪職。旣而辛企宗言永思 元站太后在虔,帝遣永思迎歸,權三省、 樞密事。 盧益頗與之交結,為諫官吳表臣所

嘗捕魔賊有功,復爲帶御器械。

逮。 獄成, 未幾, 大理 追一官。尋復爲閤門宣贊舍人,遷同知閤門事。永思乞增給飱錢,戶部言其不 推治偽告,事連永思,帝曰:「永思雖戚里,旣有過,安可廢法!」乃罷職就

應格法,乃止。 紹興八年,自右武郎擢右武大夫,知閤門事,尋卒。 列傳第二百二十四 外戚下

御 有書名。 器 械。 吳益字叔謙,蓋字叔平,俱憲聖皇后弟也。 后受册推恩, 蓋,紹興五年,以恩補官,累遷宣贊舍人。 益加成州團練使, |蓋加文||州刺史。帝爲置皇后宅大小學教授,以王 益,建炎末,以恩補官,累遷幹辦御輦院、帶 帝與后皆喜翰墨,故爲、蓋兄弟師法,亦

其家,今若遽出其壻則傷恩,臣僚無得更有論列。」自是不復遷。 之勢,乞褫職名,以示至公。 加恩,帝乃特命賜益三品服,累加秘閣修撰,直徽猷閣。 使,加太尉、開府儀同三司(三)。 使,始進 寶文閣。 追封 益 [娶秦檜長孫女,又與王繼先交相薦引,故三家姻族皆躐美官。 衞王。 少保。 |檜死,其子||熔復請於帝,又升||敷文閣待制。 孝宗嗣位,進 帝謂:「鵬舉所論甚切當,然股於奠檜日, 少傅,又進太師,封太寧郡王。 初旣建節,以膾故,授文資,直秘閣。 中丞陽鵬舉言,益以庸瑣之才,恃親 以檜提舉編修寬恤詔令,又加 乾道七年,卒,年四十八,諡莊 顯仁太后葬,爲攢宮總護 益歷官至保康軍節 檜進徽宗御製, 辭免 **諭檜妻子**,許以 益直 保 度 全 昵

卒,年四十二。 蓋官至寧武軍 贈太傅,追封鄭王 節度使〔三〕,亦累升太尉、開府儀同三司、少保,封新興郡王。 乾道二年,

踞 册 慶元府,位至少師,判建康府兼留守,卒。 軍節度使,復以才選,除知明州兼沿海制置使。 立 死後,宋遣使至金議和,屢不合,金人言南使中惟吳琚言爲可信。 寧宗。琚言於后曰:「垂簾可暫不可久。」后遂以翌日徹簾。 益 子 習吏事,乾道 九年,特授添差臨安府通判,其後歷尚書郎 方孝宗崩,光宗以疾不能執喪,大臣請太后 寧宗初,乃得祠, 琚嘗使金, 奉朝 請 部使者, 金人嘉其信義 尋 知鄂州 換資至鎮安 垂簾, 再知

| 据弟璹,仕至保靜軍節度使。 蓋子躟,亦至昭化軍節度使。

掌其 閤門宣贊舍人。 仲爲霍明所殺,道與統制李橫率兵稿素圍明于即,明亡去。 軍。 李道字行之,相州人。其中女爲光宗后。初,道與兄旺聚衆歸宗澤,澤因事斬旺,命道 澤薨,道引軍依襄陽鎭撫使桑仲,仲以爲副都統制兼知隨州,奏于朝,授武義郎、

除 |鄧 院以道能察軍情,不受鎮 劉豫遣人持書招道,道不從,執其使以聞,詔嘉獎之。豫怒,遣將穆楷攻道,道拒破之。 随州 鎭撫使兼 知野州。 撫之命,理宜褒賞。 時李橫已命別將守鄧,道憚橫,不敢受,遂命仍知隨州。 詔領榮州團練使,進武義大夫。

胡安中守唐州, 勢孤不能自立,遂附豫。 道招之,安中復來歸。 會李成入寇,鎭撫使李

郢州 横棄襄陽去, 襄陽都 統制。 道亦棄隨南歸,至江州。 從飛收復襄陽等郡,授行營護軍。 韶道屬岳飛爲選鋒軍統制, 累至復州防禦使、果州觀察使。 入唐州, 擒偽將,除唐鄧 戍

鄂州 ,加中侍大夫、武勝軍承宣使,又升御前諸軍統制

桂陽,詔道移 武 興蠻楊再興連歲寇掠,道破其衆,擒再興及其二子,遷保寧軍承宣使。羣盜朱持等聚 軍衡州經理,道遣高仲等擊平之。落階官,加龍、神衞四廂都指 揮 使, 遷鎭

軍承宣使。

召奏事,道代爲御前諸 大將言道與鄂帥不 金將渝盟,命道以所部戍剌南府。 協,罷。 軍都統制。 踰年, 起授捧日、天武四厢 |金將劉士夢屯光化境,道掩擊,焚其舟,廖遂遁去。 帥臣劉錡奏改爲御前前軍、 都指揮使,知荆 右軍, 府。 就命道統之。 尋因 錡

南

卒,乃拜慶遠 隆 興初, 軍節度使,贈太尉,諡忠毅。 湖北諸司 劾其過, 帝曰:「道恃戚里妄作, 后旣貴,進封楚王。 可罷。」久之,再爲湖北 孫孝友、孝純,皆至節度使。 副 總管。 及

|海 軍 節 鄭 度 興 使。 裔 字光錫, 父蕃 和州 初名興宗,顯肅皇后外家三世孫 防禦使。 興裔早孤,叔父藻以子字之,分以餘貲, 也。 曾 祖 紳 封樂平 郡王。 興裔不受,請立 祖翼之,陸

下

葬,充攢宮內外巡檢,累至江東路鈴轄 瞻宗族。 及藻沒, 遂解官致追報之義。 初以后恩授成忠郎, 充幹辦祗候庫。

習更事,行當用卿。」

會復置武臣提刑,就命爲之,加遙領高州刺史。

郡縣積玩,檢驗法廢, 興裔創爲格目,分畀屬縣,吏不得行其姦,因著爲令。 非 其人。徙福建路兵馬鈴轄,過闕入見,詢以守令臧否,興裔條析以對。 |乾道初,建康留司請治行宮備巡幸,興裔奏勞人費財,乞罷其役,且言都統及馬軍帥皆 帝曰:「卿識時務,

常無及,興裔請置澳長,寇至徑率民兵禦之。又言禁兵事藝不精,多充私役,乞行禁止,尉 以捕盜改秩,多僞,當加審實。帝善其數論事,詔加成州團練使。 **建、劍、汀、邵鹽筴屢更,漕臣請易綱運爲鈔法,興裔極言其不可。海寇倏去忽來,調兵**

殺鄰舍兒,取其臂釧而棄其屍,獄成,刑部以無證左,出之。命興裔覆治得實,帝喜,賜居 東、浙西、江東提刑,請祠以歸。 丁母憂去官,服闋,復故職,除均州防禦使。 時傳聞金欲敗盟,召興裔爲賀生辰副使(即)以覘之,使還,言無他,卒如所料。 尋韶知閤門事兼幹辦皇城司,又兼樞密副都承旨。 軍婦楊 累差浙

嘗卻鄰道互送禮,至是按郡籍,見前所卻者有出無歸,遂奏嚴其禁。 揚與廬爲鄰。初,興裔在廬 揚有重屯,糧乏,例糴

乃息。 築城,有謂韓世忠遺基不可易者,命興裔往視,旣至,闕地丈餘增築之。帝閱奏,喜曰:「興裔 他境,興裔搜括滲漏以補之,食遂足。民舊皆茅舍,易焚,興裔貸之錢,命易以瓦,自是火患 不吾欺也。」 又奏免其償,民甚德之。修學宮,立義塚,定部轄民兵升差法,郡以大治。 楚州議改

准、襄兩道帥,損登進士甲科,與抗皆有位于朝。 位,除知明州兼沿海制置使。告老,授武泰軍節度使。卒,年七十四,贈太尉,諡忠肅〔台〕。 紹熙元年(至), 興裔歷事四朝,以材名結主知,中興外族之賢,未有其比。 子三人:挺以橫行團練使歷 遷保靜軍承宣使,召領內祠,充明堂大禮都大主管大內公事。 寧宗即

死事。祖漸,以遺澤補官,仕東南,家于越之上虞。 楊次山字仲甫,恭聖仁烈皇后兄也,其先開封人。會祖全,以材武奮,靖康末, 捍京城

郎。 州觀察使,尋拜岳陽軍節度使。后謁家廟,加太尉。韓侂胄誅,加開府儀同三司。尋進少 后爲貴妃,累遷帶御器械、知閤門事。丐祠,除吉州刺史,提舉佑神觀。后受册,除福 次山儀狀魁偉, 少好學能文, 補右學生。后受職宮中, 次山遂霑恩得官, 積階至武德

列

保,封永陽郡王。 南郊恩加少傅,充萬壽觀使。 致仕,加太保,授安德軍、昭慶軍節度使,改

封會稽郡王。

次山能避權勢,不預國事,時論賢之。 嘉定十二年,卒,年八十一,贈太師,追封冀王

子二人。

谷至太傅、保寧軍節度使,充萬壽觀使、永寧郡王。

授保寧節度使,提舉萬壽觀,奉朝請,進封信安郡侯。十五年,以檢校少保進封開國公。 挽弦三發三中的,全使氣沮。嘉定改元,除揚州觀察使、知閤門事,進保寧承宣使。久之, 祗侯,尋帶御器械。 石字介之,乾道間入武學,以恭聖仁烈后貴,賜第。 嘉泰四年,充賀正旦接伴使。時金使頗驕倨,自矜其善射,石從容起, 慶元中,補承信郎,差充閤門看班

心,苟不從,禍變必生,則楊氏且無噍類矣!」后默然良久,曰:「其人安在?」彌遠等召問 帝所立,豈敢擅變。」谷、石凡一夜七往反以告,后終不聽。谷等拜泣曰:「內外軍民皆已歸 入,遂矯詔廢<u>诚爲濟王,立</u>畇,是爲理宗。授開府儀同三司,充萬壽觀使。 寧宗崩,宰相史彌遠謀廢皇子城而立成國公昀,命石與俗白后,后不可,曰:「皇子,先

嗣位,或尚在幼沖,或素由撫育,軍國重事有所未諳,則母后臨朝,宜也。今主上熟知民事, 時寶慶垂簾,人多言本朝世有母后之聖。石獨曰:「事豈容槪言?昔仁宗、英宗、哲宗

以臨 天下悅服,雖聖孝天通,然不早復政,得無基小人離間之嫌乎。」乃密疏章獻、慈聖、宣仁所 朝之由 ,遠及漢、唐 母后臨朝稱制得失上之,后覽奏,即命擇日徹簾。 進石少保,對永

寧郡王。以壽明慈睿仁福三册太后寶,進至太傅。

矧 恭 有 除 彰德、集慶節度使,進封魏郡王。 元勛盛德,徒以 聖 石 性恬澹, 抑遠族屬,意慮深遠:言猶在耳, 每拜爵命必力辭。 恭聖祔廟、除太師。 卒,年七十一,贈太師。 何可遽忘?」乃合疏懇辭,至再三,不受。 兄谷疑於辭受,石力言曰:「吾家非 及屬疾,

校勘記

起 復 鎭 潼 軍節度使 潼 原作 海), 據緊年要錄卷四五、汪藻浮溪集卷一 孟忠厚特授起復

〉制改。

- Ξ 開 府儀同三司 「開府」二字原脫,據曹勛松隱文集卷三五吳益墓誌銘補。
- 寧武 軍節度使 「寧武」二字原倒,據同上書同卷吳蓋墓誌銘、繫年要錄卷一七二改。
- 賀生 一辰副 國文忠公集平園 使 「副」字原脫。按鄭興裔副韓元吉爲賀金主生辰使,見金史卷六一変聘表;周必大 續稿卷三〇鄭興裔神道碑正作「副使」。據改。

列傳第二百二十四 校勘記

金

(云) 忠肅

紹熙元年 「紹熙」原作「紹興」,據周益國文忠公集平園續稿卷三〇鄭興裔神道碑改。

周益國文忠公集平園續稿卷三〇鄭興裔神道碑作「惠肅」。

了中主早三「京青 o

一三五九八

宋史卷四百六十六

列 傳第二百二十五

宦者一

竇神寶 王仁睿 王繼恩 李神福 衛紹欽 弟神祐 劉承規 石知顒 孫全彬 閻承翰

鄧守恩

秦翰

周懷政

張崇貴

張繼能

韶臣僚家毋私蓄閹人,民間有閹童孺爲貨鬻者論死。 宋世待宦者甚嚴。 太祖初定天下,掖庭給事不過五十人,宦寺中年方許養子爲後。 去唐未遠,有所懲也。 叉

權重,貂璫有懷姦慝,旋踵屛除,君臣相與防微杜漸之慮深矣。 啃 中更主幼母后聽政者凡三朝,在於前代,豈非宦者用事之秋乎!祖宗之法嚴,宰相之 厥後,太宗却宰相之請,不授王繼恩宣徽,眞宗欲以劉承規爲節度使,宰相持不可而

宦 者

列

傳

第 =

百二十

五

「君子之道,辟則坊與! 大爲之坊,民獨踰之。」可不戒哉!! 然而 宣 政間童貫、梁師成之禍, 亦豈細哉! 南渡苗、劉之逆,亦宦者所激也。 作宦者傳。 坊記日:

賊,前後破砦三十六,斬千餘級,大獲鎧甲、牛馬、豪駝, 爲黃門,太平興國中,從征太原,擐甲登城,中流矢,稍遷入內高品,監抖州戍兵。 部 邢臺徙延州,未至郡,詔神寶乘傳權州事。環州近邊內擾,與陳德玄討之,破牛家族二十八 心,由此或生邊隙。」乃止。俄轉殿頭高品。 尹憲屯夏州,時岌伽羅膩等十四族久叛,神寶率兵大破之,焚其廬帳,斬千餘級,虜獲甚衆。 獲其渠帥九人。西戎寇鄜,以援之之勞,遷供奉官,與田紹斌部送靈州獨糧,卽命駐泊 且規度通遠入靈武路,就命環慶同駐泊。 竇神寶,父思儼,五代時爲內侍,宋初皇城使。 雍熙中,朝廷遣使綏、宥、麟、府州,募邊部願攻契丹者,賜以金帛。 神寶上言:「狼子野 牛家族復結衆叛,又破之,殲餘黨於極泉鎮 淳化中,使河東,閎視堡栅兵騎。慕容德豐自 兄神興,左領軍衞大將軍致仕。 因築三砦。 詔褒之。 九年, 神寶初 屢出 命與 襲

至道初,繼遷再寇靈武,神寶遣人間道告急闕下。 賊圍之歲餘,地震二百餘日,城中糧

李繼遷入寇,與慕容德豐襲破其堡砦,焚帳幕,獲人畜數萬計。

連詔嘉獎, 遷內殿崇

浦洛河、清遠軍援獨糧,與楊允恭議造小車三千,運粮至環州。 糗皆竭,潛遣人市糴河外,宵運以入。間出兵擊賊,賊引去,以功拜西京作坊副使。 三年,遷西京左藏 庫副使。 又命于

出使靈武,還,奏對稱旨,面授供備庫使。

使、領密州刺史兼掌往來國信。 朝陵、留與劉承珪同掌大內事。 與熟魏族接戰,詔神寶和洽之,至則定其經界,遣悉還舊地。入爲內侍右班副都知 咸平中出爲高陽關鈴轄,徙貝、冀巡檢。會原州野俚族三千餘衆徙帳于順成谷,大蟲堪 大中祥符初,勾當三班院,又掌諸王宮事。 遷西京左藏庫 眞宗

錄 《其子守志爲入內供奉官。 神寶蒞 職精恪, 性吝嗇, 畜貨鉅萬。 天禧初,以皇城使罷內職。三年,卒,年七十一。

秦邸陰 頗 稱旨。 王仁睿,不知何許人。年十餘歲,事太宗于晉邸,服勤左右,甚淳謹;及卽位,宣傳指 事。 雍 歷入內小底都知、洛苑副 熙四年被疾,遣太醫診視。 使。 命典宮闈出納之命,最居親近。 卒,年四十一,特贈內侍省內侍。 嘗與柴禹錫等發

揮

國 朝以 列 傳 來, 簿 _-內侍 百 都 + 知、押班不領他職。 五. 宦 者 淳化、至道後,皆內殿崇班以上兼充, 一三六〇一 多至諸司

使,有領觀察使者,沒皆有贈官,官給葬事。

男四人爲假子,又縱卒略民家小兒,致其母抱兒投海死,决杖配掃灑班,復申前詔以戒厲之。 始聽養子,仍以其名上宣徽院,違者準前詔抵死。咸平中,徐志通爲温、台等州巡檢,坐取李歡 舊制,內侍人許養一子,以充繼嗣。開寶四年,以其爭財起訟,詔自今滿三十無養父者,

王繼恩, 陝州陝人。 周顯德中爲內班高品。 初養於張氏,名德鈞。 開寶中求復本宗,

太祖召見,許之,因賜名焉。累爲內侍行首。

十月,加武德使。太祖崩,副杜彦圭案行陵地,尋充永昌陵使。太平興國三年,遷宮苑使。 久之,領河州刺史,掌軍器弓槍庫。 會討江南,與竇神興等部禁兵及戰船抵采石。九年春,改裏面內班小底都知,賜金紫。

爲鎭、定、高陽關三路排陣鈴轄口。淳化初,賜甲第一區。五年,加昭宜使,勾當皇城司。 按行增築之。及遣將北伐,又爲排陣都監,屯中山。改皇城使。端拱初,領本州團練使,又 敗績之後,河朔諸路爲契丹所擾,城壘多圮。四年,詔繼恩與翟守素、田仁朗、郭延濬分路 雍熙中,王師克雲、朔,命繼恩率師屯易州,又爲天雄軍駐泊都監。自岐溝關、君子館 傳 第 _ 百 _ + 五. 宦

繫囚 分遣討賊,並受繼恩節度。詔前軍所至,其賊黨敢抗王師者,即須殺戮;如本非同惡,受制 一,非十 李順亂成都,命爲劍南兩川招安使,率兵討之。 ·惡正贓,悉得以便宜決遣。二月,命馬步軍都軍頭王杲趣劍門、崇儀使尹元 軍事委其制置,不從中覆。 管內 由 | 峽路 凶

徒,先被脅從今能歸順者,悉釋其罪。四月,繼恩由小劍門路入研石砦破賊,斬首五百級,逐

北過青疆嶺,平劍州,進破賊五千于柳池驛,斬千六百級,賊衆望風奔走,殺戮溺死者不可勝

計。又克閬、綿二州。五月,至成都,破賊十萬餘,斬首三萬級,獲順及鎧甲、僭僞服用甚衆。 朝議賞功,中書欲除宣徽使。 太宗曰:「朕讀前代史書,不欲令宦官預政事。

宣徽使,

臣,命學士張洎、錢若水議別立宣政使,序位昭宣使上以授之。進領順州防禦使行 執政之漸也, 止可授以他官。」宰相力言繼恩有大功, 非此任無足以爲賞典。上怒, 深責相

进伏山谷間,州縣有復陷者。太宗知之,乃命入內押班衛紹欽同領其事。 博局棋枰自隨,威振郡縣。僕使輩用事恣橫,縱所部剽掠子女金帛,軍士亦無鬭志。 繼恩握重兵,久留成都,轉餉不給,專以宴飮爲務。每出入,前後奏音樂。又令騎兵執 又遺樞密直學士 餘城

張鑑、西京作坊副使馮守規(三乘傳督其捕賊。 議分減師徒出蜀境,以便粮運

卒皆怨。一夕臥帳中,指揮使張嶙遣卒排闥入,斬文壽首以出。會夜昏黑,嶙猶疑其非,然 高品王文壽者,隸繼恩麾下,繼恩遣領虎翼卒二千,分遂州路追討。文壽御下嚴急,士

列 一三六〇三

鄉導擊賊,悉平之。 歸,因可破賊。上然之,令巡檢程道符諭旨。亡卒斬嶙,函首送繼恩,皆自拔來歸。 宗欲盡誅軍人妻子,近臣或請勿殺,悉索營中書,遣帥招撫,諭以釋罪,親屬皆全,必自引來 炬照之, 曰:「是也。」時<u>嘉州</u>賊帥張餘有衆萬餘,<u>嶙</u>即以所部與之合,賊勢甚盛。 初奏至,太 因使爲

薄,無以慰中外之望。」上大怒,以拱辰惑衆,杖脊黥面配崖州。 神福按行山陵,加領桂州觀察使。 至道二年春,布衣韓拱辰詣號上言:「繼恩有平賊大功,當秉機務,今止得防禦使,賞甚 俄召繼恩。 太宗崩,命與李

尋察其狂妄,追還詔書。 之交往,每以多寶院僧舍爲期。有潘閬者能詩詠,賣藥京師,繼恩薦之,召見,賜進士第。 忠之,自是寵遇莫比。喜結黨邀名譽,乘間或敢言薦外朝臣,由是士大夫之輕薄好進者從 繼恩初事太祖,特承恩顧。及崩夕,太宗在南府,繼恩中夜馳詣府邸,請太宗入,太宗

削籍,長流尋州。 右監門衞將軍,均州安置,籍沒貲產,多得蜀土僭擬之物。 連宮禁者。素與胡旦善,時將加恩,密諉其爲褒辭。又士人詩頌盈門。上惡其朋結,黜爲 及眞宗初,繼恩益豪橫,頗欺罔,漏泄機事,與參知政事李昌齡緘題往來,多請託,至有 詔中外臣僚曾與繼恩交識及通書尺者,一切不問。 昌齡賣忠武軍節度行軍司馬,且

咸平二年,卒於貶所,遣使將其家屬還京師,假官舍處之。 四年,聽歸葬。 大中祥符三

特詔追復官爵,以白金千兩賜其家。 子懷珪,轉入內高 班

太祖 匹 年 授 ·, 擢 年, 札,神福 入內高品。 李神福 特賜紫,後至右領軍 遷崇儀 入內高 每侍 開封 副使、勾當皇城司。 品押班,遷副 從征太原, 側,多獲別本之賜。 人。 父繼美,仕後唐爲內侍,顯德初爲御廚都監。 衞將軍。 攻城之際,往 都知、勾當翰林司, 屬初易黃門之號,轉入內黃門都知,俄 神福 及不豫,神福 來梯 少給事晉王 衝間宣 轉入內內班都知, 朝夕左 一傳詔命,卽行在所遷殿頭。 府,謹恪解上意,未嘗少怠。 石,躬侍藥膳 兼勾當 時內臣止以服色爲貴, 加 祗候內品班。 宮苑使。 太平興 太宗卽位, 太宗好 淳化 國六

使。 從謁 爲葺之。 寫 太宗聖容,以 諸陵, 四年,勾當 眞宗卽 咸平二 復爲 位, 行宮 神福 遷皇城使、內侍省入內內侍都知,領 三班,部修含光殿,賜賚甚 一年秋,閱兵東郊,以神福 立侍。 使。 進幸西京,賜酺,命神福主其事 未幾,求罷 都 爲大內都部署。 知,加昭宣使、勾當皇城司,賜第宮城側,遣 優。 景德 恩州 初,兼領親王諸宮使。 團練使、勾當永熙陵行宮事。 是多,幸大名,與王繼英並 三年,改宣政使。 修內 爲行宮 時模

利用 同經度行宮道路。 賜以器幣、緡錢。 八中祥 符初、 ,天書降夕,神福與劉承珪、鄧永遷、李神祐、石知顒、 及車駕進發,又爲行宮使。 京師 關會,又令神福與白文肇、閻承翰同典之。 禮畢 - ,授宣慶使,領昭州防禦使,整肅禁 張景宗、 是歲封泰山, 藍繼宗同直 與博

一班,無 肺 福性恭愿和易,每爲衞紹欽所詬駡,皆引避不校。 :規制,遠近失敍,有請託者不能拒之,人譏其所守。 在禁闥五十年,稱爲長者。然久 子懷斌、懷贇。 弟神祐

衞。

先是

,諸司使止于宣政,故特置使額以寵之。

三年,卒,年六十四。

贈潤州觀察使。

焚梯衝 部 征 擒偽將朱令贇, 慮擾民, 帑 太原,負 神祐, 藏之物 令神站 **亟命神祐部** 、御寶從行。 初以父任授殿頭高品。 赴 京師 命神站馳入獻捷書,賜錦袍、 馳驛止之。 衞兵爲援,斬賊甚衆,餘悉潰 及土 開寶二年,又從征太原,時有詔緣邊和 一寇周瓊等叛,又副尹崇珂討平之。六年(四),隨曹彬南 時韶下已五 太祖將納孝章皇后,命神祐奉聘禮于華州。 日 1,神祐 、金帶 去。 夕而 王 及晉陽。 師伐廣州 市軍儲,車駕在潞州聞之,且 日, 隨 軍賞給。 甲 土旣 陣,賊潛縱 征。克關城 劉鋹不, 乾德五 年, 火

隨駕 以備繕完甲兵。 心即位 遷 南作坊副 劉繼元表納降款, 使。 錢俶 歸 朝, 太宗陳儀衞城北臺以受之, 命神祐往按府藏之積。 再征太原,領 繼元移時未至, 工徒千人 神祐

馳單 蒸四百萬以濟其用。 又令率兵屯定州以備契丹。 ·騎入城,俄頃,引繼元至。及北伐燕薊,命與劉廷翰(n)統精騎爲大陣之援。 至道初,西鄙不寧,命爲靈、環排陣都監,率衆至烏白池而還。 七年,契丹寇邊,命領兵屯瀛州,俄改崇儀使,提點左右藏庫,遷洛 太平興國六年,滑州治河防,材章未具,命神祐 俄駐永興,復護糧運抵 馳往垣曲 車駕還, 、伐薪 苑

而逃,遂達其命。 斥,道途阻塞,命神祐單騎諭密旨於諸將。敵騎數百忽至,神祐乃周麾而呼,若召伏兵,敵懼 眞宗嗣位,轉內園使、邠州都監。 俄充邢州排陣都監,勾當西八作司。景德初,上幸澶州,領隨駕壕砦。 車駕北巡,改天雄軍都監、子城內巡檢。 時北兵充

年六十六。大中祥符六年,錄其孫永和爲三班奉職。神祐性謹愿,曉音律,頗好篇詠 侍,上怒,悉停其官。 神祐洎石知顒、副都知張景宗、藍繼宗並坐削職。 有譴累而互陳勞効,且言神祐等品第非當,泣訴于上,止而復來者數四。 預從祀者,令神祐第其勤狀,上親閱而敍遷之。有范守遜、皇甫文、史崇貴、張延訓等,皆嘗 三年,遷入內都知。從東封還,遷南作坊使。時內侍將遷秩,有扈從升山、不升山或不 尋掌御廚七年,卒, 守遜等先改內常

子懷岊,太宗時嘗請爲道士,後復內侍。多屯邊郡,常持大鐵鞭以圖賊,屢中流矢,至

供奉官。懷儼爲內殿崇班。

列

喬維岳率兵討定之。 太平興國四年,命與內衣庫使張紹勍等六人率師屯定州,以備契丹, 拜 嘉其退讓 又護滑州決河。 北作坊副使。時泉帥陳洪進歸朝,遣承規疾置封其府庫。 至道中,與周瑩同簽書提點樞密、宣徽諸房公事,仍加六宅使。 劉 承規字大方,楚州山陽人。 父延韜, 內班都知。 雅熙中, 勾當內藏庫兼皇城司, 出為鄜延路排陣都監, 改崇儀使, 遷洛苑 承規,建隆中補高班,太宗即位,超 會土民嘯聚爲寇,承規與知州 承規懇辭,帝雖不許而

俄銀勾當羣牧司。 東、崇政殿等諸門,遷宮苑使。上詢承規西事,請益環州木波鎭戍兵,以爲諸路之援,從之。 咸平三年,遷北作坊使。時邊境未寧,議修天雄軍城壘,命承規乘傳經畫,又命提舉內 尋讓宣徽之務,加莊**宅**

庫務,以承規領之。所創局署,多所規制。改皇城使。與林特、李溥議更茶法。四年,三司 上言新課增羨,承規以勞加領昭州團練使。 景德二年,與李允則使河間,按視嘗經戰陣等處將卒之勞。是歲,置官提舉京師諸司

爲副 運,凡百供應,悉安流而達。 使。 大中祥符初,議封泰山,以掌發運使遷昭宣使、長州防禦使。 祀汾陰,復命督運。 自朝陵、東封及是皆留掌大內。 議者以自京至河中, 由陸則山險, 禮 成,當進秩,表求休致,手詔 具舟則湍悍, 承規决議 會修玉清昭應宮,以承規 水

敦勉,仍作七言詩賜之。拜宣政使、應州觀察使。

度。 特置景福殿使名以寵之,班在客省使上。仍改新州觀察使,上作歌以賜。 六十四。 歸於有司,手詔褒美,復定殿使奉以給之。本名承珪,以久疾羸瘵,上爲取道家易名度厄之 義,改珪爲規。 又再表求罷,官檢校太傅、左聽衞上將軍、安遠軍節度觀察留後致仕。 五年,以疾求致仕。 廢朝,贈左衞上將軍、鎭江軍節度,諡曰忠肅。 疾甚,請解務還私第,聽之。仍許皇城常務上印日,內藏庫 修宮使丁謂言承規領宮職、藉其督轄、望勿許所請、第優賜告詔、 承規以廉使月稟 有創 七月卒公,年 制 就取 商

具, 亦或寬恕,鑄錢工常訴本監前後盜銅瘞地數千斤,承規佯爲不納,因密遣人發取送官,不 命,修祠祀,飾宮觀,承規悉預聞。 ,必毁而 又製定權衡法,語在律曆志。 承規事三朝,以精力聞,樂較簿領,孜孜無倦。 更造,有司不敢計所費。 作玉清昭應宮,尤爲精麗。 性沈毅徇公,深所倚信,尤好 二聖殿塑配饗功臣,特詔塑其像太宗之側。 自掌內藏僅三十年,檢察精密, 屋室有少不中程,雖金碧已 何察,人多畏之。 承規遇 上崇瑞 動著條

列

問其罪。 及編著讐校之事,承規悉典領之。 見禮待,或密爲延薦 咸平中, 朱昂、杜鎬編次館閣書籍,錢若水修祖宗實錄, 頗好儒學,喜聚書,間接文士質訪故實,其有名於朝者多 其後修册府元龜 或 史

祭文。 自寢疾惟以公家之務爲念,遺奏求免贈賻詔葬,上甚嗟惜之,遣內臣與鴻臚典喪,親爲 玉清昭應宮成,加照侍中,遣內侍鄧守恩就墓告祭。 子從愿,為西染院使。

以給之。 考掠過苦,延範遂坐誅。 遷內侍供奉官、內殿崇班。 金吾兵,以承翰及劉承蘊分充左右金吾都監兼 閻 承翰,真定人。 雍熙中,知廣州徐休復奏轉運使王延範不軌狀,遣承翰馳往同逮 周顯德中爲內侍。 李順亂蜀, 先是,八作司材木頗有隱弊,承翰建議於都城西置事材場,治材 命爲川峽招安都監。賊平,授西京作坊副使。 入宋事太祖,以謹愿稱。太宗時擢爲殿頭 街仗司事,俄罷之。 捕下獄,就鞫之, 高品,稍

塞。 年,入內都知韓守英爲鎭、定、高陽關三路排陣都鈴轄,上以其素無執守,議別擇人,因謂宰 時議徙鄆州以避河患, 真宗即位, 改西京作坊使、 又韶承翰與工部郎中陳若拙乘傳規度, 內侍左班副都知。 徙于舊治之東南。 遣承翰護 五

渠,計引唐河水自嘉山至定州三十二里,又至蒲陰東六十二里,合沙河經邊吳泊入界河以 相 曰:「承翰雖無武勇,然涖事勤恪。」乃令代守英。時中山屯兵甚衆, 艱於飛輓, 承翰 請鑿

濟饋運,亦可旁爲方田,上嘉而從之。 渠成,人以爲便,優詔褒之。

好,始置國信司主交聘之事,以承翰領之,多所規置。 德淸軍規度重修城壘。 促駕度浮橋。 景德初,契丹謀寇順安軍,承翰奉詔發雄、霸精兵,與|荆嗣、張延同築壘禦之,俄又遣詣 二年,加領廉州刺史, 車駕北征,承翰先在澶州北城,奏契丹兵在近, 勾當羣牧司,多條上馬政,遂兼羣牧副使。 請不度河, 時契丹結 上不聽,

夏臺進奉使,上以荒敻勞役,不許。 大中祥符初,改西京左藏庫使,充夏州趙德明加恩官告使。還,請於浦洛河置館, 四年,遷內園使、左班都知,領獎州團練使。

杖。 相得,遂各訟訴, 司,當冤所居官; 羣牧都監張繼能、判官陳越田瑴、勾當騏驥院楊保用、估馬楊繼凝皆釋之,制置使陳堯 有西京左藏庫副使趙守倫久典廐牧,至是又掌估馬,與承翰聯職任,雖素爲姻家,然不 並付御史臺。 典吏當杖脊。 承翰坐擅用羣牧司錢,當贖金三十斤; 韶寬其罰: 承翰贖金十斤,守倫贖金二十斤,典吏亦 守倫坐違制移 降從 位馬

內侍箴賜之, 承翰表請刻石省中。 明年,建應天府爲南京,作鴻慶宮,設太

宜

者

叟特免按問

祖、太宗像,遣承翰自京奉往。 授南作坊使、入內都知。 未幾, 卒,年六十八。 贈懷州防禦

仗

承翰性剛彊,所至過於檢察,乏和懿之譽。 子文應,西京左藏庫使。

韶安撫以緩其陰計。王師至,翰又諷保忠以地主之禮郊迎,因並驅而出,保忠遂就擒,以功 先鋒事,遷入內殿頭高品、鎭、定、高陽關三路排陣都監。 數萬擊契丹,瀚爲都監,以善戰聞。 加崇儀副使。 趙保忠叛,命李繼隆率師問罪,翰監護其軍。 秦翰字仲文,真定獲應人。十三爲黃門,開寶中遷高品。 至道初,爲靈環慶州、清遠軍四路都監。 太宗因加賞異,謂可屬任。 次延州,翰慮保忠遁逸,即乘驛先往, 眞宗即位,加洛苑使、入內副都知。 淳化四年,補 太平興國四年, 雍熙中出為瀛州 入內押班 崔彦進領衆 駐泊, 仍管 矯

幼。詔褒之,徙定州行營鈴轄。

咸平中,河朔用兵,以爲鎭、定、高陽關排陣都監,敗契丹于莫州東,

追斬數萬,

盡奪所掠老

衆擊賊,中流矢不却,五戰五捷,遂克益州,上手札勞問。翼日,進至廣都,斬首千餘級,獲馬 王均之亂,爲川峽招安巡檢使。時上官正與石普不協,翰恐生事,爲曉譬和 解之。

數千匹。歸朝,遷內園使,領恩州刺史。

牛馬 十五 百兩、帛五百匹。 三千餘帳相率內附。 甚衆。 人。又爲邪寧、涇原路鈴轄兼安撫都監,率所部按行山外,召戎落酋帥, 出爲鎭、定、高陽關前陣鈴轄,又徙後陣, 復與陳興、曹瑋襲殺章埋軍主于武延鹹泊川。 未幾,康奴族拒命,翰與陳興、許均深入擊之,斬級數千,焚其廬帳,獲 破契丹二萬衆于威虜軍西,俘其鐵林大將等 詔書加獎,賜錦袍、金帶、白金五 諭以恩信,凡

以翰在邊久,宣力勤盡,特置是名以寵異焉。 蔽,翰規度要害,鑿巨塹,計工三十萬,役卒數年而成,不煩於民。 溝 漁 以 拒 契 丹。 月餘,令率所部兵還京師,加宮苑使、入內都知。 與大軍會德清軍, 景德初,車駕將北巡,先遣翰乘傳往澶、魏裁制兵要,許便宜從事。 功畢,契丹兵果暴至,翰不脫甲胄七十餘日,契丹乞和,凱旋,留泊澶州 張掎角之勢。又召爲駕前西面排陣鈴轄, 翰表讓,不聽 出爲涇原儀渭鈴轄。 管勾大陣。 就遷皇城使、入內都知。 先是,西鄙無藩籬之 俄充邢洛路鈴轄, 翰即督衆環城浚

是歲,夏州屬戶有擾境上者,即日遣翰往雕上按視,遍巡邊部。 .在諸司細務,悉令裁决,不須中覆。 大中祥符初,求從東封,手詔諭以西垂委任之異。改昭宣使,又爲羣牧副使,祀汾陰。 禮畢,加領平州團練使,奉祀亳州,掌如汾陰。 及翰至,事寧,復還扈從,凡

列傳

第

二百

二 十

五

庭

營葺大內,韶翰參領其事。 **貝州觀察使,賻襚加等。** 修內畢,詔遣使以襲衣、金帶賜其家。 **閆六月,暴卒於內庭之廨,年六十四。** 上甚悼惜,爲之泣下。贈

出 [入其帳中,無疑間,嘗白太宗言:「臣一內官不足惜,願手刺此賊,死無所恨。」太宗深嘉其 |翰倜儻有武力,以方略自任。 前後戰鬭,身被四十九創。 李繼遷之未賓也,翰因使常

忠。

休戚,能得衆心,皆樂爲用。其歿也,禁旅有泣下者。 |翰性温良謙謹,接人以誠信,羣帥有剛狠不和者,|翰皆得其懽心。 輕財好施,與將士同

論美之。子懷志,內殿崇班。 九年,重贈影國軍節度,詔楊億撰碑文,億以其不蓄財,表辭所贄物,雖朝廷不許,而時

殿頭。 轉入內西頭供奉官。祀汾陰,轉東頭。六年,劉承規卒,擢內殿崇班、入內押班、勾當皇城 禁中,累至入內高品。 周懷政,幷州人。父紹忠,以黃門事太宗,從征河東,得懷政于亂屍間,養爲子。給事 天書每出宮,與皇甫繼明並爲夾侍。東封禮成,與內殿崇班康宗元留泰山,修圜臺; 大中祥符初,眞宗東封,命修行宮頓遞。及奉泰山天書馳驛赴闕,轉

司。 命爲入內副都知、管勾左右春坊,轉左騏驥使。三年,領英州團練使,加昭宣使。 又爲修奉寶册都監,加領長州刺史,是多遷洛苑使。二年春,遷左藏庫使。仁宗爲皇太子, 醮告使,懷政爲都監。 又爲修兗州景靈宮、太極觀都監,俄遷內殿承制。 九年,建資善堂,以懷政爲都監。 會朝謁太淸宮,與閻承翰等同管勾大內事。 還,爲玉清昭應宮都監兼掌景靈宮、會靈觀使。 壽丘宮觀成,優賜襲衣、金帶,遷崇儀使。 七年,奉天書摹刻于乾元殿,爲刻玉都監 是多,命起居舍人、知制誥盛度爲會眞宮 刻玉 成, 遷如京副

時寇準鎭永興〔+〕,能爲巡檢,倚準舊望,欲實其事。準好勝,喜其附已,多依違之。 御藥使、領階州刺史。 俄於終南山修道觀,與劉益輩造符命,託神言國家休咎,否臧大臣。 厮養,爲人凶狡,遂賂懷政親信, 得見, 因與侍卒姚斌妄談神怪以誠之。
懷政大惑, 援能至 中外帑庫皆得專取,因多入其家。性識凡近,酷信妖妄。有朱能者,本單州團練使田敏 懷政日侍內廷,權任尤盛,於是附會者頗衆,往往言事獲從,同列位望居右者,必排抑

稱宣召,入內東門,坐別室,久之而還,以欺同類。會準爲相,踰年而罷,懷政愈畏獲譴,不 朝臣屢言懷政之妄,眞宗含忍不斥,然漸疏遠之。懷政憂懼,時使小黃門自禁中出,詐

刀口 年七月, 與弟禮賓副使懷信謀潛召客省使楊崇勳、內殿承制楊懷吉、閣門祗侯楊懷

列

終累我 崇勳 使、 朱能父左武 哀而 怒,命收懷政 玉會皇城司 不聽,故皆 親從並杖 E, 懷 !」懷信謂之曰:「兄前事 古詣 命斬于城西普安寺。 l得冤死 衞將軍致仕諤、 期以二十 ,令宣徽北院使曹瑋與崇勳於御藥院鞫訊,具伏。 配 丁謂第密告之,謂即 海 :島 遠州,部下 五 日 竊發,殺 母周氏, 父內殿承制紹忠及懷信並 一必敗, ·使臣 夜偕 丁謂等,復相寇準,奉眞宗爲太上皇,傳位太子。 罰 貶秩 崇勳、懷吉 銅 宜早詣上首實,庶獲輕典。」及其謀亂,又泣拜止之, 百斤, 八有差。 子守昱、守吉分配邵、蔡、道州(云)。 至曹利 懷政之未敗也,紹忠嘗詬之曰:「斫頭竪子 杖配 用第計 復岳州 帝坐 議。 承明殿 翌 子姪勒停,貲產沒官。 日, 利用入奏, 臨問,懷政 懷政僕 前 但前

杭州 門卒勿納,至是言其事, 房州 圓 黄門楊允文與懷政 都 右 街 監 入內供奉官石承慶嘗爲懷政 僧錄澄遠以預聞妖詐, 擢崇勳內客省使、 協同妖妄,皆杖配 承慶 坐 桂州 削 决杖黥配 兩 觀 所召,· 任, 察使, 遠州 配宿州。 郴州。 夜二鼓不下皇城門鑰以待, 懐吉. 如如 入內押班鄭志 內供奉官譚元吉、 京使,賜以 楊 犪 玉次日 金帶、 始詣 誠 與能 金銀 樞 高品 書問 密院自陳, 責授侍禁, 黄門黃守忠見之, 戒 王 往還,削 德 高 兩 班 任, 胡 配

道 懷 政 旣 張用和悉免死, 誅 ,亟遣入內供 奉 配遠州。 官盧 守明、 能值知使者至,衷甲出,殺守明以 鄧文慶 心馳驛 永興,捕朱能。 劉 益、李貴、 级。 韶遣內殿承制

知永 江 磔 軍 于 德明、入內供奉官于德潤發兵捕之,能入桑林自縊死。 + 興軍 市 將 張順 府朱巽、轉運使梅詢 王先、李貴、唐信、 斷 能 及其子首以 張用和八人皆處斬。 人獻,補 劉 楚、知鳳翔府臧 興閤門祗侯,順牢城都 奎等 能 母妻子弟皆决杖 坐 興懷政、 頭。以劉益等十一 永興、乾耀都巡檢供奉官李興、本 能 交結 配 相稱薦,皆論罪。 隸, 人黨能 閣 門 祗 害中 候穆介、 使, 降

寇

準太常卿,再貶道州。

凡朝士及永興、鳳翔官吏與準厚善者,悉降黜

納 土,命馳往 張崇貴, 真定 閱城防儲僻之數。 人。 太祖時爲 親征太原, 內中高品, 從崔彦進、 稍遷殿頭。 李漢瓊先路視 太平 興國中,以善射選爲 水草。 端 拱 初,補 御帶。錢俶 內供

佐趙 倉族 右 留崇貴 班押班 光祚 癿 淳化 遇戰於雙塠,殺二千餘級,掠牛羊、橐駝 、與石霸守綏州,徙平夏民以實之。 一,就命管勾廊 、張浦求納款,會于石堡砦,崇貴椎牛釃酒犒諭之,給以錦袍帶。 四年,命乘傳之延州招羌戎之內附者,發庫錢犒給,以 延 屯兵,李繼隆討李繼遷,詔崇貴以延安兵掎 繼遷 、鎧甲甚衆,連 扼橐駝路, 驅脅內屬戎 詔 金幣賜 褒 渝 角進 人, 繼遷走漠中,遣其將 酋 討。 領 會改內班為黃門 崇貴 及擒趙保忠, 將行,轉內 (與田 敏率 激

列

傳

命爲黃門右班 (押班,仍加內殿崇班,又改黃門爲內侍,職隨易焉。 既而繼遷貢 、橐駝、名馬待

罪,遺崇貴往賜器幣、茶藥、衣物。

繼隆 一大發師進討。 至道元年,進崇儀副使、內侍右班副都知。 賊圍靈州急,太宗將棄之,廷議未决,命崇貴與馮訥乘傳往議其事,乃益 時繼遷復叛,扨芻餽于浦洛河。 二年,韶李

兵固守,就命爲靈環慶州、清遠軍路監軍,又爲排陣都監

功。 及是,保洁復修貢,詔以定難節度授之,命崇貴持詔命、衣帶、器幣以賜。 |真宗立,拜||洛苑使、右班都知、管勾丼|||軍馬。 自||至道後,五路討賊,兵戰相繼,卒無 使還, 加六 成

鹽事。 賊,獲具裝馬數十匹,再詔褒飭。 繼福爲隙,因緣內擾,崇貴與張守恩擊之,焚廬舍,獲貲畜、器甲、生口甚衆。 |咸平元年,又命管勾鄜延屯兵,泊延安,改駐泊都監,又爲鈴轄。 與衞超領軍入敵境,焚廬舍帳幕,獲廩糗、牛羊,復被詔獎。崇貴屢詗契丹事傳遞以 四年,詔歸。俄領獎州刺史,復涖鄜延,仍制置沿邊青白 其後繼遷復與熟戶李 又與王榮禦

撫,以向敏中爲緣邊安撫使。 景德元年,保吉死,其子德明尙幼,崇貴移書諭朝廷恩信,德明請俟釋服禀命。 自是邊防事宜,經制小大,皆崇貴專主之。築臺保安北十里 詔書慰 聞,願身當一隊爲前鋒,詔不允。

旨,凡七事。德明悉如約,惟以子弟入質及納靈州爲難,故亦禁鹽如舊,不許回 緡錢各四萬、茶二萬斤,給內地節度奉,聽回圖往來,放青鹽禁,凡五事。 許,召戎人會議,與之盟約。二年春,召赴闕面授方略,許德明以定難節度、西平王,賜金帛 土疆,止居平夏,遣子弟入宿衞,爰略去官吏,盡散蕃漢兵及質口,封境之上有侵擾者禀朝 而令德明納 靈 州

善琴,崇貴與石普軍中宴集,令信奏之,信以久廢爲辭,崇貴與普因摭其他過以聞,眞宗知 陵, 次瓊林苑, 崇貴對于苑中, 即命爲行宮使。是秋, 復還延安。供奉官曹信時監邊軍, 信 領 其誣奏,不問。 大中祥符元年,加昭宣使。 |誠州團練使 (チ)。又持旌節誥命授[德明,太常博士趙湘爲之副。四年,使還,會車駕上 三年九月,以德明誓表來上,崇貴因請入朝,許之。以功拜皇城使、內侍左右班都知,

州 靜制之。」二年,上言久去鄕里,願得告歸葬父母。許之,錫與甚厚。復命爲都鈐轄,提舉権 夏州趣邊有二路,其文移至環慶者,皆付延州議焉。嘗請置緣邊安撫使,如北面之制。上 曰:「西鄙別無經營,苟德明能守富貴,無慮朝廷失恩信也。增置署局,徒爲張皇,不若委卿 .觀察使,內侍護喪還京師。子承素,東染院副使。 崇貴乞留京師,面諭委屬之意,聽歲入奏事。四年八月,卒,年五十七。帝悼惜之,贈豐 <u>崇貴久在邊,善識完戎情僞,西人畏服。</u> 每德明有所論述及境上交侵,皆先付裁制。

都監,從崔彥進戰長城口,多所俘馘。 國 初爲內品。 張繼 能字守拙,丼州太原人。父贊,晉末爲內班。 從征 河東, 命主城南洞屋,以勞遷高品。 明年,又與彥進敗契丹于唐興口,轉殿頭高 繼能,建隆初以黃門事禁中,太平興 契丹入寇,命爲高陽、鎭、定路先鋒

略其事 崇班。未幾,拜供備庫副使,復遣護環州屯兵,徙<u>涇原儀</u>渭都巡檢使。 遷內供奉官、靈環慶、淸遠軍後陣都監,與西人轉鬥,敗走之。復還淸遠。 軍,繼能護其役。 承睿與知靈州侯延廣領聽卒五千,同主軍務,俄留爲本州都監。及鄭文寶議城威州、淸遠 三千,屯五回嶺。 雍熙中,夏州叛,命李繼隆爲銀、夏都部署,以繼能監軍。 代還,掌內弓箭庫。 工畢,命與西京作坊副使張延洲同知軍事,又與田紹斌同掌積石砦。 端拱初,遷入內殿頭,從趙保忠討李繼遷。 淳化三年,與白承睿護芻粟入靈武。會繼遷復寇邊,命繼能 保忠薦其有材,命與保忠同經 俄徙護定州屯兵,領聽捷卒 詣闕奏事,遷內殿

峽兩路招安巡檢使。 夏人寇淸遠軍,營于積石河,繼能與楊瓊、馮守規在慶州逗遛,不時赴援,致陷城堡,又 |真宗卽位,遷崇儀使、||靈||環十州軍兵馬都監兼巡檢安撫使。||咸平三年||王均之亂,命爲|| 成都平,留爲利州招安巡檢,尋召歸。會跟、夏寇警,復爲邪寧駐泊都

焚棄 西 捕 青岡砦,特詔 賊巡檢,獲千餘 下御史府,冤死,長流儋州 人,改 內殿崇班。 從朝陵,爲行宮四面巡檢。 景德二年,會赦,還,爲內侍省內常侍,

杖之,至有率妻拏趣山 四 年, 宜州卒陳進爲亂。 林以采者, 初, 知州劉永規馭下嚴酷,課澄海卒伐木葺州厮,數不中程即 雖甚 風雨,不停其役。 故進因衆怨,殺永規及監軍國鈞,

均奉 內侍 衆來 撫使, 將 與鬥, 殿直 擁判官<u>盧成均</u>為帥,據其城 **屻**,頗潰去, 入容管。 宣州 攻柳 高品品 上語 任吉與邕桂巡檢、殿直張崇寶、侍禁張守榮擊走之。 七 大獲其器甲。 如京副使張從古及繼能副之,虞部員外郎薛顏 月奏至, 近臣 印遣使詣舒賁求赦罪。 以縣,殿直韓明、許貴、郝惟和以所部兵千餘禦敵, 周文質使廣州,監屯兵,會鄰路巡檢使控要路,集東西海戰權,扼端州 初至 衆心攜貳, .日:「番禺寶貨雄富,賊若募廳果,立謀主,沿流 韶東上閤門使忠州刺史曹利用、供備庫使賀州刺史張煦爲廣南東、 柳州,限江不能渡。 又攻天河砦, 將棄宜州,以家屬之悼耄者五百 是夕, 砦兵甚少,監軍奉職錢吉部分嚴整, 知州王昱望賊遁走,城遂陷 進復陷柳城,官軍退保象州 同勾當轉運 人隕江中,率其衆裁三千趣脚、象, 賊退而復集者累日,吉輩 明、貴死之,惟和僅以 東下 趣廣州 事 賊 發 又寇 荆湖、 ,則爲患深矣。」 戰敗之。 懐遠 峽 口。 間守, 軍 身死, 西路 賊衆屢 賊悉 知 遣 安 屢

列

進率衆· 斬 動, 飛 用 矢攢 命 衆遂潰。 入 ,,,生擒賊帥六十餘人,斬首級、獲器甲戰馬甚衆。 朝 八內高 來拒, 鋒 廷 辽 不能卻,前軍卽持棹刀巨斧破其牌,史崇貴登山大呼曰:「賊 詔 班于德潤以千兵倍道襲逐,利用等繼至,遇賊武 直犯前軍,前軍寄班侍班郭志言麾騎士左右縱擊。賊衣順 逐北至象州 書四 十分揭要路,諭賊歸順者悉釋其罪。 城下, 賊砦猶有據長竿瞰城中者, 成均始挈其族以詔書來降, 乃 賊挈族居思順州, 仙縣之李練鋪。 走矣,急殺之! 水 甲、執標 分兵攻象州 賊 初 不 牌以進, 知覺,惟 」賊心 利

賜緋。 復下, |寶、 供 歸 備 遠 進 任吉並爲供奉官,錢吉爲右侍禁。 軍 庫 利 初,賊攻象州, 如 使, 用 克獲, 又賜邴三子知道、知古、知常出身,邴之親屬同扞寇者悉甄敍之。升象州爲防禦使。 土 是 手 分兵捕餘寇,遣于德潤馳奏其事。授利用引進使,煦如京使,從古莊宅副使,繼能 者 志言供備 殺進者李昊、劉宗、趙敏並補本軍都頭〔10〕,張守榮爲供奉官、閤門祗侯, 兩月,汲之以 城在 庫使。 高丘上,素無井,閉壘之日,皆以乏水爲慮。 濟。 又以 山 |御前忠佐馬步軍副都軍頭郭全豐爲都軍頭,領勤州 中無烽候,每欲破賊,卽禱於城西神祠,或見巨蟒吞龜,是 又以知象州大理寺丞何邴最有勞,優拜祠部員 賴天雨,停水將竭而 外郎, 刺史。 張崇 雨

日 果有 衆以爲神靈助順 心之應。 張守榮俄病瘴,遣尚醫馳往視之,未至而卒,贈如京

使,錄其子官。

月,餘寇悉平。 東封, 留繼能 爲京舊城內巡檢鈴轄,俄 加東染院使。

繼能 且言 是 鈐 州 提 轄 召 西 刺 點 來 豆 $\stackrel{\frown}{=}$ 侍 以 人 郡 史 、中稍 備 畏 縣 聞 國 講 而不敢 真宗 謁 信 將 主 說 未幾, 太清宮,爲天書扶侍都監。 諸 書, 士 符 記 院 二年, 亦爲標題其末,人以爲榮。 設殺獲 上嘉其勤學, 犯。 事。 徙 鄜延 入內都 德明 功狀,賊聞之甚懼 三年, 都鈴轄。 雖受朝命, 知李神祐 兼羣牧都 令講 先是, 誦日 面 $\stackrel{\frown}{=}$ 監 七年, 別 | 羌部 等坐 內屬戶殺漢 九年, 歸朝, 給公膳, 祀 不絕寇境。 以疾 汾陰, 事 復涖 坐前 悉罷, 專遣 水 羣牧。 留掌大 護修莊穆皇后陵摧陷,左授 解職, 口 擢|繼 繼能 者 繼能 止 仁宗 不許。 內兼舊 主 能 **罸孳畜**, 日課卒截竹爲簽, 之。 入內內 在 命爲 俄 儲宮,嘗 城]侍省 繼能 內巡 叉 與 涇 原儀渭岩 八內殿 檢鈴 則 副 1親書 麗 都 轄 於常法, 知。 承 西 署字其上, ____ 鎭 制 「染院使, 幅賜之。 岑保 戎 俄 時 宗 軍 領 由 路 會 IF.

屬 酒 牧, 之沮己, 保相 獄 坐事 未就, 毆, 禧 停職 密遣. 初, 繫府中, 爲羣 復 親 西京左藏庫 至是, 事 牧 卒偵宗。 副 而假 使 **犁**牧 楊崇勳所發, 馬 使。 吏左宗抉其宿負, 之事 會宗弟元 戜 未發。 信司 繼能坐罷內職,降授西京作坊使, 喪妻, 更陳誠 誠 卽 宗嘗爲假敦駿軍校馬送葬, 白 白制置使 者,頗巧點, 繼 能, 請屬 曹 利 繼能欲援置 府 用, 中 故誠 井 劾其 不 羣 出爲 遂所求 事 及還, 牧司,而 邠 知 元 府 寧鈴 誠先 樂 抵 繼 黄 能 飲 怒宗 隸 目 肆 興 受 堻

列

知。 能自陳不願外任,得掌瑞聖園,尋領往來國信所。 未幾, 遷崇儀使,以衰老求解職,轉內園使,掌瓊林苑。 三年,復爲西京左藏庫使、內侍右 五年,卒,年六十五 特贈汀 班副都

州團 [練使,錄其子懷忠爲大理寺丞,孫逖爲三班奉職,遜爲借職、春坊祗候。

繼能性沉密知兵,頗勇敢,喜讀書,然好治生。晚年急於聚蓄,衆以此少之。

爲滏陽尉。 何邴後歸朝,知磁州而卒。 省鄓無賞延之例,獨以城守勞,故甄錄焉。 一子知崇裁十餘歲,特補太廟齋郎。 又徙其姪平夷尉知古

묘묘 品, 甚被親倚。從征太原,命督諸將攻城,劉繼元降,命領驍卒先入城,燒其營栅,遷殿頭高 雅熙二年,擢入內西頭供奉官。 淳化中,部修皇城,功畢,授入內押班。五年,加崇儀 **衞紹欽,開封人。 父漢超,內侍高品。** 紹欽始以中黃門給事晉邸,太宗卽位,補入內高

餘人,獲器甲槍槊千餘。 雙流砦,招降數萬衆, 李順之亂,王師致討,與王繼恩同領招安捉賊事,遇賊,鬥學射山南。又攻淸水埧,破 斬千餘級。 遣別將曹習領兵捕餘賊于安國鎮,斬三百級。時嘉、眉二州賊尚 順死,餘黨保險爲寇,又與楊瓊先扼要路以邀之,擒斬萬

副使

擾 城郭,又遣內殿崇班宿翰討之。 兩川平、召還、深被褒勞。

使。 兵守河橋 景德 眞宗 公嗣位, 元年 三年, - , 改皇城使。 拜宮苑使, 加昭宣 使。 領愛州 從幸河朔, 朝諸陵,復爲行宮巡檢。 刺史,充入內副都 命爲車駕前後行宮四面 知、修奉永熙陵都監,旣復 駐洛陽,命爲皇城內外都巡檢。 都巡檢。 次澶淵, 土,遂爲陵 命領扈 駕 歷

一班院、

皇城儀鸞翰林司。卒,年五十六。

卽 尊 願焚身以報 促令躋薪上,火旣盛,僧欲投下,紹欽遣左右以义抑按而焚之。 面 謝 紹欽 紹欽 一节愎少恩,不爲衆所附。 日:「昨朝辭日 太宗允其請, ,親奉德晉,不煩致謝。」僧惴怖偃蹇, 命紹欽往督營繕。 太平 興國中, 旣 **訖役,遽積薪於廷,請** 江東有僧詣闕請修天台壽昌寺,且言寺成 顧道俗望有救之者,紹 子承慶,至內殿承制。 僧 如願,僧言欲見 欽

石 知 願, 真定人。 **造**偉,建隆 曾祖承渥 ,梁尙食使。 祖守忠,晉 內供 奉官。 雅熙中,諸 父希鐸,高 將征 幽薊,以知

厰 隨 軍。 歸 ,掌儀鸞 司

知

願

形

貌

中授內

中高品。

太宗卽位,改供奉官。

淳化中, 明州 初 置 市 舶 司,與蕃商貿易, 命知願往經制之。 轉內殿崇班、 親王諸宮都

列

傳

第

_

百

監。從王繼恩平蜀寇,就遷西京作坊副使。

等州緣河巡檢使棄安撫,加領長州刺史。三年,戍鎭、定、高陽關三路,押大陣。 咸平初,遷正使、帶御器械。 契丹犯邊,上北巡,命爲天雄軍、澶州巡檢使, 俄改德、博 是多,改高

諭, 賜白金千兩,授入內都知 景德中,自京抵泗,遣徒治河堤,命總其役。 初計工累月,及是,狹日而畢。上面加褒

陽開駐泊行營鈴轄。

歸朝,復掌親王諸宮事

, 并、代州鈴轄, 遷莊宅使, 徙鎭、定、 高陽關鈴轄。 四年, 命與內殿崇班張繼能、 供奉官侍其 旭同修太祖神御殿。上封求覲闕下,復掌羣牧司、三班院、親王諸宮事 大中祥符初,遷內園使。俄以定內侍遷秩品第不當,爲其列所誣,坐罷都知。

天禧二年,爲才、代州鈴轄兼管勾麟府路軍馬事。三年,卒,年六十九。 孫全彬。

過州縣東治民俗。還,具以對,帝以爲忠謹。陝右羣盜殺鳳州巡檢,遣往擒滅之。 全彬字長卿,以知願奏補入內小黃門,累遷西頭供奉官。 仁宗使致香幣于南海,

代州都監,加內侍押班。 元昊 叛,全彬監鄜州兵救延州,解圍去。 進鈴階,徙鄜延,還,爲押班。 經略使明鎬言其勇略善將,得邊人情, 除井、

儂 智高 寇廣南,以爲湖南、江西路安撫副使。 出桂林,請于宣撫使狄青,願獨當一

自 於是使將左方兵,力戰于邕州。 南方平,領綿州防禦使。

復授之。 以心計辦治。 進宮苑使、利州觀察使,給兩使留後奉。 張貴妃居寧華殿閣,命全彬提舉。 轉領信武軍留後,爲永昭陵鈴轄。 遷福延宮使,提點奉先院。 妃薨,治喪過制,皆<u>劉</u>沆、王洙與全彬共爲之。數月, 俄為入內副都知,知制誥劉敞封還詞命,居三月, 時去永定復土四十二年,有司多亡其籍,全彬

熙寧中,卒,年七十六。贈太尉、定武軍節度使,諡曰恭僖。

契丹入寇,命石保吉爲鎮、定都部署,以守恩爲都監。踰年,入掌騏驥院。 淳化 中,盜起成都,從王繼恩往討之。至道初,就護西蜀屯兵。 咸平初, 為入內高班 會龍 騎 叛卒剽劫

環、慶,遣守恩飨翦之。 景德初,爲澶、濮都巡檢。又使環、慶及戌、瀘等州 巡察邊 事

遊殿 大中 景靈宮。 祥符 初,按獄于濮州,雪寬人十餘。 累遷 入內高品、 供奉官。 宮成,遷內殿承制。 預監修玉清昭應宮、 八年,預修大內,改西京作坊副 會靈 觀。 七年,又 〈衆修眞

列

傳

第

Ħ

= +

五

宦者

校

勘

記

使。九年,營造皆畢,授東染院使,充會靈觀都監。

歸朝,加領昭州刺史。是秋,掌皇城、國信二司,整肅禁衞,遷入內副都知。會建天章閣,命 命爲修河鈐轄。郊祀,召爲行宮使,改如京使,復還本任。 天禧二年,掌軍頭引見司,又修|祥源觀成,遷崇儀使。 四年春,河復故道,遷文思院使。 三年,授入內押班。 河決滑州,

守恩長七尺餘,狀貌甚偉,涖事幹敏,以溫果稱于時。五年,卒,年四十八。贈淄州防禦

領其事。又勾當資善堂兼太子左右春坊司。

校勘記

使,錄其子官。

- 鎮定高陽關三路排陣針轄 「三」原作「兩」,據本卷閻承翰傳、秦翰傳改。
- 順州 防禦使 「州」下原行「路」字,據長編卷三六、長編紀事本末卷一三删。
- 西京作坊副使馮守規 「副」字原脫,據本書卷五太宗紀、長編卷三六補
- 六年 據本 書卷三太祖紀、長編卷一五、一六,曹彬南征,事在開寶七年;克關城、擒朱令贇,事
- 在開寶八年。此誤。
- (至) 劉廷翰 「廷」原作「延」,據本書卷二六〇本傳改。

記

規」事,都繫於六年七月。此繫於五年下,誤。

(1) 時寇準鎮永興 「時」原作「及」,長編卷九三、長編紀事本末卷二四作「時」。按本書卷八眞宗紀、

卷二八一寇準傳,準於大中祥符八年出鎮永興,此天禧三年事,以作「時」爲是,據改。

按長編卷九六,句上有「並其」二字,「邵蔡道州」作「蔡郡道州」;長

編紀事本末卷二四,句上有「並其」二字,餘與此同。

(公) 子守昱守吉分配邵蔡道州

(元) 誠州團練使 「誠」原作「博」,據長編卷六四、東都事略卷一二〇張崇貴傳改。

8 本軍都頭 「都」字原脫,據長編卷六七補。

 $\stackrel{\triangle}{=}$

李神站

 $\stackrel{\frown}{=}$ 涇原儀渭鎮戎軍路 「軍」下原衍「兩」字,據武經總要前集卷一八,陝西的軍事路分中,這幾個

「祐」原作「福」,據本卷傳目、李神斌傳和長編卷七一改。

州軍同屬一路,簡稱涇原路。長編卷八三記張繼能遷官正作「涇原路鈴轄」,據刪。

宋史卷四百六十七

列傳第二百二十六

宦者二

楊守珍 李憲 張茂則 韓守英 宋用臣 藍繼宗 王中正 張惟吉 李舜舉 甘昭吉 石得一 盧守懃 梁從吉 王守規

劉惟簡

之。徙眞定、保、趙等州駐泊都監,邕、桂等十州安撫都監。從曹克明降撫水州蠻,築二棚 先鋒事。 發貫髻,人服其精。選爲環慶路走馬承受公事。契丹謀入塞,爲鎭、定、高陽關行營同押 楊守珍字仲寶,開封祥符人。爲入內黃門,習書史,學兵家方略。 會許民周繼宗爲人誣告與外夷交通,干證者六十人,辭服,遣守珍覆問,悉辨理出 善射,家僮過堂下,

以扼其要。

苑中, 路。 爲內侍 天禧 命乘馬馳射,賞其便習,賜錦袍巵酒。 省 內侍. 擒 盜 押班,提點內弓箭軍器庫。 於青灰 山。 累遷西京作坊使、帶御器械、永興軍 卒,贈原州防禦使。 進 內園使、右 班都 知、領端州刺史。 ·兵馬鈴轄, 徙眞定、邠寧 嘗侍仁宗

抵朔州 高陽 遷殿頭。 于劍門有功,遷西京作坊使、劍門都監。 關、幷代路兵馬鈴轄。 俄領會州刺史,解都知,再遷昭宣使,復領三班 韓守英字德華,開封祥符人。初爲入內高品,從征 ,以牽賊勢。遂破狼水砦,俘數百人,獲馬牛羊鎧甲以數萬計,賊爲解去。 久之,以西頭供奉官擢入內內侍押班,遷副 契丹圍岢嵐軍,守英與鈴轄張志言、知府州折惟昌帥所部渡河, 還,勾當三班院,進入內內侍都知。 歷 定州、鎭定 都知。 河東,數奉韶至石嶺關督戰,取隆州, 隨王繼恩招安西川,爲先鋒,戰 賜錦袍金

留騎 軍千,餘人悉徙內地。」眞宗曰:「邊臣能體朝廷恤民之意,宜詔諸路視此行之。」 出 爲 廊延路都鈴轄,徙井代路。建言:「本路宿兵多,百姓困於飛輓,今幸邊鄙無事,請

知,領獎州團練使、雅州防禦使,入內都知,管勾修國史。 提舉在京諸司庫務,勾當皇城司,爲趙德明官告使。歷宣政、宣慶二使, 書成,進景福殿使,又爲延福宮 內侍左班都

藍繼宗字承祖,廣州南海人。事劉鋹爲宦者,歸朝年十二,遷爲中黃門。從征太原,傳

韶營陳間,多稱旨。

復使繼宗勞賜仲舒。 言者以爲生事,請罷仲舒。太宗遣繼宗往按視,還奏二砦據要害,產良木,不可棄。帝悅, 秦州 並邊有大、小洛門砦,自唐末陷西羌,雍熙中,温仲舒諭酋豪使獻其地,徙衆渭北。 累遷西京作坊副使、勾當內東門。

扶侍都監,再遷東染院使。 神祐第東封扈從內臣之勞,而入內供奉官范守遜等訴其不公,罷都知。 近陵舊乏水,繼宗疏泉陵下,百司從官皆取以濟。擢入內副都知,爲天書扶侍都監。詔與李 元德太后、章穆皇后葬,爲按行園陵使。 車駕北征,勾當留司、皇城司。 祀汾雅, 復爲天書 車駕謁諸陵,

復修會靈、祥源觀。車駕幸亳州,管勾留司、大內公事,提舉在京諸司庫務, 洛 苑使、高州團練使,充都監。坐章穆皇后陵隧墊,貶如京使。 明 年,領會州刺史,進崇儀使、勾當皇城司。修玉清昭應宮,與劉承珪典工作。宮成,遷 典修景靈宮,進南作坊使, 勾當三班院,修

列

國 一史院。 爲趙德明 加恩使,德明與繼宗射, 繼宗每發必中,德明遺以所乘名馬。 爲內侍省

右班都知,遷入內都知。

求致 疾。 仕, 卒,贈安德軍節度使,諡僖靖。 仁宗卽位,遷左騏驥使、忠州防禦使、永定陵修奉鈐轄。歷昭宣、宣政、宣慶使。 特免入朝拜舞及從行幸。 頃之, 復固請罷都知,以景福殿使、邕州觀察使家居養 累上章

宗曰:「我欲歸種花卉、弄游魚爲樂爾。」景福殿置使,自大中祥符間至繼宗,授者纔三人。養 子元用、元震。 事 ,四朝,謙謹自持,每領職未久,輒請罷。 元用終左藏庫使、梓州觀察使。 家有園池,退朝即亟歸,同列或留之,繼

都監, 以 未集,元震獨傳呼宿衞,以功遷高品。 、時息。 元震以兄蔭補入內黃門,轉高班,給事明肅太后。 監三館祕閣, 詔褒之,賜襲衣金帶。 積官皇城使。 卒, 贈鎭海軍留後。 累遷入內副都知、忠州防禦使。 爲三陵都監,條列防守法,其後諸陵以爲式。 元慶養子五人,不畜閹子。 禁中夜火,后擁仁宗登西華門,左右 仙韶院火,元震救護,火 歷羣牧

張惟吉字佑之, 開封人。 初補入內黃門,遷殿頭、 高陽關路走馬承受公事。 護塞滑州

內殿崇班,復監權貨務。凡內侍領內東門,次遷勾當御藥院,而惟吉纔進官, 還,領內東門司,爲修奉章獻、章懿太后二陵承受。 天臺埽役, 遷西頭供奉官,監在京權貨務。 知嘉州張約以贓敗, 時議復用李諮 権茶算緡法,乃以惟吉爲 韶與御史王軫往劾其獄。 衆以爲薄,惟

吉欣

然就職。

再春,以羨餘遷

逐漸制

命惟 元昊果引去,還奏稱旨。 汾驍勇, 環慶兩路器甲,丼訪攻守利害。 復領皇城 遷供備庫使, 吉按視,言河 爲趙元昊官告使,還言元昊驕僭,勢必叛,請預飭邊備。 商胡決行了,爲澶州修河都鈴轄。 副以土兵,輕齎赴 司, 卒。 盡汰軍頭司軍校之罷癃者。 可塞而民誠困, 領皇城司,遷內侍省押班、羣牧都監,簡陝西冗兵,領軍頭引見司, 河外。 敵旣退,夏竦、韓琦謀自鄜延深入,乘虛擊之,命惟吉募抖、 財用不足, 宜少待之。 惟吉以爲我師當持重何變,不宜馳赴不測以自困。 轉 運使施昌言請亟塞,崔嶧以爲歲災民困,役宜緩。 同提舉在京諸司庫務,領 從其議。 及元昊寇延州, 恩州刺 遷如京使、果州團練使 史,爲入內都知。 遣按視鄜延、

惟 觀 祭留後。 吉日:「此 惟吉任 逾月, 事 事干典禮,須翌日問宰相。」旣而宰相不能執議,惟吉深以爲非。 久。 又贈保順 頗見親信,而言弗阿狗。 軍 節度使, 諡忠安。 張貴妃薨,將治喪皇儀殿,諸宦官皆以爲可,獨 贈昭信軍節度

列

傳

征儂賊,皆以幹敏選爲走馬承受。賊平,以勞進官,三遷環慶路鈴轄。 養子若水,字益之,以惟吉奏補小黃門,給事章惠太后殿,轉入內高品。 討環州解乜臼族復 王師平貝州,

功,歷帶御器械、內侍押班、副都知。

觀察使,提舉四園苑諸司庫務。卒,贈天平軍留後。 請射,連中徹札。建慶壽、寶慈兩宮,典領工作,再遷嘉州防禦使。 熙寧初,造神臂弓成,神宗御延和殿臨閱,置鐵甲七十步,俾衞士射,未有中者。 以病蘄解職,領輝州 若水

共執 東路 御器械。 一操兵 都巡檢。齊州武衞小校馮坦率營卒二百突入州廳事,欲爲變,昭吉單騎馳往,戒所從將 + 甘昭吉字祐之,開封人。初以內侍殿頭爲英、韶州巡檢,捕盜有功,再遷內殿崇班、京 餘人,告曰:「此誘我者也。」昭吉立殺之,縱其餘去,州以無事。 、在外,先獨見亂卒,諭以福禍,令推首惡自贖,衆疑沮不敢動。 後內侍省押班闕,仁宗記前功,特以授之。遷入內副都 知 特遷供備庫副使、帶 已而操兵者皆入,卽

英宗卽位之夕,昭吉直禁中,翊衞有勞,自文思副使超遷供備庫使、康州刺史。 昭吉奏

寢足矣。」帝愛其忠,特授永昭陵使,加如京使。 曰:「臣本孤微,無左右之舉,而先帝知臣朴直,自小官拔用至此,分當從葬,今願得洒掃陵 還朝,表辭職,以左龍武軍大將軍致仕,卒。

昭吉敦實愼密,人士稱之。

兵馬鈴轄,徙鄜延路。 省押班、領昌州刺史。 元昊寇保安軍,守懃率兵擊走之,特遷左騏驥使,移陝西鈴 盧守數字君錫,開封祥符人。自入內內品累遷禮賓使、邪寧環慶路鈴轄,還爲入內內侍 明道中,改葬章懿太后,而舊藏有水,以守懃嘗典葬事,罷爲永興軍 再遷六宅使,加貴州團練使,進榮州防禦使兼邪寧環慶路安撫都監。

籍,配雷州本城,康伯,均州都監。 制誥華清臣以守懃擁兵觀望,請正其罪,并按二人。守懃奪防禦使,爲湖北都監,用章除 棄城,將保壓州,獲欲遣安撫都監李康伯往說賊,不肯行,賊去而守蔥、用章更相論 初,劉平、石元孫被執,守懃撫膺涕泣不敢出,又嘗易蕃官馬。 延州通判計用章勸范雍

知

事,卒,贈保順軍節度使,諡安恪。 久之,復恩州防禦使,遷利州觀察使,歷眞定府、定州、北京路鈴轄。 養子昭序。 以左衞大將軍致

列

帶御器械。 等相見。」以功遷入內殿頭。選治京城水,決汴河于公賈村,決蔡河于四里橋,水患以息。加 至延福宮,回視所經處已成煨燼。翌日,執政候起居,帝曰:「非王守規導朕至此,幾不與卿 時,守規爲小黃門,禁中夜半火,守規先覺,自寢殿至後苑皆擊去其鎖,乃奉仁宗及皇太后 王守規,真定欒城人,入內都都知守忠之弟。守忠事眞宗,謹愿愼密,眷遇最厚。明道 積官至宣慶使、康州防禦使、內侍右班副都知。 卒,年六十七,贈昭武軍留後。

示衆曰:「此旗,天子所賜也,視此以戰,帝實臨之。」士爭呼用命以進。督諸將傍山焚族帳, 之,憲馳至軍。先是,朝廷出黃旗書敕諭將士,如用命破賊者倍賞。於是憲晨起帳中,張以 視鄜延軍制,行至滿中,會木征合董氊、鬼章之兵攻破踏白城,殺景思立,圍河州,詔趣赴 河州,加東染院使,幹當御藥院。復戰牛精谷,拔珂諾城,爲熙河經略安撫司幹當公事。按 原府路走馬承受,數論邊事合旨,幹當後苑。|王韶上書請復河湟,命憲往視師,與韶進收 李憲字子範,開封祥符人。皇祐中,補入內黃門,稍遷供奉官。神宗卽位,歷永興、太 列傳第二百二十六 宦者二

卽 酋 長 日 八 通 十餘人詣軍門降。 路 至 河州 賊餘衆保踏白,官軍出與戰, 捷聞,以功加昭宣使、嘉州防禦使。 大破之。 進至 一餘川 還,爲入內內侍省押班 又破賊堡十餘,木征 一、幹當 率

城

爲不 功不 史中丞 都 鼠 師 巨 木 知,又 乘之,殺獲萬計,斬冷雞朴。 。」憲銜之。 ·成其禍 安南 給京師營繕。 म् 鄧潤 漫宣 憲曰:「何傷乎! 叛,副 甫、 小,有成功其禍大。」章再上,弗聽。冷雞朴誘山後生羌擾邊,木征請自効,衆以 一慶使。 趙高招討,未行,高建言:「朝廷置招討副使, 御史周尹蔡承禧彭汝礪極論其不可,又言:「鬼章之患小,用憲之患大, 由是屢紛辨,遂罷憲而令乘驛計議秦鳳、熙河邊事,諸將皆聽節度。於是 賜瑞應坊園宅一區 時用兵連年,度支調度不繼,詔憲兼經制財用, 羌人天性畏服貴種。」聽之往。 董氊懼,卽遣使奉贄効順 木征盛裝以出,衆聳視,皆無鬥志, 加宣州觀察使、宣政使、入內副 軍事 須共議, 裁冗費什六,歲運西山 至節制號令卽 宜 御

州 又 河 詔 憲領 乃總 而 ゔ゙゙゙゙ 還 豐 中,五 兵 兵 東 直 上,平夏人于高川石 趣 路 興、靈,董遛 出師討夏國、憲領熙、秦軍至西市新城。 亦稱 欲往 峽 進至屈吳山,營打囉城,趨 宜 乘機協力入掃巢穴, 復蘭州,城之,請建爲帥府。 若 天都, 興、靈 道阻,即 燒南牟府庫,次葫 過 河 取凉

之由,憲以 入奏,具陳師老民困狀,乃罷兵。 日:「兵法, 憲既 進景福殿使、武信軍留後,使復還熙河,仍兼秦鳳軍馬。 不能至 飽餉不接爲辭,釋弗誅。 期而 後至者斬。 |靈州, 董氊亦失期, 况諸路皆至而憲獨不行, 不可赦。」帝以憲猶有功, 趣憲赴闕,道賜銀帛四千。 復上再舉之策,兼陳進築五利,且從之。 師無功。 憲欲以開闡、會邀功弭責,同知樞密院孫固 爲涇原經略安撫制置使,給衞 會李舜舉CID 但令詰擅還

內省 不克, 必 大舉,乃增城守塹壁,樓櫓具備。 職 夏 糧 人入蘭州,破 事 盡 引 去。 又詔憲遣間諭阿里骨結等,且選騎渡河, 西關,降宣慶使。 明年多,夏人果大入,圍蘭州, 憲以蘭州乃西人必爭地,衆數至河外而相羊不進,意 與賊遇,破之。 步騎號八十萬衆, 坐妄奏功狀,罷 + 日

义貶右千牛衞將軍,分司 避 敏恪,改忠敏。 興、 哲宗立,改永興軍路副都總管,提舉崇福宮。 靈 會師之期, 頓兵以城蘭州 南京,居陳州。 遺患至今, 卒,年五十一。 永樂之圍,逗留不急赴 御史中丞劉擊論憲貪功 紹聖元年,贈武泰軍節度使, 援。 ?生事,一出欺罔, 降宣州 觀 察使,

憲以中人爲將,雖能拓地降敵,而罔上害民,終貽患中國云。

<u>張茂則字平甫,開封人。</u>初補小黃門,五遷至西頭供奉官,幹當內東門。 禁庭夜有盜,

茂則 首登屋以入,旣獲賊,遷領御藥院。

外 利害,進入內都知。 入爲內侍押班,再遷副都知。 生疑耶?」帝疾間,欲處以押班,懇求補外,轉宮苑使、果州團練使,爲永興路兵馬鈴轄。 仁宗不豫,中夜促召,茂則趨入扶衞,左右或欲掩宮門,茂則曰:「事無可慮,何至使中 熙寧初,同司馬光相視恩、冀、深、瀛四州生隄及六塔、二股河

之,仍進其官。 以窄衣金帶。累乞退休,言受國厚恩,廩食過量,積而未請者七年,乞令三司毁券。詔褒 上元夜,宮中火,督衆卽撲滅。 哲宗卽位,遷寧國軍留後,加兩省都都知。 韶曰:「宮禁不驚,帑藏如故,惟忠與力,予固嘉之。」賜 卒,年七十九。

監門衛將軍,崇寧中入黨籍。 茂則性儉素,食不重味,衣裘累十數年不易。 紹聖論元祐人,以茂則嘗預任使,追貶左

宋用臣 列 僔 字正卿,開封 第 ----百 _ 十 六 宜 爲人有精思疆力,以父蔭隸職內省。 者 _ 神宗 建東、西府、築京城、

紹聖初,召爲內侍押班,進瀛州 外事。同列悉籍以進,朝士之乏廉節者,往往諂附之,權勢震赫一時。積勞至登州防禦使,加 宣 建尚書省,起太學,立原廟,導洛通汴,凡大工役,悉董其事。 一政使。 刺史。 性敏給,善傳詔令,故多訪以 四年, 主管靈仙觀

用臣 稱公者皆須耆宿、大臣與鄕黨有德之士,其曰「念公之勞,久徙于外」,斯乃古周公之事,於 諡 僖敏。 非所宜言也。 徽宗即位,遷蔡州觀察使、入內副都知。爲永泰陵修奉鈴轄,卒陵下,贈安化軍節度使, 諡議謂用臣爲廣平宋公,有「天子念公之勞, 久徙于外」之語。 止令賜諡,論者是之。 豐稷論奏,以爲凡

命置 遷 東 左右 頭 王 中正字希烈,開封人。 供 奉官, 慶曆衛士之變,中正援弓矢卽殿 歷幹當御藥院、 因父任補入內黃門,遷赴延福宮學詩書、曆算。 鄜延 環慶路公事,分治河東邊 西督 捕射,賊悉就擒,時年甫十八,人頗壯之。 事。 破西人有功,帶御器 仁宗嘉其才,

神宗將復熙河,命之規度。 還言:「熈河譬乳虎抱玉,乘爪牙未備可取也。」 途從王韶入 槭。

熙河,治城壁守具,以功遷作坊使、嘉州團練使,擢內侍押班

其故道。」從之,隴東遂不可得。還,使熙河經畫鬼章,進昭宣使、入內副都知。 外蕃因以乘間。縣至綿與茂,道里均,而龍安有都巡檢,緩急可倚仗。 有之,中正不能討。乃因吐蕃入寇,言:「其路經靜州等族,榛僻不通,邇年商旅稍往來,故 吐蕃圍茂州,韶率陝西兵援之,圍解。自石泉至茂州,謂之隴東路,土田肥美,西羌據 請割石泉隸綿,而窒

詔,所過募禁兵,願從者將之,主者不敢違。 行其言。復往廊延、環慶經制邊事,詔凡所須用度,令兩路取給,無限多寡。旣行,又稱面受 元豐初,提舉教畿縣保甲將兵捕賊盜巡檢,獻民兵伍保法,請於村疃及縣以時閱習,悉

臣、石得一爲四凶,又貶秩兩等。久之,提舉崇福宮。紹聖初,復嘉州團練使。卒,年七十 坐前敗貶秩。元祐初,言者再論其將王師二十萬,公違詔書之罪,劉摯比中正與李憲、宋用 士卒多死,命權分屯鄜延並邊城砦,以俟後舉。自請罷省職,遷金州觀察使、提舉西太一宮, 問罪西夏,以中正簽書涇原路經略司事。 詔五路之師皆會靈州,中正失期,糧道不繼,

宗使督工冶金爲器,旣成,有羨數幷上之,帝嘉其不欺。 舉字公輔 開封人。 世爲內侍,曾祖神福,事太宗以信謹終始。 出為秦鳳路走馬承受 舜舉少補黃門,仁

將不法爲職,而終更論最,乃使帥臣保任,乞免之。」遂删舊制 來,不得一見而去,何以慰遠人!」謁者以聞,亟召對,帝意良悅。 英宗立, 奏事京師。 會帝不豫,內謁者止之宮門,舜舉曰:「天子新卽位, 因言:「承受公事 使者從邊方 ,以察守

史、帶御器械。 中之政得與講畫,或疾置入朝,禀受成算。 熙寧中,歷幹當內東門、御藥院、講筵閣、實錄院。 進內侍押班,制置 涇原軍馬 會達貶,亦降左藏庫副使,以文思院使領文州刺 郭逵討交州,以爲廣西幹當公事,軍

焉。 懲前 國,而以邊事屬二內臣,可乎?內臣正宜供禁庭洒掃之職,豈可當將帥之任!」聞者代]時慚 輒毆擊,解州 朝廷以 日之役多死於凍餒,皆憚行,出錢百緡不能雇一夫,相聚立栅山澤不受調,吏往逼 五. 路 邊事 師 出 屬 至械縣令以督之,不能集。 無功,議再舉,李憲督饋糧,言受密詔,自都轉運使以下乏軍興者皆聽斬。 押班及李留後,無 西顧之憂矣。」舜舉曰:「四郊多壘,此卿大夫之辱,相公當 舜學入奏其事,乃罷兵。退詣中書,王珪迎勞之曰: 民

轉嘉州團練使。 沈括城永樂,遣舜舉計議,被圍急,斷衣襟作奏曰:「臣死無所恨,願朝

廷勿輕此賊。」尋以死聞,贈昭信軍節度使,諡曰忠敏

嘗書「李舜舉公忠奉上,恭勤檢身,始終惟一,以安以榮。」十九字賜之。 舜舉資性安重,與人言未嘗及宮省事。 頗覽書傳,能文辭筆札。在御藥院十四年,神宗

紹聖中,贈隨州觀察使。 人,飛語朝上,暮入狴犴,上下惴恐,不能自保,至相顧以目者殆十年。」坐降左藏庫使,卒。 閣、皇城司,四遷入內副都知。元祐初,領成州團練使,罷內省職。御史劉摯言:「得一頃筦 皇城,恣其殘刻,縱遣邏者,所在棋布,張穽設網,以無爲有,以虛爲實。朝廷大吏及富家小 石得一,開封人。爲內侍黃門,累官內殿承制。神宗時,帶御器械、管幹龍圖天章寶文

足以 請分河北爲路〔三,每路以一帥府統之,遂建魏、鎭、定、瀛四帥。熙寧初,爲邠寧環慶路駐泊 翦除,若得重臣統其事,不崇朝可平矣。」於是仁宗以文彥博爲安撫招討使。賊平,又奏 梁從吉字君祐,開封人。補入內高班。王則反,奉命宜慰,還言:「小寇無多慮,諸將之兵

列傳

兵馬 班,遷永州團練使,爲副都知。元祐中卒,贈成德軍節度使,諡曰敏恪 叛卒,以功升都鈴轄,累官皇城使。 鈴轄。 夏人寇大順城,圍慶州七砦,從吉率兵八百餘人與戰,獲其酋領。 從高遵裕至靈武(日),督士卒攻城,身被創甚,進入內押 又討平寧州

解間。 班。 即位,臣來自邊塞,未瞻天表,不敢輒還,不知其他。」帝歎曰:「小臣知所守如此。」識其姓名 下,雨沾衣不退,帝起坐幛中,望見呼問曰:「諸路如汝者幾人,何以獨來? 英宗初立,惟簡自河北來朝,請對寢門, 劉惟簡,開封人,由入內黃門積官至昭宣使、康州刺史、高陽關路兵馬都監, 他日,神宗覽所題屏,擢幹當延福宮,自是蒙親信。 內謁者難之,獨引見皇太后。 : 」對曰:「陛下新 惟簡立福 為入內抑 寧殿

足繫。」帝信之。 |交人叛,詔馳驛至||桂州審視事勢,還言:「帥臣劉彝貪功生事,罪當誅。 郭逵、趙卨南征,以爲行營承受。逵、卨被謫,惟簡亦奪一 官。 乾德狂童,頸不

卒不幸,以將臣上違聖略,糧食不繼,逃生以歸,其情可貸。今同立庭中而不預賜, 恐患生 **倉卒。」帝用其言,均予之。又使案閱河北保甲,振濟京西水災,參定諮陵薦獻。旣而爲言者** 陝西 五 路師還,受命撫犒士卒,以疾先還者不賜。惟簡心知其不便,至慶州,疏言:「士

校勘記

- 〔1〕商胡决 「胡」原作「湖」,據本書卷九一河渠志改。
- \exists) 李舜舉 「舜」原作「順」,據本卷本傳、本書卷四八六西夏傳、東都事略卷八六本傳改。
- (三) 又奏請分河北爲路 按下文說「建魏、鎮、定、瀛四帥」,疑「爲」下脫「四」字。
- (四) 靈武 |武; 又本書卷四六八李祥傳謂祥「從劉昌祚征靈武」,亦指此事。 原作「寧武」,按本書卷三四九劉昌祚傳、卷四六四高遵裕傳,此處實指靈州, 據改。 靈州治靈

宋史卷四百六十八

列傳第二百二十七

宦者三

李祥 雷允恭 陳衍 閻文應 馮世寧 任守忠 李繼和 童貫 高居簡 方臘附 梁師成 程昉 蘇利涉 楊戩

蘭州 思立 升兵馬都鈴轄。 加沂州團練使。 大至,與涇原將姚兕力戰,敗之。 ,

祥赴援,保險待變,數日,

虜徹圍去。 于河、湟,以功遷內殿崇班,爲河州駐泊兵馬都監。 李祥,開封人。爲入內黃門。 或言所部兵失亡多,降簡州刺史,權熙河廣會路都監,總岷州兵。 在熙河二十餘年,以宜慶使、內侍押班卒。 遷皇城使、鎭戎軍沿邊都巡檢使。從劉昌祚征靈武,議功 資 聽 銳, 復團練使,進階州防禦使。 善騎射,用材武中選,授涇原儀渭同巡檢。 從郭逵討交阯,駐富良江二丁,賊兵 從种誼襲鬼章有功, 夏人攻 從景

列

韓王宅,領御藥院、內東門司。宣仁山陵,爲按行使。 陳衍,開封人。以內侍給事殿庭,累官供備庫使。 俄以左藏庫使、文州刺史出爲真定路 梁惟簡薦諸宣仁聖烈皇后,主管高

引所私,俾居耳目之地。」張商英亦論:「衍交通宰相,御服爲之賜珠;結託詞臣,儲祥爲之 賜膳。」蓋指呂大防、蘇軾也。衍坐貶,監郴州酒稅務。 御史來之邵方力詆元祐政事,首言:「衍在垂簾日,怙寵驕肆,交結戚里,進退大臣,力 惟簡以援引,張士良、梁知新以黨

附,皆得罪。已又編管白州,徙配朱崖。

動搖,大逆不道。 無所得,安惇、蔡京乃奏衍疏隔兩宮,斥隨龍內侍十餘人于外,以剪除人主腹心羽翼,意在 召之,使實其說。 章惇起獄,誣元祐諸老、大臣,云結衍輩以謀廢立。 乃詔處死,令廣西轉運使程節涖其刑。 士良至, 但言宣仁彌留之際, 衍嘗可否二府事及用御寶付外而已。 士良嘗與衙同在宣仁后閣,自郴州 鍛鍊

欲 蓋不欲使知宮省曲折也。徽宗賞歎。進感德軍留後。政和初,以內客省使、彰化軍留後致仕。 知。崇寧新官名,世寧首知入內內侍省事。禁中夜火,使宿衞士撲滅之,旣定,令自他途出, 夜出問訊,世寧執言不可,帝雖微忤,卒爲之改容。 世寧出入禁闥六十年,循謹無過。卒,年六十七,贈開府儀同三司,諡曰恭節。 馬世寧字靜之,以入內黃門累遷昭宣使、忠州團練使、入內押班。 再遷景福殿使、明州觀察使,至副都 揚國公主寢疾,哲宗

·虎至,即斬關自歸。」已而果然。 賊平,遷兩秩。 王則反 具州,爲城下走馬承受。 距守,官軍重圍之,不得入。 繼和獨上南關門,密呼所結內應者,論以禍福。衆言:「俟<u>李</u>昭 沙苑闕馬,詔秦州置場以券市之,繼和領職不數月,得馬千數,而人不擾。 李繼和,開封人。以父任爲內侍黃門。慶曆中,爲河北西路承受。 保州兵叛, 舊制,內侍 塞城門

入仕三十年始得磨勘,至是,乃令以勞進官者無拘於年。

使、入內副都知,卒。 子|從|善援例求贈官,|神宗日:「此弊事也!|繼和無軍功,何必贈?」自 「汝曹爲一杯酒,遂喪軀命乎!」衆悟散去。事聞,擢帶御器械。累遷宣慶使、文州團練 環州弓箭手歲時給酒,州將不與,衆諠訴,亟闔府門不敢出,繼和步入衆中譬曉之曰:

第二百二十七

宦者三

是為定制云

超 轉殿頭,領後苑事。 高居簡字仲略,世本番禺人。 坐奉使梓夔路多占驛兵,降高品。 以父任爲入內黃門。 護作温成原廟奉神物,以精辦稱, 歷領龍圖天章寶文閣、內東門司,

幹當御藥院

罪惡已多。祖宗舊制,幹當御藥院官至內殿崇班以上,即須出外。今陛下獨留四人,中外以 班。以文思使領忠州刺史, 此竊議。 過於先帝。 神宗卽位, 况居簡頃在先朝,依憑城社,物論切齒。 願明治其罪, 御史張唐英言其資性儉巧,善迎合取容。中丞司馬光亦言其「久處近職, 以解天下之惑」。於是罷爲供備庫使。 卒, 贈耀州觀察使 🔡 。 及陛下繼統,乃復先自結納,使寵信之恩 稍遷帶御器械, 進內侍押

力,居簡督衆護軍資甲仗二庫,賴以獲全。 居簡聞外廷議論,必以入告,省中目爲「高直奏」。仁宗時,嘗使南海,遇廣州火,救者不 事聞, 詔褒之。

程昉,開封人。以小黃門積遷 西京左藏庫副使。

宮苑 防議塞之, 因疏 寧軍直河,作橋于眞定之中渡。 加帶御器械。 副 熙寧初, 使。 又塞潭河,作浮梁于洺州。 兼外都水丞, 韶相度興修水利。 爲河北屯田都監。 河決商胡北流,與御河合爲一。及二股東流, 塘水溉深州田。 河決楽彊 又自衞州王供埽導沙河入御河,以廣運路。 又導葫蘆河,自樂壽之東至滄州二百里。 ,釃二股河導之使東,爲鋸牙, 御河遂淺澱。昉以開浚功, 下以竹落塞決 河決大名第五埽, 塞孟家口, 累遷達州團練 開乾 口

使(三)制置河北河防水利。

宗曰:「王安石以昉知河事,故加任使,令開漳河,用工七百萬,滹沱八九百萬,已議體量 提點刑獄司牒者十二,故有違拒。小人誤當賞擢,驕暴自肆。 指決河所侵便爲淤田。 洛、趙、深、祁五州之田,王廣廉、孔嗣宗、錢勰、趙子幾皆嘗論奏其<u>姦</u>欺之狀,則多置撻口 廢 人戶水磑,久無成功。 御 :史盛陶言:「昉挾第五埽之功,專爲己力。 其事權之盛,則舉官廢吏,惟其所欲。 又議開沁河,因察訪官按行,始知不便。 假朝廷威福,恐動州縣。 悖慢豪橫,則受聖旨者三,受 願遣官代還,仍行宪治。」|神 潭河、滹沱之役,水占邢、 所開共城河,頗

始,安石欲興水利,驟用時,防挾安石勢而慢韓琦,後安石覺其虛誕,亦疏之。 列 第 三百二十 七 以憂死,

贈耀州觀察使(1)。遂罷都大制置河防水利司。

以爲穎王府都監,力辭。 崩,乞與醫官同貶,三上表待罪,不許。 士之變,以護衞有勞,賞激加等。英宗爲皇子,利涉給事東宮。及卽位,遷東頭供奉官,欲 蘇利涉字公濟。 祖保遷, 幹當御藥院,遷供備庫使。帝不豫,侍醫藥最勤,言輒流涕。及帝 自廣州以閹人從劉鋹入朝。 利涉初爲入內內品。 慶曆中衞

神宗即位,授達州刺史。歷內侍押班、副都知,轉海州團練使。 仙韶院火,營救甚力,

賜襲衣、金帶。卒,年六十四,贈奉國軍節度使,諡日勤僖。

往有緣飛語受禍者,人始以利涉爲賢。 利涉嘗幹當皇城司,循故事,廂卒邏報不皆以聞。後石得一代之,事無巨細悉以奏,往

恭豫發其事,懷政死,擢內殿崇班,遷承制。再遷西京作坊使、普州刺史、入內內侍省押班。 雷 允恭,開封人。 初爲黃門,頗慧點,稍遷入內殿頭,給事東宮。 周懷政僞爲天書,允

恭 請 E 效力 陵 章獻后初臨政,丁謂潛結允恭,凡機密事令傳達禁中,由是允恭勢橫中外。山陵事起,允 (上,章獻后曰:「吾慮汝有妄動,恐爲汝累也。」乃以爲 山陵 都監。 允恭馳至陵下,

中和 天 監 曰:「恐下有石與水爾。」允恭曰:「上無他子,若如秦王墳,何不可?」中和 邢中和 爲允恭言,「今山陵上百步,法宜子孫,類汝州秦王墳」。 **允**恭 曰:「何不就?」 曰:「山陵 事

之。」允恭素貴橫,人不敢違,卽改穿上穴。 入白其事,章獻后曰:「此大 重,踏行覆按,動經月日, 恐不及七月之期耳。」允恭 曰:「第移就上穴,我走馬入見太后言 事,何輕易如 此?

允恭 山 一,石盡水出。 一陵使, 日:「使先帝宜子孫,何惜 允恭具道所以, 允恭竟以是丼坐盜金寶賜死,籍其家。 調唯 **岩可**? 唯 而 已。 」章獻后意不然,曰:「出與山陵使議 允恭 入奏曰:「山陵使亦無異議矣。」 中和流沙門島。 | 講尋竄海 可否。」時丁謂 旣而 上穴果有 爲

日:「夷簡獨 夏竦、陳堯佐 閻 文應 開封人。 不 附 太后邪 、范雍、趙稹 給事 ? 但多機巧,善應變耳。」由是抖夷簡 ,掖庭,積遷至入內副 (五)、晏殊、錢惟演皆章獻 都知。 后所 仁宗初親 任 靇 用, 政,與宰相呂夷簡謀,以張 悉罷之。 退以語郭后,后

素與文應 相結, 使爲 中酮。 久之,乃知事由郭后, 夷簡遂怨后。 及再相,楊、尚二

列

傳

竟廢后爲淨妃,以所居宮名瑤華,皆文應爲夷簡內應也。 大怒。文應乘隙,遂與謀廢后,且勸以爪痕示執政,夷簡以怨,力主廢事,因奏仁宗出諫官, 美人方寵,尚美人於仁宗前有語侵后,后不勝忿,批其頰,仁宗自起救之,誤中其頸,仁宗

大懼。會后有小疾,挾太醫診視數日,乃言后暴崩,實文應爲之也。 日,以尚氏爲女道士,居洞眞宮;楊氏別宅安置。旣而仁宗復悔廢郭后,有復后之意,文應 車載二美人出,二美人涕泣,詞說云云不肯行。文應駡曰:「官婢尙何言?」驅使登車。翌 亟以爲言,仁宗未能去。 文應早暮入侍,言之不已,仁宗厭其煩,強應曰:「諾。」文應卽以氊 郭后旣廢,楊、尚二美人益寵專夕,仁宗體爲之弊,或累日不進食,中外憂懼。楊太后

使,爲秦州鈐轄,改鄆州;士良罷御藥院,爲內殿崇班。 累至昭宣使、恩州團練使。時諫官劾其罪,請幷其子士良出之。以文應領嘉州防禦

日,士良曰:「陛下閱此,豈非欲納陳氏女爲后邪?」仁宗曰:「然。」士良曰:「子城使,大臣家 不可。王曾、呂夷簡、蔡齊相繼論諫。陳氏女將進御,士良聞之,遽見仁宗。仁宗披百葉擇 奴僕官名也,陛下納其女爲后,無乃不可乎!」仁宗遽命出之。文應後徙相州鈴轄,卒,贈 始楊、尚二美人之出宮也,左右引陳氏女入宮,父號陳子城,楊太后嘗許以爲后,宋綬

邠州觀察使。

. 藥供奉。初,章獻后聽政,守忠與都知江德明等交通請謁,權寵過盛。 仁宗親政,出爲 任守忠字|稷臣,蔭入內黃門,累轉西頭供奉官,領御藥院,坐事廢。 久之,復故官,稍遷

<u>黄州都監,又謫監</u>夷州酒稅,稍遷潭州都監,徙合流鎭。 西鄙用兵,又爲秦鳳、涇原路駐泊

察使,爲入內都知。 都監,以功再遷東染院使、內侍押班。 出爲定州鈴轄,加內侍副都知。累遷宣政使、洋州觀

使、安靜軍留後。 守忠又語言誕妄,交亂兩宮。於是知諫院司馬光論守忠離間之罪,爲國 仁宗未有嗣,屬意英宗,守忠居中建議,欲援立昏弱以徼大利。 及英宗卽位,拜宜慶

趙樂難之,脩曰:「第書之,韓公必自有說。」琦遂坐政事堂,立守忠庭下,曰:「汝罪當死,貶 之大賊,民之巨蠹,乞斬於都市。英宗猶未行,宰相韓琦出空頭敕一道,參政歐陽脩已簽,

保信軍節度副使,蘄州安置。」取空頭敕塡與之,卽日押行,琦意以爲少緩則中變也。 守忠久被寵幸,用事于中,人不敢言其過,及貶,中外快之。久之,起爲左武衞將軍,致

卒,年七十九。

茲始。 故,貫曰:「上趣成功耳。」 師竟出,復四州。 嘗 明 李憲故事監其軍。 十使陝右,審五路事宜與諸將之能否爲最悉,力薦之。合兵十萬,命王厚專闖寄,而貫用 金局于杭,貫以供奉官主之,始與察京游。 童貫,少出李憲之門。 至惶川,適禁中火,帝下手札,驛止貫毋西兵。 貫發視,遽納鞾中。 性巧媚,自給事宮掖,即善策人主微指,先事順承。 擢景福殿使、襄州觀察使, 京進,貫力也。 凉旣相, 贊策取靑唐, 因言貫 內侍寄資轉兩使自 徽宗立、置 |厚問

軍、洮州,加檢校司空。頗恃功驕恣,選置將吏,皆捷取中旨,不復關朝廷,寖咈京意。除開 府儀同三司,京曰:「使相豈應授宦官?」不奉詔 未幾,爲熙河蘭湟、秦鳳路經略安撫制置使,累遷武康軍節度使。 討溪哥臧征,復積石

爲公相,因稱貫爲媼相。 <u>横山,以太尉爲陝西、河東、河北宣撫使。俄開府儀同三司,簽書樞密院河西北兩房。不三</u> 歲,領院事。更武信武寧護國河東山南東道劍南東川等九鎭、太傅、涇國公。時人稱蔡京 破羌,故欲見之,因使覘國,策之善者也。」使還,益展奮,廟謨兵柄皆屬焉。遂請進築夏國 政和元年,進檢校太尉,使契丹。或言:「以宦官爲上介,國無人乎?」帝曰:「契丹聞貫

敢言。 塞,遇伏而死。法,西州名將,旣死,諸軍恟懼。 不可, 貫逼之曰:「君在京師時, 親授命於王所, 震、晉銳師深入河、隴,薄于蕭關古骨龍, 關右旣困,夏人亦不能支,乃因遼人進誓表納款。 []隱其敗,以捷聞,百官入賀,皆切齒,然莫 謂可制夏人死命。 自言必成功, 使至,授以誓詔,辭不取,貫彊 ` 今難之,何也?」|法不得已出 遣大將劉法取朔方,

手失其分地而使守新疆,禁卒逃亡不死而得改隸他籍,軍政盡壞。 伴使固與之,還及境,棄諸道上。 舊制,熟羌不授漢官,貫故引拔之,有至節度使者。 弓箭

刻 日發命。 政 和 元年,副鄭允中任之使于遼,得燕人馬植,歸薦諸朝,遂造平燕之謀,選健將勁卒, 會方臘起睦州,勢甚張,改江、浙、淮南宣撫使,即以所聚兵帥諸將討平之。

反, 峒皆落山谷幽險處,民物繁夥,有漆楮、杉材之饒,富商巨賈多往來。 自稱文佳皇帝,故其地相傳有天子基、萬年樓,臘益得憑籍以自信。 方臘者,睦州青溪人也。 世居縣場村,託左道以惑衆。 初,唐永徽中,睦州女子陳碩 縣境梓桐、幫源諸

月, 介胄,唯以鬼神詭祕事相扇詸,焚室廬,掠金帛子女,誘脅良民爲兵。 起爲亂,自號聖公,建元永樂,置官吏將帥,以巾飾爲別, 時 ·吳中困於朱勔花石之擾,比屋致怨,臘因民不忍,陰聚貧乏游手之徒。 自紅巾而上凡六等。 人安於太平,不識兵 宣和二年十 無弓矢、

列

革,聞 探其肺腸,或熬以膏油,叢鏑亂射,備盡楚毒,以償怨心。 走,州卽陷,殺制置使陳建、廉訪使趙約,縱火六日,死者不可計。 月陷陸、歙二州 金鼓聲卽斂手聽命,不旬日聚衆至數萬,破殺將官蔡遵于息坑。 南陷衢,殺郡守彭汝方;北掠新城、桐廬、富陽諸縣,進逼杭州。郡守棄城 凡得官吏, 必斷臠支體, 十一月陷青溪,十二

呂師囊、方巖山陳十四、蘇州石生、歸安陸行兒皆合黨應之,東南大震。 警奏至京師, 王黼匿不以聞, 於是凶焰日熾。 蘭溪靈山賊朱言吳邦、 **剡縣仇道人、仙居**

居,乃宵遁。 千,築京觀五,賊還據忧。二月,貫、隨前鋒至淸河堰(も),水陸並進,臘復焚官舍、府庫、民 年正月,臘將方七佛引衆六萬攻秀州,統軍王子武乘城固守,已而大軍至,合擊賊,斬首九 <u>童貫、譚履爲宣撫制置使,率禁旅及〉秦、晉蕃漢兵十五萬以東,且論貫使作詔罷應奉局。 三</u> |妻邵、子毫二太子、僞相方肥等五十二人於梓桐石穴中,殺賊七萬。 四年三月,餘黨悉 發運使陳亨伯請調京畿兵及鼎、灃槍牌手兼程以來,使不至滋蔓。 徽宗始大驚,亟遣 諸將劉延慶、王稟、王渙、楊惟忠、辛興宗相繼至,盡復所失城。四月, 生擒臘

湯巖、檔嶺(₹)八十五里間,九村山谷相望。王師自出至凱旋,四百五十日。 臘之起,破六州五十二縣,戕平民二百萬,所掠婦女自賊峒逃出,倮而縊於林中者,由 平。進貫太師,徙國楚。

兩月,命致仕,而代以譚稹。明年復起,領樞密院,宣撫河北、燕山。 臘雖平,而北伐之役遂起。 旣而以復燕山功,詔解節鉞爲眞三公,加封徐、豫兩國。 宣和七年,詔用神宗遺 越

訓,能復全燕之境者胙本邦,疏王爵,遂封廣陽郡王。 是年,粘罕南侵,貫在太原,遣馬擴、辛興宗往聘以嘗金,金人以納張覺爲責,且遣使告

謀遁歸。太原守張孝純誚之曰:「金人渝盟,王當令天下兵悉力枝梧,今委之而去,是棄河 康與敵也。河東入敵手,奈河北乎。」貫怒叱之曰:「貫受命宣撫,非守土也。君必欲留貫, 興兵,貫厚禮之,謂曰:「如此大事,何不素告我?」 使者勸貫速割兩河以謝,貫氣褫不能應, 置帥何爲?」孝純拊掌嘆曰:「平生童太師作幾許威望,及臨事乃蓄縮畏懾,奉頭鼠竄,何面 目復見天子乎?」

十大罪,命監察御史張澂迹其所至,蒞斬之,及於南雄。旣誅,函首赴闕,梟于都市。 人議者蠭起。初貶左衞上將軍,連謫昭化軍節度副使,竄之英州、吉陽軍。行未至,詔數其 攀望號慟,貫唯恐行不速,使親軍射之,中矢而踣者百餘人,道路流涕,於是諫官、御史與國 邊募長大少年號勝捷軍,幾萬人,以爲親軍,環列第舍,至是擁之自隨。上皇過浮橋,衞士 [] 奔入都,欽宗已受禪,下詔親征,以貫爲東京留守, 貫不受命而奉上皇南巡。] 貫在西

列

日開。 息,貫悉偵得之,先密以白,且陷以他事,砌反得罪,逐死。 數,皮骨勁如鐵,不類閹人。有度量,能疏財。後宮自妃嬪以下皆獻餉結內,左右婦寺譽言 姦稔禍,流毒四海,雖葅醢不償責也。 【握兵二十年,權傾一時,奔走期會過於制敕。 寵煽翕赫,庭戶雜遝成市,岳牧、輔弼多出其門,廝養、僕圉官諸使者至數百輩。 嘗有論其過者,詔方砌往察,砌一動一 貫狀魁梧,偉觀視,頤下生須十

傅,遂拜太尉,開府儀同三司,換節淮南 明堂,爲都監,旣成,拜節度使、加中太一、神霄宮使。歷護國、鎭東、河東三節度,至檢校太 主出 .外傳道上旨。<u></u>政和間,得君貴幸,至竄名進士籍中,積遷晉州觀察使、興德軍留後。 建 梁師成字守道,慧黠習文法,稍知書。初隸賈詳書藝局,詳死,得領睿思殿文字外庫,

帝曰「先臣何罪?」自是,賦之文乃稍出。以翰墨爲己任,四方儁秀名士必招致門下,往往 殿中,凡御書號令皆出其手,多擇善書東習做帝書,雜詔旨以出,外廷莫能辨。師成實不能 文,而高自標膀,自言蘇軾出子。是時,天下禁誦賦文,其尺牘在人間者皆毀去,師成訴於 時中外泰寧,徽宗留意禮文符瑞之事,師成善逢迎,希恩寵。帝本以隸人畜之,命入處

遭 而升。 點 汚。 多置書畫卷軸於外舍,邀賓客縱觀,得其題識合意者, 王黼父事之,雖蔡京父子亦諂附焉,都人目爲「隱相」,所領職局至數十百。 輒密加汲引,執政、侍從可

懼 不敢抗禮。 吏儲宏亦豫科甲,而執廝養之役如初。|李彦括民田於|京東、西,所至倨坐堂上,監司、郡守 賄 而止。 謝,人士入錢數百萬,以獻頌上書爲名,令赴廷試,唱第之日,侍於帝前,囁嚅升降。 |黼造伐||燕議,|師||成始猶依違,卒乃贊决,又薦||譚稹爲宣撫。 師成貌若不能言,然陰賊險鷙,遇間卽發。 有言於帝,師成適在旁,抗聲曰:「王人雖微,序於諸侯之上,豈足爲過?」言者 燕山平,策勳進少保。 其小 益 通

師成及望之以宣和殿珠玉器玩復往。 宦官表裏 東下,師成以舊恩留京師。於是太學生陳東、布衣張炳力疏其罪。 黼 彰化軍節度副使。 相,師成山是盆絀。 師成 相 疑之,寢食不離帝所,雖奏廁亦侍於外,久未有以發。 應,變恐不測。 開封東護至貶所。 耶王楷寵盛,有動搖東宮意,師成能力保護。欽宗立,嬖臣多從上皇 東復論其有異志,攘定策功,當正 先令望之詣中書諭宰相,至則留之,始詔暴其罪,責 行次八角鎭,縊殺之,以暴死聞,籍其家。 典刑。 會鄭望之使金營還,帝命 炳指之爲李輔國, 帝迫於公議,猶未誦言 帝罷 且

楊戩,少給事掖庭,主掌後苑,善測伺人主意。 自崇寧後,日有寵,知入內內侍省。立明

堂,鑄鼎鼐,起大晟府、龍德宮,皆爲提舉。

海、鎭東三鎭,由檢校少保至太傅,遂謀撼東宮。 政和四年,拜彰化軍節度使,首建期門行幸事以固其權,勢與梁師成埓。 歷鎭安、清

增租錢至十餘萬緡,水旱蠲稅,此不得免。擢公才爲觀察使。宣和三年,戩死,贈太師、吳 澤,綿亙數百里,濟、軍數州,賴其蒲魚之利,立租算船納直,犯者盜執之。一邑率於常賦外 國公,而李彥繼其職 淤流之處,皆勒民主佃。額一定後,雖衝蕩回復不可減,號爲「西城所」。 築山濼古鉅野 度地所出,增立賦租。始於汝州,浸淫于|京東|西、淮西北,括廢隄、棄堰、荒山、退灘及大河 有胥吏杜公才者獻策于戩,立法索民田契,自甲之乙,乙之丙,展轉究尋,至無可證,則

東州縣吏劉寄、任輝彦、李士漁、王滸、毛孝立、王隨、江惇、呂坯、錢棫、宋憲皆助彦爲虐,如 加威刑,致死者千萬。公田旣無二稅,轉運使亦不爲奏除,悉均諸別州。京西提舉官及京 指爲天荒,雖執印券皆不省。魯山闔縣盡括爲公田,焚民故券,使田主輸租佃本業,訴者輒 意天資狠愎,密與王黼表裏,置局

汝州,臨事愈劇。

凡民間美田,使他人投牒告陳,皆

奴事主,民不勝忿痛。 前執政冠帶操笏,迎謁馬首獻媚,花朝夕造請〔五〕,賓客徑趨謁舍,不

敢對之上馬,而/>
一處之自如。

薜荔 閱月,無休息期。 寥不爲取竹,誣刊蘇軾詩文于石爲十惡,朝廷察其捃摭,亦令勒停。當時謂朱勔結怨于東 發物供奉,大抵類朱勔,凡竹數竿用一大車、牛驢數十頭,其數無極,皆責辦於民,經時 一本,輦致之費踰百萬。喜賞怒刑,禍福轉手,因之得美官者甚衆。 農不得之田, 牛不得耕墾, 殫財靡芻, 力竭餓死, 或自縊轅軛間。 額昌兵馬鈴轄范 如龍 鱗

南,李彦結怨於西北。 **靖康初,詔追戩所贈官爵;彥削官賜死,籍其家;劉寄以下十人皆停廢;復范寥官。**

校勘記

- 富良江 「富良」原作「富民」,據宋會要蕃夷四之三六、通考卷三三〇四裔考改。
- 鮰 耀州 觀察使 「耀」原作「輝」,據宋會要儀制一三之五、長編卷三一一改。
- 達 州 團 練 使 團 練」原作「防禦」,據宋會要儀制一三之五、長編卷二七七改。
- 鯉 耀 州 觀 察 使 「耀州」原作「輝州」,據長編卷二七七、宋會要儀制一三之五改。
- (至) 趙 列 傳 稹 第 原作 趙 百 __ 積」,據 + -ti 本書卷二一一字輔表、卷二八八本傳改。 校 勘 記

(*) 鄭允中 原作「鄭久中」,據本書卷二〇徽宗紀、十朝綱要卷一七改。

一三六六六

(七) 淸河堰 原作「靑州堰」,據方勺靑溪寇軌、吳自收夢粱錄卷一一「堰閘渡」條改。

(人) 楷嶺 青溪寇軌作「榴樹嶺」。

(九) 花朝夕造請

疑有脫誤。

朱史卷四百六十九

列傳第二百二十八

宦者四

邵成章 藍珪 康履附 馮益 張去為 陳源 甘昇 王德謙

關禮 董宋臣

邵成章,欽宗朝內侍也。帝入靑城,命成章衞皇太子赴宣德門稱制行事。 太子北去,

成章留于汴。 金人掠陝西、京東諸郡,羣盜起山東,黃潛善、汪伯彥匿不以聞。及張遇焚眞州,去行 康王將卽位,元祐太后遣成章奉乘輿、服御至南京,從幸揚州

帝怒,除名,南雄州編管。侍御史馬伸言成章緣上書得罪,今是何時,以言爲諱。

成章上疏條具潛善、伯彥之罪日,必誤國,且申潛善等使聞之。

在六十里,帝亦不之知也。

久之,帝思<u>成章</u>忠直,召赴行在,其徒忌之,譖于帝曰:「邵九百來,陛下無歡樂矣!」遂

列傳第二百二十八

宦者四

成章不應,脅之以威,亦不從。 金人曰:「忠臣也,吾不忍殺。」遺之金帛而去。 止之于洪州。 。金人入洪,聞其名,訪求得之,謂之曰:「知公忠正,能事吾主,可坐享富貴。」

至馬前,故疾之者衆。俄遷內侍省押班、金州觀察使。 違者停官編隸。履終無所忌憚,與內侍曾擇凌忽諸將,或踞坐洗足,立諸將於左右,聲喏甚 恩用事,履尤妄作威福,大將如劉光世等多曲意事之。帝知之,詔內侍不許與統兵官相見, |主管機宜文字。朝廷遣人趣師入援,履等請王留相州,王叱之而行。旣卽位,二人俱恃 藍珪、康履,初皆爲康王府都監、入內東頭供奉官,嘗從康王使金人行營。及開元帥府,

横,以告武功大夫劉正彥,正彥曰:「會當共除之。」王淵躋樞筦,正彥以爲由宦者所薦,愈不 赫然遮道。統制苗傅等切齒曰:「此輩使天子至此,猶敢爾邪?」傅幕客王世脩亦疾中官恣 街,愈有輕外朝心。及幸)浙,道吳江,其黨競以射鴨爲樂。 比至|杭州,江下觀潮,中官供帳, 帝在揚州,金兵卒至,帝馳馬出門,百官不戒備,從行者惟履等五六人。自是履等益自 伏兵斬淵,遣兵圍履家,分捕中官,凡無須者皆殺之。

履馳入白帝,傅等至,厲聲曰:「陛下信任中官,凡中官所主者皆得美官。王淵遇賊不戰,

官以安之。 臣? 浙西機宜文字時希孟曰:「中官之爲患,至此極矣。 交康履得樞密。中官在外者已誅,更乞康履、藍珪、曾擇等誅之,以謝三軍。」帝不忍,除傅等 言:「陛下何惜 」遂以付傅, |傅等日:「欲遷官,第須控兩匹馬與內侍,何必至此!」帝問百官,策安出? 主管 康履,不以慰三軍?」帝不得已,遣人執履至,履望帝呼曰:「大家何獨殺 即腰斬之,梟其首。 帝幸睿聖宮,傅等留內侍十五人奉左右。尋捕珪、擇 不除之,天下之患未已。」軍器監漢宗諤

侍省都知。 等,皆編置遠州;擇,昭州,行一程,追還斬之。 益 張,中外切齒。」不報。 珪初與履 |傅等誅,贈||履官,諡||榮節,召||珪等還。 及迎太后,命充都大主管。 同進,而驕橫不及履,故幸以壽終。 <u></u>
珪至,自武功大夫擢內侍省押班。 太后旣還宮,珪奏應干補授恩,乞聽慈寧宮施行。從 中書舍人季陵言:「中官復召,其黨與相賀,氣燄 慈寧宮建,命提點事務,尋升內

使,諡良恪。 有安石者,與珪同姓,爲內侍省副 渡江後,中官贈諡自安石始。 都知,至景福殿使、湖州觀察使。 卒,贈保寧軍節度

其直舍,必縱飮大醉,薄莫乃歸,嘗漏泄禁中語。劉光遠被劾,諝與內侍陳永錫受其金,力爲 又有與履同姓者名諝,爲內侍省押班,亦親幸用事,與知閤門事藍公佐善,每邀公佐至 言官劾之,帝詔永錫與祠,醑送吏部。 後累官至均州觀察使。 卒,贈保信軍節度使,

列

第

百

諡忠定。

王即位,自入內東頭供奉官遷至幹辦御藥院,專兼幹辦皇城司

特舊恩 驕恣。 帝幸浙東,益與御前右軍都統制張俊爭渡,以語侵俊,且訴于帝。 事下御史

馮益,康王邸舊人也。

臺,侍御史趙鼎言:「明受之變,起于內侍,覆轍不可不戒。」事乃已。

紹興三年,授武功大夫、康州防禦使、帶御器械。 時帝用侍御史常同言,韶皇城司並隸

觀察使。 臺祭,益言非祖宗舊制,帝爲追寢前詔。特遷宜政使。 內廐舊有騏驥院官,益請别置御馬院, 自領其事,又擅穿皇城便門。 益自言藩邸舊吏,乞加恩, 侍御史沈與 遂升明州

|求以爲言,趙鼎等皆患之。

言事關 會劉豫揭榜山東,言益遣人收買飛鴿, 國體,當解職 加罰。 帝喜曰:「聞益交關外事,漸不可長。」與祠放歸。 因有不遜語。 張浚請斬益以釋謗,帝不許。 後意未息,鼎 鼎

解之。益自是家居廩祠者十四年。

詐,遂以眞告。 先是,偽柔福帝姬之來,自稱爲王貴妃季女,益自言嘗在貴妃閣,帝遣之驗 及事覺,益坐驗視不實,送昭州編管,尋以與皇太后連姻得免。 視, 十九年, 益為所

又遷內侍省押班。時見道爲入內內侍省押班,父子並充景福殿使。去爲寖有寵,請以一官 延福宮使,累遷至入內內侍省都知,恃恩干外朝謀議 回授見道,帝嘉而許之。其後見道以保康軍承宣使致仕,而去爲與秦檜、王繼先俱用事,升 張去爲,內侍張見道養子也。初爲章太后宅提點官,累遷至安德軍承宣使、帶御器械,

都人駁之, 莘老復劾其罪。帝不得已, 令去爲致仕, 莘老亦出補外。 悟而止。侍御史杜莘老乞斬去爲,以作士氣。先是,去爲取御馬院西兵二百人,髡其頂髮, 金兵將至,遣使來,出慢言以相懼。去爲陰沮用兵,進幸蜀之計,宰相陳康伯力非之,帝

軍承宣使。 (重,然至死不復涉朝廷事。 及內禪,詔落致仕,提舉德壽宮,行移如內侍省,仍鑄印賜之。 初,安恭后入宮,去爲實進之。 后崩,上皇又遣去爲傳旨,立謝貴妃爲后,故亦 修宮有勞,又特遷安慶

哈等又劾之, 之。 源廝役也,工理 政,遂罷。 言者猶未已,移源郴州。 十年 春, 淳熙 源特恩顓恣,本宮書史徐彥通者, 詔源應奉日久,特落階官,與京祠。 乃謫源建州居住,籍其貲進德壽宮。 中提舉德壽宮,頗有寵。 髪, 奏補承信郎; 源有園名小隱,其制 又補臨安府都吏李庚以官,使之窺伺府事。 俄帶浙西副總管,給事中趙汝愚言,內侍不當干軍 爲源掌家務,不數歲官至經武大夫,甄士昌 視禁籞有 給事中字文价封還錄黃,改外祠。 彦通 加,高宗以賜王才人。 除名,道州編管, 士昌、 孝宗聞而 庚皆抵罪 臺官黃 惡

不朝 娼女以別業,源在貶所與妓濫, 住,舜卿 史章穎 駁之,乃移源 重華宮, 光宗 論其離間君親,乞行誅 任便居住。 、即位, 婺州, 源與內侍楊舜卿、林億年數有間言。 復召還。 億年湖州。 慶元二年,以生皇子恩,源、億年許自便, 紹熙 四年, 竀, 義端 **俱以淫媒聞**, 以慰壽皇在天之靈 再駁舜卿內祠,反 自拱衞大夫、永州 人疑其非宦者云。 寧宗 坐 防禦使除入內內侍省押班。 即位,命三人俱事光宗于泰安宮。 詔罷 外補,其後源等卒聽自便。 源等官, 舜卿與內祠。 源無州、 給 事 億年常州 中 帝以疾 億年 汪 義端 御 居

甘昇, 內侍者押班澤之子。 澤之死,昪累遷亦至押班。 乾道中, 帝頗親昇,昇以此用

地,潛升卿于帝前,謂爲豪民馬請事,所得至萬緡。上疑,遂論罪,馬流嚴州, **繫獄,與可諷有司以私鹽論,御史陳升卿決獄,平反之。**昪之子婦,與可女也, 臨安尹胡與可爲小官時,丐貸於臨安富民馬氏,不如欲,銜之。 至是,馬以鬻官鹽踰格 升卿由是罷 乃陰爲與可

熹曰:「姦人無才,何以動人主。」昇用事二十年,招權市賄,黃由對策,亦頗及之。後帝察其 姦,遂抵之罪,籍其貲,竟以廢死。 無恥者爭附之。旣而覿死抃逐,獨昪在,朱熹力言之,帝曰:「昪乃德壽宮所薦,謂有才耳。」 時曾覿以使弼領京祠,王抃以知閤門兼樞密都承旨,昪爲入內押班,相與盤結,士大夫

舉佑神觀。 弟昺,淳熙末,幹辦內東門司、帶御器械。 慶元初,爲內侍省都知。帝過壽康宮,昺有力焉。遷官二秩,頗貴寵。 光宗朝,累遷至親衞大夫、保康軍承宣使、提

王德謙,初爲嘉邸都監,頗親幸。

得旨,德謙固請覆奏,王斥之,遂行。 孝宗大漸,光宗以疾久不朝重華宮。黃由時爲王府贊讀,奏請嘉王詣重華宮問疾,旣 孝宗崩,王在喪次,中外洶洶,王以告直講彭龜年。 龜

年以爲建儲則人心安,須白中宮乃可。 卽諭德謙奏之皇太后,德謙不敢,強之,旣而無 報。

王卽位,德謙累遷昭慶軍承宣使、內侍省押班,賜居第。驕恣踰法,服食擬乘輿,出入

或以 導駕燈籠自奉。爲人求官,贓以巨萬計,泄其事者禍立至,故外朝多附之。

署,諫議大夫劉德秀率臺諫論列,宰相京鐵復以爲言,命遂寢。 直學士院,將使草麻。宗旦先備草示之,引天寶、同光爲比,德謙喜。 中書舍人吳宗旦事之尤謹,夜則易服造謁。 德謙求爲節度使,先薦宗旦爲刑部侍郎 制出,參政何澹不肯

姚愈言吳宗旦嘗草德謙制,遂罷其官。愈又率同列力攻德謙,詔送廣德軍居住。尋以臨安 言其姦詭,乞自今不以赦移,雖特旨亦許執奏,帝用其言,德謙途坐廢斥以死。 尹劾其贓濫僭擬,詔降團練使,移居撫州,他事勿問。中書舍人高文虎請改爲安置,臺諫復 韓侂胄與德謙爭用事,德謙屢以計勝,侂胄擠之,詔與外祠,臺諫又交章論駁。 侍御史

關禮,高宗朝宦者。淳熙末,積官至親衞大夫、保信軍承宣使。孝宗頗親信之,後命提

舉重華宮。

|孝宗崩,光宗疾,不能執喪,樞密趙汝愚等請建儲以安人心,光宗御批又有「念欲退閑」

尋除 語,丞相留正懼,納祿去,人心愈搖。 其意,問之,侂胄不以告。 禮指天自誓不言,侂胄遂白其事,禮卽入宮, 泣告太后以時 無所出,亦惟有去而已。 太后曰:「此豈可易言!」明日,汝愚再遣侂胄附宗尹以奏,未獲命而侂胄退,與禮遇, 太后驚曰:「知院,同姓也,事體與他人異。」禮曰:「知院未去,恃有太后耳。 今有請不許,計 憂之狀,且曰:「留丞相已去,所恃者趙知院耳。今欲定大計而無太皇太后之命,亦將去矣。」 日太后 禮 入內內侍省都知,又差銀重華、慈福宮承受,充提舉皇城司,遷中侍大夫。 垂簾上其事。 又明日,嘉王入行禪祭,汝愚卽簾前進呈御批,太后遂命王卽皇帝位。 知院去,天下將若何?」太后悟,遂命禮傳旨侂胄以諭汝愚,約明 汝愚遣戚里韓侂胄因內侍張宗尹以禪位之議奏,太皇 事可 |禮知

|禮 不以功自居,乞致仕,不許;乞免推恩,又不許。南渡後,內侍可稱者惟邵成章與

禮云。

侍 御 史洪 選幸寧海 **董宋臣,理宗朝宦者。淳祐中,以睿思殿祗侯特轉橫行官。寶祐三年,兼幹辦佑聖觀。** 天錫 軍 勃之,不報, 天錫 ,簽判文天祥上疏乞誅宋臣,又不 坐左遷大理 少卿。 開慶初,大元兵駐江上,京師大震。

列

著作佐 軍器庫、翰林院、編修敕令所、都大提舉諸司,提點顯應觀,主管景獻太子府事。 景定四年,自保康軍承宣使除入內內侍省押班,尋兼主管太廟、往來國信所, 郎兼獻景府教授(1),義不與宋臣聯事,上書求去,天祥出知瑞州 同提點內 會天祥以

命主管御前馬院及酒庫。 臣方爲之和 薰灼,其力能去臺諫、排大臣, 至結凶渠以致大禍。 言者論宋臣不置,帝曲爲論解庇之。 解,此 過計也。 旣卒,帝猶命特轉節度使,其見寵愛如此。 願收還押班等除命,不勝宗社之幸。」疏入,帝亦不之省。六月, 秘書少監湯漢上封事,亦言:「宋臣十餘年來聲焰 中外惶惑切齒,而陛下方爲之辨明,大

校勘記

以著作佐郎無獻景府敎 條, 嘉定十三年,其府名不應沿稱至理宗時,上文所稱「景獻太子府」亦疑有誤。 云 「義不 天祥係以秘 與宋臣 書省正 聯 事」, 字兼景獻府教授, 授 此處作「獻景」, 按文天祥文山先生全集卷一七劉岳申文丞相傳、 亦有不合。 與此不同;又上文董宋臣「主管景獻太子府事」, 又景獻太子係寧宗太子詢的諡 紀年錄景定三年 號, 詢死於 下文

宋史卷四百七十

列傳第二百二十九

佞幸

弭德超 侯莫陳利用 趙贊 王黼 朱勔 王繼先 曾覿

龍大淵附 張說 王抃 姜特立 譙熙載附

梯媒也。 也。 日 敗闕,雖能殄除,隳城以求狐,灌社以索鼠,亦曰殆哉!宋世中材之君,朝有佞幸,所不免 太宗有弭德超、趙贊,孝宗有曾覿、龍大淵,二君固不可謂非剛明之主也。作佞幸傳。 人君生長深宮之中,法家、拂士接耳目之時少,宦官、女子共啓處之日多,二者,佞幸之 剛明之主亦有佞幸焉,剛好專任,明好偏察,彼佞幸者一投其機,爲患深矣。他

|弭 德 超 滄州 清池 李符、 李琪薦之,給事太宗晉邸。 太宗卽位, 補供奉官。 興

國 遷酒 坊使、杭州 兵馬都監,又爲鎭州駐泊 都 監

院使:並 矣。」」又巧誣彬他 使曹彬秉政歲久,得士衆心; 初, 兼 太宗念邊 樞 密副 戍勞苦, 月賜士卒銀, 使 事 で 上 一頗疑之,出彬爲天平軍節度。 臣 從塞上來, 謂之月頭銀。 聞士卒言: 以王顯爲宣徽南院使,德超爲 『月頭 德超乘間以急變聞於太宗日:「樞 銀曹公所致, 微曹公我 宣 輩 徽 餒 北 死

具伏, 得綫 徳超 頭,我 徳超譖 許 视 下 度 大官。 事 詔奪官職, 上 月餘, 無守執, 曹彬事 汝等 稱 病請告,居常怏怏。 為汝輩 與其家配隸瓊州 成, 何人, 反在我上, 期得樞 所眩惑。」 密使,乃爲副 禁錮,未幾死 顯告之,太宗怒, 更令我効汝輩所 日 使; 詬 |顯
及 又柴禹錫與德超官同,先授,班在其上。 禹 命膳部郎中、 錫 爲 日 我實 我言 「恥之。」又大駡曰:「汝輩當斷 國家 知雜滕中正就第鞫德超 大事,有安社稷功,

止

故

樞 密 承旨陳從信白於太宗,即日召見,試其術頗 侯 莫陳利 用, 益州 成都人,幼得 變 幻 之術。 太平 驗, 即授殿直, 興 或 杒, 賣 累遷崇儀 、藥京師, 副使。 言黄 白 雍熙二年, 事 以 惑人。

刺 改 右 史。 監門衞將軍,領應州刺史。 四 年,遷鄭州 團 練 使。 前 後賜 三年,諸將北征,以利用與王侁並爲并州駐泊都監,擢單州 與甚渥,依附者頗獲進 用,遂橫恣無復畏憚。 其 (居處

服 玩皆僭 乘 興,人畏之不敢

家,俄詔還之。 請 曰:「陛下 會趙 普再 木 誅, 入中書,康知殺 是亂天下法。 人及諸不 法 可惜,此 法, 盡奏之。 何足惜哉 太宗遣近臣案得姦狀,欲貸其死,普固 」遂下詔除名,配商州 禁錮。 初

詰實, 及之,已爲前使誅 紅黃 太宗怒,令中 (羅袋; 趙普恐其復用, 令上 疏告之。 澶州 使臠殺之, 黄 河清,鄭州 又京西轉運 因殿 已而 中丞竇諲嘗監鄭州権酤,知利用每獨南向坐以接京使, 復遣使貸其死, 用爲 副使宋流籍 詩 題試 舉 人,利用 利用家,得書數紙, 乘疾置至新安,馬旋濘而 判試 官狀(こ,言甚 言皆指斥切害, 踣, 不 遜 出濘換馬, 召|諲 悉以 犀玉帶用 至 進上。 中書 比追

元屠之無 趙贊 列 流遺類 傳 井州 第 稍署贊 人,性險 百 + 右 設 九 職 辯 給,好 佞 太原平, 幸 l利害。 隸三司爲走吏,又許本司 初爲 軍 小 吏,與都校不協, 補殿直,太宗頗任之。 因 ||誣營中 謀叛, 遷供 劉繼

中外益畏其口。 簿,令贊 奉官、閤門祗 百,欲磔諸 (自選吏十數人爲耳目, 市 候,提舉京西、陝西數州錢帛,發摘甚衆。又自乞捕盜,至永興,得兵士盜錢二 知府張齊賢奪而 會改三司官屬,以贊爲西京作坊副使、度支都監 專何中書、樞密及三司 釋之。 太宗命御史臺按問,停贊官數月。 事, 乘間白之。 太宗以爲忠無他腸, 復令專鈎校三司

聯事,由是益橫恣,所爲皆不法。太宗頗知之,以問左右,皆畏二人,無敢言其惡 乞著籍便殿門,許非時入奏,與鸞親比相表裏,累遷至西上閤門副使、鹽鐵都監。 人,太宗嘉其直。 時又有鄭昌嗣者,宣州人,亦起三司役吏,稍遷侍禁。 會市物吏因緣爲姦,列肆屢謁開封訴之,乃置雜買務,使昌嗣監之。 奉使西川,回奏在官不治者數十

官,許攜家配隸房州禁錮,即日驛遣之。昌嗣黜唐州團練副使,不署事。 登宮中玉皇閣,飲宴至夜分,掌舍宦者不能止,以其事聞。 至道元年上元節,京城張燈,太宗以上淸宮成, 臨幸。 太宗大怒,并摭諸事,下詔 贊與昌嗣邀其黨數人, 攜妓樂 既數 日,並賜死於 奪費

刑罰 今之衣儒服、居淸列者,亦頗朋附小人,爲自安計。 焉?」參知政事寇準對曰:「帝堯之時,四凶 太宗謂侍臣曰:「君子小人如芝巓荆棘,不能絕其類,在人甄別耳。 在庭,則三代之前,世質民淳,已有 如贊、昌嗣之類奔走賤吏,不足言也。」 **芍**盡 君子, 小 則 何用

寒失帝意,遣使以玉環賜<u>蔡京於杭〔三〕,</u>黼覘知之,數條奏<u>京所行政事,并擊商英。</u> 志,何志同領局,喜其人,爲父執中言之,薦擢校書郞,遷符寶郎、左司諫。 成 散,京計不行。還爲學士,進承旨。 京與鄭居中不合, 黼復內交居中, 京怒,徙爲戶部尚書,大農方乏,將以邦用不給爲之罪。 相,德其助己,除左諫議大夫、給事中、御史中丞,自校書至是財兩歲。 丞、中書侍 一西甲第,徙居之日,導以敎坊樂,供張什器,悉取於官,寵傾一時。 而 稱爲恩府先生,倚其聲焰,逼許氏奪之,白晝逐將家,道路憤歎。復爲承旨,拜尚書左 有口辯,才疏雋而寡學術,然多智善佞。中崇寧進士第,調相州司理參軍,編修九域圖 諸班禁旅賚犒不如期,詣左藏鼓譟,黼聞之,卽諸軍揭大榜,期以某月某日,衆讀榜皆 遭父憂,閱五月,起復宣和殿學士,賜第昭德坊。故門下侍郎許將宅在左,黼父事梁師 王黼字將明, 郎。 宣和元年,拜特進、少宰。由通議大夫超八階,宋朝命相未有前比也。 開封祥符人。初名甫,後以同東漢宦官, 賜名黼。 爲人美風姿, 張商英在相位, 目睛

如

列 傳

第

三百二二

+ 九

佞

別賜

豆,减遙郡使、横班官奉入之半,茶鹽鈔法不復比較,富戶科抑一切蠲除之,四方翕然稱 蔡京致仕 l,黼陽順人心,悉反其所爲,罷方田,毀辟雍、醫、算學, 倂會要、六典諸局, 汰

復露章劾之,兩人皆徙遠郡。 御史陳過庭乞盡罷以御前使喚爲名冗官,京西轉運使脹汝霖請罷進 官吏承望風旨,凡四方水土珍異之物,悉苛取於民,進帝所者不能什一 旣 得位,乘高爲邪,多畜子女玉帛自奉,僭儗禁省。誘奪|徽猷閣待制|鄧之綱妾,反以罪 加少保、太宰。請置應奉局,自兼提領,中外名錢皆許擅用,竭天下財 西路花果, 帝旣納, 黼 ,餘皆入其家。 力以供

然,且有 言,歸過陛下。」帝怒。 。」貫至吳,見民困花石之擾,衆言:「賊不亟平,坐此耳。」貫 循 以 |睦寇||方臘起,||鷳方文太平,不以告,蔓延彌月,遂攻破六郡。 功轉 罷應奉局之令,吳民大悅。 :少傅,又進少師。]貫之行也,帝全付以東南一事,謂之曰:「如有急,即以 買謀起察京以間觸,觸 貫平賊歸,黼 言於帝曰:「臘之起由茶鹽法也,而貫入姦 即命其僚董耘 帝遣宣貫督秦甲十萬 作手詔 ,若罪己 御 始平

年, 然自累朝以來,彼之慢我者多矣。兼弱攻昧,武之善經也。今弗取,女眞必彊,中原故 是時朝廷已納趙良嗣之計, 結女眞共圖燕, 大臣多不以爲 म 雖 通 好

地將不復爲我有。」帝雖向其言, 然以兵屬貫,命以保民觀釁爲上策。 滿復折簡通誠於貫

日:「太師若北行,願盡死力。」時帝方以睦寇故悔其事,及鷳一言,遂復治兵。

緒, 竟買空城五六而奏凱。 率百僚稱賀, 帝解玉帶以賜, 優進太傅, 封楚國公, 許服紫花袍, 黼於三省置經撫房,專治邊事,不關之樞密。括天下丁夫,計口出算,得錢六千二百萬

翳從儀物幾與親王等。'黼議上尊號,帝曰:「此神宗皇帝所不敢受者也。」却弗許。

宰,至陪扈曲宴,親爲俳優鄙賤之役,以獻笑取悅。 都,每張宴其居,輒陳尙方錦繡、金玉、瑰寶,以誇富盛,由是女眞益生心。 身爲三公,位元 始,遼使至,率迂其驛程,燕犒不示以華侈。 及黼務於欲速,令女眞使以七日自燕至

謂但當得觀察使,召宮臣耿南仲諭指,使草代東宮辭諶官奏,竟奪之,蓋欲以是撼搖東 <u>飲宗在東宮,惡其所爲。</u>剛王楷有寵,黼爲陰畫奪宗之策。皇孫諶爲節度使、崇國公,

梁師成與連牆,穿便門往來,帝始悟其交結狀。還宮,黼眷頓熄,尋命致仕。 帝待遇之厚,名其所居閤曰「得賢治定」,爲書亭、堂牓九。有玉芝產堂柱,乘興臨觀

節度副使,籍其家。 <u></u>
欽宗受禪,
黼惶駭入賀,
閻門以上旨不納。 |金兵入汴,不俟命, 载其孥以東。 吳敏、李綱請誅黼,事下開封尹聶山,山方挾宿怨,遣武士躡及於 韶貶爲崇

佞

二百二十

雅 丘 南輔固村, **戕之**,民家取其首以獻。 帝以初即位,難於誅大臣,託言爲盜所殺。 議者不

以誅黼爲過,而以天討不正爲失刑云。

邑乞貸,遇異人,得金及方書歸, 朱勔,蘇州人。父沖,狡獪有智數。 設肆賣藥,病人服之輒效, 家本賤微,庸於人, 遠近輻: 梗悍不馴, 凄, 家遂富。 抵罪鞭背。 因脩蒔 去之旁 園

圃(三),結游客,致往來稱譽。

凉 郡守、郡守呼沖見京、京語故、沖願獨任。 大驚,陰器其能。 始,蔡京居錢塘,過蘇,欲建僧寺閣,會費鉅萬,僧言必欲集此緣,非朱沖不可。 明年召還,挾動與俱,以其父子姓名屬童貫竄置 居數 日,請京詣寺度地,至則大木數千章積庭下, 軍籍中, 皆得官。 京以屬

歲增 綗 置應 加,然歲率不過 徽宗頗垂意花石, 奉局 于蘇,指取內帑如囊中物, 再三貢,貢物裁五 京諷 励語 其父, 七品。 密取浙中珍異以進。 每 取以 至政和· 數 + 中始 百 萬 計 極 盛,舳艫 初致黄 延 福宮、 楊 相 艮嶽成,奇卉異植 銜 三本,帝嘉之。 于 准、汁,號 花 後歲

物其中。

<br

徐鑄 應安道、王仲閎等濟其惡,竭縣官經常以爲奉。所貢物,豪奪漁取於民,毛髮不少

之不 償。 刨 被 速。 士民家一石一木稍堪翫,即領健卒直入其家,用黃封表識,未即取,使護視之,微不謹, 以 大不恭罪。 民預是役者,中家悉破產,或鬻賣子女以供其須。 及發行,必徹屋抉牆以出。 人不幸有一物小異, 共指爲不祥, 唯恐芟夷 斸山輦石,程督峭慘,雖在江湖

横、 不測 石 抑 其太甚者。 陵皪州 凡十餘 嘗 之淵,百計取之,必出乃止 至,賜名「神運昭功石」。截諸道糧餉綱,旁羅商船,揭所貢暴其上,篙工、柁師倚勢貪 得 ·太湖石,高四丈,载以巨艦,役夫數千人,所經州縣,有拆水門、橋梁, 縣,道路相 帝亦病其擾,乃禁用糧綱船,成伐冢藏、 聽動與察攸等六人入貢,餘進奉悉罷。 視以目。 廣濟卒四指揮盡給輓士猶不足。 自是動 毁室廬,好得加黃封帕蒙人園囿花 小 京始患之,從容言於帝、願 戢。 鑿城垣以過

之,引 百家 自 朔望皆拜庭下,命 天 方大寒, 衞 旣 期 爲發運使,公肆掊克。 子汝賢 M $\dot{\overline{L}}$ 架 役死 日 甚。 虚 (等召 者 徙,郡吏逼逐,民嗟哭於路。 所居直蘇市 相 土 呼 至,輒 枕藉 鄉 州 官寮,頤指目攝,皆奔走聽命,流毒州郡者二十年。 朝謁,然後通 霖志在媚動,益 中孫老橋,忽稱 園 池擬禁籞,服飾器用 刺詣 加苛虐,吳、越不勝其苦。 一一一 途建神霄殿,奉青華帝君像其中,監司、都邑吏 韶,凡橋東 主趙 上僭乘與。 霖建三十六浦牐, 西四至 一壤地室廬悉買賜予己,合數 叉託 輓舟募兵數千人, 擁以 徽州 興必不可成之功, 盧宗原竭庫錢遺

列

觀使。 內侍,進見不避宮嬪。 可得,不附者旋踵罷去,時謂東南小朝廷。 者、民大悅。然寇平,勔復得志,聲焰熏灼。 一門盡爲顯官,騶僕亦至金紫,天下爲之扼腕 歷隨州觀察使、慶遠軍承宣使。 童貫出師, 承上旨盡罷去花木進奉, 帝末年益親任之,居中白事,傳達上旨,大略如 **衺人穢夫,候門奴事,自直祕閣至殿學士,** 燕山奏功,進拜寧遠軍節度使、體泉 帝又黜耐父子弟姪 如欲 在 職

即所至斬之。 凡 由 動得官者皆罷。 **|靖康之難,欲爲自全計,倉卒擁上皇南巡,且欲邀至其第。** 籍其貲財,田至三十萬畝。言者不已,羈之衡州,徙韶州、 欽宗用御史言,放歸 循州 田里,

讀。」直柔再 易前 夫、 開州 国練 使致仕。 班; 繼先,開封人。 則自 駁,命乃寢。 此 一轉行 無礙,深恐將帥解體。」帝曰:「朕頃冒海氣,繼先診視有奇效,可特書 尋以覃恩, 姦點善佞。 旣 而特授榮州 改授武功大夫,落致仕。給事中富直承奏三繼先以雜流 建炎初以醫得幸,其後寖貴寵,世號王醫師。 防禦使。 至和安大

太后有疾,繼先診視有勞,特補其子悅道爲閤門祗侯。 尋命繼先主管翰林醫官局,力

大夫、華州觀察使、詔餘人毋得援例。 是時、繼先用事,中外切齒,乃陽乞致仕,以避人言。 吳貴妃進封,推恩遷奉寧軍承宣使,特封其妻郭氏爲 韶遷秩二等,許回授。 俄除 右武

郡夫人。

楊椿沮之,計不行。繼先富埓王室,子弟通朝籍,總戎寄,姻戚黨與盤據要途,數十年間,無 敍拜兄弟,表裏引援。 能搖之者。 繼先遭遇冠絕人臣,諸大帥承順下風,莫敢少忤,其權勢與秦檜埓。 遷昭慶軍承宣使,又欲得節鉞,使其徒張孝直等校本草以獻,給事中 膾使其夫人詣之,

|金兵將至,|劉錡請爲戰備,|繼先乃言:「新進主兵官,好作弗靖,若斬一二人,和好復

固。」帝不懌曰:「是欲我斬劉錡乎?」

凡名山大刹所有,太半入其家。此特舉其大者,其餘擢髮未足數也。」 富民金,薦爲閤職;州縣大獄,以賂解免;誣姊姦淫,加之黥隸;又於諸處佛寺建立生祠, 宮」,奪良家婦女爲侍妾;鎭江有娼妙於歌舞,矯御前索之;淵聖成喪,舉家燕飲,令妓女 不歌,謂之『啞樂』;自金使來,日輦重寶之吳興,爲避走計;陰養惡少,私置兵甲,受 侍御史杜莘老劾其十罪,大略謂:「繼先廣造第宅,占民居數百家,都人謂之 『快樂仙

奏入,詔繼先福州居住。其子安道,武泰軍承宣使;守道,朝議大夫、直徽猷閣;

以 潮 千 奉 ·萬 郞 直 計,鬻其田 秘 閣 · 孫崎,承議郎、直秘閣:並勒停。 園及 金銀,並 一隸御前激賞庫。 其海舟付李寶,天下稱快。 放還良家子爲奴婢者凡百餘人。 籍其貲

住,毋至行在。 方繼先之怙寵奸法, 淳熙八年,卒。 帝亦知之,故晚年以公議廢之,遂不復起。 孝宗卽位,詔任便居

內 必大格除目 言之,帝不納。 īĦ 爲諫官?乞賜貶黜。」中書舍人張震 石 城 文州刺史、權知閣門:皆兼皇城司。 權 顯 知 司 客。 既 事。大淵遂除知閤門事,而觀除權 曾觀 諫議大夫劉度 而給舍金安節、 字純甫,其先汴人也。用父任補官。 孝宗受禪, 不下, **震辭去,遂以** 尋與祠, 二人除命亦寢。 大淵自左武大夫除樞密副都承旨,而戲 入對,首言二人潛邸舊人,待之不可無節度,又因進故事, 周必 內祠 大 ,再封還錄黃。 兼 侍 繳其命至再, 不數月間、除命四變。 讀 知 閣 門事 劉度 未幾,卒以大淵爲宜 時張燾新 紹興三十年,以寄班祗侯與龍大淵同爲建王 奪言職, 出 度言:「臣欲退之,而陛下進之,何面 知紹 拜參政,亦欲以大淵、觀決去就,力 權 興府。 劉度出知建寧府,尋放罷 工部 自武翼郞除帶御器械, 侍郎,而二人仍知 州 殿中侍御史胡沂 觀察使、 知閣 門 亦論二人 論京房、 事 閣 幹辦皇 門 目尚 41 劑

論選之公,有輕國體。 時又有內侍押班梁珂者,三人表裏用事。 及珂以罪出,右正言龔茂 司條陳利害,示以副封,公然可否。 若夫交通賄賂,干求差遣,特其小者耳。 蚁 良 之寡恥者潛附麗之。帝嘗令大淵撫慰兩淮將士,侍御史王十朋言大淵銜命撫師,非出朝 、時有少過,昌言於外,謂嘗爭之而不見聽。 人對,首論:「二人害政甚珂百倍,陛下罷行一政事,進退一人才,必掠美自歸,謂爲已力。 **攀臣旣以言二人得罪去,侍御史周操章十五上,不報。** 羣臣章疏留中未出,間得窺見,出以語人。有 自是觀與大淵勢張甚, 願特出威斷, 士大夫 廷

特陛下未之覺耳。」疏入不報。茂良待罪,除太常少卿,五辭不拜,出知建寧府。 茂良再上疏言:「德宗不知盧杞之姦邪,此其所以姦邪也。 以二人皆潛邸舊人,非近習比;且俱有文學,敢諫諍,杜門不出,不預外事,宜退而訪問。 良時爲監察御史,亦言:「水至陰,其占爲女寵,爲嬖佞,爲小人,蓋專指左右近習也。」帝論 唱酬,字而不名。罷宰相,易大將,待其言而後決。嚴法守,裁僥倖,當自宮掖近侍始。」茂 先是,江、浙大水,詔侍從、臺諫陳闕政。著作與劉夙上封事曰:「陛下與覿、大淵輩觴詠 大淵、覿所爲,行道之人能言之,

並行罷去。」

之?」邁以二人告。 日,右史洪邁過參政陳俊卿日:「聞將除右史,邁遷西掖,信乎?」俊卿日:「何自得 俊卿卽以語宰相葉顒、魏杞,而己獨奏之,且以邁語質之帝前,帝怒,卽

网傳

健。 可也 乾道 人 於 引 四年, 外。 以 自 近 於是遷大淵爲江東總管, 大淵 而 待以賓友,使得與聞政事,非所以增聖德、整朝綱也。」帝納珙言, 死,覿尙 在福建。 帝憐,欲召之,樞密劉珙奏曰:「此曹 觀爲淮西副總管,中外快之。 尋改大淵浙東、覿福 奴隸爾,厚賜之

泛

之命, 俊卿 管。 之 國 恢 Ħ 未幾,以墨韶 日二不 Ŀ 旣 且戒悶 封 mj 事論 覿 會處允文使圖還,與俊卿同奏觀 ·爾,亦須 垂滿,俊卿恐其入,預請以浙東總管處之。 門吏趣 列, 進覿一官爲觀察使,中書舍人繳還,不因事除 且見俊卿切責之,掞之得台州教官以出。 朝辭, 有名。」會汪大猷爲賀金正 覿 由 是怏怏而 去。 不可留。 旦使,俾覿副之。 帝日: 臺臣上疏論之,不報。 「然, 覿至龍山已久, 同談之去, 然後 拜(图),必有人言。 留則累朕。」卒除浙東副總 比還,遷一秩,而竟申浙東 太學錄魏掞 帝不 聽。

政 府 撻之,待罪乞出,不許。 年,姚 儀 行 必 同三司 六年夏, 相 憲爲 事 ,遽以文武 賀 俊卿罷 匹 金國 年, 尊號使, 鼠欲以 政 (官各隨本色蔭 戶部員外郎謝廓然忽賜出身,除侍御史。 十月, 文資官其子孫 皾! 副之。 觀以京祠 補法 歸,除武 召。 繳進,覿 ,帝遣中 泰 七年,立皇太子至,覿以件讀勞,升 軍 大怒。 使 節 至 度使,提舉萬 一省中 茂良 · 具使 退 朝, 相 廓然首論茂良,以資政殿 言觀。 . 奏補法. 覿 從騎 淳熙 不 龔 避, 茂 元 良 茂 年, 承宣使。 良 诗 執 以參 而

是責逐大臣,士始側目重足矣。廓然旣以擅權罪茂良,從班有韓彥古者,覿之姻,廓然之 學士知鎭江;章再上,鐫罷;言之不已,貶英州:皆覿所使也。 觀前雖預事,未敢肆,至

大當草制,人謂其必不肯從,及制出,乃有「敬故在尊賢之上」之語,士論惜之。 六年二月,帝幸佑聖觀,召宰臣史浩及覿同賜酒。是歲,加覿少保、醴泉觀使。 時周必

黨,遂獻議助之,使人主疑大臣而信近習,至是益甚。

都 自 承旨、賜三品服,俄爲浙西提刑,尋以集英殿修撰奉內祠。是二人者,皆覿所進也。 小官十年至宰相。徐本中由小使臣積階至刺史、知閤門事,換文資爲古文殿修撰、樞密 覿始 與龍大淵相朋,及大淵死,則與王抃、甘昪相蟠結,文武要職多出三人之門。 葉衡

知 其門牆,承望其風旨。」疏入,帝怒,諭令分析,丞相趙雄言之,事遂止。陳俊卿守金陵,過闕 譖逐大臣, 貶死嶺外。 入見,首言曾覿、王抃招權納路,薦進人才,皆以中批行之。 帝曰:「瑣細差遣,或勉循之。至 於近上之除,此輩何敢預。」俊卿入辭,又曰:「向來士大夫奔覿、肘之門,十才一二,尙畏人 今則公然趨附,十已八九,大非朝廷美事也。」帝感悟。 力,有曰:「一二近習之人,蠱惑陛下心志,所謂宰相、師傅、賓友、諫諍之臣,或反出入 著作郎胡晉臣因轉對,極論近習怙權之害,遂出知漢州(台)。南康守朱熹應詔上書,其 自是寖覺其姦,嘗謂左右曰:「曾觀誤我不少。」遂稍疏觀。 覿用事二十年,權震中外,至於

列

傳

論觀得罪者皆錄贈,胡晉臣起至執政,魏掞之贈直祕閣,龔茂良悉還其職名恩數云。 覿 憂 。志,宜發于背。 七年三月,侍帝宴于翠寒堂,退爲記以進。 十二月,卒。於是凡前

壽聖皇后女弟,由是累遷知閤門事。 開封人。父公裕,省吏也,爲和州防禦使,建炎初有軍功。 隆興初,兼樞密副都承旨。 乾道初,爲都承旨,加明州 說受父任爲右職,娶

旣下,朝論譁然不平,莫敢頌言于朝者。 人曰:「張左司平時不相樂,固也。 大不草詞。 七年三月,除簽書樞密院事。 尋除說安遠軍節度使(+),奉祠歸第。不數月,出試知遠州(S)。 范致能亦胡爲見攻?」指所坐亭材植曰:「是皆致能所忠 時起復劉珙同知樞密院,珙恥與之同命, 惟左司員外郎張斌在經筵力言之,中書舍人范成 力辭不拜。 説旣奉 ·祠,語 命

呂交章論之,起居鄓莫濟不書錄黃,直院周必大不草答詔,於是命權給事 命翰林學上王曮草答詔。未幾,曮升學士承旨,憲贈出身,為諫議大夫。 八年二月,復自安遠軍節度使提舉|萬壽觀,簽書樞密院事。 侍御史李衡、右正言王希 中姚憲書讀 韶希呂合黨邀名, 行下,

官。 觀, 論 日下出 反覆, 責遠小監當。 說勢赫然,無敢攖之者。 國門。 或 [子司業劉焞移書賣宰相,言說不當用,即爲言者所論,出爲江西 衡素與說厚,所言亦婉,止罷言職,遷左史,而濟、必大皆與在外宮 九年春,說露章薦濟、必大,於是二人皆予郡,必大卒不 轉 運 判

낽

亦貶 念之, 湯 邦彦 松州。 淳熙元年,帝廉知說欺罔數事,命侍御史范仲芭究之,遂罷爲太尉,提舉玉隆宮。 詔復 |又劾其姦贓,乃降爲明州 承宣使,給事 中陳峴繳之,乃止。 觀察使,責居撫州。 其子薦,文州 三年,許自便。 刺史;嶷,明州觀察使。 七年,卒于湖州。 說 敗,薦 帝 諫官 獝

便,說 可 ※ 止。 先是,南丹州莫延甚表乞就宜州市馬,比橫山省三十程,說在樞筦以聞,樞屬有論其不 不聽。 與右相梁克家議使事 說旣貶,遂罷其議。 不合,克家罷去而說留, 說又嘗建議欲郎官、卿監通差武臣,中書舍人留正以爲不 其竊政權、傾大臣類 如 此

使, 許以地 王 初爲 易歳 國 貢 信所小吏。 爲 歳幣 而 還。 金 人求海、泗、唐、鄧、 乾道 中,積官至知閤門事,帝親信之。 商 秦地, 議久不 决。 金使至, 金兵至,遣抃往 議 國書禮,

列

傳

第

翌日,金使乃進書。帝以爲可任,遣詣荆襄點閱軍馬。 不合,抃以宰執虞允文命,紿其使曰:「兩朝通好自有常禮,使人何得妄生事,已牒知對境。」

市人充軍,號呼滿道,軍士乘隙掠取民財。 淳熙中, **兼樞密都承旨,建議以殿、步二司軍多虛籍,請各募三千人。** 帝專以罪殿前指揮使王友直,而命抃權殿前 已而殿司輒捕

位之初,宰相如葉顒等皆懼陛下左右侵其權,日夜與之爲敵。陛下察數年已來,大臣還有 與陛下左右角是非者否?蓋其勢積至此也。今將帥之權盡歸王抃矣。」 宗正丞袁樞因轉對,數爲帝言之,帝猶未之覺也。 吏部侍郎趙汝愚力疏抃罪,言:「陛下卽 趙雄詢其人,雄憚抃等,乃令晉臣捨抃等,指其位卑者數人以對,晉臣竟外補。校書郞鄭鑑 時掛與曾覿、甘昇相結,恃恩專恣,其門如市。 著作郎胡晉臣嘗論近習怙權,帝令執政

受國書,尋悔之。淳熈八年,全賀正旦使至,復要帝起立如舊儀,帝遽入內,抃擅許全使用 舊儀見。 先是,打給金使取國書,及使歸,金主誅之。嗣歲,金使至,帝以德壽宮之命,爲離席 翌日,汝愚侍殿上,帝不懌數日。汝愚因亟攻抃,帝遂出抃外祠,不復召。 淳熙十

年,以福州觀察使卒。

姜特立字邦傑,麗水人。以父經恩,補承信郎。

趙汝 讀 由是得幸於太子。 、愚薦于朝, 淳熙中, 累遷福建路兵馬副都監。 召見,獻所爲詩百篇,除閤門舍人,命充太子宮左右春坊衆皇孫平陽王伴 太子卽位, 除知閤門事,與譙熙載皆以春坊舊人用事,恃恩無所忌 海賊姜大獠寇泉南,特立以一 舟先進,擒之。 帥

惲,時人謂曾、

龍再出。

擇 步軍副總管,詔賜錢二千緡爲行裝。 「臣與特立勢難兩立。」帝答曰:「成命已班,殷無反汗,卿宜自處。」」正待罪國門外,帝不復 人執政,孰可者?」明日,正論其招權納賄之狀,遂奪職與外祠。帝念之,復除浙東馬 留正 爲右 祖,執政尙闕人,特立一日語正曰:「帝以丞相在位久,欲遷左揆,就二尙書中 正引唐憲宗召吐突承璀事, 乞罷相,不許。 正復言

寧宗受禪,特立遷和州防禦使,再奉祠,俄拜慶遠軍節度使,卒。

召,而特立亦不至。

熙載亦爲平陽邸伴讀,累官至忠州防禦使、知閤門事。 紹熙中卒,較之特立頗廉勤。

{秋 褒貶齊宣 熙載子令雍 |王易牛、|秦穆公悔過事,|令雍卽爲三詩以獻,王甚愛重之。 ,以恩補承信郎、平陽郡王府幹辦,尋充王府內知客,小有才。 及卽位, 王嘗與論春 除知閤門

列

傳第

__

百二十

九

佞幸

校

勘

是,復書「得開知 累遷至揚州承宣使。 止」四字以名其堂。 謝事,拜保成軍節度使。 寶璽歸,覃恩進檢校少保,仍轉太尉致仕。卒,贈開府 初賜居第,帝親書「依光」二字賜之。

校勘記

儀同三司。

- 〔1〕 判試官狀 「官」字原脫,據張縣卷二九補。
- 遣使以玉環賜蔡京於杭 東都事略卷一〇六汪黼傳:「徽宗召蔡京於錢塘, 遣中使賜以玉環。」

此處「遺使」前當有脫字。

- 3 因 脩 抗菌園圃 脩 原作「循」,據東都事略卷一〇六本傳改。
- 不因 事除 拜 朝野 ·雜記乙集卷六孝宗黜龍曾本末,此上有「以 爲」兩字。
- 至立皇 太子 「太」字原脫,據本書卷三四孝宗紀、朝野雜記乙集卷六補。
- 漢州 原作 「濮州」,據本書卷三九一胡晉臣傳、南宋館閣續錄卷一八改。
- **等除說安遠軍節度使** 本書卷三四孝宗紀,乾道七年三月,說「爲安慶軍 節度使,提舉萬壽觀

(大) 出栻知袁州 宋會要職官七八之五二同,此處「安遠軍」疑爲「安慶軍」之誤。 「村」字原脫,據本書卷四二九張拭傳、中興兩朝聖政卷五 下文同

米史卷四百七十一

列傳第二百三十

姦臣一

蔡確 吳處厚附 那恕 呂惠卿 章惇 曾布 安惇

其象爲陽。|宋初,五星聚奎,占者以爲人才衆多之兆。 易國是,賊虐忠直,屛棄善良,君子在野, 方其盛時,君子秉政,小人聽命,爲患亦鮮。 湯曰:「陽卦多陰,陰卦多陽。」君子雖多,小人用事,其象爲陰,小人雖多, 無救禍亂。 及其衰也,小人得志,逞其狡謀,壅閼上聽,變 然終宋之世,賢哲不乏,姦邪亦多。 有國家者,正邪之辨,可不愼乎!作 君子用事,

庭參 故 宣 並 事 撫 確 不可 陝西 不肯,後尹 聞 '用。」遂乞解職 字 見所 持正 轉運 製樂語 , 泉州 使薛向(三行部, 劉庠 晉江人,父徙陳。 [責之,確] ,以爲材, 日:「唐藩鎭自 薦於弟開封 欲按治, 確有智數,尚氣,不謹細 見其儀觀 尹維 置掾屬, 辟管幹右廂公事 秀偉, 故有是禮。 召 I與語, 行。 今虀 維去 第進 奇之, 轂 一士,調 Mi 下北 更 確 加 邠州 肩 至。 延 事 舊制 司 韓絳 理 雖

视 帥 加 郭 直 主 集 逵 王 一安石 賢 意, 一劾其 院 與時 遷御 罪,詔使 薦 確 上下 ,徙爲三 史 知 杜 ', 純 雜 知 神宗 鞫治 班 事 主 得實 È 簿。 厭 安石 用鄧綰薦,爲監察御 安 因 石 卻其牘, 安石 乘馬入宣德 更遣 史裏 確, 門與衞 確 希 意直 王韶開熙河,多貸公錢,秦 土 競, 韶 卽 逵、 疏 純獲 其 (過以 譴 買直 |確

爲 令 木 知 便,不公言之而 制 范 浩 子 淵浚河之役, 知 諫院 兼 私 判 語 知 司 執政 農 制 寺。 誥 熊本按行以 三司 意 E 一安石 使沈括 旣 爲 謁 去,新法 非是,爲子淵 字相 吳充 口 搖 論 耳。 所訟,確 免役法, 括坐 確 **勃本附文彦** 黜 知 言 宣 |括 州 爲 近 博 臣 , 見朝廷 黜之, 代

壻也 史上官均按之,與府獄 開 確 封 言 鞫 相 事 關 州 大臣 民 訟, , 非開 同。 事 連 判官陳安民, 王珪奏遣確詣臺參治,確鍛鍊爲獄, 封 미 了,途移 御史臺。時獄 安民令其甥文及甫 起皇城,卒事 求援於充之子 潤甫、均不能制, 多不讎。 安持 中丞 鄧 密奏確慘 及甫 潤 甫 御 大

掠 諸 囚。 連遣諫官及內侍審直,皆怖畏,言不寃,由是潤甫、均皆罷,而確得中丞,猶領司農, 確何知之, 即劾二人庇有罪, 且詐使吏爲使者慮問,囚稱寃, 輒苦辱之。 帝頗疑

凡常平、免役法皆成其手。

以爲 位。 豕。 同 得計 久 繋 一艘處,飲食旋溷共爲一室,設大盆於前,凡羹飯餅胾舉投其中,以杓混攪, 確 太 自 學生虞蕃訟學官,確深探其獄,連引朝士,自翰林學士許將以下皆逮捕械繫,令獄卒 不問,幸而 也 知 制 誥爲御史中丞、參知政事,皆以起獄奪人位而居之,士大夫交口咄駡,而確自 得問,無一事不承。遂劾參知政事元絳有所屬請,絳出知亳州,確代其 ,分餇之如犬

束。 今陛下所 吳 | 左數爲帝言新法不便,欲稍去其甚者,確曰:「曹參與蕭何有隙,至代爲相,一遵何約 自建立,豈容一 人挾怨 而壞之。」法遂不變。

旨, 中 郎足矣。」帝以爲 相, 書令。」珪信不 屢興羅織之獄,縉紳士大夫重足而 元 豐 審覆,尚書受而 五 年,拜尙書右僕射兼 然。 疑。 確 故 **| 確名為** 行之,三省分班奏事,柄歸中書。 乃言於帝曰:「三省長官位高,不須置令,但令左右僕射分銀 次相,實顯大政, 中書侍郞。 <u>77.</u> 矣。 時富弼 初議官制,蓋做唐六典,事 **违以左僕射兼門下**, 在西京,上言察確小人不宜大用。 確說王珪曰:「公久在相位,必得 拱 手 無大小, 而 並中書取 帝 靴 兩 確既 以 省 次 侍

列

敍相 注、確,然不 加禮重, 屢因微失罰金, 每罰輒門謝。 宰相罰金門謝,前此未有, 人皆恥

二省,凡取旨事及臺諫官章疏,並執政同進擬,不專屬中書。 哲宗立,轉左僕射。 韓縝入相中書,用其兩姪爲列卿,確風御史中丞黃履劾縝。 蓋確畏失權,又復改 制 也 始 詔

嚴叟連擊之,言確有十當去,「在熙寧、元豐時,寃獄苛政, 文殿學士、知陳州。 煩苛,確言皆己所建白,公論益不容,太皇太后猶不忍卽退斥。 人曰:『當時確豈敢言。』此其意欲固竊名位,反歸曲於先帝也」。司馬光、 爲永裕山陵使,靈駕發引之夕,不宿於次,在道又不扈從,還,又不丐去。 明年,坐弟碩事奪職,徙安州,又徙鄧。 首尾預其間。 元祐元年閏二月,始罷爲觀 呂公著進用, 及至今日 御史劉摯、王 ,稍語於 蠲 除

恕等合志邪謀,謂珪實懷異意,賴己擁護,故不得逞。 旣失勢,愈怨望,恕又益爲往來造言,識者以爲憂,未有以發也 初,神宗疾革,王珪議建儲事,確與同列皆在側, 知狀。 確奉使陵下, 確自見得罪於世,陰與章惇、邢 韓縜白發其端,事寖籍

上元間諫高宗欲傳位天后事,以斥東朝,語尤切害。於是左諫議大人梁燾至、右諫議 禹、左司諫吳安詩、右司諫王嚴叟、右正言劉安世,連上章乞正確罪。 確 在安陸,嘗游車蓋亭,賦詩十章,知漢陽軍吳處厚上之,以爲皆涉譏 訓, 紹確具析, 其 用 郝 確自 大夫 處俊

南 其 書「元豐受遺定策殊勳宰相蔡確之墓」賜其家。 墓域,建爲其祠。」帝覽其 末,當屠岸賈 天下快之。 壻皆得官,貴震當世 御 辨 二年,贈太師,諡曰忠懷,遣中使護其葬,又賜第京師。崇寧初,配饗哲宗 、復用 京 製其文,立石 甚 悉。 高宗即 、趙挺之、王彭年坐不舉劾,中書舍人彭汝礪坐 再 紹聖元年,馮京卒,哲宗臨奠。 吳處厚者,邵武人,登進士第。仁宗屢喪 nij · 責英州別駕,新州安置。 安世等又言確罪狀著明,何待具析,此乃大臣委曲爲之地耳。 居中,王珪 位,下詔暴羣姦之罪,貶確武泰軍節度副使,竄懋英州,凡所與濫恩,一切削奪 、之難,程嬰、公孫杵臼 墓前。 壻也。 擢懋同知 疏矍然, 時潤更名懋,京使之重理前事,以沮 樞密院事,次子莊爲從官,弟碩,贈待制,諸女超進封爵,諸 宰相范純仁、左丞王存坐廉前出語救確,御史李常、盛陶 即以處厚爲將作丞,訪得兩墓於降,封 虚死以 確子潤,原壻也,於喪次中闌訴。 全趙孤 全嗣, 京與太宰鄭居中不 處厚上言:「臣嘗讀史記,考趙氏廢 宋有 一封還詞命,皆罷去。 天下,二人忠義未 居中,遂追封 相能,居中以憂去,京懼 明日,詔復正議大夫。 廟庭。 侯 確後卒于貶所。 **遂貶光祿卿,分司** 立 見褒 廟 確淸源郡王, 蔡京請徽宗 表, 宜

列

傳

第

_

百 \equiv

+

姦 臣

三七〇一

訪其

興本

禮 不從,確 舒亶 始 怒欲逐之,未果。 相攻,事下大理 蔡確嘗從處厚學賦,及作相,處厚通牋乞憐,確無汲引意。 珪請除處厚館職,確又沮之。 燭爲自盜 **珪爲永裕山陵使,辟掌牋奏。** 王珪用爲大理丞。 確密遣達意救亶, 確代 處厚

使,

出

知通

利軍,又徙知漢陽,

處厚不悅

紹聖間 今比 非佳 會高宗 語 郡 元 祐 欲 作守,猶 追貶歙州 遜位 譏 中, 謗切害,非所 確 武后, 知安州 爾 別駕。 邪?」會得確 處俊 郡有靜江卒當戍漢陽, 宜. 諫止,今乃以比太皇太后。 言。」確遂南竄。 車蓋亭詩 引郝甑 **擢處厚知衞州,然士大夫由此畏惡之,未幾卒。** 確固不遣, Щ 事,乃箋釋上之,云:「郝處俊 且用滄海揚塵事,此蓋時運之大變,尤 處厚怒曰:「爾在廟堂時數陷我, 封 甑 山

安石 校書。 習。 怒, 從程 邢恕字和叔 王 一安石 顥 諫官亦言新進士未歷官而卽處館閣, 學,因 亦愛之, 田入 鄭州陽武 因賓客諭意,使養晦以待用, 司 馬光、 人。 呂公著門。 博貫 、經籍,能文章,喜功名, 登進士第,補永安 開奔競路,出知延陵縣。 恕不能 論古今成敗事, 從, 主 簿。 而 公著 對其子雲語新法 縣廢不復調,浮湛 薦 于朝,得崇文院 有戰國 一縱橫氣 不便

洛間者七年,復爲校書。

及。 爲門下容,亟結納之。恕亦深自附託,乃爲確畫策,稍收召名士,於政事微有更革, 神宗見其送文彥博詩,稱於確,乃進職方員外郎。 吳充用爲館閣校勘,歷史館檢討、著作佐郞。 察確代充相, 帝有復用光、公著意,確以恕於兩 盡逐充所用人, 恕深居懼 自是

相

與如

素

須性 論,維 太后屬 ?,傳播其語 小 帝不豫,恕與確成謀,密語宣仁后之姪公繪、公紀曰:「家有白桃著華〔三〕,道書言可療 、曹皆賢王也。」公繪鶩曰:「此何言?君欲禍吾家邪!」急趨出。 意 持異則 邀與歸視之。 雍王,與王珪表裏。 執而誅之。 至則執其手曰:「一察丞相令布腹心,上疾不可諱, 延安冲幼,宜早有定 旣而珪言上自有子, 導確約1建入問疾,陽鈎致1珪語,使知開封府蔡京伏劍士於外, 定議立 延安。 恕益無所施, 恕計 不行,則反宣言 **獨自謂有定策**

書, 詰之日:「汝素 鵬 知隨 持以取 哲宗 州 立,遷右司 信。 改汝襄、 不識字,誰爲之者?」公繪 會確得罪, 河陽。 員外郎、起居舍人。又爲公繪具奏,乞尊崇朱太妃,爲高氏異 恕亦責監永州酒 |恕久斥外,蓄怒憤,間道謁|確於|鄧, 不得隱,以恕對,且上其稿。 緒成前 惡, 時恕方召試 給司馬光子康手 日計。 中書,遂

功

列

部 北齊婁后宣訓事,試高遵裕之子土京追訟其父在日,王珪令其兄士充來謀立雍王,遵裕非 侍 又教蔡懋上文及甫私牘爲廋詞,歷詆梁燾、劉摯,云陰圖不軌,且加司馬光、呂公著以 郎,再遷吏部尙書兼侍讀,改御史中丞。恕旣處風憲,遂誣宣仁后有廢立謀,引司 初,擢寶文閣待制、知青州。 章惇、蔡卞得政,將甘心元祐諸人,引恕自助,召爲刑 馬光言

白其短,竟爲惇所陷,出知汝州。未幾,徙應天府。 事者,如此則天變遂廢矣。帝嘉納之,數登對。惇恐其大用,切忌之。恕亦揣帝稍薄惇,屢 日月薄食、星文變見爲不足慮。恕言仁宗之旨雖合於荀卿書,然自古帝王孰肯自謂不修政 言者論其矯誣,責爲少府少監,分司西京,居均州。 恕內懷猜猾,而外持正論。嘗於經筵讀寶訓,至仁宗論輔臣,以爲人君當修舉政事,則 惇復摭其囊過,移知南安軍。 徽宗初,

妄, 京力主之。已而夏人寇鎭戎, 欲趨渭州, 警奏至京師日五六, 京懼, 始徙忠太原, 連徙永 原,擢至龍圖閣學士。恕乞築蕭關,采其里人許彥圭車戰法,爲淺攻計。又欲使熙河造船, 興、潁昌、眞定,尋奪職。久之,復顯謨閣待制。卒,年七十。 直抵興、靈,以空夏國巢穴,其謀皆迂誕。轉運使李復言慰所爲類兒戲,不可用,帝亦燭其 蔡京當國,經營湟、鄯,以開邊隙,欲使恕立方面之勳,起爲鄜延經略安撫使,旋改涇

險冒 進,爲司馬光客卽陷光,附章惇卽背惇,至與三綮爲腹心則之死弗替。 恕本從程門得游諸公間,一時賢士爭與之交。 思善爲表襮,蚤致聲名,而天資反覆,行 上謗母后,下誣

忠良,幾於禍及宗廟。建炎元年,與蔡確同追貶,而恕爲常德軍節度副使。 居實 有異材,八歲爲明妃引,黃庭堅、晁補之、張耒、秦觀、陳師道皆見而愛之。從恕守 子居實、惊。

隨,作南征賦,蘇軾讀之,歎曰:「此足以藉手見古人矣。」卒時年十九,有遺文曰呻吟集。

罕大怒 以情告惊曰:「金國有余觀金吾者,尚領契丹精銳甚衆,貳於金人,願歸大國,可結之以圖二 質, 會。」

惊以聞,大臣信之,卽爲賜

除觀詔書授倫,納衣領中,厚與倫金帛。 朝廷議亦留其使以相當,於是踰月不遣。都管趙倫,燕人也,性猾獪,懼不得歸,乃詐 惊及恕在 ,以聞 金主,報令深入攻討,遂復提兵南下。 1時爲司農丞,靖康初至少卿,奉詔館金國使。 惊時出知岳州, 詔責其始禍, 削籍停官, 是時,肅王使斡离不軍,爲所 倫獻其書黏罕,黏

旣

而

京闕失守云。

虎 之害,璹教民焚燎 呂 惠卿字吉甫, 而耕, 泉州晉江人。父璹習吏事,爲潭浦令。縣處山林蔽翳間, 害爲衰 非 通 判宜州 ,農智高入寇,轉運使檄璹與兵會,或勸勿 民病 瘴霧蛇

三七〇五

列

事,更多爲之地,嚋窮治之,志聰以謫去。 將二千人躡賊後以往,得首虜爲多。 終光祿卿。 爲開封府司錄,鞫中人史志聰役衛卒伐木

也。 必謀之,凡所建請章奏皆其筆。擢太子中允、崇政殿說書、集賢校理,判司農寺。 學先王之道而能用者,獨惠卿而已。」及設制置三司條例司,以爲檢詳文字,事無大小 惠卿起進士,爲眞州推官。 惠卿方編校集賢書籍,安石言於帝曰:「惠卿之賢,豈特今人,雖前世儒者未易比 秩滿入都,見王安石,論經義,意多合,遂定交。 熙寧初,

充、李訓若無才,何以能動人主?」帝默然。 光又貽書安石曰:「諂諛之士,於公今日誠有順 適之快,一旦失勢,將必賣公自售矣。」|安石不悅。 世務,惠卿爲之謀主,而安石力行之,故天下幷指爲姦邪。近者進擢不次,大不厭衆心。」帝 曰:「惠卿進對明辨,亦似美才。」光曰:「惠卿誠文學辨慧,然用心不正,願陛下徐察之。 司馬光諫帝曰:「惠卿儉巧非佳士,使安石負謗於中外者皆其所爲。安石賢而愎,不閉

之。安石力薦惠卿爲參知政事,惠卿懼安石去,新法必搖,作書徧遺監司、郡守,使陳利害。 又從容白帝下詔,言終不以吏違法之故,爲之廢法。故安石之政,守之益堅。議罷制科,馮 會惠卿以父喪去,服除,召爲天章閣侍講(四),同修起居注,進知制誥,判國子監,與王

京爭之不得。

檢括 長給散青苗,使結甲赴官,不遺一人,上下騷動。 無遺,至鷄豚亦偏抄之。 弟升卿無學術,引爲侍講。 隱匿者許告,而以貲三之一充賞,民不勝其困。 又用弟和卿計,制五等丁產簿,使民自供手實,尺椽寸土, 义因保甲正

其兄弟強借秀州富民錢買田,出知陳州。久之,以資政殿學士知延州。 是乘勢併陷三人,皆獲罪。 鄭俠疏惠卿朋姦壅蔽,惠卿怒,又惡馮京異己,而安石弟安國惡惠卿姦諂,面辱之。於 韓絳爲相不能制,請復用安石。安石至,猶與共事。 。安石以安國之故,始有隙。 惠卿旣叛安石,凡可以害王氏者無 御史察承禧論其惡,鄧綰又言

都監高永亨,老將也,爭之力,奏斥之。蕃部屈全也將入寇,惠卿以近世帥臣多養威持重, 乃將牙兵按邊,啓師于東郊,遂趨經德,抵無定河,歷十有八日而還。 始合之爲一,先蒐補守兵而出其選以戰,隨屯置將,具條約上之,邊人及議者多言不可。路 始,陝西緣邊漢蕃兵各自爲軍,每戰則以蕃部爲先鋒,而漢兵城守,伺便乃出戰。

帝曰:「惠卿固貪冒,然嘗爲執政,治之傷體,姑責以義可也。」但削其誤奉,惠卿猶自辨。 **史义論其方居喪,不應有言,詔勿問**。 俄丁母憂, 詔於本奉外特給五萬, 惠卿更請添支萬五千, 御史劾之, 將下揚州取奉曆, 御

事? 以 遣步騎二萬襲夏人於聚星泊,斬首六百級,夏 攻 」數其輕躁矯誣之罪,斥知單州,明年 元 亦 豐 五 可以守, 年 加 大 要在 學 土 大爲形勢而 知太原府。入見, 復知太原。 帝 將使仍鎮壓延 曰:「如惠卿言 人遂寇 鄭延。 哲宗即位,敕疆 是爲 |悪卵 陝西 云:「陜西之師, 更勿侵擾外界。 可棄 也, 豊宜 非 委以 叫 1 惠 邊 [4]

原,事 常守道之士無噍類矣。 惡。 相 **擿教導,以濟其惡。** 之辨詐,有盧杞之姦邪,詭變多端,敢行非度。 軋 乃貶爲光祿卿,分司 惠卿見正人彙進,知不容於時,懇求散 董卓則殺董卓, 化爲敵讎,發其私書,不遺餘力。 如惠卿之惡,縱未正典刑,猶當投畀四裔,以禦魑魅。」中丞劉擊數其五罪, 又興起大獄,欲株連蔓引, 劉牢之事王恭則反王恭,事司 安石於惠卿有卵翼之恩,父師之義。 南京。 再資建寧軍節度副使, 犬彘之所不爲,而 地。 王安石 **塗汚公卿**。 於是右司 馬 位強很傲 元顯則反元顯:故曹操、桓玄終畏而 建州安置。 諫 惠卿爲之。 賴 先 蘇轍條奏其姦曰:「惡卿懷張 方其求進則廖固 誕, 帝仁聖,每事裁抑,不然,安 於吏事 中書舍人蘇軾當制 昔呂布事 宜無 所 爲 丁原則殺 知, 一,及勢力 惠卿 |]

開 安、惠卿修米脂諸砦以備。 聖中,復資政殿學士、知大名府,加觀文殿學士、 寇至,欲攻則城不可近,欲掠則野無所得,欲戰則諸將按兵 知延州 夏人復入 寇, 將以全師

罪於訓

詞,天下傳訟稱快焉

不動, 欲 南 則懼腹背受敵,留二日即 拔栅去, 遂陷金明。 惠卿求詣闕, 不許。 以築威戎、威

完城,加銀青光祿大夫,拜保寧、武勝兩軍節度使。

卿責 節度。 仕。 崇寧 徽宗 祁 州 布去位,復武昌節度使,知大名。數歲,又以上表引喻失當,還爲銀青光祿 Í. 惠 立,易節 年,起爲觀文殿 練副使,安置宣州,再移廬州。 鎭 南。 因曾布 學士、知杭州 有宿憾,徙爲杭州,而用范純粹帥延, 坐其子淵 復觀文殿學士,爲醴泉觀使, 聞妖 人張懷素言不告,淵 治其上功罔冒事, 致仕。 配 卒, 沙 大夫,令致 門島,惠 贈開府 奪

陵,往往寫「福建子」三字,蓋深悔爲惠卿所誤也。 敢引入朝。 间 始,惠卿逢合安石,驟致執政,安石去位,遂極力排之,至發其私書於上。 以是轉徙外服,訖於死云。 雖章惇、曾布、蔡京當國,咸畏惡其人,不 安石退處金

|章惇字子厚,建州浦城人, 父俞徙蘇州。 起家至職方郎中,致仕,用厚貴, 累官銀青光

祿大夫,年八十九卒。

列

傳

第

百

Ξ

姦

臣

惇豪俊,博學善文。 進士登名,恥出姪衡下,委敕而出。 再舉甲科, 調商洛令。 與蘇軾

索挽 游 「君他日 . 劾罷 南 樹,攝 山 之。 必能 抵 仙 衣 殺人。」惇曰:「何也?」軾曰:「能自判命者,能殺人也。」惇大笑。召試館職,王 而下,以漆墨濡筆大書石壁曰:「蘇軾、章惇來。」既還,神彩不動,軾拊其背曰: 游潭,潭下臨絕壁萬仞,橫木其上,惇揖軾書壁,軾懼不敢書。 惇平步過之,垂

陁

惇修 神宗 淫 南 布衣張翹亦言南、北江羣蠻歸化朝廷,遂以事屬惇。 三路 北江羣蠻,命爲湖南、北祭訪使。 以爲 兵平 夷婦,爲會所殺,遂致攻討,由是兩江扇動。神宗疑其擾命,安石戒惇勿輕動,惇竟以 起居注,以 熙 寧初,王安石秉政,悅其才,用爲編修三司條例官,加集賢校理、中書檢正。 懿、 然,專委於燁,安石主惇,爭之不已。 冷、鼎州。 是兵 久不决。 以蠻方據潭之梅山,遂乘勢而南。 提點 刑獄 趙鼎言,峽州羣蠻苦其質剝刻,謀內附,辰 旣而燁得蠻地,安石恨燁沮惇,乃薄其賞,進 **惇募流人李資、張竑等往招之,資、竑** 轉運副使察燁言是役不可亟 時經制 州

翰林 下 占民沈立田,立遮訴惇,惇繫之開封。 神宗 學 召 [停還, 士。 問 知 元豐三年, 爲 擢 (惇,明) 知 制 誥、 直學 日 拜參知 命爲三司 土 政 院 事。 使。 判軍器監。 朱服 呂惠 坐二罪,罷知察州,又歷陳、定二州。 爲御史, 卿 去位,鄧綰論惇同惡,出 三司火,神宗御樓觀之,惇部役兵奔救,過樓 **惇密使客達意於服,爲** 知湖州,徙杭州。入爲 服 五年,召拜門下 所白。 惇父冒

侍 鄓 豐稷奏曰:「官府肇新而惇首用,非稽古建官意。」 稷坐左遷。 諫官趙彥若又疏惇無

著曰:「惇所論固有可取,然專意求勝,不顧朝廷大體。」光議旣行,惇憤恚爭辨簾前,其語甚 爲言者彈治 初遽改免役,後遂有弊。今復爲差役,當議論盡善,然後行之,不宜遽改,以貽後悔。」呂公 馬光所更役法,累數千言。其略曰:「如保甲、保馬一日不罷,有一日害。 若役法則熙寧之 宣仁后怒,劉擊、蘇轍、王覿、朱光庭、王嚴叟、孫升交章擊之,黜知汝州。 哲宗卽位,知樞密院事。 宣仁后聽政,惇與察確矯唱定策功。確罷,惇不自安,乃駿司 七八年間,數

書導察渭,使告劉摯、梁燾有逆謀,起同文館獄,命蔡京、安惇、蹇序辰窮治,欲覆諸人家。 地,任言責,協謀朋姦,報復仇怨,小大之臣,無一得免,死者禍及其孥。 國是,凡元祜所革一切復之。引察卞、林希、黄履、來之邵、張商英、周秩、翟思、上官均居要 元祐之初,老姦擅國。 又請發司馬光、呂公著冢, 斷其棺。 遣呂升卿、董必察訪嶺南,將盡殺流人。 哲宗親政,有復熙寧、元豐之意,首起惇爲尙書左僕射兼門下侍郎,於是專以「紹述」爲 識者知禍之未弭也。遂治劉安世、范祖禹諫禁中雇乳媪事, 哲宗日:「朕瓊祖宗遺制、未嘗殺戮大臣、其釋 哲宗不聽,惇意不愜,請編類元 甚至詆宣仁后,謂 又以文及甫誣語

列

第

勿治。」然重得罪者十餘人,或至三四謫徙,天下寃之。

日惇、「下再言、哲宗怒曰:「卿等不欲股入英宗廟乎?」惇、下乃已。 欲誣宣仁后,以此實之。惇遂追貶司馬光、王珪,贈瓊裕奉國軍留後。結中官郝隨爲助,欲 光語范祖禹曰:「方今主少國疑,宣訓事獨可慮。」又誘高士京上書,言父遵裕臨死屏左右謂 追廢宣仁后,自皇太后、太妃皆力爭之。哲宗感悟,焚其奏,隨覘知之,密語惇與蔡卞。 上京日:「神宗爾留之際, 王珪遣高上充來問日: 『不知皇太后欲立誰。』我叱士充去之。」 皆 惇用邢恕爲御史中丞,恕以北齊婁太后宮名宣訓,嘗廢孫少主立子常山王演,託司馬

略華宮。 博又以皇后<u>孟氏,</u>元祐中宣仁后所立,迎合<u>郝隨,勸哲宗</u>起掖庭秘獄,託以左道,廢居 其後哲宗頗悔,乃歎曰:「章惇壞我名節。」惇又結劉友端相表裏,請建劉賢妃於中

外察民妄語者論如律。優立賞邏,告訐之風浸盛。民有被酒狂譌者,詔貸其死,惇竟論殺 西諸道興役五十餘所,敗軍覆將,復棄||唐,死傷不可計。知天下怨己,欲塞其議,請詔中 悖以爲蹙國棄地,罪其帥臣,遂用淺攻撓耕之說,肆開邊隙,絕夏人歲賜,進築汝遮等城,陝 慟哭,循致不豫,故元祐宰輔推本其意,專務懷柔外國。 西夏請故地,以非要害城砦,還之。 初,神宗用王安石之言,開熈河,謀靈、夏,師行十餘年不息。迨聞永樂之敗,神宗當宁

之。用刑愈峻,然不能遏也。

言,知樞密院事曾布叱之曰:「章惇,聽太后處分。」 皇太后決策立端王,是爲徽宗。 諸王皆是神宗庶子。」惇復曰:「以長則申王當立。」皇太后曰:「申王病,不可立。」 惇尙欲 哲宗崩,皇太后議所立,惇厲聲曰:「以禮律言之,母弟簡王當立。」皇太后曰:「老身無 遷惇特

潭州安置。右正言任伯雨論其欲追廢宣仁后,又貶雷州司戶參軍。 進,封申國公。 是民、民日:「前蘇公來、爲章丞相幾破我家、今不可也。」徙陸州、卒。 占官舍,遂僦民屋,惇又以爲強奪民居,下州追民宪治,以僦券甚明,乃已。至是,惇問舍于 爲山陵使,靈靡陷澤中,踰宿而行。言者劾其不恭,罷知越州,尋貶武昌軍節度副使, 初,蘇轍謫雷州,不許

廖敏識加人數等,窮凶稔惡,不肯以官爵私所親,四子連登科,獨季子援嘗爲校書郎,

餘皆隨牒東銓仕州縣,訖無顯者。

「悼亡不堪,柰何?」瓘曰:「與其悲傷無益,曷若念其臨絕之言。」惇無以對。 妻張氏 【甚賢,惇之入相也,張病且死,屬之曰:「君作相,幸勿報怨。」旣祥,惇語陳瓘曰:

欲 追廢爲庶人,賴哲宗不 政 和 中,追贈觀文殿大學士。紹興五年,高宗閱任伯雨章疏,手詔曰:「惇詆誣宣仁后, 從其請,使其言施用,豈不上累泰陵。貶昭化軍節度副使,子孫不

列傳

第

二百

三十

姦臣

得仕於朝。」詔下,海內稱快,獨其家獨爲辨誣論,見者哂之。

曾布字子宣,南豐人。年十三而孤,學於兄鞏,同登第,調宣州司戶參軍、懷仁令。 熙寧二年,徙開封,以韓維、王安石薦,上書言爲政之本有二,曰:厲風俗,擇人才。其要

有八,曰:勸農桑,理財賦,興學校,審選舉,責吏課,敍宗室,修武備,制遠人。大率皆安石

指也。

方曉然皆知主不可抗,法不可侮,則何爲而不可,何欲而不成哉?」|布欲堅神宗意,使專任 之。|布疏言:「陛下以不世出之資,登延碩學遠識之臣,思大有爲於天下,而大臣玩令,倡 上疏極論新法之害,神宗頗悟,布遂爲安石條析而駮之,持之愈固 而威福之用未果也。陛下誠推赤心以待遇君子而厲其氣,奮威斷以屛斥小人而消其萌,使四 之於上,小臣橫議,和之於下。人人窺伺間隙,巧言醜詆,以譁衆罔上。是勸沮之術未明, 凡三日,五受敕告。與呂惠卿共創青苗、助役、保甲、農田之法,一時故臣及朝士多爭 以威脅衆,使毋敢言。故驟見拔用,遂修起居注、知制誥,爲翰林學士兼三司使。 韓琦 神宗召見,論建合意,授太子中允、崇政殿說書,加集賢校理,判司農寺,檢正中書五

以售四方之貨,常低卬其價,使高於兼拌之家而低於倍蓰之直,官不失二分之息,則商賈自 吏、牙駔惟恐夏之不盡而息之不夥,則是官自爲兼抖,殊非市易本意也。」事下兩制議,惠卿 然無滯矣。今嘉問乃差官於四方買物貨,禁客旅無得先交易,以息多寡爲誅賞殿最,故官 曲 貨不流通;貨不流通,由商賈不行;商賈不行,由兼丼之家巧爲摧抑。故設市易於京師 七年,大旱,詔求直言,布論判官呂嘉問市易掊克之虐,大概以爲:「天下之財匱乏,良

閣待制知桂州,進直學士、知秦州,改歷陳、蔡、慶州。元豐末,復翰林學士,遷戶部尚書。司 留爲翰林學士,遷承旨兼侍讀,拜同知樞密院,進知院事。 爲。」元祐初,以龍圖閣學士知太原府,歷眞定、河陽及青、瀛二州。紹聖初,徙江寧,過京, 馬光爲政,諭令增損役法,布辭曰:「免役一事,法令纖悉皆出己手,若令遽自改易,義不可 惡卿參大政,置獄舉劾,黜布知饒州,徙潭州。復集賢院學士、知廣州。 元豐初,以龍圖 以爲沮新法,安石怒,布遂去位。

處極典。 人,流貶鐫廢,略無虛日,亦多陰擠之。掖庭詔獄成,付執政蔽罪,法官謂厭魅事未成,不當 布贊惇「紹述」甚力,請甄賞元祐臣庶論更役法不便者,以勸敢言。惇遂興大獄,陷正 初,章惇爲相, 布草制極其稱美,冀惇引爲同省執政, 惇忌之,止薦居樞府,故稍不相 布曰:「驢媚蛇霧,是未成否?」衆皆瞿然,於是死者三人。

列

畏宰相,不知畏陛下。 贈謚,勿毀墓仆碑,而以爲無益之事。又奏:「人主操柄,不可倒持,今自丞弼以至言者,知 惇以士心不附,詭情飾過,薦引名士彭汝礪、陳瓘、張庭堅等,乞正所奪司馬光、呂公著 臣如不言,孰敢言者?」其意蓋欲傾惇而未能。 會哲宗崩,皇太后召

宰執問誰可立,惇有異議,布叱惇使從皇太后命。

明年,乃改元建中靖國,邪正雜用,忠彥遂罷去。「布獨當國,漸進「紹述」之說。 不復相矣。」已而復召會肇草制,拜布右僕射,其制曰:「東西分臺,左右建輔。」忠彥雖居上, 然柔懦,事多决於市,市猶不能容。時議以元祐、紹聖均爲有失,欲以大公至正消釋朋黨, 「麻詞未審合作專任一相,或作分命兩相之意。」徽宗曰:「專任一相。」原出,宣言曰:「子宣 徽宗立,惇得罪罷, 遺中使召蔡京鏁院, 拜韓忠彦左僕射。 京欲探徽宗意,徐請日

豫者,陛下之爵禄,柰何使宰相私其親?」布壻陳迪,佑甫子也。 士、知潤州。 温益叱布曰:「曾布,上前安得失禮?」徽宗不悅而罷。御史遂攻之,罷爲觀文殿大學 明年,又改元崇寧,召察京爲左丞,京與市異。 會布擬陳佑甫爲戶部侍郎,京奏曰:「爵 布忿然爭辨,久之,聲色稍

布落職,提舉太清宮,太平州居住。又降司農卿,分司南京。 京積憾未已,加布以贓賄,令開封呂嘉問逮捕其諸子,鍛鍊訊鞫,誘左證使自誣 又以嘗薦學官趙諗而 而貸其 列傳第二百三十 姦臣一 校勘記

中丞。

復太中大夫、提舉崇福宮。 諗 级, 責散官, 衡州安置。 大觀元年, 又以棄湟州,責賀州別駕, 卒于潤州, 年七十二。後贈觀文殿大學士, 又責廉州司戶。 凡四年, 乃徙舒州, 諡日文

爤

哲宗 初政, 安惇字處厚,廣安軍人。上舍及第,調成都府教授。 許察官言事 , 滅議 大夫孫覺請汰其不可者,詔劉擊推擇,罷惇爲利州路轉運 上書論學制, 召對,擢監察御史。 判

官,歷夔州、湖北、江東三路。

祐 心 親政,必有欺 顧 命 肆 、果如 大臣 其忮心,上言:「司馬光、 擅 紹 聖 事 之迹, 是 ,以翦陛下之羽翼。 初 一,召爲 乎? 君之誅,乃密爲 過趙高指鹿爲馬。 」惇、原曰:「誠有是心,特反形未具耳。」帝爲誅胻, 國子司 業, 傾搖之計。 劉摯、梁燾、呂大防等交通陳衍之徒,變先帝成法,懼陛下一 縱釋先帝之所罪, 遷諫議大夫。 比詢 、完本末,得其情狀,大逆不道,死有餘責。 於是疏 章惇、蔡卞造同文謗獄,使蔡京與惇雜治, 隔兩宮,斥隨龍內侍,以去陛下之腹心; 收用先帝之所棄。 無君之惡,同司 錮擊、燾子孫 帝 馬昭之 百...「元 遷 御 日 史 廢

既往之善,惇乃詿惑主聽,規騁其私,若明示好惡,當自惇始。」乃以實文閣待制知潭州,尋 之謠。徽宗雅惡之。鄭浩還朝,惇言:「浩若復用,盧彰先帝之失。」帝曰:「立后,大事也。 放歸田里。 史中丞不言而浩獨敢言之,何爲不可復用。」惇懼而退。陳瓘請曰:「陛下欲開正路,取浩 士大夫或千里會逮,踵蹇序辰初議,閱訴理書牘,被禍者七八百人,天下怨疾,爲二察、二惇 上當天心,下合人望。」朝士皆笑其姦佞。 劉后之受册也,百官仗衞陳于大庭,是日天氣淸晏,惇巍立班中,倡言曰:「今日之事, 又鞫鄒浩事, 檄廣東使者鍾正甫攝治之于新州,

蔡京爲相,復拜工部侍郎、兵部尚書。崇寧初,同知樞密院。卒,贈特進。

長子郊,後坐指斥誅。流其次子邦於陪而追貶惇單州團練副使,其祀遂絕。 人以爲惇

校勘記

平生數陷忠良之報云。

一薛向 原作「薛何」,據本書卷三二八薛向傳、琬琰集下編卷一八蔡確傳改。

原作「張燾」,據本書卷三四二梁燾傳及琬琰集下編卷一八蔡確傳改。

(三) 白桃著華 張編卷三五一、編年綱目卷二〇記此事略有出入,都作「桃着白花」,並有入庭中見

紅桃花語。疑此有誤。

(四) 天章閣侍講 「講」原作「讀」,據琬琰集下編卷一四本傳及東都事略卷八三本傳改。

(垂) 知延州 按長編紀事本末卷一三〇及東都事略卷八三、琬琰集下編卷一四本傳均作

「知延安

府」。據本書卷八七地理志,元祐四年,升延州爲延安府。此處所言爲紹聖間事,作「知延安府」

爲是。

一三七一九

宋史卷四百七十二

列傳第二百三十一

姦臣二

蔡京 弟卞 子攸 翛 趙良嗣 張覺 郭藥師附

命,朝廷榮之。改龍圖閣待制,知開封府。 遼還,拜中書舍人。 時弟||一爲舍人,故事,入官以先後爲序,||七班||京下。 蔡京字元長,興化仙游人。登熙寧三年進士第,調錢塘尉、舒州推官,累遷起居郞。 兄弟同掌書

使

法,爲期五日,同列病太迫,原獨如約,悉改畿縣雇役,無一違者。詣政事堂白光,光喜曰: 「使人人奉法如君,何不可行之有!」已而臺、諫言京挾邪壞法,出知成德軍,改瀛州,徙成 諫官范祖禹論京不可用,乃改江、淮、荆、浙發運使,又改知揚州。 元豐末,大臣議所立, 京附察確, 將害王珪以貪定策之功,不克。 司馬光秉政,復差役 歷軍、永興軍,遷龍

列

傳

第二百三十一

姦

臣二

三七二一

圖 閣直學 士 復知 成

於反掌,兩 施行之爾,何以講爲?」惇然之,雇役遂定。 紹聖 初, 人相倚以濟,識者有以見其姦 入權 戶部尙書。 章惇復變役法,置司講議,久不决。 差雇兩法,光、惇不同。 京謂惇曰:「取熙寧成法 十年間京再蒞其事,成

令述陳衍事狀, 王巖叟、范祖禹、劉安世復遠竄。 即以大逆不道論誅,并劉擊、梁燾劾之。 京覬執政,曾布知樞密院,忌之,密言下備位承轄,原不可 衍死,二人亦貶死,皆錮其子孫。

以同升,但進承旨

交論 **灌論其交通近侍,瓘坐斥,京亦出** 徽宗 其惡,奪職,提舉洞霄宮,居杭州 即位,罷爲端明、龍圖兩學士,知太原,皇太后命帝留京畢史事。 知江寧,頗怏怏,遷延不之官。 御史陳次升、龔夬、陳師 諫官陳

踰數月,

徐 已而宮妾、宦官合爲一詞譽原,遂擢致虚右正言,起原知定州。 屬,質日以達禁中,且附語言論奏至帝所,由是帝屬意京。 知常善, 童 |貫以供奉官詣三吳訪書畫奇巧,留炕累月,京與游,不舍晝夜。 知常以符水出入元符后殿, 致虚深結之,道其平日趣向,謂非相京 又太學博士范致虛素與左街 崇寧元年,徙大名府。韓忠 凡所畫屏障、扇帶之 不足以有爲。 I 道 錄

二百三十一 姦臣二

第

行賞,懼不能

無枉濫。」蔣之奇

班

一行,且不令質究本末。

荆南守馬珹言:「有生徭,有省地徭,今未知叛者爲何種族,若計

級

叛,殺溆浦令,京重爲賞,募殺一首領者賜之絹三百,官以

南開黔中,築靖州。

辰溪徭

之日,賜坐延和殿,命之曰:「神宗創法立制,先帝繼之,兩遭變更,國是未定。 京,撰愛莫助之圖 與曾布交惡,謀引京自助,復用爲學士承旨。 以獻,徽宗遂決意用京。 忠彥罷,拜尚書左丞,俄代曾布 徽宗有意修熙、豐政事,起居舍人鄧洵武 爲右僕射 **股欲上述** 制 **|**

兄之志,卿何以敎之?」京頓首謝,願盡死。

二年正月,進左僕射

以待四方之士。) 解、錢遹之議,復廢元祐皇后。 之,奏改法誤民,京怒奪其官; 宗室、冗官、國用、商旅、鹽澤、賦調、尹牧,每一事以三人主之。凡所設施,皆由是出。 富商巨賈嘗齎持數十萬緡,一旦化爲流丐,甚者至赴水及縊 故事,卽都省置講議司,自爲提舉,以其黨吳居厚、王漢之十餘人爲僚屬,取政事之大 者六人。陳瓘子正彙〔〕以上書黥置海島。 |京起於逐臣,一旦得志,天下拭目所爲,而||京陰託「紹述」之柄,箝制天子,用條例司 [1] 推方田於天下。權江、淮七路茶,官自爲市。 因鑄當十大錢,盡陷辉諸弟。 罷科舉法, 令州縣悉做太學三舍考選, 建辟雍外學於城南, 死。 御史沈畸等用治獄失意,羈削 虚 更鹽鈔法, 提點淮東刑獄章粹見而哀 凡舊鈔皆弗 者 用馮 用, 如如

知樞密院,恐忤原意,白言賊不體國,原罷賊,命舒亶代之,以

剿絕羣搖爲期。 西收湟川、鄯、廓,取怑牱、夜郎地。

宋喬年、胡師文爲郡守。禁卒于掫月給錢五百,驟增十倍以固結之。 法蕩然無餘矣。 又欲兵柄士心皆歸己,建澶、鄭、曹、拱州爲四輔,各屯兵二萬,而用其姻昵 擢 宣貫領節度使,其後楊戩、藍從熙、譚履、梁師成皆踵之。凡寄資一切轉行,祖宗之 威福在手, 中外莫敢

議。累轉司空,封嘉國公。

時皆折支,亦悉從眞給,但入熟狀奏行,帝不知也。 |京旣貴而貪益甚,

已受僕射奉,復創取司空寄祿錢,如粟、豆、柴薪與傔從糧賜如故,

進司空、開府儀同三司、安遠軍節度使,改封魏國。 籍范柔中以下爲邪等。凡名在兩籍者三百九人,皆錮其子孫,不得官京師及近甸。 德殿門,又自書爲大碑,偏班郡國。初,元符末以日食求言,言者多及熙寧、紹聖之政,則又 時元祐羣臣貶竄死徙略盡,京猶未愜意,命等其罪狀,首以司馬光,目曰姦黨,刻石文 五年,

財數尺,上封者甚衆,朕甚畏其言。此器已就久矣,倘人言復興,久當莫辨。」原曰:「事苟當 盤琖,皆石晉時物,持以夸臣,謂南朝無此。今用之上壽,於禮無嫌。」帝曰:「先帝作一 帝嘗大宴,出玉琖、玉巵示輔臣曰:「欲用此,恐人以爲太華。」」京曰:「臣昔使契丹,見玉 時承平旣久,帑庾盈溢,原倡爲豐、亨、豫、大之說,視官爵財物如糞土,累朝所儲掃地 小臺

於理,多言不足畏也。陛下當享天下之奉,區區玉器,何足計哉!」

府儀同三司、中太乙宮使。其黨陰援於上,大觀元年,復拜左僕射。以南丹納土,躐拜太尉, 五年正月,彗出西方,其長竟天。帝以言者毀黨碑,凡其所建置,一切罷之。 京

京

気

高

開

受八寶,拜太師。

老追 箝臺諫,熾親黨,長奔競,崇釋老,窮土木,矜遠略。 乞投畀遠方,以禦魑魅。 其書出,士人爭 臨平之山; 託言灌田 予以蠹國用,託爵祿以市私恩,役將作以葺居第,用漕船以運花石。名爲祝聖而修塔,以壯 相傳寫,以爲實錄。 允,至是,贬太子少保,出居,杭 買 [上聚徙郡之惡。不軌不忠,凡數十事。先是,御史中丞|石公弼、侍御史|毛注數劾|京,未 三年,臺諫交論其惡,遂致仕。猶提舉修哲宗實錄,改封楚國,朝朔望。太學生陳朝 四年五月,彗復出奎、婁間,御史張克公論京輔政八年,權震海內,輕錫 而決水,以符「興化」之識。 法名退送,門號朝京。 方田擾安業之民,

有以時政爲題策士者。 政和二年,召還京師,復輔政,徙封魯國,三日一至都堂治事。 提舉淮西學士蘇城〔三欲自售,獻議請索五年間策問,校其所詢,以 京之去也,中外學官頗

列傳第二百三十一 姦臣二

觀向背,於是坐停替者三十餘人。

敢言。 以降,謂之御筆手詔,違者以違制坐之。 下 共議,蓋大臣有陰從中而爲之者。 初, 繇是貴戚、近臣爭相請求,至使中人楊球代書,號曰「書楊」, 京復病之而亦不能 國制,凡詔令皆中書門下議,而後命學士爲之。至熙寧間,有內降手詔不由中書門 至京則又患言者議己,故作御筆密進,而丐徽宗 事無巨細,皆託而行,至有不類帝札者,羣下皆莫 親書

擢伯芻至徽猷閣 吏不復立額,至五品階以百數,有身兼十餘奉者。 魏伯芻領 既又更定官名,以僕射爲太、少宰,自稱公相,總治三省。 権貨, 造料次錢券百萬緡進入,徽宗大喜,持以示左右曰:「此太師與我奉料也。」 待制 侍御史黃葆光論之,立竄昭州。 追封王安石、蔡確皆爲王,省 拔故吏

高廣相夸尚,而延福宮、景龍江之役起,浸淫及於艮嶽矣。 欲廣宮室求上寵媚,召童貫輩五人,風以禁中偪側之狀。 橋,大興工役,無慮四十萬。 方澤,立道觀,作大晟樂,製定命寶。 京每爲帝言,今泉幣所積贏五千萬,和足以廣樂,富足以備禮,於是鑄 兩河之民,愁困不聊生,而京僴然自以爲稷、契、周、召也。 任孟昌齡爲都水使者,鑿大伾三山,創天成、聖功二 貫俱聽命,各視力所致,爭以侈麗 九鼎,建明堂,修 又

子攸、儵、脩,攸子行,皆至大學士,視執政。 **峰**尙茂德帝姬。 帝七幸其第, 贅予無算。

命坐傳觴,略用家人禮。 廝養居大官,媵妾封夫人,然公論益不與,帝亦厭薄之。

條以撼京, 宰臣白時中、李邦彥惟奉行文書而已,旣不能堪,兄攸亦發其事,上怒,欲竄之,原力丐冤, 謀,斥逐朝士,創宣和庫式貢司,四方之金帛與府藏之所儲,盡拘括以實之,爲天子之私財。 語,堂東數十人,抱案後從,由是恣爲姦利,竊弄威柄,驟引其婦兄韓梠爲戶部侍郎,媒蘗密語,堂東數十人,抱案後從,由是恣爲姦利,竊弄威柄,驟引其婦兄韓梠爲戶部侍郎,媒蘗密 事 特勒停侍養,而安置韓梠黃州。 年,當有相讒譖者。」貫曰:「不知也。」「京不得已,以章授賞,帝命詞臣代爲作三表請去,乃降 制從之。 ,悉決於季子條。 宣 和 京殊無去意。 令致仕。 凡京所判,皆條爲之,且代京入奏。每造朝,侍從以下皆迎揖,呫囁耳 六年,以朱勔爲地,再起領三省。 帝呼童貫使詣京, 未幾,褫條侍讀,毀賜出身敕,而京亦致仕。 令上章謝事, 貫至, 京至是四當國,目昏眊不能事 京泣曰:「上何不容」京數 方時中等白罷

極 二州。 一疏其姦 欽宗 行至 一惡,乃以祕書監分司南京(E),連貶崇信、慶遠軍節度副使,衡州安置,又徙韶、儋 即位,邊遽日急,京盡室南下,爲自全計。 潭州死,年八 + 天下罪京爲六賊之首,侍御史孫觀等始

海 九州之力以自奉。 京天資 《凶譎,舞智御人,在人主前,顓狙伺爲固位計,始終 帝 亦知其姦, 屢罷 屢起, 且擇與京不合者執政以柅之。 一說,謂當越拘攣之俗,竭四 京每開將退

列

傳

第

百三

+

姦臣

門,輸貨僮隸得美官,棄紀綱法度爲虛器。 患失之心無所不至,根株結盤,牢不可脫。 以自解。 免,輒入見祈哀,蒲伏. 見利忘義,至於兄弟爲參、商,父子如秦、越。 扣頭,無復廉恥。 燕山之役,京送攸以詩,陽寓不可之意,冀事 暮年卽家爲府,營進之徒,舉 集其 成得

子八人,儵先死,攸、脩伏誅,絛流白州死,鞗以尚帝姬免竄,餘子及諸孫皆分徙遠

宗社之禍,雖譴死道路,天下猶以不正

典刑

爲恨。

郡。

國子 直講,加集賢校理、崇政殿說書,擢起居舍人,歷同知諫院、侍御史。 下字元度,與京同年登科,調江陰主簿。 王安石妻以女,因從之學。 居職不久,皆以王 元豐中,張璪薦爲

安石執政親嫌辭。拜中書舍人兼侍講,進給事中。

曰:「此,君所乘,蓋異禮也。」使還,以龍 哲宗立,遷禮部侍郎。使於遼,遼人頗聞其名。 圖閣待制知宣州,徙江寧府,歷揚、廣、越、潤、陳五 **|** 下適有寒疾, 命載以白馳 車, 典客者

州。 廣州寶具叢凑,一無所取。及徙越,夷人淸其去,以薔薇露灑衣送之。

聖元年,復爲中書舍人,上疏言:「先帝盛德大業,卓然出千古之上,發揚休光, 而實錄所紀,類多疑似不根,乞驗索審訂,重行刊定,使後世考觀,無所迷惑。」詔從 正

是,下即防家取以上,因斐落事實,文飾姦僞,盡改所修實錄、正史,於是呂大防、范祖禹、趙 以卞兼國史修撰。 初,安石且死,悔其所作日錄,命從子防焚之,防詭以他書代。

彥若、黃庭堅皆獲深譴。

遷翰林學士。

之際,惇毅然主持,卞或噤不啓齒。一時論者以爲惇迹易明,卞心難見。 然後請帝親札付外行之。章惇雖鉅姦,然猶在其術中。惇輕率不思,而上深阻寡言,論議 四年,拜尙書左丞,專託「紹述」之說,上敷天子,下脅同列。凡中傷善類,皆密疏建白,

四也;鄒浩以言忤旨,卜激怒哲宗,致之遠謫,又請治其親故送別之罪,五也;蹇序辰建 禮法官議?』皇后以是得罪,三也;編排元祐章牘,萋菲語言,被罪者數千人,議自卞出, 有六,曰:「誣罔宣仁聖烈保佑之功,欲行追廢,一也;凡紹聖以來竀逐臣僚,皆下啓而後 江寧府,連貶少府少監,分司池州(至)。 者八百三十家,凡此皆下謀之而惇行之,六也。願亟正典刑,以謝天下。」詔以資政殿學士知 看詳訴理之議,章惇遲疑未應,下卽以二心之言迫之,惇默不敢對,卽日置局,士大夫得罪 行,二也;宮中厭勝事作,哲宗方疑,未知所處,惇欲召禮法官通議,卞云:『旣犯法矣,何用 伯雨言「下之惡有過于惇。去年封事,數千人皆乞斬惇、下,公議於此可見矣。」遂陳其大罪 徽宗卽位,諫官陳瓘任伯雨、御史龔夫疏其兄弟姦惡,瓘倂數卜尊私史以厭宗廟之罪,

不復 夫,永年竟爲帳下執去以降。 問 帝謀: 纔踰 其直貴賤。 復煌、鄯,問於下,下以王厚、高永年對。 歲, 起 知 大名府,徙揚州,召爲中太乙宮使,擢 酅、廓至斗米錢四千,束獨錢千二百,秦中騷困。 自是西方交兵,連年不息,追讎任伯 與京合謀, 知樞密院。 竭府藏以事 時原居相位,下禮辭,不 雨所言,曲自 及取三州, 進金紫光祿 邊,募商 辨 人運糧 理。 至

帝前詆十,下求去,以資政殿大學士知 對,下日:「用憲已非美事,憲猶 事 時 有不合。 | | 居 心傾邪,一意以婦公王氏所行爲至當。 京以中旨用童貫爲陝西 ,稍習兵,貫略無所長,異時必誤**邊計。**」帝令中書行之。 河南 制置使,下言不宜用宦者,右丞張 兄晚達而位在上, 致己不得相, 故二 康 國 引 李憲故 一府政 京於 事 以

欲會獄

證治,諸

人坐貶。

旋 加觀 妖人張懷素敗,下素與之游,謂其道術 文殿學士,拜昭慶軍節度使,入爲侍讀,進檢校 通 神,嘗識 少保、開府 孔子、漢高祖,至稱爲 儀同三司 易節 大士, 鎭 東 坐降職

政 和 末, 謁歸上冢, 道死,年六十。 贈太傅,諡曰文正。 高宗卽位, 追責爲寧國軍 節度

副使。紹興五年,又貶單州團練副使。

攸字居安, 京長子也。 元符中,監在京裁造院。 徽宗時爲端王,每退朝, 他 適 趣 局 遇

塗,必下馬拱立,王問左右,知爲蔡承旨子,心善之。 及卽位、記其人,遂有寵

籙宮、 年間 袖其間,懵不知學,士論不與。 初置宣和殿,命爲大學士,賜毬文方團金帶, 至樞密直學士。原再入相,加龍圖閣學士兼侍讀,詳定九域圖志,修六典,提舉上淸寶 、祕書省兩街道錄院、禮制局。道、史官僚合百人〔も〕,多三館雋游,而攸用大臣子領 崇寧三年,自鴻臚丞賜進士出身,除祕書郎,以直 .祕閣、集賢殿修撰,編修國朝會要,二 改准康軍節

敵。 愛於京,數請殺之,帝不許。 以問京, 京曰:「君固不解此, 此兒欲以爲吾疾而罷我也。」閱數日, 京果致仕。 請 |他別居賜第,嘗詣|京,原正與客語,使避之,|他甫入,遽起握父手爲胗視狀,曰:「大人脈 .百拜以懇,帝意遂解。其後與|京權勢日相軋,浮薄者復間之,父子各立門戶,遂爲仇 帝將去官,先逐其黨劉昺、劉煥等,使御史中丞王安中劾之。 攸通籍禁庭,聞其事,亟 體中得無有不適乎?」原曰:「無之。」惟曰:「禁中方有公事。」即辭去。客竊窺見, 以季弟條鍾

侍 禁掖,子行領殿中監,視執政,寵信傾其父。 曲 <u>他</u>歷開府儀同三司、鎭海軍節度使、少保,進見無時,益用事,與王黼得預宮中祕戲,或 則短衫窄袴,塗抹青紅,雜倡優侏儒,多道市井淫媟謔浪語,以蠱帝心。 帝留意道家者說,攸獨倡爲異聞, 妻宋氏 謂有珠星 出

壓月、跨鳳 乘龍、天書雲篆之符,與方士林靈素之徒爭證神變事。 於是神霄、玉清之祠偏天

下,咎端自攸興矣。

|攸指 敢承,遂以付他。 攸,旣而悔 州降云,進攸少傅。 加 童買 [請曰:「臣成功歸,乞以是賞。」帝笑而弗責。 涿州留守郭藥師擁所部八千人舉隊、易 (伐燕,以攸副宣撫,攸童騃不習事,謂功業可唾手致。入辭之日,二美嬪侍上側 之,但進太保,徙封燕。 攸退,屬其客給事中吳敏,議遂定。 王師入燕,進少師,封英國公。還,領樞密院。王黼罷政,帝欲大用 帝欲內禪,親書「傳位東宮」字授李邦彥,邦彥卻立云云不

軍, 御 史言攸罪不减乃父, 尋遣使者隨所至誅之。 靖康 元年,從上皇南下。 燕山 之役禍及宗社, 及還都,始責爲大中大夫,繼而安置永州,連徙潯、雷。 驕奢淫泆載籍所無, 當竄諸海島。 韶置萬安 京死,

兄亦 然之,密與攸議,稍持正 用之,以挽物情。 知事 偷 初以恩澤爲親衞郎、祕書丞,至保和殿學士。 勢日異,其客傅墨 尋加大學士,提舉醴泉觀。 論,故與京異。 卿、孫傅等復語之曰:「天下事必敗,蔡氏必破,當亟爲計。」脩心 然皆蓄縮不敢明言, 宣和中,拜禮部尚書兼侍講。 遂引吳敏、李綱、李光、楊時等 時||脩弟

乖,宜勿行。 功成,會金破濬州,徽宗南幸,攸假徽宗旨,請脩守鎭江,改資政殿大學士。 飲宗立,脩上募兵陝西策,自請行,又勸西幸,帝頗采納,俾知京兆府。 **翛幸得去,不復辭。** 流言至京師,謂將復辟於鎭江。 帝趣迎上皇還,而責翛昭 或謂脩前計已 計垂就,攸忌其

|攸之誅也,御史|陳述且行,帝取詔批其尾曰:「翛亦然。」於是倂誅。

信軍節度副

使。

利,持道家吐納之說以爲論思,侍立集英瞑目自若爲不恭,遂奪職。陳正彙上原變事,置 但復集英殿修撰,旋還待制,提點洞霄宮。 獄京師,具陳在杭州時,日聞崈盛言京有後福,獄上,詔削其籍。 初,京黨以學行修飭聞諸朝,與泉州布衣呂注皆著道士服。 召入謁,累官拜給事中兼侍讀。 京去位,爲言者所攻,以顯謨閣待制提舉崇福宮。言者復論其不學無文,結豪民,規厚 密者, 京族子也。 性矯妄,善談鬼神事。 宣和中,卒。 當承門蔭,固推與庶兄,宗族稱爲賢。 京復相,徽宗戒毋得用密,

趙良嗣,本燕人馬植,世爲遼國大族,仕至光祿卿。 行汚而內亂,不齒於人。 政和初,

氏,以爲祕書丞,圖燕之議自此始。遷直龍圖閣,提點萬壽觀,加右文殿修撰 因,對曰:「遼國必亡,陛下念舊民遭塗炭之苦,復中國往昔之疆,代天譴責,以治伐亂,王師 諸蕃,禁商賈舟船不得行,百有餘年矣。 一旦啓之,懼非中國之利。 易姓名日李良嗣。 <u></u> **童貫出使,道盧溝,植夜見其侍史,自言有滅燕之策,因得謁。** 一出,必壺漿來迎。萬一女眞得志,先發制人,後發制於人,事不侔矣。」帝嘉納之,賜姓趙 薦諸朝,卽獻策曰:「女眞恨遼人切骨,而天祚荒淫失道。本朝若遣使自 童貫與語,大奇之,載與歸 徽宗召見,問所來之 、地接

至六七,頗能緩頰盡心,與金爭議,進龍圖閣直學士。既得燕山,又加延康殿學士、提舉上 清宮,官至光祿大夫。 宣和二年二月,使于金國,見其主阿骨打,議取燕雲。 使還,進徽猷閣待制。 自是將命

者曰:『此平燕首謀之人,得請閑退,天下美事也。』不然,則臣爲敢欺神明,何所不至。」凡 賴陛下威靈,今日之事幸而集,顧前日之約豈可欺哉?願許臣致仕,使得買田歸耕,令有證 瀝 三上章,詔不許。旣而朝廷納張覺,良嗣爭之云:「國家新與金國盟,如此必失其歡,後不可 |酒於北極祠下,耐天爲約,俟他日功成,卽挂冠謝事,以表本心,初非取功名而徼富貴也 良嗣言:「頃在北國,與燕中豪士劉範、李奭及族兄柔吉三人結義同心,欲拔幽薊歸朝

悔。」不聽。坐奪職,削五階。

乞戮之於市。 靖康元年四月, 御史<u>胡舜陟論共結成邊患, 敗</u>契丹百年之好, 使<u>途寇侵陵, 禍及中國,</u> 時已竄郴州(10),韶廣西轉運副使李昇之即所至梟其首,徙妻子于萬安軍

覺 捐定 亂者, 州人推領州事。 張覺,平州義豐人也。 在遼國第進士,爲遼興軍節度副使。 |燕|||淳死,覺知||遼必亡,籍丁壯五萬人,馬千匹,練兵爲備。 鎭民殺其節度使蕭諦里,

蕭后遣時立愛來知州,拒弗納。

章事。企弓、公弼與曹勇義、虞仲文皆東遷。 者,防蕭幹耳。」厚賂公弼使還。公弼道其語,粘罕信之,升平州爲南京,加覺同中書門下平 度使,任知平州。 請使焉而觀之。」遂往見覺。覺曰:「契丹八路皆陷,今獨平州存,敢有異志。所以未釋甲 金人入燕,訪覺情狀於遼故臣康公弼,公弼言彼何能爲,當示以不疑,乃以爲臨海軍節 遼相左企弓等將歸東, 粘罕欲先遣兵擒覺, 公弼曰: 「如此是趣之叛也, 我

後也。 非公而誰?」覺召僚屬議,皆曰:「近聞天祚復振於松漠,金人所以急趨山西者,畏契丹議其 時賦民盡徙,流離道路,或詣覺訴:「公廟、企己等不能守滅,致吾民如是。 公能仗大義,迎故主以圖興復,責企弓等之罪而殺之,縱濕人歸濕,南朝宜無不納。 能免我者,

國。」燕人尙義,皆景從。 以爲然。 **黛金人西來**, 女真, 讎也,豈可從?」指其像曰:「此非汝主乎,豈可背?當相約以死,必不得已則歸中 乃殺企弓等四人,復稱保大三年,繪天祚像於廳事,每事 內用營、平之兵,外藉南朝之援, 於是悉遣徙民歸 何所懼乎? 」覺又訪於翰林學士李石, 告而後行。 呼父老諭

帶甲十餘萬,覺文武全才,若爲我用,必能屏翰王室。苟爲不然,彼西迎天祚,北通蕭幹, 壓足矣。 」 詹度日:「本朝與金國通好,信誓甚重,豈當首違? 金人昨所以不卽討覺者, 爲吾肘腋忠矣。」安中深然之,具奏于朝,願以身任其責,令安弼、黨詣京師。 榆鯯故也。 石更名安弼,偕故三司使高黨往燕山 而度數誘致之、諷令內附 今既已東去,他日西來,則覺蕞爾數城,恐未易當。 [說王安中曰:「平州自古形勝之區,地方數百里, 爲今之計,姑當密示羈 以兵在 徽宗以手札付 將

以塞盟誓,緬想大朝,亦非得已。遺民假道當管,寃痛之聲, 抗賊命,以存生靈,使復父母之邦,且爲大朝守禦之備,已盡遣其人過界,謹令掌書記張鈞 宣和五年六月,覺遣書至安撫司云:「金虜恃虎狼之強, 盈於衢路。州人不忍, 驅徙燕京富家巨室, 止留空城 愈謂宜

金人聞覺叛,遣闍母國王將三千騎來討,覺帥兵迎拒之于營州,闍母以兵少,不交鋒而

參謀

軍

事張敦固詣安撫司聽命。」

覺也。覺匿於王宣撫甲仗庫,若不與我,我自以兵取之。」安中不得已,引覺出,數其過,使 月,州民數千潰圍走,莫肯降。 往降,獻其詔勑。。金人圍平州,覺之從弟及姪固守,金人以納叛爲責,且求餉粮,凡攻擊數 諜知,舉兵來,覺不得返,同其弟挾所被詔勑奔燕。母妻先寓營州,爲金人所得,弟聞之,亟 以安弼、黨、鈞、敦固皆爲徽猷閣待制,宣撫司犒以銀絹數萬。詔命至,覺喜,遠出迎。」金人 退,大書于門,有「今多復來」之語。覺遂妄以大捷聞,朝廷建平州爲泰寧軍,拜覺節度使, 將軍、涿州留守。淳死,蕭后立,蕭幹專,國人貳。 當奈何?」自是解體,金人終用是啓釁云。 行刑, 覺語殊不遜。旣死, 函首送之, 燕之降將及常勝軍皆泣下, 郭藥師曰: 「若來索藥師, 藥師及張令徽、劉舜仁、頭五臣爲將。淳建號於燕,改「怨軍」爲「常勝軍」,擢藥師至諸衞上 怨軍」,藥師爲之渠首。明年,其兩營叛,藥師殺叛者羅青。都統蕭幹留二千人爲四營,以 郭藥師、渤海鐵州人也。遼之將亡,燕王淳募遼東饑民爲兵,使之報怨於女眞,目曰 金人旣平二州,始來索覺,王安中諱之。索愈急,乃斬一人貌類者去。 金人曰:「此非 宣和四年九月, 似 第 三百三 藥師擁所部八千人奉涿、易二州來歸, 十 一 姦 臣二 韶以爲恩州觀察使。王師北

遣樂師 討,劉延慶與幹軍于盧溝,藥師曰:「幹以全師抗我,燕城必虚,選勁騎襲之,可得也。」延慶 藥師失馬,幾爲所擒,遂以敗還,猶進安遠軍承宣使。 繼至,下令納燕人降而盡殺契丹雜虜。 與諸將帥兵六千,夜半渡河,倍道而進。 藥師遣人諭蕭后,使趣降,后密詔蕭幹還戰於三市 質明,甄五臣領五千騎奪迎春門以入,大軍 十二月,拜武泰軍節度使。五年正

月,加檢校少保,同知燕山府。

宴。 祚,臣故主也,國破出走,臣是以降。 曰:「此非吾功,汝輩力也。」卽剪盆分給之。 下,願以付他人。」因涕泣如雨。 顏。」帝深褒稱之,委以守燕,對曰:「願效死。」又令取天祚以絕燕人之望, 詔入朝,徽宗禮遇甚厚,賜以甲第姬妾。 又召對於後苑延春殿,藥師拜廷下,泣言:「臣在虜,聞趙皇如在天上,不謂今日得望龍 ' 帝以爲忠, 陛下使臣畢命他所,不敢辭,若使反故主,非所以事陛 加檢校少傅,歸鎭 解所御珠袍及二金盆以賜。 張水嬉於金明池,使觀之,命貴戚大臣更互設 變色而 薬師出, 言曰:「医 諭其下

|蕭幹犯塞,樂師破其衆於峯山,生擒阿魯太師,獲耶律德光尊號寶劍檢 [1]、塗金印,幹 策勳加檢校太傅。

尋爲部下所殺。

序,藥師不從。 初, 王安中知燕山府, 詹度與藥師同知, 加以常勝軍肆橫,藥師右之,度不能制,告于朝廷。 藥師自以節鉞,欲居度上。 慮其交惡,命度與河間 度稱 御筆所書有

蔡靖 無不從。 路、增募兵號三十萬,而不改左衽,朝論頗以爲慮。 兩易。 良械精甲,多遣部曲貿易他道,爲奇巧之物以奉權貴宦侍,於是譽言日聞。 |靖至, 坦懷待之, 藥師亦重媾, 稍爲抑損, 安中但諂事之, 朝廷亦曲徇其意, 所請 亟拜太尉,召入朝,辭不至。

共羊羜,皆不敢爭,奏言樂師威聲遠振,攸益謂其可倚,故內地不復防制。 俄頃,四山鐵騎耀日,莫測其數。 貫衆皆失色。 我父,焉知其他?」貫釋然。遂邀貫視師,至于迥野,略無人迹,樂師下馬,當貫前掉旗一揮, 避之。曰:「汝今爲太尉,位視二府,與我等耳,此禮何爲?」薬師曰:「太師,父也。 通 金國書,輒 |金使賀天寧節歸,送伴使見樂師兵,遇之於道,|金使爲之斂馬引避。 帝令童貫行邊,陰察其去就,不然,則挾之偕來。 歸爲帝言,藥師必能抗虜,蔡攸亦從中力主 貫至燕,藥師迎于易州,再拜帳下,貫 鄉兵 屢有告變及得其 或持矛揭 樂師唯拜

悉鎖于 師 破 日 檀 甚。 「薊,至 事,藥師欲降,婦日:「靖誓死 家。 今聞與金人交結,背負朝廷,興禍不遠,願早爲之慮。」始詔遣官究實,而金兵已南 年十二月,詹度言:「藥師瞻視不常,趣向懷異,蜂目烏喙,怙寵恃功,逆節已萌,凶橫 斡離 玉田。蔡靖遣藥師、張令徽、劉舜仁帥師 不 · 及郊, 薬師 率軍官迎拜,遂從以南。 報國,此 何言邪? 」引佩 出禦,其夕,令徽遁歸,靖與部 叛報至,帝猶祕其事,議封爲<u>燕王</u> 刀將自 「剄,藥師抱持 使者詣 使者 藥

列

傳

第

三百

Ξ

+

姦

15

校勘

記

割地與之,使世守,而已無及。

城、詰索宮省與邀取寶器服玩、皆藥師導之也。 斡雌不至慶源,聞天子內禪,欲回軍,藥師曰:「南朝未必有備,不如姑行。」其後趦趄京

校勘記

- (二) 條例司 「司」字原脫。據長編紀事本末卷一三二、東都事略卷二〇一本傳補。
- 陳瓘子正彙 「正」字原脫,據本書卷三四五陳瓘傳、東都事略卷一〇一蔡京傳補。
- **=** 提舉淮 提舉永興軍路學事 疑爲「學事」之誤。 西學士蘇棫 ·施坰」,卷三八有重和元年十一月「提舉成都府路學事翟筠」等。 本書卷一六七職官志有提舉學事司,長編拾補卷三二有政和三年七月「新 此處「學士」
- 四四 南京 原作「西京」,據本書卷二三欽宗紀、卷二一二字輔表改。
- S 分司 池州 東都事略卷一〇一本傳、長編紀事本末卷二二〇均爲「分司南京, 池州居住」,疑此
- (云) 資政 殿大學士 原作「天章閣學士」, 據本書卷二一二字輔表及東都事略卷一〇一本傳改。

處

脫

(十) 禮制局道史官僚合百人 按本書卷二一徽宗紀,政和二年五月蔡京再相,七月置禮制局;宋會

記

要職官一八之一五. 政和四年蔡攸奏請繕寫國史實錄付祕閣收藏,其官職與本傳略同,中有「充

編類御筆禮 制局詳議官」一 職。 此處「局」字原在「道史」下,當係舛誤,今乙正。

元 州降,以易州降者爲高鳳,並非郭部。 郭爽師 擁 所部八千人舉涿易二州降 此處「易二」二字行。下文郭藥師傳同。 按本書卷四四六劉翰傳、編年綱目卷二九,郭藥師只以涿

へれし 邦彦卻立 「卻」原作「欲」,據東都事略卷一〇一蔡攸傳改。

69 郴州 原作「柳州」,據靖康要錄卷五、編年綱目卷三〇改。

獲耶律德光傳號寶劍檢 北盟會編卷一八記此無「劍」字。

宋史卷四百七十三

列傳第二百三十二

姦臣三

黄潛善 汪伯彦 秦檜

宗命潛善察訪陝西,因往視。 黃潛善字茂和,邵武人。擢進士第,宣和初,爲左司郎。陝西、河東地大震,陵谷易處,徽 潛善歸,不以實聞,但言震而已。 擢戶部侍郎,坐事謫亳州,

以徽猷閣待制知河間府。

|靖康初, 金人入攻,康王開大元帥府,檄潛善將兵入援。 張邦昌僭位,潛善趨白于帥

府,王承制拜潛善爲副元帥。

右丞 呂好問 二年,高宗卽位,拜中書侍郞。 止之。 未幾,潛善拜右僕射兼中書侍郎,綱遂罷。 時上從人望,擢李綱爲右相,綱將奏逐潛善及汪伯彥, 御史張所言潛善姦邪,恐害

列

傳

第

二百三十二

姦

臣

Ξ

新 政, 會歐陽激上書詆 左 |遷||所 尚書郎 時事,語侵宮掖,帝謂其言不實,潛善乘間啓殺胤幷東誅之,識與不識 尋謫 江州 太學生陳東論李綱不可去, 潛善、 伯彦 不可 任 潛善

皆爲之垂涕,帝悔焉

里, 酒稅,道卒。 內侍邵成章疏潛善、伯彥誤國,成章坐除名。 明 金人攻陝西, 京東、山東盜起,潛善、伯彥匿不以聞。 御史馬伸亦以劾潛善、伯彦得罪,謫監濮 張遇焚眞州, 距行 在六十

門而 州 渡。 帝 其罪,揮刃而前,鰐方辯其非是,而首已斷矣。 游 |其鋒,潛善以爲不足慮,率同列聽浮屠||克勤說法。 俄泗州奏||金人且至,帝大驚,决策南 出,死者相枕藉,人無不怨憤。會司農卿黃鍔至江上,軍士閗其姓以爲潛善也, 御舟已戒,潛善、伯彥方共食,堂吏大呼曰:「駕行矣。」乃相視蒼黃鞭馬南馳。 潛善進左僕射兼門下侍郎。 鄭、濮相繼陷沒,宿、泗屢警,右丞<u>計景衡以</u>扈衞單弱, 都 Ä 争

請

於誤國,而潛善之惡居多,王庭秀〔三繼以爲言,責置英州。 張 澂 动之, 乃罷潛善爲觀文殿大學士, 知江寧府, 落職居衡州。 帝 渡瓜州,幸鎭江,敵兵已躡其後。潛善、伯彥聯疏言艱難之時,不敢具文求退。 諫官遠植乞斬之都市,帝不許。 鄭數江又論潛善、伯彥均 中丞

尋卒于梅州

其禍,中外爲之切齒。高宗末年有旨,潛善、余深、薛昂皆復官錄後。 附蔡京,潛善專恣誤國,今盡復三人恩數,恐政刑失平,忠義解體。 潛善猥持國柄,嫉害忠良。李綱旣逐,張慤、宗澤、許景衡輩相繼貶死,憲諫一言,隨陷 韶以潛善嘗任副元帥, 諫官凌哲言深、昂朋

特復元官,錄一子。

防 濟達于南京 書請王還相,躬服豪難,部兵逆王于河上。王勞之曰:「他日見上,當首以京兆薦公。」其受知 言人人殊, 伯彥獨曰:「非出北門濟子城不可。」王喜曰:「延俊言是也。」旣濟, 繇大名歷鄆、 自 此 十策,直龍圖閣、知相州。是多,金人陷眞定,詔徙眞定帥司于相,俾伯彥領之。 \始矣。未幾,王奉蠟書,開天下兵馬大元帥府,以<u>伯彥爲副將。王引兵渡河,謀所向</u>, 高宗以康王使金至磁,時金騎充斥, 嘗有甲馬數百至城下, 蹤跡王所在。 汪伯彥字廷俊,徽之祁門人。登進士第,積官爲虞部郎官。靖康改元,召見,獻河北邊 (三),奏爲集英殿修撰。 伯彦亟以帛

眞 (狂譎, 是欲款我 北 兵薄京城,欽宗詔:金人見議通和,康王將兵,毋得輕動。伯彥以爲然。宗澤曰:「女 介師爾。 如卽信之,後悔何及乎!宜亟進兵。」伯彥等難之。及城破,金人

列傳第

百三十二

姦臣三

逼二帝北行,張邦昌僭立,王聞之涕泣。 明年春,王承制除伯彥顯謨閣待制,升元帥,

學士。高宗卽位,擢知樞密院事。未幾,拜右僕射。

永州 官,下至韋布內侍,皆劾奏之。 方高宗初政,天下望治。 紹興初,復職,知池州、江東安撫大使。言者弗置,乃詔以舊職奉祠,尋知廣州 伯彥、潛善踰年在相位,專權自恣,不能有所經畫。 罷伯彥爲觀文殿大學士、知洪州,改提舉崇福宮, 尋落 御史諫 職居 24

年,帝追贈陳東、歐陽澈。舍人王居正論伯彥、潛善不已,復褫前職

忘豐沛、南陽故舊,皆人情之常。」伯彥上所著中興日曆五卷,拜檢校少傅、保信軍節度使。 闕,帝謂恰曰:「伯彥便令之官,庶免紛紜。」又曰:「伯彥潛藩舊僚,去國七年。 漢之高、光不 伯彦之未第也,受館于王氏, 宜興牽復。」秦檜、張浚曰:「臣等已議曰郊恩取旨,更得天筆明其舊勞,庶幾內外孚信。」始 十年,請祠,從之。明年五月,卒,贈少師,諡忠定。 |檜嘗從之學,而浚亦伯彥所引,故共贊焉。 九年,知宣州,過

遂 拘而北,久之乃還。或云似之得歸,伯彥實使人贖之。 初, 伯彥旣去相州,金人執其子軍器監丞似,使割地以至相州,守臣趙不試固守不下, 似後更名召嗣。

列 傳 第 百 Ξ + _ 姦 臣 Ξ

|康 二言金人狙詐(3),守禦不可緩;三乞集百官詳議,擇其當者載之誓書;四乞館金使于外, 元年,金兵攻汴京,遣使求三鎮, 檜上兵機四事:一言金人要請無厭, 乞止許燕山一路, 秦檜字會之,江寧人。登政和 五年第,補密州教授。繼中詞學兼茂科,歷太學學正。靖

不可令入門及引上殿。不報。除職方員外郞。 尋屬張邦昌爲幹當公事, |檜言:「是行專爲割

地,與臣初議矛盾,失臣本心。」三上章辭,許之。

滅而還。 金二 人請與之,檜等三十六人持不可。 **酋歸**,言金堅欲得地,不然,進兵取汴京。 時議割三鎭以弭兵,命恰借禮部侍郞與程瑀爲割地使,奉肅王以往。 御史中丞李回、翰林承旨吳升共薦檜,拜殿中侍御史,遷左司諫。 未幾,除御史中丞。 十一月, 集百官議于延和殿,范宗尹等七十 金師退,檜、瑀 王雲、李若 水見

曹職 姓。 爲 留守王時雍等召百官軍民共議立張邦昌,皆失色不敢答,監察御史馬伸 圖 爭臣,豈容坐視不吐一辭?當共入議狀,乞存趙氏。」時膾爲臺長,聞仰言以爲然,即 十一月,汴京失守,二帝幸金營。 二年二月,莫儔、吳拜自金營來,傳金帥命推 言於衆曰:「吾 立

進狀 目

|檜 荷 或 厚恩,甚愧無報。 今金人擁重兵,臨已拔之城,操生殺之柄,必欲易姓,膾 三七四七

盘死以辨,非特忠於主也,且明兩國之利害爾。 求和軍前。 頃緣姦臣敗盟,結怨鄰國,謀臣失計,誤主喪師,遂致生靈被禍,京都失守,主上出郊, 兩元帥旣允其議,布聞中外矣,且空竭帑藏,追取服御所用,割兩河地,恭 趙氏自祖宗以至嗣君, ,百七十餘載。

數,焉可以一城决廢立哉。昔西漢絕於新室,光武以興,東漢絕於曹氏, 唐爲朱温篡奪,李克用猶推其世序而繼之。蓋基廣則難傾,根深則難拔。 宋於中國,號令一統,綿地萬里,德澤加於百姓,前古未有。雖興亡之命在天有 劉備帝蜀

爲臣子,今乃變易前議,人臣安忍畏死不論哉?

之,終不足爲大|金屏翰。必立|邦昌,則京師之民可服,天下之民不可服;京師之宗子 特大宋蒙福,亦大金萬世利也。 可滅,天下之宗子不可滅。。檜不顧斧鉞之誅,言兩朝之利害,願復嗣君位以安四方,非 致,亦邦昌爲之也。天下方疾之如仇讎,若付以土地,使主人民,四方豪傑必共起而誅 張邦昌在上皇時,附會權倖,共爲蠧國之政。 社稷傾危,生民塗炭,固非一人所

不許。初,二帝北遷,檜與傅、叔夜、何奧、司馬朴從至燕山,又徙韓州。上皇聞康王卽位, 作書貽料罕,與約和議,俾檜潤色之。檜以厚路達料罕。會金主吳乞買以檜賜其弟撻懶爲 金人尋取檜詣軍前。三月,金人立邦昌爲僞楚。邦昌遺金書請還孫傅、張叔夜及檜,

任 用 撻懶攻山陽, 建炎 四年十月甲辰,檜與妻王氏及婢僕一 家,自軍中取連水軍水砦航 海

歸行在。丙午,檜入見。丁未,拜禮部尚書,賜以銀帛,

欲 參 未 必 求 自 解 議官 處之 質 派 對 仇 和 議 、妻屬 書 前 至 | 檜之歸也, 楚 經 和 並 ,實自 三千 改 筵,帝 帝 日 安得與王氏偕? 京 曰:「檜朴 帝命先見宰執。 ·入百 秩, 舟人孫靖 檜 自 日:「且 言殺金 始。 1里、踰河 忠過人,朕得之喜而 蓋檜 · 與 一 事 人 越海 、監己者奔舟 急亦 在 惟宰 金庭 檜首 簡尚書。」故有 一、豈無 柏 補 首 言「如欲 范宗尹 承 唱 譏訶之者,安得殺監而 信 而來。 和 郎。 議,故撻懶縱之使 不寐。蓋 天下 同 禮部之命。 始, 知樞 朝 無 士多謂 朝 事 聞二帝、母后消息, 密院 廷 ,南 雖 李回 從行 層與奧、傳、朴同拘,而層獨 自 數遣使, 南 南? 歸也 小北自 與檜善,盡破 王 一安道、 就令從軍撻懶,金 但 北」,及首 且 又得一佳 守且 馮 由 羣 和, 義 [奏所草與撻 疑,力薦其忠。 而 水砦 1: 專 也。 人縱之, 與金 Ţ 宗 歸;又 禩 尹 及

賞, 攘; 事 聳 動 檜力贊其議, 故 天 知 紹 能 个。 」 興 樞 中興, 密院 元年二月,除參 或問 事 今二 見帝 何以不言, 九月, 相宜 意 堅, 分任內 知 呂願 政 反以 檜 事。 浩再相, 曰:「今無相 此 濟之。 七月,宗尹 頤浩遂建都督府於鎭江 檜 同秉 宗尹 不 罷。 政, 旣 可 去, 行也。」 先是,范宗 謀 奪 相 位 其 八月, 人虚。 柄, 尹 風 帝曰:「頤浩專治 建議 拜右 其黨 檜揚 僕 討論崇寧、大觀 建言:「 言曰:「我 射、 同 中 周宣 書 有二 軍 闁 王 旅 一內修 以來 一策, 下 平 |檜 專 章 外 可

列

傳

第

百

Ξ

+

姦

臣

Ξ

理庶務,如種、蠡之分職可也。」

討 統 修,修其所謂外攘之政而已。 ?官林待聘皆上疏言不可廢。 亦謂檜曰:「宰相事無不統, 汝文求去; 二年, 檜奏置修政局, 諫官方孟卿一再論之,汝文竟罷。 目為提舉, 參知政事翟 今簿書獄訟、官吏差除、土木營繕俱非所當急者。」屯 七月,一止出臺,除起居郎,蓋自叛其說,識者笑之。 何以局爲?」檜皆不 聽。 一汝文同領之。 監察御史劉 既而 有議廢局以搖檜者, 一止,檜黨也, 未幾, 檜面劾汝文擅治堂 言:「宣王內 止 田 一及檢 卵會

討 年為 檜 漂、 宜 勝 止、林待聘、 非 ,提舉江州 專主 人,檜亦力引 先去之。」蓋安國嘗問人材於游酢,酢以膾爲言,且比之荀文若。 |玛輩布 殿 不可用,勝非遂以醴泉觀使兼侍讀。安國求去,檜三上章留之,不報。 頤 浩自江 中侍 和 議,沮 列清要。 御史,劉棐爲右司諫,蓋將逐膾。 樓炤並落職予祠,臺省一空,皆檜黨也。 太平觀 上還,謀逐檜,有敎以引朱勝非爲助者。 安國。 止 恢復,植黨專權,漸不可長,至比恰爲溝、卓。 頤浩問去檜之術於席益,益曰:「目爲黨可也。 至是,安國等去,膾亦尋去。 於是江躋、吳表臣、程瑀、張燾、胡世將 檜再相誤國,安國已死矣。 檜初欲傾頤浩, 引一時名賢如安國 詔以勝非同都督。給事中胡安國 八月,檜罷,乃爲觀文殿學 故安國力言恰賢於張浚 今黨魁胡安國在瑣闥 頤浩尋以黃龜 黃龜年始勃 劉

劉豫 今無聞。」密禮卽以上意載訓辭,播告中外,人始知檜之姦。 前 帝 日, 日:「檜言『南人歸南, 上召直學士院綦宏禮入對,示以檜所陳二策, 北人歸北』。殷北人,將安歸? 欲以 |檜又言『爲相數月, 龜年等論層不已,詔落職 河北人還金國, 中原 可聳 動天 人 還

勝朝堂,示不復用。三年,韓肖胄等使還,洎金使李永壽、王翊偕來,求盡還北俘,

與檜前議

行在, 脗合。 守,並權赴尙書、樞密院參决庶事。 殿學士、知温州。 及寧德后計,帝號慟發喪,即日授恰樞密使,恩數視宰臣。 五. 用右相張浚薦也。十二月,檜以醴泉觀兼侍讀赴講筵。七年正月,何蘇使金還,得徽宗 年,金主旣死,撻懶主議,卒成其和。 識者益知檜與金人共謀,國家之辱未已也。 六年七月,改知紹興府。 時已降詔將行幸,檜乞扈從,不許。帝駐蹕下江,召檜 二月,復資政殿學士,仍舊宮祠。 尋除體泉觀使兼侍讀, 充行宮留守; 四月,命王倫使金國迎奉梓宮。 六月,除觀文 孟庾 [n]蹈 赴

張守 知其闇,不復再薦也。 面奏,各數千百言,層獨無一語。浚遂謫永州。 人才,浚劇談檜善,鼎曰:「此人得志,吾人無所措足矣!」浚不以爲然,故引檜,共政方 始,浚、鼎相得甚,浚先達,力引鼎。

知

《其闇。」帝曰:「然則用趙鼎。」鼎於是復相。

九月,|浚求去,帝問:「誰可代卿?」|浚不對。帝曰:「秦檜何如?」|浚曰:「與之共事,始

臺諫交章論浚,安置嶺表。

鼎約同列救解,與

列傳

第

檜 在 樞 府惟聽鼎,鼎素惡檜,由是反深信之,卒爲所傾。 鼎與後晚遇於閩,言及此,始知皆

爲膾所賣。

中興固有時。」帝曰:「此固有時,然亦須有所施爲,然後可以得志。 十一月, 奉使朱弁以書報粘罕死,帝曰:「金人暴虐,不亡何待?」|檜曰:「陛下但積德,

部侍郎 是太后春秋高,殷旦夕思念,欲早相見,此所以不憚屈己,冀和議之速成也。」鱠曰:「屈己議 命。 和,此人主之孝也。 可成,邊備亦不可弛。」 人相矣。」五月,金遣烏陵思謀等來議和,與王倫偕至。 六月,思謀等入見。帝愀然謂宰相曰:「先帝梓宮, 八年三月,拜右僕射、同中書門下平章事兼樞密使。 魏矼館伴,矼辭曰:「頃任御史,嘗言和議之非, ||檜曰:「公以智料敵,||檜以誠待敵。」||紅曰:「第恐敵不以誠待相公爾。」 見主卑屈,懷憤不平,此人臣之忠也。」帝曰:「雖然, 今不可專對。」 思謀即宣和始通好海上者。 果有還期,雖待二三年尙庶幾。 吏部侍郎晏敦復有憂色, ||檜問|||瓜所以不主和 有備 無思, 檜乃改 使和議 議以吏 惟

欲講和, 乞顓 日,容臣別奏。」又三日,檜復留身奏事,帝意欲和甚堅,檜獨以爲未也,曰:「臣恐別有未便, 十月,宰執入見,燴獨留身,言「臣僚畏首尾,多持兩端, 與臣議,勿許羣臣預。」帝曰:「殷獨委卿。」 檜曰:「臣亦恐未便, 此不足與斷大事。 望陛下更思三 若陛下决

欲望陛下更思三日,容臣別奏。」帝曰:「然。」又三日,檜復留身奏事如初,知上意確不移,乃

出文字乞決和議,勿許羣臣預。

|中參告, 亦以此爲言。故鼎與大中俱罷。明年, 璩卒授保大軍節度使, 封崇國公。 |魔擇藝祖後,得伯宗、伯政入宮,皆藝祖七世孫。 辭,勸帝曰:「臣去後,必有以孝弟之說脅制陛下者。」出見膾,一揖而去,膾亦憾之。 子矣。今日禮數不得不異。」帝乃留御筆俟議。 約 此 相,帝出御札,除璩節度使,封吳國公。執政聚議,樞密副使王庶見之,大呼曰:「並后匹嫡, 建國公。帝論鼎專任其事。 不可行。」鼎以問膾,不答。檜更問鼎,鼎曰:「自丙辰罷相,議者專以此藉口,今當避嫌。」 同奏面納御筆,及至帝前,檜無一語。鼎曰:「今建國在上,名雖未正,天下之人知陛下有 鼎力求去位,以少傅出知紹興府。 又請建資善堂,鼎罷,言者攻鼎,必以資善爲口實。 初,帝無子。 明日,檜留身奏事。後數日,參知政事劉 伯踪改名暖,伯玖改名璩。暖先建節,封 建炎末,范宗尹造膝有請,遂命宗室令 及鼎、檜再 故鼎入

合,自淮西入樞庭,始終言和議非是,疏凡七上,且謂憎曰:「而忘東都欲存趙氏時,何遺此 檜深憾之。 本中、禮部侍郎張九成皆不附和議,層論之使優游委曲,九成曰:「未有枉已而能正人者。」 鼎旣去,檀獨專國,決意議和。中朝賢士,以議論不合,相繼而去。於是,中書舍人呂 殿中侍御史張成上疏乞留趙鼎,又陳十三事論和議之非,忤膾。 王庶與檜尤不

傳

第二百三十二

姦

臣三

敵邪?」檜方挾金人自重,尤恨庶言,故出之。

濱嶺, 吟思漢之赤子,以詔諭江南爲名,要陛下以稽首之禮。 弟之名,檜亦不能罪。僧開見檜,言今日當論存亡,不當論安危。檜駭愕,遂出之。司勳員外 送銓貶昭州 書舍人勾龍如淵抗言於櫓曰:「邪說橫起,胡不擇臺官擊去之。」檜遂奏如淵爲御史中丞,首 部尙書張燾、吏部侍郎晏敦復魏矼、戶部侍郎李彌遜梁汝嘉、給事中樓炤、中書舍人蘇符、 憤怒,豈肯聽陛下北面爲仇敵之臣哉!天下將有仗大義,問相公之罪者。」後數日, 有二年,以覆我王室,以弛我邊備,以竭我國力,以懈緩我不共戴天之讎,以絕望我中 郎朱松、館職胡程張擴凌景夏常明范如圭同上一疏言云:「金人以和之一字得志于我者十 外。旣而校書與許忻、樞密院編修官趙癃同日上疏,猶祖銓意,力排和議。 擁又欲正 至引漢高祖分羹事爲喩。 工部侍郎蕭振、 且移書切賣檜,檜始大怒,傳於是固辭新命不拜。奉禮 樞 地惡瘴深,諺曰:「龍南、安遠,一去不轉。」言必死也。 密院編修官胡銓上疏,願斬檜與王倫以謝天下。於是上下洶洶。 陳剛中以啓賀銓,檜大怒,送剛中吏部,差知贛州安遠縣。 起居舍人薛徽言同班入奏,極言屈已之禮非是。新除禮部侍郎尹焞獨上 帝曰:「朕不忍聞。」顰蹙而起。 自公卿大夫至六軍萬姓,莫不扼腕 | 檜乃謫時行知萬州, 尋亦抵罪。中 郎馮時行召對,言和議不可信, 剛中果死。尋以銓事戒諭中 | 贛有十二邑,安遠 檜謬爲解救,卒械 一南北兄 權吏 國謳

劾 |銓。

徐議 益憤 國信。 往往流涕。 若其不克,委曲從之未晚。」亦不許。 願以身當之,不許。 ^職餘事 ,,再疏言:「<u>金</u>以詔諭爲名,暗致陛下歸順之義,此主辱臣死之時,願效死戰以決勝敗。 金 京、淮宣 使張通 過平江, 古、蕭哲以詔諭江南爲名, |撫處置使韓世忠凡四上疏 守臣向子諲不拜,乞致仕。 哲等既至泗州,要所過州縣迎以臣禮,至臨安日,欲帝待以客禮,世忠 哲等既入境,接伴使范同 , 恰獨恐物論咎己, 與哲等議, 改江南爲宋, 力諫, 哲等至准安,言先歸河南地,且册上爲帝, 有「金以劉豫相待」之語,且言兵勢重處, 再拜問金主起居,軍民見者, 詔 諭

李誼 從。 李光素有時望,俾押和議牓以鎭浮言。 楊沂中、 三年不言」 事以告櫓, 日,詔 數見檜議 帝命恰即館中見哲等受其書。 |檜至是欲上行屈己之禮,帝曰:「朕嗣守|太祖、|太宗基業,豈可受||金人封册。」|會三衙帥 金使來,將盡割河南、陝西故地, 解潛、韓世良相率見檜曰:「軍民洶洶,若之何?」退,又白之臺諫。 國書事, 於是定層攝冢宰受書之議。 如淵謂得其書納之禁中, 金使欲百官備禮,檜使省吏朝服導從,以書納禁中。 又降御札賜三大將。 又許還梓宮及母兄親族, 則禮不行而 帝亦切責王倫, 事定。給事 初無需索。 |倫諭金使, 中樓炤 於是勾龍 以參知政事 金使亦懼 亦舉「諒陰 如淵 先 而

守臣 使, 藍 ,專撫遺民,勸農桑,各因其地以食,因其人以守,不可移東南之財,虛內以事外。」帝雖 九 公佐副之。 年 金 人歸 河南、陝西故地,以王倫簽書樞密院事,充迎奉梓宮、奉還兩宮、 判大宗正事士優、兵部侍郎張燾朝八陵。 帝謂宰執曰:「河南新復, 交割 宜命 地界

聽|檜和 欺 ||南||夫 徐俯 州 詢薨書二十篇,大意言自古講和,未有終不變者,條具者皆豫備之策。 檜悉加黜貴,紃貶循 汪 應辰樊光遠、澧州推官韓紃、臨安府司戶參軍毛叔慶,皆言金人叵測;迪功郎張行 時張浚 守上饒,連南夫帥廣東,岳飛宣撫淮西,皆因賀表寓諷。俯曰:「禍福倚伏,情僞多端。」 」飛日:「救暫急 日:「不信亦信, 而 實疑 在永州,馳奏,力言以石晉、劉豫爲戒,復遺書孫近,以「帝秦之禍,發遲而大」。 金詐、未嘗弛備也。 而解倒懸,猶之可也;欲長慮而尊中國,豈其然乎?」他如秘書省正字 其然豈然?雖虞舜之十二州,皆歸王化,然商於之六百里,當念 成獻 爾

所主 七 一, 將 月,兀朮 有他 殺其領 謀 也。 |倫| 三省事宗磐及左副元帥撻懶,拘王倫於中山府。 密奏于 朝,檜不之備,但趣倫進。 時韓世忠有乘懈掩擊之請,檜 蓋兀朮以歸地爲二

言春秋不伐喪,與帝意合,遂已。

十年,金人果敗盟,分四道入侵。 兀朮入東京, 葛王褎取南京, 李成取西京, 撒离喝趣

於是檢位復安,據之凡十八年,公論不能撼搖矣。 是,初無主議。 下以爲至戒。」帝深然之。恰力排羣言,始終以和議自任,而大獨謂無主議者,專爲恰地也。 永 興 軍 河南諸郡相繼陷沒。 事有小變,則更用他相,後來者未必賢,而排黜異黨,紛紛累月不能 帝始大怪,下詔罪狀兀朮。 御史中丞王次翁奏曰:「前 定,願陛 日 或

尋竄 力招討。」卒不行。 故 弧。 潮州 六月, 檜奏曰:「德無常師,主善爲師。臣昨見 謹懶有割地講和之議,故贊陛下, 今兀朮戕其叔撻懶,藍公佐歸,和議已變,故贊陛下定弔伐之計。願至江 閨六月,貶<u>趙鼎興化軍,以王次</u>翁受檜旨,言其規圖復用也。 上諭 言者不已, 取河南 諸 帥同

聞之,棄壽春而歸。 捷。 堂恩封檜莘國公。十一年,兀朮再舉,取壽春, 朥 於 | 節還太平。 楊沂中戰拓阜,又破之。檜忽諭沂中及張俊遽班師。 泇口鎮,諸將所向皆奏捷,而檜力主班 時張俊克亳州,王勝守克海州,岳飛克郾城,幾獲兀朮。 飛軍聞詔,旗靡轍亂,飛口呿不能合。 自是不復出兵。 師。 入廬州 九月,詔飛還行在,沂中還鎮江,光世 於是淮寧、察、鄭復爲金人有。 諸 韓世忠聞之,止濠州 將邵隆、王德、關師古等連 張浚戰勝於長安公、韓世 不進 戦 以 明 池 忠 皆

四月,恰欲盡收諸將兵權,給事 列 第 百百三 + _ 姦 臣 \equiv ,中范同獻策,檜納之。密奏召三大將論功行賞,韓世忠、

州 樞 俊 良臣偕金使蕭毅等來,議以淮水爲界,求割唐、鄧二州。 並 密 至 是,兀朮 爲 使,進封慶國公。 樞密使,岳飛爲副使,以宣撫司軍隸樞密院。 有求和意,縱之歸。恰復奏遣劉光遠、曹勛使金,又以魏良臣爲通問使。 徽宗實錄成,遷少保,加封冀國公。 六月,拜左僕射、 尋遣何鑄報聘, 許之。 先是,莫將、韓恕使金,拘于涿 同中書門下平章 事

請定國· 政 子 事。 雲俱送大 與太祖 ·宽之,聞者流涕。 十月, 本, 同 雖 皆三十歲建節」爲指斥乘興,受詔不救淮 俱與檜大異,必欲殺之。鑄、三畏初鞫,久不伏; 附 理寺,命御史中丞 興岳 和 議,以自 飛之獄。 飛之死,張 奏事,檜忌之也。 | 檜使諫官万俟禼論其罪,張俊又誣飛舊將張憲謀反, |何鑄、大理卿周三畏鞫之。十一月,贬李光藤州,范同罷參 俊 行力焉 語在 十二月,殺岳飛。 - (飛傳 西罪,賜死獄中。子雲及脹憲殺于都市 **离入臺,獄途上。** 檜以飛屢言和議失計, 涵 常自言 於是飛及 且嘗奏 知

咎前 無 母為 九月,加 子 秦、 日之異己者。 十二年, 喚 妻貴 魏 太 國 師 夫人。 III 進封 切鈴 妬 再編 |檜在金國, 出熔爲|檜 魏 先是,趙鼎貶潮州 子熺舉進士,館客何溥 國公。 管新州 十月),進封 八月,徽宗及顯肅 秦、魏 後。 王庶貶道州, 赴南省,皆爲 檜還,其家以熺見, 兩 國公。 、懿節二梓宮至行在。 胡銓再貶新州。 檜以 第 封兩國與蔡京、重貫 ___ 檜喜 ||熔本||王 至是,皆遇赦永不檢 一喚擊子,檜妻喚妹, |檜 太后 幸 和 還慈寧宮。 議 同,請改封 復 区成,盆

會開 (、李彌) 遜並落職。 張俊本助和議,居位歲餘無去意,檜諷江邈論罷之。

言木內有文曰「天下太平年」,詔付史館。 節備舉, 書言彗星不足畏,檜大喜,特改京秩。 十三年,賀瑞雪,賀雪自檜始。 爲苟安餘杭之計,自此不復巡幸江上,而祥瑞之奏日聞 賀日食不見,是後日食多書不見。 楚州 於是修飾彌文,以粉飾治具,如鄉飲、耕籍之類 奏鹽城縣海淸,檜請賀,帝不許。 矣。 彗星常見, 知 虔州 選人康倬 薛

光皆 解 刺 爲 貶,累及僧宗杲(弘編配,皆以語忤檜也。 省, 世。 外祠。 潛 配 聞皓語,深以爲憾,遂令李文會論之。 萬 再竄 鼅 初,粘罕行軍至准上,膾嘗爲之草檄,爲室撚所見,故因皓歸寄聲。 洪皓歸自 安軍。 官開居,辛永宗總戎外郡,亦坐不附和議, 過海。 十四年,貶黃龜年,以前嘗論檜也。 [金國,名節獨著,以致金會室撚語,直翰苑不一月逐去。 太學生張伯麟嘗題壁曰「夫差,爾忘越王殺而父乎」,杖脊刺配吉陽 **皓之罪由白鍔延譽,光以在藤州唱和** 張邵 胡舜陟以非笑朝政下獄死, 閩、浙大水,右武大夫白鍔有「燮理 亦坐與憎言金人有歸欽宗及諸王后妃意,斥 潛竄 有諷 南安死, ,刺及檜者,爲守臣所告也 永宗編置肇慶死。 室燃者,粘罕之左右 張九成以鼓唱浮 **檜意士大夫莫有** 乖謬 軍。 趙鼎、李 故將 語, 知

等以 討論 先是,議建國公出閣,吏部 不詳、懷姦附鼎皆罷。 尚書吳表臣、禮部尚書蘇符等七人論禮與檜意異,於是表臣 始, 檜爲上言: 趙鼎欲立皇太子, 是待陛下終無子也, 宜俟

列

傳

第

百三十

姦臣

 \equiv

親子乃立。 沖嘗爲資善翊善,故大方誣之。其後監察御史王鐵言帝未有嗣,宜祠高禖,詔築壇 遂嗾御史中丞詹大方言鼎邪謀密計,深不可測, 與范沖等咸懷異意, 以徼無妄

于圜丘東,皆檜意也。

罷相以來詔書章疏稍及檜者,率更易焚棄,日曆、時政亡失已多,是後記錄皆熺筆,無復有 公是非矣。多十月,右正言何若(日)指程頤、張載遺書爲專門曲學,力加禁絕,人無敢以爲 北還,自頌檜功德凡二千餘言,使著作郞王揚英、周執羔 (10) 上之,皆遷秩。自檜再相,凡前 又命子熺以秘書少監領國史,進建炎元年至紹興十二年日曆五百九十卷。熺因太后 |台州||曾惇獻||檜詩稱「聖相」。凡投獻者以||皐、||夔、||稷、||契爲不足,必曰「元聖」。||檜乞禁野

遂言淶水記聞非其會祖光論著之書,其後<u>李</u>光家亦舉光所藏書萬卷焚之。十月,帝親書 六月,帝幸檜第,檜妻婦子孫皆加恩。檜先禁私史,七月,又對帝言私史害正道。時司馬伋 「一德格天」扁其閣。十六年正月,檜立家廟。三月,賜祭器,將相賜祭器自檜始。 十五年, 熺除翰林學士兼侍讀。四月, 賜檜甲第, 命敎坊樂導之入, 賜緡錢金綿有差。

謀爲豫備。不然,異時以國與敵者,反歸罪正議口司。恰久憾浚,至是大怒,卽落浚節鉞,貶 先是,帝以彗星見求言。張浚上疏,言今事勢如養大疽於頭目心腹之間,不決不止,願

連州,尋移永州。

織, 趙鼎遇赦永不檢舉之旨,又令月申存亡,鼎知之,不食而卒。 雖聞其死而歎息者亦加以罪。 十七年,改封檜益國公。五月,移貶洪皓于英州。八月,趙鼎死于吉陽軍。 又竄呂頤浩子撫于藤州。十二月,進士施鍔上中興頭 自鼎之謫,門人故吏皆被羅 是夏,先有

行都賦及紹興雅十篇,永免文解。

自此頌詠導諛愈多。

賜百官喜雪御筵于檜第。

銓也。 訕也。 迹 (11) 。」 五月,李顯忠上恢復策,落軍職,與祠。 六月,迪功郎王廷珪編管辰州,以作詩送胡 八年, 熔除知樞密院事, 檜問胡寧曰:「外議如何?」寧曰:「以爲公相必不襲蔡京之 閏八月,福州言民采竹實萬斛以濟飢。 十一月,胡銓自新州移貶吉陽軍,以作頌謗

月,禁私作野史,許人告。 懲戒,則奏甘露瑞芝之類 G語,崇虛飾誕,無所不至。」帝雖眷**膾,而不可蔽**欺也如 嘗語<u>檜曰:「自今有奏獄空者 (四,當令監司驗實</u>。 + 九年,帝命繪櫓像,自爲贊。是歲,湖、廣、江西、建康府皆言甘露降,諸郡奏獄空。帝 果妄誕,即按治,仍命御史臺察之。 苟不

自衞。 十年正月, 檜趨朝, 殿司 是月,曹泳告李光子孟堅省記光所作私史,獄成,光竄已久,韶永不檢舉; '小校施全刺檜不中,磔于 市。 自是每出,列五十兵持長梃以 孟堅編置

奏以 徑山 事 揚 秦。 英 僧 檜 清言 傳 上書薦燒爲相 朝 故檜尤惡之。 存 趙 ,指蚁、 士 氏 連 ,皆以訕 本末 坐者 、蠅也; 付 八人,皆落職貶秩; 膀也。 史館。 ,檜奏揚英知泰州 編管右迪 家有潛光亭、 時檜疾愈, 六月 功郎安誠、布衣汪大圭,斬有蔭人惠俊、進義副 /, |熔 商隱堂,以亭號潛光,有心於黨李, 加加 朝 少保。 胡寅竄新州 · 參許肩興,二孫扶掖, 仍免拜。 鄭煒 Clo 告其鄉人福建安撫司機宜吳元美 泳 由 「是驟用。 五. 月, 堂名商隱, 二十一年,朝散 秘書少監湯思退 尉劉 允中, 無意 於 郎

舉, 於謝 曹冠策皆攻專門之學,張孝祥策則主一德元老且及存趙事 月, 龍 叉 賓州 以當 坐 卽 檜孫 謗 仮 二十二年, 語 士論 炬編管邕州 家 訕 登李光、蕭振之門, 人曰:「吾曹 敷 取綦宏禮所受御筆繳 黥 爲之不平。 文閣 配 嶺 待制 又興王庶 南; 可以 何兌 塤 考官 內侍裴詠坐指斥,編管瓊州。 試 富 訟其 進 二子之奇之荀 言時事也。 貴 則 土 矣。」 魏 師馬伸發端 舉 進。 師 ,省殿試皆爲第 及廷 遜、 檜初罷 湯思退、鄭仲 於是光永不 处試, 檜 上金 葉三省、 相, 又奏思退 上有 人書乞存趙氏, __, ·檢舉, 楊煒、 熊 責檜語, |檜從子||焞 <u>二</u>十 為編 沈虚中、 振貶池州 袁敏求公 四大獄, 应 年二月,楊炬 排, 欲泯其 帝讀熉策,皆檜、熔語, 短順 爲分檜 董德 師 遜 (迹焉。 爲 烟黨 元 功, 十三年,檜 詳定。 也 云 兌編管 周 是歲, 皆坐 夤 以弟煒舊 師 遜 沈 塤 英州 一謗訓 與 等 興 進 請 第 傑 於是擢 初 下 皆 累 黄 台 知 貢 登 死 州

孝祥爲第一,降熉第三。 未幾,損修撰實錄院,宰相子孫同領史職,前所無也。

通 管 辰州 書,編置永州 六月,以王 鄭迅、賈子展以 循 **!**友前. 十二月,魏安行、洪興祖以廣傳程瑀論語解, 知 建康嘗罪膾族黨,循友安置藤州。 會中有嘲謔講和之語,迅竄容州, 子展竄德慶府。 八月,王耀爲李光求內徙,耀編 安行編置欽州 方疇以與胡 興祖 編 置 昭 鈴

州。

又竄程緯,以其慢上無禮也

有言 춢 擅 亦防檜之壅蔽 政以來, 者恐觸 帝嘗 · 諭檜曰:「近輪對者,多謁告避免。 屛塞人言,蔽上耳目,凡一時獻言者,非誦恰功德,則計人語言以中傷善類。 忌諱, 畏言國 也 事,僅論銷金鋪翠、乞禁鹿胎冠子之類,以塞責 百官輪對,正欲聞所未聞,可令檢舉約束。」恰 而已。 故帝及之,

晉安居秀王 大驚 問櫓 衢州 嘗 ,恰曰:「不足上煩聖慮,故不敢聞,盜平卽奏矣。」退而求其故,知晉安言之,遂奏 看盜. 喪不當給俸,月損二百緡,帝爲出內帑給之。 一起,檜遣殿前司將官主立將千人捕之,不以聞。 晉安郡王因入侍言之,帝

變 僚共賦秦城王 十 五 年二月,以沈長卿舊與李光啓譏和議, 一氣詩以 人所告,長卿編置化州, 媚檜,不賦者劉芮、李燮、羅博文三人而已。 **燁武岡軍** 又與芮燁共賦牡丹詩,有「寧令漢社稷, 靜江 有驛名秦城 愿中由 此得召。 知 府呂愿中 又

以太廟靈芝繪爲華旗,凡郡國所奏瑞木、嘉禾、瑞瓜、雙蓮悉繪之。 張扶請檜乘金根車,又有乞置益國官屬及議九錫者,檜聞之安然。 十月,申禁專門之學。

|**衿**之獄,張宗元之罷,皆波及浚。浚在永州,檜又使其死黨張柄知潭州,與郡丞汪召錫共伺 病不能書。 察之。至是,使汾自誣與浚及李光、胡寅謀大逆,凡一時賢士五十三人皆與焉。獄成,而檜 李光、胡銓姓名,必欲殺之而後已。鼎已死而憾之不置,遂欲孥戮汾。 子汾與令於飲別厚贐,必有姦謀,詔送大理,拘令於南外宗正司。恰於一德格天閣書趙鼎 趙令衿觀檜家廟記,口誦「君子之澤,五世而斬」,爲汪召錫所告。 檜忌張浚尤甚,故令 御史徐嘉又論趙鼎

舉江州太平興國宮。是夜,膾卒,年六十六。後贈申王,諡忠獻。 見臺諫徐嘉、張扶謀奏請己爲相。丙申,詔檜加封建康郡王,熺進少師,皆致仕,塤、堪並提 不當與。」帝遂命權直學士院自己沈虛中草檜父子致仕制。 是月乙未,帝幸檜第問疾,燴無一語,惟流涕而已。熺奏請代居相位者,帝曰:「此事卿 熔獨遣其子塡與林一飛、鄭柟夜

指斥,曰怨望,曰立黨沽名,甚則曰有無君心。凡論人章疏,皆膾自操以授言者,識之者曰, 鋤 略盡。其頑鈍無恥者,率爲膾用,爭以誣陷善類爲功。其矯誣也,無罪可狀,不過日謗訕,日 檜 兩據相位,凡十九年,扨制君父,包藏禍心,倡和誤國,忘讎斁倫。一時忠臣良將,誅

三七六五

機 先 「此老秦筆也。」祭事之卒,布滿京城,小涉譏議, 何上動靜。 郡國事惟申省,無一至上前者。 即捕治,中以深文。又陰結內侍及醫師王 檜死,帝方與人言之。

程克俊、李文會、楊愿、李若谷、何若、段拂、汪勃、詹大方、余堯弼、巫伋、章夏、宋樸、史 聽層彈擊,輒以政府報之,由中丞、諫議而陞者凡十有二人,然甫入卽出,或一閱月,或半年 才、魏師遜、施鉅、鄭仲熊之徒,率拔之冗散,遽躋政地。 易執政二十八人,皆世無一譽。 於國,外國珍寶,死猶及門。人謂熺自檜秉政無日不毀酒具,治書畫,特其細 即罷去。惟王次翁閱四年,以金人敗盟之初持不易相之論,檜德之深也。 | 檜立久任之說,士淹滯失職,有十年不解者。 附己者立與擢用。 柔佞易制者,如孫近、韓肖胄、樓炤、王次翁、范同、万俟禼、 旣共政,則拱默而已。 又多自言官 自其獨相,至死之日, 開門受路,富敵

與膾爭論,言頗侵膾,膾不答。及光言畢,膾徐曰:「李光無人臣禮。」帝始怒之。凡陷忠良, 率用此術。 |楢陰險如崖穽,深阻竟叵測。 同列論事上前,未嘗力辨,但以一二語傾擠之。 晚年殘忍尤甚,數興大獄,而又喜諛佞,不避形迹。 李光嘗

| 禧 一年四月,追奪王爵,改謚謬醜。 然膾死燒廢,其黨祖述餘說,力持和議,以竊據相位者尙數人,至孝宗始蕩滌無餘。 嘉定元年,史彌遠奏復王爵、贈諡 開

校勘記

- (1) 鄭穀 原作「鄭慤」,據本書卷三九九本傳及繫年要錄卷二一改。
- (三) 王庭秀·原作「王廷秀」,據本書卷三九九本傳及繫年要錄卷二一改。
- (三) 繇大名歷鄆濟達于南京 「伏見謝克家自元帥府回,恭聞車駕自濟州由金鄉、單父經至南京。」據補。 「南」字原無,靖康要錄卷十六靖康二年四月二十三日引張邦昌箚子
- 狙詐 「狙」原作「徂」,據北盟會編卷二七、漢書卷一〇〇下叙傳改。
- (至)孫靖 繁年要錄卷三九、北盟會編卷一四三作「孫靜」。
- 중 同上一疏言 「天下將有仗大義,問相公之罪者」語並出范如圭貽秦檜書,見繫年要錄卷一二三、北盟會編卷 一八七。 按所載疏言係本書綜合諸人及范如圭單獨上疏改寫, 見中興聖政卷二四;其中
- (七) 王勝 原作「魏勝」,據本書卷二九高宗紀、中興聖政卷二六改。
- **元** 張波戰勝於長安 安城下敗之。」此作「張浚」誤。 按中興聖政卷二六云:「永興軍路經略副使王俊遣統領官辛鎮與金兵戰于長
- 8 へたし 僧宗杲 周執羔 原作「周執高」,據繁年要錄卷一四八、宋史全文卷二一改。 原作「僧宗果」,據繫年要錄卷一四〇、一四九及宋史全文卷二一改。

12

何若 原作「何溥」,據本書卷三〇高宗紀、宋史全文卷二一及繫年要錄卷一五二改。

 \subseteq 反歸罪正議 「議」原作「義」,據繫年要錄卷一五五、朱文公集卷九五下、中興小紀卷三二改。

檜問胡寧曰外議如何寧曰以爲公相必不襲蔡京之迹 「寧」原作「寅」,「不」字原脫。據繫年要錄

您 一五七、宋史全文卷二一及中興小紀卷三三改補。

品 自今有奏獄空者 「空」字原脫,據緊無要錄卷一五九及宋史全文卷二一補。

廿露瑞芝之類 「之」字原脫,據同上二書同卷補。

合 鄭煒 原作「鄭瑋」,據繁年要錄卷一六一、十朝綱要卷二四、中興兩朝聖政日錄任相門改。

宝 袁敏求 原作「索敏求」,據緊年要錄卷一六三及中興小紀卷三五改。

줐 楊炬 原作「王炬」,據孫觀鴻慶居士集卷四一楊元光墓表及繁年要錄卷一六六改。

焞 原作「煒」,據繁年要錄卷一六六、宋史全文卷二二改。

E 「權」字原脫,據緊年要錄卷一六九及宋史全文卷二二補。

米史卷四百七十四

列傳第二百三十三

姦臣四

万俟离 韓侂胄 丁大全 賈似道

辭,希秦膾意,譖飛于朝。留爲監察御史,擢右正言。 官,改提點湖北刑獄。岳飛宣撫荆湖,遇禼不以禮,禼憾之。禼入覲,調湖南轉運判官,陛 以便宜檄禼權沅州事。」成奄至城下,禼召土豪、集丁壯以守,成食盡乃退。除湖北轉運判 樞密院編修官、尙書比部員外郞。紹興初,盜曹成掠荆湖間,禼時避亂沅、湘,帥臣程昌萬 万俟禼字元忠,開封陽武縣人。登政和二年上舍第。 調相州、潁昌府教授,歷太學錄、

子女玉帛,已極其欲,盍示以逗遛之罰,敗亡之誅,不用命之戮,使知所懼 時憎謀收諸將兵權,萬力助之,言諸大將起行伍,知利不知義,畏死不畏法,高官大職,

列傳第二百三十三 姦臣四

置使還飛軍,獄不成,又誣以淮西逗遛之事。飛父子與憲俱死,天下寃之。 鑄明其無辜。 李光鼓倡,孫近朋比,二人皆被竄謫。 **竄死建州。** ·輔、寺丞李若樸、何彥猷言飛無罪,禼劾之;知宗正寺士優請以百口保飛,禼又劾之, 身不復。 張 俊 歸自 參政范同爲檜所引,或自奏事,檜忌之,离劾罷, 劉洪道與飛有舊,离劾其足恭媚飛,聞飛罷宣撫,抵掌流涕。於是洪道抵罪,終 ||楚州, |檜怒,以离代治,遂誣飛與其子|**雲致書張|**憲令虚申警報以動朝廷,及令|憲措 與檜合謀擠飛,令萬劾飛對將佐言山陽不可守。 再論同罪,謫居筠州。 命中丞何鑄治飛獄 大理卿薛仁 又爲檜劾

貯御前激賞庫,不許他用,蓄積稍實,可備緩急。 制,至擬五 知宋唐卿副之, 和議 成,离請詔戶部會計用兵之時與通和之後所費各幾何,若減於前日,乞以羨財別 一風樓。 | 离請與||唐卿同班上殿奏事,其無恥如此。 會吳秉信自長沙還朝,奏浚宅不過衆人,常產 梓宮還,以禼爲欖宮按行使,內侍省副 張浚寓居長沙,禼妄劾浚卜宅踰 可辦,浚乃得免。 都

事退, 楊愿封還詞頭,遂罷去,尋謫居歸州。 怒,自是不交一語。 除參 **檜坐殿廬中批上旨,輒除所厚者官,吏鈴紙尾進,离曰:**「不聞聖語。」卻不視。 知政事,充金國報謝使。使還,恰假金人譽已數千言,囑禹以聞,离難之。 言官李文會、詹大方交章劾禹,禼遂求去。帝命出守,檜愈怒。給事中 遇赦,量移沅州。 他 檜大 日

實,上之。 金 人未 [意四百八十七卷,書進,授金紫光祿 有釁,而浚所奏乃若禍在年歲間,浚坐寬 五年,召還,除參知政事,尋拜尚書右僕射、同中書門下平章事。 張浚以||离與沈該居相位不厭天下望,上書言其專欲受命於||金。 謫 禼提舉刊修貢舉敕令格式五十卷、 纂次太后回鑾事 禼 見書大怒,以

將 反 |檜所爲,首召离還。 禼 始 附檜,爲言官,所言多出檜意; 离主和固位,無異於膾,士論 及登政府,不能受鉗制,遂忤檜去。 益薄之。 檜死,帝親政,

大夫,致仕。

卒,年七十五,諡忠靖。

看詳法

使(二)。 韓侂胄字節夫,魏忠獻王琦曾孫也。 侂胄以父任入官, 歷閤門祗侯、宣贊舍人、帶御器械。 父誠,娶高宗憲聖慈烈皇后 淳熙 末,以汝州 女弟,仕至寶寧軍承 防禦使 知

閣 門 事 宣

虎胄, 門,不 福宮 孝宗 獲命, 侂胄 而 侂 崩, 馳 彷徨 胄 白 光宗以疾不能執喪,中外洶 雅善慈福 1汝愚。 欲 退,遇重華宮提 日 內侍張宗 已向 夕, 尹 汝愚 舉關禮問 汝愚 **亟命殿帥郭杲以所部兵夜分衞** 洶, 乃使侂胄介宗尹以其議密啓太后。 故,入白憲聖,言甚 趙汝愚議定策 立 皇子嘉王。 一懇切,憲聖 南北內。 可其 時憲聖太后 議。 侂胄 翌日, 禮 兩 居慈 憲聖 以 至宮 告

列

傳

第

太后卽喪次垂簾,宰臣傳旨,命嘉王卽皇帝位。

傳導 儒,戲於上前,熹遂去。彭龜年請留熹而逐侂胄。 以爲意。 提舉佑 則當推賞。」乃加郭杲節鉞,而侂胄但遷宜州觀察使兼樞密都承旨。 韶旨,浸見親幸,時時乘間竊弄威福。 神觀。 右正言黃度欲劾侂胄,謀泄,斥去。 既立,侂胄欲推定策恩,汝愚曰:「吾宗臣也, 自是,侂胄益用事,而以抑賞故,怨汝愚日深。 朱熹白汝愚當用厚賞酬其勞而疎遠之,汝愚不 朱熹奏其姦, 侂胄怒, 使優人峨冠闊袖象大 未幾,龜年與郡; 汝外戚也, 何可以言功? 佐胄進保寧軍承宣使, 侂胄始觖望, 惟爪牙之

放弗 御 出 史,而 是 也。」 得 |雪川 矣。」侂胄愕然,因問計,敬曰:「惟有用臺諫爾。」侂胄問:「若何而可。」」敬曰:「御筆批 與 用劉三傑代之。 侂胄悟,即以內批除所知劉德秀爲監察御史,楊大法爲殿中侍御史,罷吳獵監察 聞,內懷不平,至是,謂侂胄曰:「趙相欲專大功,君豈惟不得節度,將恐不免嶺海 劉敬者,曩與侂胄同知閤門事,頗以知書自負。方議內禪時,汝愚獨與侂胄計 於是言路皆侂胄之黨,汝愚之迹始危。

韶 相 引 李沐 侂 胄 始,侂胄之見汝愚,徐誼實薦之,汝愚旣斥,遂倂逐誼。 為右 欲 逐 正言。 汝愚而難其名,謀於京鐘,鐘曰:「彼宗姓,誣以謀危社稷可也。」慶元元年,庇 沐嘗 有求於汝愚不獲,卽奏汝愚以同姓居相位,將不利 朱熹、彭龜年、黃度、李祥、楊 於社稷。 汝愚

簡 呂祖 儉等以攻侂胄得罪, 太學生楊宏中、 張衢、徐範、蔣傅、林仲麟、周端朝等又以上書

論侂胄編置,朝土以言侂胄遭責者數十人。

暴薨。 王沈 偽黨 遜, 迎 侍 兵 鄭倪 部 合侂胄意 且及徐誼 今變 侍 、林采皆以 獻言令省部籍記 用 郎。 思列 何澹 留 而 侂 正 而爲逆黨。 舊 疏 胃拜保寧軍節度使、提舉佑 未至,亟除沈繼 胡紘爲言官。 以攻偽學爲言,然憚淸議,不欲顯斥熹。 論 在都堂衆辱侂胄,至是,劉 文爲學久居言路, 汝愚 偽學,思不從, 侂胄乃擢 翥執 協論永州 **偽學姓名**, 侂胄 。濟言爲學宜加 大喜,即 祖臺祭。 誼 謫 姚愈請降韶嚴僞學之禁,二人皆得遷官。 南安軍 而 張釜、 日除 繼加 神觀。又設偽學之目,以網括汝愚、朱熹門下知名之 三傑爲右正 一德秀論 張嚴、程松率由 誣熹十罪,落職罷 風 慮他日汝愚復用,密論衡守錢鍪圖之,汝愚 (厲,或指汝愚爲僞學罪首; 紘條奏汝愚 政而 正 **死思官。** 引用 言,而坐僞 侂胄意未快,以陳賈嘗攻熹, 偽黨,正坐罷斥。 此 秉政。 侂胄 祠。 學逆黨得罪者 加開府儀同三司。 三年,劉三傑入對, 施 吏部尚書葉翥 康 五 年、 十有 時臺 有 言前 召 九人。 除 抵 + 買 諫 要 衡 日

璉 大 告 理鞫之,范仲 1汝愚定策時 四年, 侂胄 瘞 拜 有異謀,具其 少傅 力爭 (E), 乃 止。其年遷 賓 封 客所 豫 國公。 言 少師 七十 有蔡璉者嘗得罪, 紙。 (日),封平 侂胄 欲 原郡王。 逮 彭 汝愚執而 龜 年、 六年,進太傅。 曾 三聘、徐誼 黥之。 五 婺州 年,侂胄使 沈 布衣呂 有 開 F

朱熹職名,留正、周必大亦復秩還政,徐誼等皆先後復官。僞黨之禁寖解。 死,侂胄亦稍厭前事,張孝伯以爲不弛黨禁,後恐不免報復之禍。 侂胄以爲然,追復汝愚 意,劾必大首植僞黨,降爲少保。 祖泰上書言道學不可禁,請誅侂胄,以周必大爲相。 一時善類悉罹黨禍,雖本侂胄意,而謀實始京鐘。 侂胄大怒, 决杖流敛州。 言者希侂胄

欲爲,宰執惕息不敢爲異,自強至印空名敕箚授之,惟所欲用,三省不預知也。 每月舉論二三常事而已,謂之月課。 而 有困於久斥,損晚節以規榮進者矣。若陳自強則以侂胄童子師,自選人不數年致位宰相 不許,允中放罷。時候胄以勢利蠱士大夫之心,薛叔似、辛棄疾、陳謙皆起廢顯用,當時固 蘇師旦、周筠又侂胄廝役也,亦皆預聞國政,超取顯仕。 三年,拜太師。 監惠民局夏允中上書,請侂胄平章國政,侂胄繆爲辭謝,乞致其仕,詔 羣小阿附,勢焰熏灼。 言路阨塞, 侂胄凡所

傅伯成言兵不可動,抵罪;至是,武學生華岳叩閽乞斬侂胄、蘇師旦、周筠以謝天下,諫議 進士毛自知廷對,言當乘機以定中原,侂胄大悅。 見,言敵國必亂必亡,願屬元老大臣預爲應變計,鄭挺、鄧友龍等又附和其言。 識者多言曦不可,主西師必叛, 侂胄不省。 安豐守属仲方言淮北流民願歸附, 會辛棄疾入 或勸侂胄立蓋世功名以自固者,於是恢復之議興。以殿前都指揮使吳曦爲興州都統, 詔中外諸將密爲行軍之計。先是,楊輔 開禧改元,

大夫李大異亦論止開邊。 岳下大理劾罪編置,大異斥去。

呢蘇師旦爲腹心,除師旦安遠軍節度使。 李壁時在太常,論定典禮,三日一朝, 援故事乞命侂胄兼領平章, 臺諫鄧友龍等繼以爲請, 因至都堂,序班丞相之上,三省印並納其第。 自置機速房於私第,甚者假作御筆,升黜將帥,事 侂胄除平章軍 國事。 |佐|

關機要,未嘗奏稟,人莫敢言。

制許 副之。 景俊、太學博士錢廷玉皆起而言恢復之計矣。 進復新息縣,光州孫成復褒信縣。 二年(5),以薛叔似爲京湖宜諭使;鄧友龍爲兩淮宜諭使;程松爲四川宣撫使,吳曦 徐邦憲自處州召見,以弭兵爲言,忤侂胄意,削二秩。於是左司諫易被、大理少卿 河東招撫使,皇甫斌副之。 時鎭江武鋒軍統制陳孝慶至道復泗州及虹縣,江州統 捷書聞,侂胄乃議降韶趣諸將進兵。 韶侂胄日一朝。 友龍、叔似並升宣撫 使。 陳

師旦 執統制田 贊侂胄斥 所 未幾,皇甫斌兵敗於唐州 誤。 去之。 俊邁以遺敵,乃獲冤。 | 佐胄招李壁飲酒,酒酣,語及師旦,屋微摘其過, 佐胄以爲然。 翌日, 師旦謫韶州,斬郭倬於京口,流李汝翼、王大節、李爽于嶺南 秦世輔至城固軍潰;郭倬、李汝翼敗於宿州,敵追 事聞,鄧友龍罷,以丘崈代爲宣撫使。 侂胄旣喪師,始覺爲 壁乃悉數其罪 圍倬,倬

而金人渡淮,攻廬、和、眞、揚,取安豐、濠,又攻襄陽,至棗陽,乃以丘崈僉書樞密院 列 傳 第 百 = + Ξ 姦 臣 74

師 日 鄧 視 友 江 龍、 |淮 皇 軍 馬。 甫 斌 侂胄翰家財二十萬以助軍 所爲,非朝廷意。 金 人答書辭甚 ,而諭丘崈募人持書幣赴 倨, 且多所要索,謂 侂 敵營,謂用兵 胄 無意 用兵, 乃蘇 師

日

等安得

專。

又遣

江、淮制 數千 營伸 胄 信 駭。 大怒 孺 萬, 使 侂 前 北 招 置 而 和 撫 成 一使,復 縛 議 派使 郭倪 遺 和 且 送首 遂 曦書, 謂 以以 |密 輟 一般意 金 林拱辰 議 興金 人指 用兵之臣。 起辛棄疾爲 許以茅土之封, 用兵 書許還准北日流民及今年歲幣,金人乃有 人戰,敗於六合; 太師平章爲首謀, 爲通謝使。 信孺 樞 密 書未 歸,白 金 都 人欲 承旨。 達 宜 金 事 責 而 **死繫銜**。 人 朝堂,不敢斥言, 八攻蜀, 安丙、 正隆以前 會棄疾死, 楊巨 吳曦 侂胄 禮路, 源已 级, 念, 乃以 受金 一率義 密坐 侂胄窮其說, 以侵疆 殿前 許 士誅 命稱 意 靇。 副 爲 都指揮使公趙淳為 | 曦矣。 蜀王。 界, 乃微 且 狀聞 索犒 密乞移 侂 胄 及 之。 舉 軍 連 書文館 銀 造 朝 |侂 方 FL.

事 啓 亦 中 兵端 從 外 可 中 憂 自 懼 力請 兵 右丞相。 使南 興 辽 禮 北 乃得密旨 來, 部 生 侍 |蜀 日下出國門。」仍令權主管殿前 靈 郞 口、漢、淮之民死於兵戈者,不可勝計,公私之力大屈, 枉 史 罹 爾遠 彌遠 凶 害 辽 時 可罷 告參 兼 資 平 〈善堂 知 章 政 軍 事 翊 或 錢 善,謀誅 事, 象祖 司 與 公事夏震以兵三百防護。 |李屋。 (佐胄, 在 外宮觀 議甚祕, 御筆云:「韓侂胄 陳自強 皇子 |榮||王 別 而侂 附 入 充位 久 青意 象祖欲奏審 奏, 任 或 獝 楊皇后 不 柄, 未已, 恤 國 輕

易祓撰答詔,

余嘉

郡國夫

至是,

盡擊謀侂胄者。

侂胄娶憲聖 吳皇后姪女,無子,取魯賦子爲後,名以,旣誅侂胄,削籍流沙門島云。

牒驅 位。 接待寺,罷相之命下矣。自是志氣驕傲,道路以目。 鹽所檢閱江州分司,復兼樞密院編修官。 史嚴之俟衆賓退, 升侍御 ; 迫之出,給令興槐至大理寺,欲以此恐之。 事內侍盧允昇、董宋臣。 丁大全字子萬, 史兼侍讀。 獨留大全,款曲甚至,期以他日必大用。 鎭江人。 劾奏丞相<u></u> 董槐,章未下,大全夜半調隅兵百餘 累官爲大理司直、添差通判饒州。 面藍色。 嘉熙二年舉進士, 拜右正言兼侍講,辭。 須臾,出北關,棄槐, 調蕭山尉。 大全爲戚里婢壻, 改右司諫,拜殿中侍御史, 入爲太府寺簿, 人,露 嘂呼而散。 上謁帥 辺圍 閫, 寅緣以取 |槐第,以臺 槐徐步入 調尙書茶 安撫使

江 · 例、吳衍爲大全鷹犬,鈐制學校,貶逐宗等。 太學生陳宗、 知 制 政 置 事。 尋爲右諫議大夫,進端明殿學士、愈書樞密院事,封丹陽郡侯,進同知 副 使, 寶祐六年,拜參 劉黻) 介 且刻, 黃鏞、曾唯(10)、陳宜中、 知政 逮繫漁湖土豪,督促輸錢甚急。 事。 四月, 拜右丞相 林則祖等六人,伏闕上書訟大全。臺臣翁應 棄樞密使,進封公。 土豪怒, 盡以魚舟濟北來之兵。 初,大全以袁玠爲九 樞密院 事 · 兼權

間, 爲子壽翁聘婦,見其豔,自取爲妻,爲世所醜。 水而死。 卿 罪:絕言路,壞人才,竭民力,誤邊防。 假陛下之刑威以箝天下之口,挾陛下之爵祿以籠天下之財。」監察御史饒虎臣又論大全四 侍御史沈炎、右正言曹永年相繼論罷。 「乞遠竄使不失刑」。詔送南康軍居住。 **棄權直舍人院劉震孫繳奏乞移徙海島。** 翁明愬大全陰造弓矢, 將通蠻爲不軌。 明年,監察御史劉應龍請加竄,追削兩官,移竄貴州團練使。 賈似道字師憲,合州人,制置使涉之子也。少落魄,爲游博,不事操行。 大全知淮西,總領鄭羽富甲吳門,始欲結婣,羽不從。 第二百三十三 姦 臣 25 臺臣復以爲言,追三官,移送南安軍居住 再削其官。景定元年,詔守中奉大夫致仕。 監察御史朱貔孫復論:「大全姦回險狡,狠毒貪殘, 四年正月,將官畢遷護送,舟過藤州印,擠之於 朱禩孫以聞于朝。又明年,移置新州。 遂令臺臣卓夢卿彈之,籍其家。 與州守游翁明失色杯酒 三七七九 以父蔭補嘉興

太常少

臣僚言

穿窬之行,引用凶惡,陷害忠良,遏塞言路,濁亂朝綱。乞追官遠竄,以伸國法,以謝天下。

開慶元年九月,罷相,以觀文殿大學士判鎭江府。中書舍人洪芹繳言:「大全鬼蜮之資,

燈 丞、軍器監。 司 倉。 火異常時,語左右曰:「此必似道也。」明日詢之果然,使京尹史嚴之戒敕之。 少年氣習,然其材可大用也。」尋出知禮州 會其姊入宮, 益恃寵不檢,日縱游諸妓家,至夜卽燕游湖上不反。 有寵於理宗, 爲貴妃, 遂詔赴廷對,妃於內中奉湯藥以給之。 理宗嘗夜憑高,望 巖之曰:「似 西湖 擢太常 中

道

雖

有

有 去。 餘。 行。 知 知 樞 江 |槐終不敢遣子秀,以似道所善陸壑代之,其見憚已如此。 密 寶祐 孫子 九 州 淳 院事。 陆 年, 霏 秀新除准東 江 二年,加同 元 加寶文閣學士、京湖安撫制置大使。 西路安撫使。 年,改湖廣總領。三年,加戶部侍郞。 六年,改兩准宣 .知樞密院事、臨海郡開國公,威權 總領,外人忽傳似道已密奏不可矣,丞相董槐懼,留身請之,帝以爲 一歲中, 撫大使。 再遷京湖制置使兼 十年,以端明殿學士移鎭兩淮, 五年,以寶章閣直學士爲沿江制置副使、 日盛。 知江陵府, 臺諫嘗論其二部將,即毅 四年,加參知政事。 調度賞罰, 得以 年始三十 五年,加 便宜施 然然求 無

也? | 殽 囪 自 | 塗縱: 端 絕 平初, 河 攻 津,取中原 |淮 漢, 孟 珙 自是 帥 地 師會大元兵共滅金,約以陳、蔡爲界。 兵端大啓。 大元兵擊敗之,范僅以數千人遁歸。 師未還而用趙范謀, 追兵至,問曰:「何爲 發兵據 而 敗盟

開慶初, 憲宗皇帝自將征蜀,世祖皇帝時以皇弟攻鄂州,元帥兀良哈鱘由雲南人交阯, 列傳第二百三十三 姦臣四

鄂, 月,兵至,傑作浮梁新生磯,濟師北歸。 戰。 肅淸聞。 軍中請稱臣,輸歲幣,不從。 自 邕州 漢陽,援鄂,卽軍 似道 似道 **蹂廣西,破湖南,傳檄數宋背盟之罪。** 再遣京議歲幣,遂許之。 帝以其有再造功,以少傅、右丞相召入朝,百官郊勞如文彥博故事 時自漢陽入督 中拜右丞 師。 相。 十一月,攻城急,城中死傷者至萬三千人。似道乃密遣宋京 會憲宗皇帝晏駕于釣魚山, 大元兵拔砦而北,留張傑、閻旺以偏 十月, 似道用劉整計,攻斷浮梁,殺殿兵百七十,遂上 |鄂東南陬破,宋人再築,再破之,賴高達 理宗大懼,乃以趙葵軍信州,禦廣兵; 合州守王堅使阮思聰踔急 師候湖南 兵。 率 明年正 以 流 誻 似 將 走 報

白似道 其門。呂文德諂似道,即使人呵曰:「宣撫在,何敢爾邪!」曹世雄、向士璧 易似道,每見其督戰, |全、衡、泳、||桂皆破,大稱旨。乃議立<u>||孟</u>啓,貶||潛個州,盡逐其黨人。||高達在圍中,恃其武勇,殊 榮王子孟啓爲太子,潛又不可。 閫。黃雖下流,實兵衝。

似道以爲潛欲殺己,銜之。 帝知其有功,不從。 初,似道在漢陽,時丞相吳潛用監察御史饒應子言,移之黃州,而分曹世雄等兵以屬 ,故似道皆恨之。 尋論功,以文德爲第一,而達居其次。 卽戲之曰:「巍巾者何能爲哉! 以覈諸兵費,世雄 帝已積怒潛,似道遂陳建儲之策,令沈炎劾潛措置無方, 、士璧皆坐侵盜官錢貶遠州 且聞潛事急時,每事先發後奏,帝欲 」每戰,必須勞始出,否即使兵士譁 在軍 每言於帝欲誅達, 中,事皆 不關 致

似道方使廖瑩中輩撰福華編稱頌鄂功, 明 ,大元世祖皇帝登極,遣翰林侍讀學士、國信使郝經等持書申好息兵, 通國皆不知所謂和也。 似道乃密令淮東制置司拘 且徵歲幣。

經等於眞州 忠勇軍營。

通 顯。又用外戚子弟爲監司、郡守。作芙蓉閣、香蘭亭宮中, 時理宗在位 · 一久,內侍董宋臣、盧允昇爲之聚斂以媚之。 引薦奔競之士,交通賄賂,置諸 進倡優傀儡,

身。 韶 敢干朝政。 不便,民間愁怨所致。 月,彗出柳,光燭天,長數十丈,自四更見東方, 界會之三,自製其印文如「賈」字狀行之,十七界廢不用。 六郡之民,破家者多。 田多爲功,皆繆以七八斗爲石。 竊弄權柄。臺臣有言之者,帝宣諭去之,謂之「節貼」。 和 似道 糴, 吏又恣爲操切,浙中大擾。 浙 入,逐盧、董所薦林光世等,悉罷之,勒外戚不得爲監司、郡守, 西田畝有直千緡者, 由是權 傾中外,進用羣小。 包恢知平江,督買田,至以肉刑從事。 似道上書力辯之,且乞罷政。 似道均以四十緡買之。 其後,田少與磽瘠、虧租與佃人負租而逃者,率取 有奉行不至者,提領劉良貴劾之。 取先朝舊法, 率意紛更, 日高始滅。 帝勉留之曰:「公田不可行, 數稍多,予銀絹 銀關行,物價 臺諫、 復以楮賤作銀關,以一準十八 增吏部 布韋皆上書, 有司爭相 益 七司法。 子弟門客斂跡, 頭,楮の ; 又多, 以奉帝爲遊燕。 迎 益 合,務以買 予度牒告 賤。 買公田以 卿建議之 言此 償田主。 公田 秋七

始,朕已沮之矣。今公私兼裕,一歲軍餉,皆仰於此。 如國計何 後又行推排法。江南之地,尺寸皆有稅,而民力弊矣。 ·」有太學生蕭規、葉李等上書,言似道專政。命京尹劉良貴捃摭以罪,悉黥配 使因人言而罷之,雖足以快一時之議

以經筵拜太師,以典故須建節,授鎭東軍節度使,似道怒曰:「節度使粗人之極致爾!」遂 旨留之者日四五至,中使加賜賚者日十數至,夜卽交臥第外以守之。除太師、平章軍國重 節理,以示不屈。至是,人皆駭歎。然下沱之報實無兵也。三年,又乞歸養。大臣、侍從傳 命出節,都人聚觀。節已出,復曰:「時日不利。」亟命返之。|宋制:節出,有撤關壞屋,無 大小朝政,一切决於館客廖瑩中、堂吏翁應龍,宰執充位署紙尾而已。 事,一月三赴經筵,三日一朝,赴中書堂治事。賜第葛嶺,使迎養其中。 理宗,即棄官去,使呂文德報北兵攻下沱急,朝中大駭,帝與太后手爲詔起之。似道至,欲 理宗崩,度宗又其所立,每朝必答拜,稱之曰「師臣」而不名,朝臣皆稱爲「周公」。甫葬 吏抱文書就第署, 倒

輩爭獻寶玉,陳奕至以兄事似道之玉工陳振民以求進,一時貪風大肆。五年,復稱疾求去。 |祥、陳文龍、陸達、杜淵、張仲微、謝章輩,小忤意輒斥,重則屛棄之,終身不錄。 一時正人端 士,爲似道破壞殆盡。 似道雖深居,凡臺諫彈劾、諸司薦辟及京尹、畿漕一切事,不關白不敢行。 吏爭納賂求美職,其求爲帥閩、監司、郡守者,貢獻不可勝計。 李芾、文天 趙溍

列

送之出

殿

延始

坐。

繼又令十日一入朝

帝 泣涕留之, 不從, ,

令

六

日

一

朝

,

一

月

兩 赴經筵。 六年,命入朝不拜。 朝退,帝必起避席、

胡貴 紿 中。 惟 罷 累月不 政。」即 登玩。 故 …「平章已允乘逍遙輦矣。」帝遂 博 魔之父(IE) 顯祖為帶御器械,請如開禧故事,卻輅,乘逍遙輦還宮,帝曰 嘗 時 徒 襄 朝,帝如景靈宮亦不從駕。八年,明堂禮成,祀景靈宮。 與羣妾踞 日出 陽 日 聞余所有玉帶,求之,已徇葬矣,發其塚取之。 至縱: 圍已急, 嘉 (會門,帝留之不得,乃罷 地鬥蟋蟀,所狎客入,戲之曰:「此軍國 博,人無敢窺其第者。 似道 日坐葛嶺,起樓閣亭樹,取宮人娼尼有美色者爲妾,日淫樂其中。 歸。 其妾有兄來,立府門,若將入者,似道 似道 顯祖,涕泣 大怒曰:「臣爲大禮 一出貴嬪爲尼,始還。 重事 人有物,求不予,輒得罪。 邪?」酷嗜寶玩, 天大雨,似道 使,陛 下舉動 期帝 平章云云, 顯祖 見之,縛投火 建多寶閣, 不得預聞,乞 雨 自是,或 ıĿ 开輅。

寬 科 場恩 似 道 例,以 旣 專恣日甚,畏人議己,務以權 小 利 陷之。 由是言路斷絕,威福 術駕 馭,不 肆行 愛官爵,牢籠一時名士,又加太學餐錢,

以運 事 公 天下爲得。乃就中書置機速房以調邊事。 自 卵 重 雜 襄 陽 議。 以來, 監察御史陳堅等以爲師臣 每上 書請 行邊,而陰使臺諫 田 顧襄 時物議多言高達可援襄陽者,監察御史李旺 上章留己。 未 必能及准,顧准 呂文煥以急告,似道 未必能 及襄,不若居中 復申請之,

吾以 文焕 率朝 當不至此爾。」 不知朝中實無援襄事也。)捷聞,則達必不成遣矣。」文煥大以爲然。 時寢兵出,獲哨騎數人, 在襄,聞達且入援,亦不樂,以語其客。客曰:「易耳,今朝廷以襄陽急, ;士入言於<u>似道。似道曰:「吾用達,如呂氏何?」旺等出,歎曰:「呂氏安則趙氏</u>危矣。」 襄陽降,似道曰:「臣始屢請行邊,先帝皆不之許,向使早聽臣出, 即繆以大捷奏,然 故遣達援之,

十月,其母胡氏薨,詔以天子鹵簿葬之,起墳擬山陵,百官奉襄事,立大雨中,終日無敢

易位。

尋起復入朝。

少軍軍魯港。二月庚申夜,虎臣以失利報, 曆三百二十年。」似道俛首而已。時一軍七萬餘人,盡屬孫虎臣,軍丁家洲。似道與夏貴以 如軍中,請輸歲幣稱臣如開慶約,不從。夏貴自合肥以師來會,袖中出編書示似道曰:「宋 不能動,乃易他舟而去。至蕪湖,遣還軍中所俘曾安撫,以荔子、黃甘遺丞相伯顏,俾宋京 行,金帛輜重之舟,舳艫相衡百餘里。至安吉,似道所乘舟膠堰中,劉師勇以千人入水曳之 然憚劉整,不行。 頃之,虎臣至,撫膺而泣曰:「吾兵無一人用命也。」貴微笑曰:「吾嘗血戰當之矣。」似道 度宗崩。大兵破鄂,太學諸生亦羣言非師臣親出不可。 明年正月,整死,似道欣然曰:「吾得天助也。」乃上表出師,抽諸路精兵以 似道倉皇出,呼曰:「虎臣敗矣!」命召貴與計 似道不得已,始開都督府臨安,

死守淮 岸揚 旗招之,皆不至,有爲惡語慢駡之者。乃檄列郡如海上迎駕,上書請遷都,列郡守於是 將 西 安出 爾 。」遂解舟去。 」貴曰:「諸軍已膽落,吾何以戰?公惟入楊州,招潰兵, 似道亦與虎臣以單舸奔揚州 明日,敗兵蔽江而下,似道使人登 迎駕海上,吾特以

遁

遂入揚州

從。 幕官 移 方應 至, 幾 五 平 似道 疏, 月,王爚論似道旣不死忠,又不死孝,太皇太后乃詔似道歸終喪。七月,黃鏞、王應麟請 必發權 建寧 四月, 侍御史陳文龍乞俯從衆言,陳景行、徐直方、孫嶸叟及監察御史俞浙倂上疏,於是始謫 率衆爲露 **翁**應龍, 、都督,予祠官。 陳宜 陛下皆抑而不行,非惟付人言於不恤,何以謝天下! 鄰州,不從。 直 中 乃名儒朱熹故里,雖三尺童子粗 高斯得乞誅 舍 請誅似道,謝太后曰:「似道勤勞三朝,安忍以一朝之罪,失待大臣之禮。」上罷 廖瑩中、王庭皆自殺。 布逐之。 人院,封還錄黃,乞竄似道 。三月,除似道諸不恤民之政,放還諸竄謫人,復吳潛、向士璧等官,誅其 王爚 似道,不從。 監察御 入見太后曰:「本朝權臣稔禍,未有如似道之烈者。 史孫嶸叟等皆以爲罰輕, 而似道亦自上表乞保全,乃命削三官,然尙居揚不歸。 潘文卿、季可、陳堅、徐卿孫皆似道鷹犬,至是交章劾)廣南; |知向方,聞似道來嘔惡,况見其人! |時國子司業 中書舍人王應麟、給 !」始徙似道 言之不已。 事中黃鏞亦言之,皆不 又徙 建寧府。 **婺人開似道** 縉紳草茅不 翁合奏 將 知

似道爲高州團練使,循州安置,籍其冢。

時,侍妾尚數十人,虎臣悉屛去,奪其寶玉,徹轎蓋,暴行秋日中, 遣鞫問,未至。 即死。」虎臣曰:「吾爲天下殺似道,雖死何憾?」拉殺之。 丞相何以至此?」似道慚不能對。 每名斥似道,辱之備至。 福王 與芮素恨似道, 八月,似道至潭州木綿菴,虎臣 似道至古寺中,壁有吳潛南行所題字,虎臣呼似道曰:「賈團練,吳 募有能殺似道者使送之貶所, <u>嵊叟、應麟奏似道家畜乘興服御物,有反狀,乞斬之。</u> [屢諷之自殺,不聽,曰:「太皇許我不死,有詔 有縣尉鄭虎臣欣然請行。 令舁轎夫唱杭州歌謔之, 似道行

校勘記

1〕寶寧軍承宣使 按本書地理志無「寶寧軍」,疑此有誤。

 Ξ 少傅 原作「少保」,據本書卷三七寧宗紀 、兩朝綱! 目卷 五 改。

范仲藝 原作「張仲藝」,據兩朝綱目卷五、宋史全文卷二九上改。

少師 原作「太保」,據本書卷三七寧宗紀、宋會要職官一之七改。

三 原作「四年」,據本書卷三八寧宗紀 、兩朝綱目卷 九 改。

陳孝 慶 原作「陳孝廣」,據本書卷三八寧宗紀、卷四五五華岳傳、兩朝 綱 目卷九改。

列

傳

第

二百

三十

Ξ

校勘記

(七) 淮北 原作「河北」, 據兩朝綱目卷九、 續宋編年通鑑卷一三,幷參照上文「淮北流民願歸附」

語改。

2 殿前副都指揮使 原脫「副」字,據本書卷三八寧宗紀、兩朝綱目卷一〇補。

(九) 今日大坡上殿 「大坡」原作「大成」。按葉夢得石林燕語卷五、洪邁容齋四筆卷一五,「大坡」是

8 黃鏞曾唯 宋人對諫議大夫的俗稱,此處乃指林行可而言。兩朝綱目卷一〇、慶元黨禁都作「大坡」,據改。 原脫「鏞曾」二字,據本書卷四一八陳宜中傳、宋季三朝政要卷二補。

藤州 原作「滕州」,據本書卷四五理宗紀、宋季三朝政要卷三改。

胡貴嬪之父 按宋季三朝政要卷四作「胡貴嬪之兄」。

米史卷四百七十五

列傳第二百三十四

叛臣上

張邦昌 劉豫 苗傳 劉正彦附 杜充 吳曦

時。 大義昭明,旋踵殄滅,蓋天道也。 人,先無仁心,視背君親猶反掌耳。 高宗南渡,國勢弗振,悍僕狂奴,欺主衰敗,易動於惡。 宋失其政,金人乘之,俘其人民,遷其實器,效遼故事,立其臣爲君, 扶綱常,遏亂略,作叛臣傳。 世將之子使握重兵,居之阨塞之地,豈非召亂之道乎? 兵雖凶器, 尤忌殘忍, 將用忍 冠屨易位, 莫甚斯

張邦昌 列 傳 字子能,永靜軍 第 = 百 \equiv -|-匹 東光人也。 叛 臣 上 舉進士,累官大司成, 以訓導: 失職, 一三七八九 貶提舉崇福宮,

知光、 物,從之。 汝二州。 宣 和元 政和末, 一年,除尙書右丞,轉左丞,遷中書侍郎。 , 由 知洪州改禮部侍郞。 首請取崇寧、大觀以來瑞應尤殊者增製旗 飲宗卽位 一,拜少宰。

斡 王以行,仍命|邦昌爲河北路割地使。 離 不怒責邦昌,邦昌對以非出朝廷意。 金 犯京師, 朝廷議割三鎭,俾康王及邦昌爲質于金以求成。 俄進太宰兼門下侍郎。 既而康王還,金人復質肅 會姚平仲夜斫金人營,

墾書付 文殿 大學士、中太一宮使,罷割地議。 初 河北,亦不 邦昌力主 許。 和議,不意身自爲質,及行,乃要飲宗署御批無變割地議,不許,又請以 時粘罕兵又來侵,上書者攻邦昌私敵,社稷之賊也。 其多,金人陷京師,帝再出郊,留青城。 **逐黜邦昌為觀**

衆問 等不奉命, 久之,計 金人意所主, 明 年 無所出,乃曰:「今日當勉強應命, 春 表請立趙氏。 1,吳升、莫儔 齊愈書「張邦昌」三字示之,遂定議, 自金營持文書來,令推異姓堪爲 金人怒,復遣 肝、懤促之,劫傳等召百官雜議。 舉在 軍前· 者一人。」適尙書員 以邦昌治國 人主者從軍 事 ·前備禮册命。留守孫傅 外郎宋齊愈至自外, 孫傅、 衆莫敢出聲, 張叔夜不署

衆意唯唯。 王 時 雅時爲留 有太學生難之,瓊恐沮衆,厲聲折之,遺歸學舍。 守,再集百 官詣秘書省,至卽閉省門, 以兵環之, 時雍先署狀,以率百官。 俾范瓊諭衆以立 一邦昌, 御史

狀,金人執之置

軍

中。

中丞秦檜不書,抗言請立趙氏宗室,且言邦昌當上皇時,專事讌游,黨附權姦,蠧國亂政,社

傾危實由邦昌。 金人怒,執檜。 升、 傳持狀赴軍 前

耶 位 御牀西受賀,遣閤門傳令勿拜,時雍率百官遽拜,邦昌但東面拱立。 」適金人奉册寶至,邦昌北向拜舞受册,即僞位,僭號大楚,擬都金陵。遂升文德殿,設 |邦昌入居尚書省,金人趣勸進,邦昌始欲引决,或曰:「相公不前死城外,今欲塗炭一城

謀舉義金水門外。 外統制官行之、宣贊舍人吳革恥屈節異姓,首率內親事官數百人,皆先殺其妻孥,焚所 范瓊詐與合謀,令悉棄兵仗,乃從後襲殺百餘人,捕革併其子皆殺

之,又擒斬十餘人。

宜 稱「臣啓陛下」,邦昌斥之;勸邦昌 自 事 爲 推恩四方,以道阻 有佐命功云。 今各遵法 , 呂好問 是 日,風霾,日暈無光。 權領門下省,除秉哲權領中書省。 :度,御史臺覺察以聞。」見百官稱「予」,手詔曰「手書」。獨<u>時</u>雍 即以時雍權 一先赦京城,選郎官爲四方密諭 知樞密院事領尚書省,丹權 百官慘沮,邦昌亦變色。 坐紫宸、垂拱殿,呂好問爭之,乃止。 下令曰:「比緣朝廷多故,百 使。 唯時確、肝、懤、瓊等欣然鼓舞,若以 同知樞密院事, 海言 邦昌 官有司皆失其職。 | 傳權簽書樞密院 以嗣位之初, 事 邦昌 前,輒

|金 人將 列 傳 第 退 師 百 邦昌詣金營祖 = + 깯 叛 臣 別,服 上 析袍、張紅蓋、所過設香案、起居悉如常儀、時確、秉 一三七九

哲、开、 **傳皆從行,士庶觀者無不感愴。** 二帝北遷,邦昌率百官遙辭於南薰門,衆慟哭,有仆

旣 內 獻大宋受命寶,復降手書請元祐皇后垂簾聽政,以俟復辟。書旣下,中外大說。太后始御 權宜一時以舒國難也,敢有他乎?」王詢師愈等,具知所由,乃報書|邦昌。 **祐皇后,請康王早正大位,** 旣 册 曰:「夫騎虎者勢不得下,所宜熟慮,他日噬臍,悔無及已。」徐秉哲從旁贊之,,邦昌弗聽, 東門小殿,垂簾聽政。 而 元祐皇后日宋太后,入御延福宮。 去,能復有今日乎?康王居外久, 邦昌亦至,伏地慟哭請死,王撫慰之。 金 師既還,邦昌降手書赦天下。 |邦昌以太宰退處內東門資善堂。尋遣使奉乘興服御物至南京(三), 庶獲保全。」監察御史馬伸亦請奉迎康王。 衆所歸心,曷不推戴之?」又謂曰:「爲今計者,當迎 遣蔣師愈齎書於康王自陳:「所以勉循金人推戴者,欲 呂好問謂邦昌曰:「人情歸公者劫於金人之威耳,金人 邦昌從之。 邦昌尋遣謝克家 王時 雍

力言:「邦昌已僭逆,豈可留之朝廷,使道路目爲故天子哉?」高宗乃降御批曰:「邦昌僭逆, 人之旣退,方降赦以收恩。是宜肆諸市朝,以爲亂臣賊子之戒。」時黃潛善猶左右之。 與機政,擢冠宰司。 E 即皇帝位,相李綱,徙邦昌太保、奉國軍節度使,封同安郡王。 國破而資之以爲利,君辱而攘之以爲榮。異姓建邦四十餘日〔三〕,逮金 網上皆極論:「邦昌久 |綱 |又

理合誅夷,原其初心,出於迫脅,可特與免貸,責授昭化軍節度副使印,潭州安置。」

罪,賜死潭州,李氏杖脊配車營務。 女陳氏以進。 酒,李氏 邦昌 ·擁之曰:「大家,事已至此,尙何言?」因以赭色半臂加邦昌身,掖入福寧殿,夜飾 僧居內庭,華國端恭夫人李氏數以果實奉邦昌,邦昌亦厚答之。 及邦昌還東府,李氏私送之,語斥乘輿。 時雅、秉哲、肝、傳等先已遠竄,至是,併誅時雍 帝聞,下李氏獄,詞服。 夕, 詔數邦昌 邦昌 養 被

未幾, 年,判國子監,除河北 同舍生白 劉豫字彥游,景州阜城人也。 豫累章言禮制局事,帝曰:「劉俊 [金盂、紗衣。 提刑。 政和 二年, 召拜殿中侍御史,爲言者所擊,帝不欲發其宿醜,詔 世業農,至豫始舉進士,元符中登第。 河北種田叟,安識禮制?」黜豫兩浙祭訪。 豫 少時 無 行,管盜 宣和六 勿問。

遣子|蘇出戰,敵縱兵圍之數重,郡倅|張柬益兵來援,金人乃解去。 忿,遂畜反謀,殺其將關勝,率百姓降金,百姓不從,豫縋城納款。 時盜起山東,豫不 金 人南侵,豫棄官避亂儀眞。 願行,請易東南 一郡,執政惡之,不許,豫忿而去。是多,金人攻濟南, 豫善中書侍郞張慤,建炎二年正月,用慤薦除 因遣人陷豫以利,豫懲前 三年三月,兀朮聞高宗渡 知濟 南府。

列

傳第

江 以麟 乃徙豫 知濟 知 南府, 東平府,充京東西、淮南等路 界舊河以南,俾豫統之。 安撫使, 節制大名開德府 (三)、濮濱博棣德滄等

求僭號。 先是, 義, 年。 王瓊爲汴京留守,子麟 乃命慶裔、防備璽綬寶册以立之。 高宗以王太雅厚孝純, 以張孝純爲丞相 四年七月丁卯,金人遣大同尹高慶裔、知制誥韓昉册豫爲皇帝, 北京順豫門生瑞禾,濟南漁者得鱣,豫以爲己受命之符,遺鱗持重寶路金左監 **達辣許之**, 遣使即 ,李孝揚爲左丞,張柬爲右丞, 爲太中大夫、提領諸路兵馬兼知濟南府。 豫所 俾太招之, 部容軍民所宜 九月戊申, 會點罕遣人自雲中送歸豫,遂失節於賊。 立,衆未及對,豫鄉 豫即僞位, 李儔爲監察御史,鄭億年爲工 赦境內, 孝純始堅守太原,頗懷忠 人張狹越次請立豫,議 國號大齊, 奉金正 一朔,稱天會八 都大名府。 部侍郎 軍

大名, 京 妾錢氏爲皇后。 留守。 **豫還東平,升爲東京。** 乃起四郡丁 復降准寧、潁昌(公)、順昌、興仁府悉爲州。 一錢氏,宣和內人也,習宮掖事,豫欲有所取則,故立之。十一月,改明年元 壯數千人,號「雲從子弟」。下偽詔 改東京爲汴京,降南京爲歸德府。 求直言。 自以 生景州,守濟南,節制東平, 十月,册其母 以弟益爲北京留守, 翟氏爲皇太后 尋改作 僭位

方豫未僭號時,數遣人說東京副留守上官悟,及賂悟左右喬思恭與共說悟令降金,悟

阜昌。

之故 中。 之何。 寵,不至。 並斬 囚之十旬,不屈;欲官之,不受。 國信副使宋汝爲以呂頤浩書勉豫忠義,豫曰:「獨不見張邦昌乎?業已然,尙何言哉! 之。 人也。」立 洪皓久陷于金,粘罕勸皓仕豫,不從,竄皓冷山 又招知楚州趙立, 文林郎李喆、尉氏令姚邦基皆棄官去。 日:「我知有君父,不知有故人。」燒殺偲。 立不發書, 豫大索宋宗室,承務郞閻琦匿之,豫杖死琦。 斬其使。 復遣立友人劉偲以榜旗誘之,且曰「吾君 朝奉 郎趙俊書甲子不書僭年, 博州 處士尹惇聞豫召, 判官 劉長孺以書勸豫反正 逃山谷間 召迪 豫 边郎王 亦 走 無

|滄||州 進士 是月,豫立陳東、歐陽澈 邢希載上豫書乞通宋朝,豫殺希載 廟於歸德 ,如唐張巡、許遠雙廟制

廬州 入寇,王彥、關師古敗之。 下令大索,或轉鬻諸國,或繫送雲中,實防豫也。 左 光世、呂頤浩非中興將相才,後爲 丞 相。 紹興元年五月,張俊討李成敗之,成逃歸豫。 守臣王亨誘斬世冲,大敗其衆。 置招受司于宿州,誘宋逋逃。 偽知海州薛安靖及通 人所訴, 十一月,帥臣葉夢得招降豫將王才。 金人旣立豫,以舊河爲界,恐兩河民之陷沒者逃歸 詔鞫而刑之。 六月, 判李彙以 十月,豫入寇,遣其將王 雄州大僧王友直嘗抵豫書招 州 來 豫以麟爲兵馬大總管、 世冲以蕃、漢兵攻 偽 秦 鳳 李 成 **漁師郭振** 尙書 謂

月, 第 _ 知商州董先以商、號二州叛附于豫。 百 \equiv + 四 叛 臣 上 襄陽鎭撫使桑仲上疏請 IE 豫罪。

延

尋命 之,授仲二子將仕郎 德安陳規、蘄黃孔彥舟、廬壽王亨相爲應援,毋失事機。 韶幷戮其使。 仲兼 節制應援京城 豫乃陰結興麾下楊偉圖之。 河南鎮撫使翟興 軍馬,量度事勢,復豫所陷郡。仍命 屯伊陽山, 偉殺興,持興首降豫 豫患之, 使人招興, 三月,仲爲其將霍明 河南 翟 興、 荆 許以王爵。 南 解潛、金房王彦、 所 高宗闻 興焚傷

赦,不用宦官,不度僧道。 十餘萬爲皇子府十三軍。 親巡郊社。 几 月丙寅, 是日,暴風 豫遷 都汴。 文武 分置河南、汴京淘沙官,兩京冢墓發掘殆盡。 **捲旗**,屋瓦皆震,士民大恐。 因奉祖考于宋太廟,尊其祖日徽祖毅文皇帝, **【雜用,不限資格。」時河、淮、陝西、山東皆駐北軍,麟籍鄉兵** 豫曲赦汴人,與民約曰:「自今不肆 賦斂煩苛, 父為衍祖睿仁皇 民不聊

宋汝爲留偽庭,久謀疏豫虛實蠟書以聞,事泄,豫殺唐佐,亘亦遇害。豫以知東平府李鄴爲 於揚石,乘勝趣汝州,偽守彭玘以城降。豫遣劉夔與金帥撒離曷侵蜀。 尚書右丞,河南鎭撫司都統制董先爲大總管府先鋒將(x)。十二月,襄陽鎭撫使李橫敗豫兵 使孔彥舟叛降豫,其將陳彥明(+)率衆千餘來歸。直徽猷閣凌唐佐、尚書郎李亘、國信副 勉豫三早圖反正,庶或全宗,孰與他日倂妻子磔東市?」豫怒,欲兵之,賴張孝純獲免 五月,豫聞桑仲死,遣人招隨州李道、鄧州李橫,皆不受,執其使以聞。六月、蘄、黃鎭 執進士薛笻送豫,笻 撫 使

第二百三十四 叛臣上

列

傳

間。 |城,輸款于)豫。 剖心以死。 昌府,僞安撫趙弼固守,急攻下之,弼遁,復潁昌。 子女金帛, 師 進於伊陽臺,殪之。 二萬逆戰於京城西北之牟駝岡。 三年正月庚申,李橫破潁順軍,僞守巓和降。 故及於敗。 阜, 文言沿海無備,二浙可襲取。 開封 三月,豫聞橫入潁昌,求援于金人。 人。 四月, 是月,明州守將徐文以所部海舟六十艘、官軍四千餘人浮海抵 陷 號 州。 横敗績,復陷潁昌。 鎮撫司統制官謝阜指腹示賊曰:「此吾赤心也! 豫大喜,以文知萊州,益海艦二十,俾寇通、康 壬戌,敗豫兵于長葛。 二月,河南鎭撫司統制官李吉敗豫 |粘罕遣兀朮赴之,豫亦遣將李成 横軍本羣盜, 恃勇無律, 甲子,橫引兵至潁 勝則 將梁 争取 率

遂長揖不 五月,朝廷遣韓肖胄、胡松年使僞齊。豫欲以臣禮見,肖胄無以應,松年日:「均爲宋臣。」 · 拜, 豫不能屈。 因問主上如何, 松年日:「聖主萬壽。」復問帝意所向,松年日:「必

欲復故疆

|耳。]|豫有慚色。

以 横 陝將官吳勝破豫兵於蓮花城。 荆超知州 奔 荊南,知隨州李道棄城走。 時激悉有梁、衞之地,翟宗屯伊陽之鳳牛山,不能孤立,突圍奔襄陽。 事。 賊將王彥先自亳引兵至壽春,將窺江南。 十月己亥, 賊將|李成陷|鄧州,以|齊安守之, 癸卯,陷|襄陽,|李 成據襄陽,以王嵩知隨州。 劉光世駐軍建康,扼馬家渡,造 甲辰,陷郢州,守臣李簡遁, 九月,楊政遣

<u>剛瓊領所部駐無爲軍,爲濠、壽聲援,賊乃還。</u>

爲 者,復要畫江以益豫。 可憂。今敵使在廷,宜陽許而陰圖之,乘其不疑,可一戰擒也」。 十二月分, 金人遣李永壽、王翊來報聘。 監廣州鹽稅吳伸上書請討豫,謂「金 永壽等驕倨,請還豫俘及西北士民之流寓 人雖彊,實不足慮,賊豫雖微,實

盡歸豫矣。 留之,以計獲免。 未 於 像 可弛備。」旣而朝廷遣章誼使金,至雲中。 四年正月,翰林學士綦崇禮言:「豫父子倚重金人,且永壽等從豫所來,畫江之請必 觀其姦謀,在窺吾境土。 熙河路馬步軍總管關師古與豫兵戰于左要嶺,敗績,遂降賊。洮、岷之地 恐旣通使,人情必解弛,宜戒將帥愈益置守。 粘罕答書約毋駐軍淮南,誼不屈,還過汴,豫欲 。縱和議成,亦 田

前軍,聲言攻定海。 辣、兀朮分道南侵, 取襄、鄧,遂乞师於金人。 偽奉議郎羅誘上南征策,豫大喜。 遁,尋復唐州。 六月,復隨州,磔僞守王嵩于襄陽市。 七月,復鄧州。 金主集諸將議,粘罕、希尹難之,獨宗輔以爲可。 一月,豫策進士。 步兵自楚、承進, 九月,豫下僞韶,有「混一六合」之言,遣子麟入寇,及誘金人宗輔、撻 五月,知壽春府羅興叛降豫。 騎兵由泗趨滁(10)。 乃以宗輔權左副元帥,撻辣權右副 |舒、 **蘄等州制置使岳飛復襄陽,李成** 復遣偽知樞密院盧緯請師於金 奪民舟五百載戰具,以徐文爲 語在飛傳。豫聞岳

書令。 决 帥 意 調 親 渤海、漢軍五萬應豫。 朝廷 征 震 壬 認。 申, 豫兵與金人分道 或勸帝他 幸, 以 九朮嘗 趙鼎 渡淮,楚州守臣樊序棄城走,淮東宣撫使韓世忠自承 日:「戰而 |渡江| 習知險易,俾將前 不捷, 去未 晚也。 軍 」張俊曰:「避將安之? 豫以麟領 東南道行臺尚 遂

退保鎮

使告麟 府,執僞 安。 江亦非策。 韓世忠戰於大儀,己丑,解元戰於承州 十一月壬子,下詔討豫,始暴豫罪惡,士氣大振,欲濟江决戰。 十月丙子朔, 麟 知州王靖。 棄鯔 豫 重宵遁。 不 親來,至尊豈 詔張俊援世忠, 月壬辰,岳飛遣將牛皐 語在 世忠傳。 可與遊雛决勝負 劉光世移軍建康。 ,皆捷。 、徐慶敗金人於廬州 哉? 丙 申, 准 世忠復還揚州。 豫露榜有窺江之言。 西將王師晟、 趙鼎曰:「退固不 庚子, 張琦合兵復 起張浚爲侍讀。 金 戊戌,帝發 人退 南壽 可, 臨 渡 戊

明死之。 貫陌 五. 丽 年 芷 收其算。 七月,豫廢明堂爲講武殿,暴 月,淮 西將酈瓊復光州,偽守許約降。 豫獻海道 圖 及戰船 木樣於金主 風 連 日 八 月,陷光州。 亶 **閏二月,豫將** 商元 十月,豫令民鬻子依商 攻信陽 軍,知 軍 事 税法 舒繼

世忠 年 所 庄 月,豫聚兵准陽,韓世忠引兵急 敗。 六月,築劉龍城以窺淮西,王師晟破之,執華知剛,俘其衆而還。 圍之。 賊守將連 舉六烽,兀朮 與劉猊合兵 九月,豫罷 、來援,

列

傳

第

...**.**

沿海 互市 張孝純謂豫曰:「聞南人久治舟,一旦乘風北濟,將不利於我。」豫懼,故罷

息 民也。 豫 聞 今豫進不能取,退不能守,兵連禍結,休息無期。 ·帝親征,告急於金主亶,領三省事宗磐曰:「先帝立豫者,欲豫闢疆保境,我得按兵 從之則豫收其利,而我實受弊,

|猊 此 |後 (1) 遣人星馳采石諭光世曰:「敢濟者斬。」光世不得已還廬州,與沂中相應。統制王德、 b,破之; <u>酈瓊出安豐,遇賊三將軍皆敗之。</u> 世忠不得前,還順昌。麟兵從淮西繫三浮橋以濟,賊衆十萬次濠、壽間。 奈何許之!」金主報豫自行,姑遣兀朮提兵黎陽以觀釁。 失人心。 率東路兵, 取紫荆山出渦口以犯定遠; 西兵趨光州寇六安, 彦舟統之。 乃答豫 李成、孔彥舟、關師古爲將,籍民兵三十萬,分三道入寇。 豫於是以麟領東南道行臺尚書令,李鄴行臺右丞,馮長寧行臺戶部,許淸臣兵馬大總 詔 一件以淮西屬俊,命殿帥楊沂中至泗州與俊合,比至

濠而劉光世已棄合肥矣。

張 曰:「徐當遣 又遇于|藕塘,大破之。|猊遁,|麟聞亦拔砦走,|麟兵有自書鄉貲姓名而縊者, 豫由 金人聞鱗等敗,詰豫罪狀,始有廢豫意矣。 人容訪河南百姓。」 祝衆數萬過定遠,欲趨宣化犯建康。 沂中遇稅兵於越家 豫覺,請立||鱗爲太子,以覘其意。 |麟總中路兵,由|壽春犯||盧州 十月,猊兵阻 江東安撫使張俊

七年春,豫策進士。 遣諜縱火淮甸,燔劉光世帑藏。二月,又焚鎭江。 豫自鱗敗,意沮

氣奪。 中原遺民,日望王師。三月,帝進駐建康。 八月,統制酈瓊執呂祉,以兵三萬叛降

乞師一金人,且言瓊欲自效。一金人恐豫兵衆難制,欲以計除之,乃佯言瓊降恐詐,命散其兵。 豫,尋殺祉 豫聞瓊降大喜,御文德殿見之,授瓊靜難軍節度使,知拱州。瓊勸豫入寇,豫復

|金人業已廢豫,而||豫日益請兵,遂以||女真萬戶||東||拔爲元帥府左都監屯太原,||渤海萬戶

大撻不也爲右都監屯河間。於是尙書省奏豫治國無狀,當廢。十一月丙午,廢豫爲蜀王。 初,金主先令|撻辣、兀朮僞稱南侵至|汴,紿鱗出至|武城 (三),麾騎翼而擒之,因馳至城中。

舟、酈瓊、關師古各予一郡。以女眞胡沙虎爲汴京留守,李儔副之。諸軍悉令歸農,聽宮人 臺尚書省於汴,以張孝純權行臺左丞相。偽丞相張昂知孟州台,李鄴知代州,李成、孔彦 不愈汝爲軍,不取汝冤行錢,爲汝敲殺貌事人,請汝舊主少帝來此。」由是人心稍安。置行 囚于金明池。 翼日,集百官宣詔責豫,以鐵騎數千圍宮門,遣小校巡閭巷間,揚言曰:「自今

人憐汝者,何不自責也。」豫語塞,迫之行,願居相州韓琦宅,許之。後倂其子麟徙於臨潢,

出嫁。

得金一百二十餘萬兩、銀一千六百餘萬兩、米九十餘萬斛、絹二百七十萬匹、錢九千

八百七十餘萬緡

年六十五。 封 豫為曹王 先是,齊地數見怪異,有梟鳴于後苑,龍撼宣德門滅「宣德」二字,有星隕于平原 ,賜田以居之。 紹興十三年六月卒,是年金皇統三年也。 豫 僭號凡八年, 廢時

鎭。識者謂禍不出百日,豫怒殺之。未幾果廢。

初,僞麟府路經略使折可求以事抵雲中,左監軍撒離曷密論可求代豫。 後撻辣有歸疆

之議、恐可求無望,耽殺之。

靈宮,孟邦雄發永安陵,蹠犬吠堯,蓋無責焉。 豫之僭逆也,馬定國進君臣名分論,祝簡獻遷都、國馬賦,語多指斥; 又如許淸臣毀景

臣梁揚祖以兵萬人至,傅與張俊、楊沂中、田師中皆隸麾下。 苗傅,上黨人。大父授,父履。 授在元豐中爲殿前都指揮使。 隆祐太后南渡, 康王建元帥府,信德守 |傅爲統制官

以所部八千人扈衞,駐于杭州。

候易文資至朝奉大夫, 後以事責降。 薦正彥于朝,復爲武德大夫、知濠州,擢御營右軍副都統制,淵分精兵三千與之。以平丁進 有劉正彥者,不知何許人。父法,政和間爲熙河路日四經略使,死王事。 會法部曲王淵爲御營都統制,正彥歸之。 正彥由閣門祗 淵以法故

第二百三十四 叛臣上

列傳

衆來歸。 功,進武功大夫、威州刺史。 正彥用晏計易旗幟爲疑兵,遂降進。 初,正彥討進,請劉晏偕行。 晏自通直郎遷朝請郎,正彥恥己賞薄而晏獲 晏本嚴陵人,陷遼登第,宣和中率

峻遷,由是無望,乃散所賜金帛與將士,尋被命從六宮、皇子至杭州。

建炎三年二月壬戌,高宗從王淵議,由鎭江幸杭州。 時諸大將如劉光世、張俊、

中、韓世忠分守要害,扈衞者獨苗傅。

財也。」內侍省押班康履頗用事,威福由己出,其徒奪民居,肆爲暴橫。 顯沛至此,猶敢爾耶!」其黨張逵復激怒諸軍曰:「能殺淵及內侍,則人人可富,朝廷豈能徧 先是,王淵裝大船十數,自維揚來抗,抗人相謂曰:「船所載,皆淵平陳通時殺奪富民家 傅等恨之,日:「天子

衆謂 部分既定,乃紿淵以臨安縣有盜,意欲使淵出其兵於外。 積不能平,與<u>王世脩、張逵、王鈞甫、馬柔</u>吉等謀作亂。 薦由內侍。傅自負宿將,疾淵驟貴。正彥雖由淵進,淵檄取所予兵,亦怨之。於是傅 三月辛巳,拜王淵同簽書樞密院事。初,淵建幸杭州議,內侍實左右之。及淵躐躋樞筦, 鈞甫等皆燕人,所將號「赤心軍」。傅

謀,以告淵,淵伏兵天竺。明日,賊黨亦伏兵城北橋下,俟淵退朝,誣以結宦官謀反,正彥手 康履得黃卷小文書,有兩統制作「田」、「金」字署卷末,田乃苗,金乃劉也。 於是頗泄賊

潛與傅通,導其黨入奏曰:「苗傳不負國,止爲天下除害。」 殺 淵,以兵 圍 [履第,分捕內官,凡無須者盡殺之,揭淵首,引兵犯闕。 中軍統制吳湛守宮門,

屋,猶 與軍士歸營,且曰:「已除傅承宣使、御營都統制,正彥觀察使、御營副都統制。」 功多,止作遙郡團練。已斬淵首,更乞斬康履、藍珪、會擇以謝三軍。」帝論以當流海島,可 者卽得美官。 知 Щ 杭州康允之聞變,率從官 呼而 拜。 黃潛善、汪伯彥誤國,猶未遠竄。 帝憑闌呼二賊問故,傅厲聲曰:「陛下信任中官,軍士有功者不賞,私 扣關,請帝御樓,百官皆從。 王淵遇敵不戰, 殿帥王元大呼聖駕來,傅見黃 因友康履得除樞密。 內侍 臣

捕履,得於淸漏閻承塵中。 之,禍未已也。」帝曰:「殷左右可無給使耶?」軍器監葉宗諤曰:「陛下何惜康履。」遂命吳湛 賊不退。帝問百官計安出, 傅即樓下腰斬履。 浙西安撫司主管機宜文字時希孟曰:「禍由中官,不悉除

命。」勝非謂不可。顏岐曰:「得太后親論之,則無詞矣。」 傅請隆祐太后同聽政及遣使與金議和。帝許諾,卽下詔請太后 皇太子可立。」張達曰:「今日之事,當爲百姓社稷計。」時希孟 三軍之請。」通判杭州事章誼叱之曰:「何可從三軍邪!」帝徐謂勝非曰:「殷當退避,須太后 傳猶肆惡言,謂「帝不當卽大位,淵聖來歸,何以處也?」帝使朱勝非縋樓下曲論之。 曰:「宜率百官 垂簾。城聞詔 死社 不拜,曰:「自有 一稷,否 I 則從

能答。 不許,傅等語益不遜。 抱三歲兒,何以令天下?」正彥等號泣固請,因呼其衆曰:「太后旣不允,吾當受戮。」遂作 逐、統制獨不知邪?」傅曰:「臣等定議,必欲立皇子。」后曰:「今強敵在外,使吾一婦 法,童貫起邊釁,所以致金人之禍。今皇帝聖孝,無失德,止爲黃潛善、汪伯彥所誤,已加竄 衣狀,后諭止之。傅曰:「事久不决,恐三軍生變。」顧謂勝非曰:「相公何無一言?」勝非不 拜曰:「今日百姓無辜,肝腦塗地,望太后主張。」太后曰:「道君皇帝任蔡京、王黼, 時寒甚,門無簾幃,帝坐一竹椅。 適顏岐至自帝前,奏曰:「皇帝令臣奏知太后,已决意從|傅請矣,乞太后宣諭。」后猶 旣請太后,卽起立楹側。太后御肩興出立樓前,二賊 更祖宗 人簾 前

此 爲後圖,事不成,死未晚。」勝非曰:「王鈞甫,賊腹心也,適語臣曰:『二將忠有餘,學不足。』 可爲後圖耳。」 太后還入門,帝遣人奏禪位,勝非泣曰:「臣義當死,乞下詰二凶。」帝屛左右語曰:「當

留內侍十五人,餘悉編置。 是日,帝幸顯忠寺。 甲申,太后垂簾,降赦,號帝爲睿聖仁孝皇帝,以顯忠寺爲睿聖宮,

||浚乃舉兵。 丙 ?戌,赦至平江府,張浚知有變,不拜。丁亥,至江寧,制置問題出頭問題,不算。 戊子, 御營前軍統制張俊至平江, 浚諭以起兵, 俊泣奉命。

初,勝非 奏,垂簾當二臣同對, 今屬時艱,乞許獨對。 恐賊疑,乃日引其徒一人與俱。

|傅入對,后勞勉之。 賊喜,無所疑,故臣僚入對,得謀復辟。

勝非深結王世脩,將處以從官,俾通二凶。

博欲改元,正彥欲遷都建康,太后謂勝非曰:「二事如俱不允,恐賊有他變。」己丑,改元

明受。 張浚遺書二凶,獎其忠義以慰安之。 庚寅,百官朝睿聖宮。 以傅爲武當軍節度使。

辛卯,張浚遣進士馮轓赴行在,請帝親總要務;復抵書馬柔吉、王鈞甫宜早反正,以解

天下之惑。

浚旣遣轓,即檄諸路,約呂頤浩、 劉光世會平江。 傅以堂帖趣張俊品赴秦州, 命趙哲

領俊軍,哲不從;改命陳思恭,思恭亦不從。

壬辰,以諫議大夫鄭瑴 sin 爲御史中丞。 賊以武功大夫王彥爲御營司統制, | 瑴面

凶,彦佯狂,卽日致仕。

言防遏海寇,奏道宗爲節制司參議官,措置海船以避賊。 癸巳,韓世忠引兵至常熟。 辛道宗謂張浚曰:「賊萬一 邀駕入海,何以爲計! 」浚乃聲

甲午,貶會擇、藍珪于嶺南,傅追斬擇。 賊欲以所部代禁衛守睿聖宮, 又欲邀帝幸微、

越,

張澂、勝非曲諭止之。

馮幡 說二凶反正,傅按劍瞋目視轎,正彥解之,曰:「須張侍郎來,乃可。」即遣歸朝官趙

休與轓共招浚。

乙未,呂頤浩勤王兵至丹陽,劉光世引所部來會。 丙申, 韓世忠兵至平江, 即欲進兵。

|後日:「已遣||馬||離甘言誘賊矣。投鼠忌器,不可太亟。」

賊遣張彥、

王德聲言防淮,德伺彥醉,并其軍,自

年石濟江歸劉光世,

彦尋爲人所殺。

戊戌,浚以世忠兵少,分張俊兵二千益之,發平江。

信,及得浚書,始悟見討,奏請誅浚以令天下。詔責浚黃州團練副使兵,郴州安置。 上疏謂浚不當責,密遣所親謝嚮變姓名告浚宜持重緩進,賊當自遁,浚然之。 馮幡至平江,浚復遣入責賊以大義,諭以禍福,期雖死無悔。傅等初聞浚集兵,未之

遺幡,言客自杭來,知二公於朝廷初無異心,殊悔前書失於輕易。 賊得浚遺轓書,大喜,乃 見馬柔吉,同縋入城。詰朝,與傅等議,傅曰:「爾尙敢來邪?」欲拘轓。浚逆知之,謬爲書 是日,賊遣苗瑀、馬柔吉將赤心隊及王淵舊部曲駐臨平,以拒勤王之師。 馮轓至臨平,

釋 幡。

列傳

第二百三十

四

叛臣上

事不諧,不過赤族。」乃命幕客李承造草檄告四方討賊。賊聞勤王之兵大集,卽呼馮轓、勝 壬寅,浚得謫命,恐將士解體,給曰:「趣召之命也。」是日,呂頤浩至平江,與浚對泣曰:

非 譢 復 辟。 癸卯,張俊發平江 劉光世繼之。 賊亦遣兵三千屯湖州小林。 丙午,頤浩、浚以

大兵發 平江 詔 以浚爲 知樞密院 事

說。 丁未, 帝御前殿,詔尊太后日隆祐皇太后, 勝非召二凶至都堂議復辟,率百官三上表以請。 立嗣君爲皇太子。 辛 夏四月戊申朔,帝還宮,都人大 酉,徙傳淮西制置使,正彥副

庚戌, 詔復建炎號

翊 敗走。 是日 勤王兵進北關。 頤浩、浚軍次臨平, 二凶詣都堂,趣得所賜鐵券, 苗翊、馬柔吉以兵阻河。 引精兵二千,夜開湧金門遁。 韓世忠率先鋒力戰,俊、光世 辛亥, 「乘之,

浩、浚口引勤王兵入城。 世忠手執王世脩以屬吏。

苗 傅犯富陽,統制官喬仲福 追擊之。 癸丑,犯 桐廬。 甲寅, 斬吳湛。 時希孟編管吉陽

٥

守臣胡唐老拒卻之。 軍 丙辰,傅等至白沙渡,所過燔橋以阻官軍。 丙寅,犯常山。 辛未,賊屯沙溪鎮。 世忠請任討賊。 丁巳,犯 統制巨師古云自江東討賊還,與衙仲 丁卯,以世忠爲江、浙制置 壽昌縣 黥民充軍 庚申,犯衢州 使, 自|衢

福 、王德會信州 賊聞之,還屯衢、信間。

追擊賊。

戊辰, 賊犯玉山縣。

望受之以聞。 五月戊寅朔,世忠發杭州。 賊寇浦城縣,夾溪而屯,據險設伏,以邀官軍,統制官馬彥溥 GIOI 死之。 庚辰,賊黨張翼斬鈞甫及柔吉父子首以降,江、渐制置 賊乘 使 周

勝犯中軍,世忠瞋目大呼,揮兵直前,正彥墮馬,生禽之。 賊將江池殺孟皇、禽苗翊降,衆悉

解甲。張逵收餘兵入崇安,喬仲福追殺之。

|傳棄軍變姓名夜遁建陽,土豪/詹標覺之,執送||世忠,檻車赴行在。 壬寅,詔 班師

秋七月辛巳,世忠軍還,俘傅、正彥以獻,磔于建康市。 張逵、苗瑀及傅二子俱已前死。

詔釋餘黨。

人來歸者,充慮爲敵內應,殺之無噍類。 郎、光祿少卿, 出知滄州。 杜充字公美,相人也。 靖康初,加集英殿修撰,復知滄州。時金人南侵,郡中僑寓皆燕 喜功名,性殘忍好殺,而短於謀略。紹聖間,登進士第,累遷考功

士,節制准南GID、京東西路,依前京城留守,尋知宣武軍節度使。 矣。」二年,宗澤卒,充代爲留守,兼開封尹。三年,以戶部尚書兼侍讀召,未至,改資政殿學 永誚之曰:「人有志而無才,好名而無實,驕蹇自用而得聲譽,以此當大任,鮮克有終 建炎元年,進天章閣待制、北京留守,遷樞密直學士。提刑郭永嘗畫三策以獻亢,充不

七月,以同知樞密院召還,至,卽拜尙書右僕射、同平章事、御營使。初,宗澤要結豪 第二百三十 24 叛 臣上 三八〇九

傑,圖 疏 其失。 迎二帝。 朝廷謂充有威望, 澤卒, 充短於撫御,人心疑阻,兩河忠義之士往往皆引去,留守判官宗穎嘗 可屬大事 ,呂頤浩、張浚亦薦之,故有是命。 時諸路各擁 重兵,

率驕蹇不 ·用命。 張俊方白事,謁未入,俊遽前,充怒戮其使,諸將稍稍慴 服

|康, **|**充爲重,而||充日 使盡 高宗將幸浙西台,命韓世忠屯太平台, 護諸將。 事誅殺,無制敵之方,識者寒心 光世、世忠憚充嚴急,不樂屬充。 王瓊晉屯常州。 詔移光世江州、 以充爲江、淮宣撫使, 世忠常州。 時江、浙倚 留建

解。 岳飛 砂, 時以輕舟薄南岸,官軍 敵課 諸裨校合二萬人邀擊於馬家渡,約王 金 | 人窺江 知無備,夜乃乘數十舟橫江 奮擊,或沉其舟。 張超分守諸渡, 直濟, 一變俱進。 衆不能禦, 一日當畫,金人對江 乘高據岸,以神臂弓射卻之。 敵氣銳甚,淬戰沒,變引兵遁,充軍 敵遂登岸。 .列陣而佯退,衆信之,守益 |充亟命統制官 金人復 陳淬 潰。 逼 悫 碙

源至常州 歸, 乃北約泗州劉位、徐州趙立, 金 人陷 ,道阻未得進,募健士先達上意,充詭詞自飭以報 [建康, 充渡江保<u></u> 原州。 欲合兵邀敵歸路。 充嘗痛繩 一諸將,諸將銜之,伺其敗,衆將甘心焉。 詔遣內侍任源賜親札激厲,俾爲後圖 源 充不敢

提 刑 凌唐佐在南京,守臣孟庾歸朝,以府事委之,唐佐遂降于金爲所用。 充 居眞州 長蘆寺, 守臣 1向子忞勸|充由通、|泰入|浙,欲與偕行,|充畜異 、志,不 唐佐雅善充,以書 始, 京畿

列 傳第二百三十 匹 叛 臣 上

招之。 高宗謂輔臣曰:「**股待**克不薄,何乃至是哉?」下制削<mark>充爵,徙其子</mark>嵩巖崑、 壻韓汝惟於廣 完顏宗弼復遣人說內三「若降,當封以中原,如張邦昌故事。」充遂叛降金。 事聞,

司使。 |充曰:「汝欲復歸南朝邪?」|充曰:「元帥敢歸,|充不敢也。」 |粘罕哂之。 孫自徙所間走歸方,其副胡景山誣充陰通朝廷。 是冬,充至雲中,粘罕薄之,久之,命知相州。充猜阻肆威,同列多不協。 八年,同簽書燕京行臺尚書省事。 九年,遷行臺右丞相。 |粘罕下||充吏,炮掠備至,不服,釋之,因問 十一年,和議成而充死矣。 七年,命充爲燕京三 紹興二年,其

將,後省言其太驟,改武翼郞。 承宣使。六年,光宗攢陵成,遷太尉。 元年多,由建康軍馬都統制除知興州銀利西路安撫使。 |吳曦,信王||璘之孫,節度||挺之中子。以祖任補右承奉郎。 累遷高州刺史。紹熙四年至,挺卒,起復濠州團練使。 四年,憲聖園陵成,以勞遷武寧軍 淳熙五年,換武德郎,除中郎

納曦厚路,陰贊侂胄,遂命曦興州駐箚御前諸軍都統制,兼知興州、利州西路安撫使。 會韓侂胄謀開邊,曦潛畜異志,因附侂胄求還蜀。 樞密何澹覺其意,力沮之。 陳自 從政

宜 除 息 朱 行 副 不 事 帥 棄 而 自紹 Ė 兵權悉歸 侂 興末,王人出 書, 於曦。 謂 曦 不 I總蜀 開禧 可主 賦,移牒宣 二年, 西師,侂胄不 朝廷 議 司 · 報。 ,勢均禮 出 師 詔曦爲 敵 鎭 ~ 潛副 匹 而 Ш 侂胄以總計 宣 都統 撫 副 制王大節, 使, 隸 仍知 宣 司 馧 興州 ,副使得節 聽 便

制

按

刻,

而

財賦之權又歸於曦。

未幾、棄陝西、

河東

招

撫使

困 鳳 王 几 師, 州于金,求封爲蜀王。 | 曦與從弟- 問及徐景望、趙富、米脩之、董鎭 侂胄不之覺。 會正使程 侂胄 日夜望曦進兵,曦陽爲持重,按兵河池不進,潛爲金人 M至, 曦不庭參, 松不敢詰; 共爲反謀, 陰遣客姚淮源獻關外階、成、 曦復多摘取松衛兵, 松亦不 八地以

思遁 野原 賜以 火火衆 金 金遂陷大散關,曦退屯置口品。 | 曦時已布腹心于途, 將士未之知, 猶 人犯 心 西和,王喜、魯翼拒之。 興元 都統制毋思以重兵守大散關 戰方急, 曦傳令退保黑谷, 舉 力戰, 人 陳國飾投匭上書,言曦必叛,侂胄不省。 敵人竊唉之。 曦因撤驀關之戍, 軍遂潰。 曦退 敵由 壁魚 乃焚河池, 關 版閘谷遶出思後, 招集 忠義, 退壁· 厚

敗 金 南失守, 人於七方關, 十二月, 興州 車駕幸四明,今宜從權濟事,衆失色。 見兩 曦不上其捷,還興州。 日相 摩。 金遣 吳端持詔 '是夜, 天赤如 書、金印至置口 王翼、楊騤之抗言曰:「如此,則相公八 M. 光燭 ,封曦蜀王,曦密受之。李好 地 如 書。 翌 日,曦召幕屬 諭意

喜 年忠孝門戶,一朝掃 一大中等皆稱賀 地矣 聽命。曦北 向 .) 受 印。 遣徐景望爲四 川 都 轉運使至於格青爲左右軍統

制, 趨 益昌,奪總領所倉庫。 程松 聞 變,棄興元去。

位 泣,駡不絕 于 興州, 三年正 口,曦扶出之。 卽治所爲行宮, 月,曦遣將利吉引金兵入鳳州 族子僎爲興元統制,見偽檄,色甚不平。 稱是月爲元年。 ,以四郡付之,表鐵山爲界。 使人告其伯母趙氏,趙怒絕之。 曦乘黃屋左纛, 僭王 叔母劉晝夜號

之,侂胄納其說 松 泰之悉棄官去。 目 專至夔, 遣兵扼 軍三萬,分隸 楊震仲飮藥卒, 曦既僭位,議行 十統 巫 薛九齡謀舉義兵。 吳睍為 Ш 王翙、家拱辰皆不受偽命,楊脩年、詹久中、家大酉、李道傳、鄧性善、楊 得勝、羅護等砦,以遏王 帥。 削髮左衽之令。 遣祿祁、房大勛戍萬州,泛舟下嘉陵江,聲言約金 遣董鎭至成都治宮殿,將徙居之。 士以係民心。 師。 侂胄聞曦 於是陳咸自髠其髮, 反,不知所爲, | 蟻所統軍 或勸 人夾攻 史次秦 不 寒陽 如 七萬併程 因 塗 而

其

派

封

兄好 李貴卽曦室斬其首,裂其尸。 興州合江 列 李貴等皆有謀, 傳 第 倉官楊巨源倡義討逆,未有 = 百 = + 四 交相結納。 叛 臣 上 丙分遣將士收其二子及叔父柄、弟晫、從弟晛、贼黨姚淮 二月 校 勘 甲戌 以發,遂與隨軍轉運 記 夜,漏 盡,互源、好義首率 安丙共謀誅 ·勇敢七十人斧門 曦。 會李好 義

以

與

李珪、郭仲、米脩之、郭澄等皆誅之。 時吳端猶臥後閣,亦伏誅。 徐景望、趙富 吳曉、董

鎮、郭榮、祿禧等皆在外,遣人就誅之。函曦首獻于朝。

詔曦妻子處死,親昆弟除名勒停,吳隣子孫並徙出蜀,吳玠子孫免連坐,通主隣祀。 曦

校勘記

敗時年四十六。

外統制官 按靖康要錄卷一六、繁年要錄卷三、北盟會編卷八四都無「外」字;而靖康要錄記此

據 事 為:「內親事官殿班數百人(中略)謀起義於金水門外,統制宣贊舍人吳華爲之首。」 資 、料與之相同,此「外」字涉「金水門外」之「外」字而衍。

疑本書所

 \exists 南京 原作「東京」,據本書卷二四高宗紀、中興聖政卷一改。

異姓 建邦四十餘日 繁年要錄卷四稱張邦昌僭位至退處資善堂「凡三十二日」。 按張邦昌稱帝

在 建 炎 元年三月丁酉,至四 月庚午退處資善堂,與繁年要錄所記合。 此處「四」 字當爲「三」字

之誤。

- 昭 化 軍 節 度副 使 「副」字原脫,據本書卷二四高宗紀、中興聖政卷一 補。
- (至) 大名開德府 「府」字原脫,據繁年要錄卷二一補。

- 潁昌 原作「永昌」,按宋無「永昌府」,據本書卷八五地理志、繫年要錄卷三七改。
- (七) 陳彦明 原作「陳彥時」,據繫年要錄卷五五 、北盟會編卷七六改。
- **公** 董先爲大總管府先鋒將 「管」字原脫。 據繁年要錄卷六○並參照上文□豫以麟爲兵馬大總管」

句補。

へたし 十二月 原作「十一月」,據本書卷二七高宗紀、繫年要錄卷七一改。

69 騎兵 由 泗 趨滁 「滁」原作「徐」,據繫年要錄卷八〇、中興聖政卷一六改。

張浚 原作「張俊」,據繁年要錄卷一〇六、中興聖政卷二〇改。

武城 原作「武成」,據繫年要錄卷一一七、中興聖政卷二二改。

 $\stackrel{\frown}{=}$

孟州 原作「淄州」,據繫年要錄卷一一七、偽齊錄卷下改。

熙河路 「河」原作「和」,按宋無「熙和路」,據本書卷八七地理志改。

三 張俊 原作「張浚」,據繁年要錄卷二一、揮塵後錄卷九改。

금 鄭瑴 原作「鄭慤」,據繁年要錄卷二一、本書卷三九九本傳改。 下文同。

물 黄州團 練 副使 「副」字原脫,據本書卷二五高宗紀、繫年要錄卷二一補。

[12] 浚 原作「俊」,據繁年要錄卷二二、中興聖政卷五改。

云 巨 列 師 傳 古 第 -- 「巨」原作「關」,據同上書同卷改。 百 Ξ 十 四 校 勘 記

응 馬 | 彦溥 「溥」原作「博」,據繫年要錄卷二三、中興聖政卷五改。

 \equiv 淮南 原脫,據繁年要錄卷二四、中興聖政卷五 補。

浙西 原倒,據繫年要錄卷二七、中興聖政卷六乙正。

時係 命韓世忠屯太平 命韓世忠守鎮江、劉光世守太平及池州。此處有脫文。 據本書卷二五高宗紀、中興聖政卷六、繁年要錄卷二七、中興小紀卷七,

當

量 王瓊 原作「王瓊」,據中興聖政卷六、繁年要錄卷二七改。

量 紹熙四年 原作「紹興元年」,按本書卷三六六吳挺傳,挺于紹熙四年致仕,卷三六光宗紀,挺

卽

死于是年。據改。

믕 置口 原作「置口」,據兩朝綱目卷九、朝野雜記乙集卷一八丙寅淮漢蜀口用兵事目條改。下文

同。 四川都轉運使 「都」字原脫,據兩朝綱目卷一〇、同上朝野雜記補。

呈

术史卷四百七十六

列傳第二百三十五

叛臣中

李全上

李全者,維州北海農家子,同產兄弟三人。全銳頭鑑目,權譎善下人,以弓馬趫捷,能

運鐵槍,時號「李鐵槍」。

沂。 安兒起,掠莒、密,展徽、王敏爲謀主,母舅劉全爲帥,汲君立、王琳、閻通 二祖死,霍儀繼之,彭義斌、石珪、夏全、時青、裴淵、葛平、楊德廣、王顯忠等附之。楊 初,大元兵破中都,金主竄汴,賦斂益横,遺民保嚴阻思亂。 於是劉二祖起泰安,掠淄 、董友、張正忠(1)、

福、國安用、鄭衍德、田四、于洋、洋弟潭等咸附之。 孫武正等附之,餘寇蠭起。大元兵至山東,全母及其兄死焉。全與仲兄福聚衆數千,劉慶

列傳第二百三十五 叛臣中

不得食,相率食人。 張惠望見全,躍馬赴之,槍及全,若有縶其馬足而止者。全得收餘衆保東海,劉全分軍駐崓 衆尙萬餘,掠食至磨旗山,全以其衆附,楊氏通焉,遂嫁之。 稱「九大王」,不閑軍務。 頭滴水,斷其南路。 霍儀攻沂州不下,霆自淸河出徐州,斬儀,潰其衆。 霆卽李二措,賜姓完顏。 兵退,金乃遣完顏霆爲山東行省,黃摑爲經歷官,將花帽軍三千討之,敗安兒于闌 安兒輕舸走即墨,金人募其頭千金,舟人斬以獻。 安兒妹四娘子狡悍善騎射, 惠號「賽張飛」,燕俠士也。 劉全收潰卒奉而統之, 此數人者,出沒島崓,寶貨山委而 彭義斌歸李全。黃摑者,即阿魯 全合軍與霆戰,又敗。 安兒無子,從子友僞 稱曰「姑姑」, 霆驍將

爲武鋒軍副將,辟楚州都監,與高忠皎各集忠義民兵,分二道攻金。先遂以李全五千人附 置李珏、淮東安撫崔與之皆令純之沿江增戍,恐不能禦,乃命先爲機察,論意羣豪;敍復鐸 償以玉貨,北人至者輒舍之。又說純之以歸銅錢爲名,弛度淮之禁,來者莫可遏。安兒之未 忠皎、合兵攻尅海州,糧援不繼,退屯東海。全分兵襲破莒州,禽金守蒲察李家,別將于洋 見而說之,處以軍職。安兒死,先至山陽,寅緣鐸得見純之,道豪傑願附之意。時江、淮制 敗也,有意歸宋,招禮宋人。定遠民季先者,嘗爲大俠劉佑家廝養,隨佑部綱客山陽,安兒 有沈鐸者,鎭江武鋒卒也,亡命盜販山陽,誘致米商,斗米輒售數十倍,知楚州應純之 列傳第二百三十五 叛臣中

號「忠義軍」,就聽節制。 克密州,兄福克青州,始授全武翼大夫、京東副總管。 可復。 時頻歲小稔,朝野無事,丞相史彌遠鑒開禧之事,不明招納,密敕珏及純之慰接之, 於是有旨依武定軍生券例,放錢糧萬五千人,名「忠義糧」。於是東 純之見北軍屢捷、密聞于朝、 謂中原

海馬良、高林、宋德珍等萬人輻湊漣水,鐸納之,全與劉全俱起羨心焉。

冬,徙屯淮陰之龜山 即、單、邳、徐兵來援, 勞全金玉器用及其下 |嘉定十一年五月己丑,全軍至||漣水,邀||先白事||楚城,取器甲金穀,議再攻||海州,純之厚 ·有差。 全與戰于高橋,不勝,退守石秋,分兵襲密州,禽黃摑,械至楚城。 六月,全圍海城,金經略阿不罕、納不剌等固守不下。 七月,合

胎。 急,馬司都統李慶宗戍濠,出戰,喪騎三千,珪及張春皆有亡失。帥司調全與先、珪軍援盱 顯臣敗,友、邦永遇珪,下馬與作山東語,皆不復戰。 糧之舟,二月庚辰,率軍二萬度准大掠。 并良等萬人往密州就食,不許;請速遣全代領其衆,又不許。 全進駐盱眙,鼎立以待金人。乙酉,全至渦口,值金將乞石烈牙吾答名「盧鼓槌」者將 全亦欲自試,親往東海點軍赴之。 十二年,山東來歸者不止,權楚州梁丙無以贍。 癸亥,遇金人于嘉山,戰小捷。 |丙調王顯臣、高友、趙邦永以兵逆之, |**丙**窘,乃遣||全出論之。 時||金人圍 **|**先怨||丙請預借兩月,然後帥所部五千 丙以石<u>珪</u>權軍務, <u>珪</u>乃奪運 三月,先軍進駐 至南度門,

數將,得其金牌,追至曹家莊而還。 濟,全與其將應仙掩之,金兵溺准者數千,俘獲甚衆。 三圍俱解,全喪失亦衆。 壬辰,與阿海戰于化陂湖,大捷,殺金 阿海者,金所謂四駙馬也。

進達州刺史,妻楊氏封令人。

管,其餘授官有差。 歡,謂得所托,置酒結爲兄弟。 德,勸林早附。 全有是受,而四駙馬實不死也。 使;殺駙馬,觀察使。 糧, 徙屯 楚州。 七十城之全齊,歸我三百年之舊主。」表,馮垍所作也。 心存宋,及摑敗,意决而未能達。會全還濰州上冢,揣知林意,乃薄兵靑州城下,陳說國家威 六月,金元帥張林以青、莒、密、登、萊、濰、淄、濱、棣、寧海、濟南十二州來歸(三。始,林 林恐全誘己,猶豫未納。全約挺身入城,惟數人從,林乃開門納之,相見甚 先是,制置使買涉以朝命督戰,許殺金太子者,賞節度使, 進全廣州觀察使、京東總管,劉慶福、彭義斌皆爲統制, 全致所得金牌于涉,云殺四尉馬所獲者。涉上于朝,乞如約賞之,故 全既得林要領,附表奉 十二州版籍以歸。 秋,授林武翼大夫、京東安撫兼總 表辭有云:「 增放 殺親王,承宣 三萬 舉諸 人錢

向泗之東城,將踏濠冰傅城下,掩金人不備。俄城上荻炬數百齊舉,遙謂曰:「賊李三!汝欲 效。」制府遣就盱眙劉璋議,璋集諸將燕全,時靑、夏全咸願以長槍三千人從。夜半度准,潛 十一月,大雨雪,准冰合。全請于制府曰:「每恨泗州阻水,今如平地矣,請取東 西城自

偷城耶?」天黑,故以火燭之。全知有備,引去

帥楚州 憤, 乃退保長淸縣,精銳喪失太半,統制陳孝忠死焉。 龍虎上 中通浮梁來往。 千人金銀 取東平,可乎?」於是全合林軍得數萬,襲東平之城南。 博、恩、德、懷、衞、開、相 旦,金騎兵三百奄至,全欣然上馬,帥帳 全乃分隸拱,使先歸,而以餘衆道滄州,假鹽利以慰贍之。龍虎上將軍者, 女將者 一將軍者,貫銀甲,揮長槊,盛兵以出,旁有繡旗 及盱眙忠義萬餘人以行。 一年,趙拱以朝命諭京東, 甲、赤幟,遶濠躍馬索戰。 ,劉節使女也。 一夕,汝水溢,漂大木,斷浮 九州 來歸[三]。 過青厓 |拱說||全日:「將軍提兵度河,不用而歸,非示 時 大暑,全見城阻水,矢石不能及,乃與林夾次水而砦, 涉再遣拱往渝,配 前所 啊,嚴實求內附。 有騎赴之,殺數人,奪其馬,逐北抵 梁,全首尾幾絕,蓋金 林兵還青州。 女將馳槍突鬥。 金參政蒙古剛帥衆守東平,全以三 兵二千, 拱與定約,奉實款至山陽,舉魏 全所携鎭江軍 全亦請往,涉 人堰汝水而決之也。 會諸 將至,拔全以出, 武也,今乘勢 東平副帥幹 山谷。 五百人多怨 不能 上有 止,乃

患之。 制 陳選往 全至楚州 乃陰結制帥所任吏莫凱,使譖先,先卒,全喜而心益貳。 **漣水以總之。** ,屬召先赴行在。 先黨裴淵、宋德珍、孫武正及王義深、張山、張友拒而不受,潛迎石 全自渦口之捷, 有輕諸將心, 涉乘先死,欲收其軍,輟統 獨先嘗策戰勛,威望不下己,

列

第二

百

三十

Ŧi

叛

臣

中

弊,一 有備 窮。 脩 珪 程 白 點 時 |全 知之,乃見涉 六人已順從, 因 虚 寢 涉 萬 有 覃迭爲主禮,務誇北人以繁盛。 武 籍 永 月 · 盱 眙 三千 倂 點 ,然後命 丁 一咋夕三鼓, 珪 京 被 五千人之外 未, 軍 素 因 將之。客 攻劫 東 一之議。 [卑辭獻珍具以自結, 通 虚 路 奉 全遊 籍 好於大元, 爲統 鈴轄印告各六授淵等,使之分統 珪無能爲矣。 則直 | 將招| 請討珪, 金山 有請以附淮將者, 今當遣明亮 全又 尚溢 帥 漣水 臨 作 准 白 |珪道 十數名。」涉 軍,來者 告警, 至是 涉 佛 制 面 未有 府 事 其後有敎令皆不納, 楚城,涉不 殺淵 罪在全矣。 覈 ', 以 請于 云金 實, 處。 涉 增錢粮,不至罷 薦 不 朝,以劉 而 日:「使南將主北 因可省費。」全聞之卽獻計 人萬 始悟全 或 全請所狎娼,覃不與,全歸語其徒曰:「江南佳麗無比,須 挾 議者 能 殤 武武正、 卻, 知覺,及選還,涉恥之,乃謀分珪軍爲六, 餘 語以 深 全爲 遂以付 見紿 在 知鎭 夜 邳 德珍與其謀主孟 全 不 謂 總管駐 州 支,衆心一 江 敢驚制 軍 府 然後 全。 可散其縱。 他 布南 軍, 喬 全思漣水 日 揚州 議更 翼 行 知淵等獨主建,涉 則 使, 度 簡 日 淮、楚 散,珪黨 門,移准陰戰艦 ⟨遣幕| 已 方舟逆之, 復命 分數千兵從之, 日:「全若 導歸 淵等陽受命, 一調 去 爲 邳 -屬 日:「初 大元。 點 Ŧ 咫 自 一。」涉 人迎 尺, 之。 離 大合樂以 朝 恐甚。 然之, 將此 旣 謂 陳于准岸, 一敵矣。 **漣水** 吏亟 涉 沙郎 有 無 用 而 虚 軍 其策, 險 軍未 報 響之。 涉 且 全結 將其衆。 請 聞 阻 額 全, 日:「先在 夕與覈 于 于 知全詐, 有所屬 以示 昨 城 府 全 |珪 朝 朝, 技果 忽狀 夕細 總 吏 壁復 除 出 領 珪 伺

與若等一到。」始造舭艖舟,謀爭舟楫之利焉。

行襲金人後,謁而賀日:「二監軍已立大功,乞以餘寇付全追之。」然全追之不甚力,亦以是 勝,全遁歸,資糧器械悉以委敵。。金人旣陷蘄州,扈再興、趙范及其弟葵邀擊于天長。 進承宣使。 度准,攻尅泗州之西城,入城布守。 踔徙盱眙芻粟以實之,防城之具俱撤以往,爲必守 十四年正月,金人將南來,全請於涉,欲與劉璋共圖泗州,以伐其謀,涉許之。 未幾,盧鼓槌來取西城,全盛兵出戰,大敗,統制賴興死,全閉城自守。明日 全兵至 復戰不 全隨

與惠歸,請于制置司官之,令自總一軍。 東,而不能獲,每歎曰:「天假此賊,事未可量。」及聞盧鼓槌言,自度進未必獲,退復受戮,即 陳躍馬奔全壁,棄所執兵請降。全掖而起之,相與歡甚。不數日,惠戲下數千人皆潛至,全 十五年二月,踔再取西城,盧鼓槌背城力戰,戒惠必獲全,不獲則斬。 惠數嘗敗全于山

恃其弟有大造于lk,又欲分其半,lk許la态取鹽,而不分場。 輦之,而稅其半,然後從聽往諸郡貿易,車、夫皆督辦於林,林不能堪。 南 貨,價增十倍。 膠 西當登、寧海之衝,百貨輻湊,全使其兄福守之,爲窟宅計。時互市 |全誘商人至山陽,以舟浮其貨而中分之,自准轉海,達于膠 福怒曰:「若背恩耶?待與都 林財計仰六鹽場,福 始通,北人尤重 西。 福 又具車

列傳

林泣涕道其故。 統 非 於是李馬 叛。 提 兵 取 涉以答全,全請爲朝廷取之,乃提師駐海州 兒 岩 說林歸大元,福 頭 爾 | 翊歸,全使人殺諸塗。 !」林懼,愬于制置司。 狼狽走楚州 |全攻||林急,||林走,|全遂入||青州 涉密召林戲下問之, 福伏兵于途以 多,加全 以 |招信軍節度 (迫林。 涉 (国)。 間道遣黥胥王翊、閻瓊勞林, 林獨遺涉書詆全,明己 同,林覺不

趙興,使不爲己患;唯忌帳前忠義,乃數稱高友等勇,遇出 涉 邁 合,尺籍 義 下,幷召 屯 而 鎭江 而 屯五千准陰,王暉及于潭統之,所以制 揮之,道開,涉乃入城。 自是以疾求去甚力。 十 諾之。 六年二月,涉勸農出郊,暮歸入門,忠義軍 協莽。 副司八千人于城中,翟朝宗統之;分帳前忠義萬人,屯五千城西,趙邦永、 涉帳前將校,帳前亦願隸焉,然未能合也。 莫若別置 全乃合帳前忠義悉籍之,盡統其軍,時 新籍,一 納諸朝,一申制閩,一 北軍也。 遮道,涉使人語楊氏,楊氏馳出門,佯怒忠 五月被召,卒。秋, 人莫悟 全輕鎭江兵,且以 及丘 留全所, 壽 軍必請以自 邁攝 庶功過有考, 帥事,全忽請 全新置忠義軍 1隨,涉 利 啗其統制 請給無弊。」壽 不 日; 許。 籍。初, 陳選 全每 高 忠義烏 友 統 燕 及

消弭 食 數言全必 蓋自鬻也。 月,許國自武階換朝議 反,欲 至是,喬行簡爲吏部侍郎,上疏論國望輕,不宜帥准,不報。 傾涉而代之。 大夫、淮東安撫制置 會召國奏 事 ", |國 疏全姦謀甚深, 使, 命下, 聞 反狀已著, 者驚異。 先是,國奉 非有 山陽參幕徐 豪 傑 不 洞 能

以准 必往 廷,不反也。」國繼 岩日 以爲笑。國 略示 晞稷 卽 軍 接,而已繼之。 合兵索戰。 及邳州 競者,無曲 日 眞 旷 見。」八月,全上謁,賓贊戒全曰:「節使當庭趨, :「制置無害汝等意。」慶福以報全,全集將校日:「我不參制闧,則曲 威,即奔走不暇矣。」全固留青州,國不能致。 西 雅意開閩,及聞 十七年正月,國之鎭,楊氏郊迓,國辭不見,楊氏慚以歸。 守致書海州 都統謁賈制帥, ·補承信郎,冀結其心。 小吏曰:「小吏奉書而遽得命,諸將校謂何?」不受,歸語其徒 全退,怒曰:「庭參亦常禮,全歸本朝,拜人多矣,但恨汝非文臣,本與我等。 見全無來期,數致厚餽,邀全議事。會劉慶福亦使人閱國意向,國左右知之,語 全敗,欲還楚州,會濱、棣有亂,乃引兵趨 直偏坐之,犒賚十裁七八。 二措納喜兒而囚之。 設盛 (五),欲附宋,全戲下周岊得之,即以報全。 ·國用,晞稷闕望,乃謄國奏注釋以寄全,全得報不樂。是冬,金將李二措 會宴全, 亦冤汝拜。 遺勞加厚, 汝有何勛業, 全兵欲攻邳,四面 全自山東致書于國,國誇於衆曰:「全仰我養育,我 全終不樂。 一旦位我上,便不 四月,全遣小吏致 制使必免禮。」及庭趨, 山 國之客章夢先主幕議,慶福謁見,夢 東 阻水,二措積勁弩備之, 國旣視事,痛抑北軍,有與南 全喜, 相假借耶? 再書,國喜,曲加勞接 遣王喜兒以兵二千應 在我。 國端坐納 今不計生死 全赤心 全不得進, 全拜 汝向 報 朝 覘

列

先責客將,令隔

簾貌喏,慶福不能堪。

國以名馬十餘噭遺全,不受。

國固遣,全俟其充斥階

庭、伺候移時,而復卻之。如是者半月,卒不受。

喜,語家人曰:「吾折伏此虜矣。」義斌求趙邦永來山東,全爲白之,國諾。則永乘間告國曰: 因會,席間出箚白事,國見其細故,判從之,全卽席再拜謝。 「邦永若去,制使誰與處?」國曰:「我自能兵,爾毋過慮。」邦永泣而辭之。全遂往靑州。 一月,國集兩准馬步軍十三萬,大閱楚城之外,以挫北人之心。楊氏及軍校留者恐其圖己, 全欲往靑州,懼國苛留,自計曰:「彼所爭者拜也,拜而得志,吾何愛焉!」更折節爲禮。 。 自是動息必請,得請必拜,國大

將劫寶 謀而 檄往盱眙,復告慶福曰:「制帥欲圖汝。」兩爲自結之計。乙卯云,國晨起蒞事,忽露刃充 議官荷夢玉知之,以告國,國曰:「但使反,反卽殺,我豈文儒不知兵耶?」夢玉懼禍及己,求 信有衆八百,涉徙刺揚州強勇軍。國之聚兵大閱,文信在焉,慶福與謀,令歸與揚州,別遣 指謂人曰:「此宗室也。」至語郡僚曰:「會令汝爲朝士。」潛約盱眙四軍相應。 忠義統領王文 濟王,事見竑傳。時,全圖國之意已决,遣慶福還楚城,使爲亂。或敎楊氏畜一妄男子,間 不助之力。甫歸,陰勒部曲及聚販鹽盜至千餘,結束如北軍,率衆揚言自山陽來擁立 寶慶元年,湖州人潘甫與其從弟丙、壬起兵,密告全黨于山陽,全黨欲坐致成敗,然其 應,事濟卽揮衆度江。盱眙四將不從,於是慶福等謀中輟,止欲快意於許國焉。計

第二百三十五 叛臣中

列

歸營。 州強勇軍統制彭興及淮西親兵將趙社、朱虎等爲腹心,至是首降賊,且助爲亂。 焚官寺,兩司積蓄盡入賊。 忠歎曰:「若曹不識事體,朝廷豈置汝耶?」王文信復獻計慶福曰:「我僞作重傷,提本部軍 世雄、沈興、杜靖毗、富道不屈,或與賊巷戰,興手殺賊將馬良。 賊黨得志, 更相賀,獨張正 例通判青州,全豫令還山陽,及連水而復止之。至是,擁**翀入城,與通判宋**恭喝犒南北軍 庭,客駭走,國厲聲曰:「不得無禮!」矢已及顙,流血蔽面,國走。 歸揚州,揚守必不疑,我生縛守,以其城獻。」慶福喜,夜飮而遣之。丙辰,許國縊于途。 是日,慶福首殺夢先以報貌喏之辱,戒諸軍毋害荷夢玉家,護以五十兵。 親兵數十人翼國登城樓,縋城走,伏道堂中宿焉。 亂兵悉害其家,大縱火, 時四明人姚 惟丁勝、張 初,國倚揚 使使

民。 也。」文信不疑,聯騎入城,坐客次。|拱先入,勸統收戮之,統躊躇不敢發。 · 張、范戲下。」統喜,遣之。 遇文信于十里頭,置酒相勞苦,文信僞爲裹創狀。 |拱曰:「忠義反 甲士突入郡堂,厲聲曰:「王統領好人,提刑不必疑,請出受參。」統不得已,出而犒之。劉全 |楚州,|揚州人見忠義暮歸,豈不相疑?不若暫駐兵城外,然後同見提刑,提刑急欲知||楚州事 會同官議,鈴轄趙拱曰:「若不納,則文信必曰:『我歸營,何故見拒?』將借是以魚肉城外之 拱素善文信,請說止其兵,而以單騎入,俟入城而殺之,然後撫其兵,領往盱眙,分隸 丁巳,文信將至揚州,其徒有亡入城告變者。時揚之兵皆在楚,知州兼提點刑獄汪統 劉全知其謀,帥

我已存三城人,身死無憾。 以兵翼之出,館其家。 ||拱就出,||劉全亦請從。至平山堂,文信責|||換賣已,欲殺之,||拱曰:「爾謀如此,三城人命何辜! 詰旦,統未有處。 然我死,汝八百家老幼在城,豈得生耶?」文信及其衆動色,文 拱又請引文信出城,與議回屯楚州。 文信知事泄,

整爲亂行,於是揚州復震,城門畫閉。 動,乃使下整將兵三千視之,使不敢動。整以邀文信爲辭,引兵還揚州,因僞言盱眙失守,下 時盱眙總管夏全聞山陽得志,亦懷異圖,劉璋厚賂之,乃止。 及文信亂,掉懼夏全復

信、劉全遂還楚州

皆因我起,我必報此讎。」呼趙邦永曰:「趙二,汝南人,正須爾明此事。」乃斬齎牒人,南向告 國謀反,已伏誅矣,爾軍並聽我節制。」義斌得牒大駡曰:「逆賊背國厚恩,擅殺制使。 卯,晞稷入楚城。 天誓衆,見者憤激。 心,晞稷亦勇往,乃授淮東制置使,令屈意撫全。時慶福以事濟報全,全又牒義斌等曰:「許 爾遠懼激他變,欲姑事涵忍而後圖之。 趙范時知揚州兼提點刑獄,得制置印于潰卒中,以授晞稷。 劉全躍馬登郡廳,晞稷迎之,全及門下馬,拜庭下,晞稷降等止之,賊衆乃 全自青州至楚城,佯責慶福不能彈壓,致忠義之関,斬數人,請待罪,朝 謀帥莫可,以徐晞稷嘗倅楚州、守海州,得全歡 全遣騎逆晞稷。 此

悅。

四 [月,潘壬變姓名至楚州,將度淮而北,小校明亮獲之,械送行在伏誅。

唯。 軍習之。 者棄官,無官者歸山東爲百姓。」一人抵掌憤然,使全反,全陽罵之。 翀以告晞稷。 翼日,全 欲乘|全敗舉兵追北軍,晞稷止之。|全後知其謀,對晞稷詰之,二人不爲屈。然懼禍及己,晞 足倒置矣。 見晞稷求納官,晞稷撫之而去。自是不復誰何,其後至以「恩府」稱全、「恩堂」稱楊氏,而手 義只百十人,其他軍皆南軍乘勢將帶,若潰將何以還?」一人曰:「制司必欲追之,不若有官 晞稷初至楚,緩急相濟,如囚趙社,逐朱虎,賊尚知畏。 屢令全還戰馬、軍器于制司,全唯 度准與鬥,伏發,全敗,圍之,慶福以兵往拔全出。 退招姚翀及將校飲,酒酣,全曰:「制司追我戰馬、軍器,若何?」忽有將校曰:「當時忠 甲午,時青使人僞爲金兵,道邳州,出漣水,奪全田租而伏騎八百。翼旦, 軍器庫止餘槍干數千,全復取去。全欲戰艦,歸稷使擇二艘。全移出淮河,使 全與慶福俱重傷,歸楚州。 丁勝、張世 全引二百騎

閱。 告國者,全始惡夢玉反覆。 全始發緘,使家僮讀之,有廟堂遺國書令圖全者,全大怒;又有荷夢玉書,即以慶福謀 初,楚城之將亂也,有吏竊許國書篋二以獻慶福,皆機事。 夢玉知之,時已被堂召,亟辭全如京。 慶福賞盜篋者五百千,未之 己卯,全餽餞夢玉如平

列傳

第二百三十

五

叛臣中

時,潛殪諸十里之郊,復出榜捕害夢玉者。全往青州

馬山 准,進據漣、海以蹙之,斷其南路,如此賊者,或生禽,或斬首,惟朝廷所命。 皆欲親赴之,會全遣人求晞稷書與養斌連和,乃止。 廷知義斌之功,憚全,未欲行賞。 計議官致書,乞助討賊,范亦以爲言,不報。全貽書制置司,誣議斌叛,晞稷繳達之。 復一京三府,然後養斌戰河北,盱眙諸將、襄陽騎士戰河南,神州可復也。」時四總管亦各遣 降金將武仙,衆至數十萬,致書沿江制置使趙善湘曰:「不誅逆全,恢復不成。 千匹,皆揚州 解之,乃止。 **遂死之。** 五月丁 |大元兵說之降,義斌厲聲曰:「我大宋臣,且河北、山東皆宋民,義豈爲他臣屬耶! 戲下王義深等復歸全。 卯,全取東平,不克。 強勇軍 全引兵攻恩州。 馬也。 慶福往救,又敗。 明日,義斌出兵與全門,全敗。 戊寅,劉全以劵易制 未幾,義斌俟命不至,拓地而北,與大元兵戰于內黃之五 全退保山崮,抽山陽忠義以北。 **養斌納全降兵,兵勢大振,進攻眞定,** 司錢,不如欲,復謀亂,楊氏出二千緡 **養斌以千五百騎追之,獲馬二** 賊平之後,收 但能遣兵扼 楊氏及劉全 時朝

以南軍七百從,官犒鐵錢券人五千,全犒銅錢三倍,許携南貨免稅。 折 俎 銅劵二千,他餽稱是,恩徧麾下, 全使人說時靑附己,餽金五 百兩。 人人喜悅。 |青見義斌死,乃附全,自移屯准陰。 晞稷宴青, 全餽折俎如前。 於是請行者不已,得千 全招青入城飲, 全將往 山東

人以俱,晞稷又以千八百人繼之。

於是全止 兵,終不能支。全與屆謀,屆曰:「二人俱死無益也,汝身係南北輕重,我當死守孤城,汝間道 城自守。 會金與大元爭大名,全得往來經理。三月丙辰朔,大元兵攻青州,全大小百戰,終不利,嬰 南歸,提兵赴援,可尋生路。」全曰:「數十萬勍敵,未易支也。」全朝出則城夕陷,不如兄歸。」 二年春,趙范奉祠,林珙知揚州、權提點刑獄。 而 大元築長圍,夜布狗砦,৸援路絕。 全造小校周興祖縋城,雜樵采者走楚州發接 福行。 全北剽山東,南假宋以疑大元,且仰食。

統彭托 歲月。 之,
比亦 乙亥,晞稷以戶部侍郎召,未幾,出知袁州 朝 延譽京 朝廷方謀易帥,劉璋久在盱眙,雅意建閩;又見賊勢稍孤,意功名可立,使鎭江 廷初以力未能討,故用歸稷調護,及傳全被圍,稍欲圖賊。 垂涎代掉,從臾尤力。 師,自謂:「素撫鎭江,三萬人足用,且得四總管歡心,討賊有餘力。」朝廷信 、九月,以踔知楚州兼淮東制置使,忯代知盱眙,晞稷不 晞稷畏懦,幸全未歸以茍 知也。 副

夏全,是欲 屯级己,不召也 月壬 子朔,璋至楚州,心知不能制馭四總管,惟以鎭江兵自隨。 遺 港 形 胎 夏全請從,踔素畏全狡,亦俾留盱眙。 也。 <u></u> 琸獨憚夏全,我何能用?」乃激夏全曰:「楚城賊黨不滿三千, | | 化 自 揣 資望 視 時青在准陰,掉怨 琸 更淺,日:「琸

列

傳

第

百

三十

五

叛

臣中

校勘記

健將 緩師,乃止。 |福欲分兵赴接,兵少,卒不往。 徑入|楚城,|青亦自||准||陰復移屯城內。 又在山東,劉制使圖之,收功在旦夕。太尉曷不往赴事會,何端坐爲?」夏全欣然領兵 甲子,填令夏全盛陳兵楚城,賊黨震恐,楊氏遣人路夏全求 **埠且**駭且恐,勢不容卻,復就二人謀焉。 時傳全已死,

校勘記

- 一張正忠 「忠」原作「中」,據下文及下一卷本傳下改。 周密齊東野語卷九作「張忠政」。
- 金元帥張林以青莒密登萊維淄濱棣寧海濟南十二州來歸 書卷四〇寧宗紀、齊東野語卷九所載「二府九州」之數相合;但齊東野語載有滄州,本卷下文又 按此處史文僅列舉十一 府州, 和本
- 3 舉魏博恩德懷衞開相 以二府六州降元。 疑此處有誤。 九州來歸 按此處僅列舉八州;新元史卷一三七嚴實傳,說嚴先降宋,後

有李全「附表奉十二州版籍以歸」語,疑此有脫誤。

- [四] 加全招信軍節度 按「招信軍」非節度軍額、疑爲「昭信軍」之誤;本書卷四〇寧宗紀、兩朝綱目
- (金) 金將李二指及邳州守致書海州 「金」原作「大元」,據上文和金史卷一〇三完顏霆傳改。

卷一六都作「保寧軍」。

(含) 乙卯 據本書卷四一理宗紀所載潘甫等起兵月日,及續通鑑卷一六三關於此事的記載,這日在

寶慶元年二月。

(七) 卞整爲亂 據上文,疑「卞整」爲「夏全」之誤。

(六) 雄勝軍統制 「雄」字原脫,從考異卷八二說補。

列傳第二百三十六

叛臣下

李全下

全心動,乃置酒歡甚,飮酣,就寢如歸,轉仇爲好,更與屆謀逐踔矣。 安能自立?便當事太尉爲夫,子女玉帛、干戈倉廩,皆太尉有,望卽領此,誠無多言也。」夏 氏寧獨存?願將軍垂盼。」全諾。楊氏盛飾出迎,與按行營壘,曰:「人傳三哥死,吾一婦人 寶慶三年二月,楊氏使人行成于夏全日:「將軍非山東歸附耶?狐死兔泣,李氏滅,夏

爲賊有。踔步至揚州,借州兵自衞,猶箚揚州造旗幟。林拱繳奏于朝,聞者大笑。 夏全旣逐 一令,太息而已,夜半縋城,僅以身免。鎭江軍與賊戰死者太半,將校多死,器甲錢粟悉 辛卯,夏全令賊黨圍州治,焚官民舍,殺守藏吏,取貨物。時踔精兵尙萬餘,窘束不能

第二百三十六

叛

臣下

璋,暮 翱翔淮 歸,楊氏 上。 拒之,意楊氏反目圖己,明日大掠, 趨盱眙欲爲亂, 惠、成進出兵欲勦之,夏全 狼 狽歸金,金人納之。 是舉也,張正忠不從亂,經 張惠、范成進閉門,不得

妻女于庭,并己自焚。

報至,中外大恐,劉璋自劾,未幾,死。

 瞬稷故: 之死, 恭、杜耒等爲幕客,留母及其子于京,買二妾以行。至城東,艬舟 初,姚翀從賈涉辟楚州推官,全喜 全借翀 事 而禮過之。 撫定以誑衆,以功入朝。三月,以翀爲軍器少監、知楚州 楊許獅入城,乃入,寄治僧寺,極意娛之。 其附己, 爲引重當路,得改秩, 以治事。 全請以通判青州。 兼制 間入城見楊氏,用 置 | 神辟鄭子 國

辛亥, **承制授全** 如爲衣,有身,愁無袖耶? 時全在圍 全欲歸于大元,懼衆異議,乃焚香南向再拜,欲自經,而使鄭衍德、田 山東 行 一年,食牛馬及人且盡,將自食其軍。 省 今北歸蒙古,未必非福。」全從之,乃約降大元。 初軍民數十萬, 至是餘數千矣。 四救之,日:「譬 大元兵入青州, 四月

疾而 往。 相猜 手按鞘,懼福先發。 後慶福約|甫同往,及寢,遙見福臥不解衣,心恐,不得已至床前,見床頭鞘刀, 貳,不相見。福僞病旬餘,諸將問疾,慶福 在 山陽,自知己爲厲階,懷不自安,欲圖福以自 福疑慶福就刀見害,乃躍起拔刀傷慶福, 不往。張甫 贖。 者,素厚慶福,懼福疑己, |福知之,亦謀去||慶福。 二人互 慶福徒手不支,甫救之。 慶福 乃勸 慶

俚砦奴 以 安 |坂||雄 出 白 |甫 |続 本金 溝, 距燕二百里而 喜,待遇益 元帥 聽將窩羅虎 ,封高陽公,最善馭衆。 厚。 嘗會飲燕京之大悲閣, 者,歸甫,甫納之。其後窩羅虎遁 阻 巨濼,大元兵不 金亡河北,甫據雄、霸、淸、莫、 能涉, 窩羅虎醉俚砦奴而推使投閣,幾斃焉。 甫每潛師窺何。 去,且竊甫千里馬以獻俚砦奴。 大元將俚砦奴屢欲滅甫 河間、信安不下。

虎

乃佯醉下樓,復乘所獻馬以歸甫,追者莫及,人始服甫之用間焉。

其後歸全。

之,皆 往。 遣 鄭 不支忠義錢糧,是欲立制闧以困忠義也。」六月,福乘衆怒,與楊氏謀,召翀飮。 衍 出,就坐賓 恭繼 應救之得免,去須鬢,縋城西夜走,徒步歸明州,未幾,死。 |来 福 謝以朝廷撥降未下,福曰:「朝廷若不養忠義,則不必建闔開幕; 以慶福 朝 奏捷。 服至八字橋,福兵腰戮之,耒南望再拜 〈次,左右散去。福與翀命召諸幕客,以楊氏命召翀二妾。諸幕客知有變,不得已 頭納翀,翀 **踔之敗,儲積掃地,綱運不續,賊黨籍籍,謂屆所致。** 大喜,耒曰:「慶福首禍,一世姦雄,今頭落措大手耶! 就斃。 二妾之入,翀及見之。 今建閫開幕如故,獨 福數見翀及愈幕促 福 **翀至而楊氏** 」飛報于朝, 兵欲害孙

制 朝 置, 廷 辽 改 准 楚州 亂 相 名准 仍,遣帥必斃,莫肯往來。 安軍 È, 命通 判張國明權守,視之若覊繫州然。 始 公 輕 進 而重江, 楚州 不復建園,就以帥楊紹 賊 徒黨塞 南門,開北

列

俘

第

百

Ξ

+

大

叛

臣下

未幾, 紹雲。 糧, 張 曹米 之,相屠者數百人。 全 林 支邑民田皆以少價抑買之,自收賦以膽軍,錢糧不繼如故。 外日受銅錢二百,楚州物賤可以樂生,而劉慶福爲不善,怨仇相 爲有反 屈 傳楊氏故無恙,婦人頭乃全次妻劉氏 邢德 辱, 紹雲驛送京師,傾朝甚喜。 亦謂. 且謂:「我本賈帥帳前 者未除耳 :「嘗受|宋恩,中遭全間隙,今歸于此, 有郭統制 乃共議殺福 者,殺全次子。 人,與彭安撫舉義不成而歸。」五 檄彭托、張惠、范成進、時青倂兵往楚州,便宜盡 及楊氏以獻, 也 通殺一婦人,以爲楊氏,函其首幷福 於是衆帥兵趨楊氏 ,豈可不與朝廷立事? 賊將 人相謂曰: 尋 國安用、 ,使我 家。 曹無 閻通歎日 福 出 朝 王 首 義 廷不 所 戮餘黨。 I馳獻于 深 衣 德]:「我 降錢 食。 亦 手 嘗 刃

于青州 朝廷 神鎭 五 X 一處之。 、歡宴, 忙 城中 輕儇,每 遷 延 廟 城 議 議 西各 不 分 供四 决。 北 謂 清望重 軍 爲 惠等歸盱眙,賊黨復振。 總管弄戲,得檄不敢自决, 在山東 五 一,使五 ,惟聽青區 人老幼並絕錢糧,出淮陰 人分掌之,每軍 一畫。省檄 之下,不及惠、成進。 紹雲赴 力遜。 無過千 樞 人,一 惠、成進二人即提兵入楚城, 密稟議,淮東 戰 艦 屯南 ,陳准岸以斷全 渡門,一 青亦恐禍 總領 屯平 岳 珂 歸 及,密遣 攝制 路,請 河 橋 府 與林 制 車 、報全 电比 府 及

二人給|托曰:「南北軍易致激變,宜令軍人出入無得帶刃。」又勸早發虎兒軍折洗 惠 成進 肥 歸,錢糧缺乏, 密約降金,盧鼓槌 許之。 時鎭江 軍及滁州 虎兒軍 在盱眙 忙從 者 尙

第 _ 百 = + 叛 臣 下

與惠釋憾連姻,金官惠有加,俾專制河南,以拒大元。自是金人窺淮東益急,朝廷調京湖制 兵至,開門接之,諸軍不戰皆降。於是塞南門,開北門,導准水以通泗之東西域焉。 時。 辭曰:「不願得官,欲得錢粮。」八月辛酉,惠、成進燕忙,忙左右知有謀,多不往, 司兵萬人屯青平山以備全。 酒半,縛忙,忙從者無寸鐵,且醉,皆就縛。即日渡淮輸款,以盱眙附盧鼓槌于泗州 二人每宴忙,必徧迨皂隸,忯皆不悟,方感其担夏全之功,轉兩軍官資。二人同戲 l 性 往 盧鼓槌 下合 如平

准陰, 相公,豈肯爲此!」全亦惡靑反覆。 之乍逆乍順,二人所敎也。平又數致全書至廟堂,以覘朝廷。青繳所授檄於全日:「我素推尊 人下獄,云::「非朝廷殺我妻子,吾惟問汝。」李英, 服大元衣冠,文移紀甲子而無號。 東、淮南行省,得專制山東,而歲獻金幣。十月丙辰,全與大元張宣差幷通事數 禳。 全得青報慟哭,力告大元大將,求南歸,不許,斷一指示歸南必畔,許之。 國明辭疾,青父子同至。 **|青妻至,盡殺之。遂併||青軍,擢** 全推殺其子者郭統制斬之,又收田成瑤、田之昂、李英等八 義深走金,安用殺林、德自贖。 辛酉,與登城南樓飲,殺靑,馳騎往紿靑妻,言靑病,見 小校胡義爲將,徙其半于 全腹心,狡而密,與李平皆山東 漣 丁巳,全邀青及張國明于 八海 人至楚州, 得吏。 承制 授山

紹定元年春,全厚募人爲兵,不限南北,宋軍多亡應之。 列 天長民保聚爲十六砦,比歲失 三八三九

陽制置 谷汝礪 諸崮 舟成 下江, 邦永 以就錢糧,往往貿貨輸大元。 實及石小哥邀擊,敗走。 壬辰,全使衍德提兵三萬如海州。 又遣人泛江 官振之,不能繼 多重滯。 乃變名必勝。 人習水。十一月,全至楚州。 一年四月,全以糧少爲詞,遣海舟自蘇州洋入平江、嘉興告糴,實欲習 嚴甚。 、王十五長之,亦蠭結水砦, 一湖市 全又與金合縱,約以盱眙與之,金亦遣斯經歷者聘全,皆不遂。 朝宗市煔木往揚州, 六月、試舟射陽湖、善湘恐其乘便擣通、泰、亟牒池州求通、泰入湖之路。七月 桐油煔筏, ,壯者皆就募。射陽湖浮居數萬家,家有兵仗,侵掠不可制,其豪 全知東南利舟師,謀習水戰,米商至,悉併舟糴之,留其柁工,一以敎十。 小哥,珪子也,遂奪青厓崮,據之。 厚募南匠,大治舭麓船,自淮 宋得少寬北顧之憂,遣餉不輟。 全縱遊說于朝,不若復建山 乙未,全及楊氏大閱戰艦于海洋。 善湘亦聞于朝,請以松木易留之。 以觀 全山東經理未定,而歲貢于大元者不缺,故 成敗。 翟朝宗知揚州 及海相望。 九月,全歸海州 權制置。 於是善湘禁桐油 八月,全趨青州,爲嚴 全不得已,代以楡板 全厚賞捕趙邦永, 海道,覘畿 治舟益 外恭 周安民 源于宋 急 甸 點筏

陽言歸東平葬方士許先生。 節使何爲有是言也。」全曰:「縻費朝廷錢糧至多,乃殺許制置,不忠;我兄被人殺,不能 未幾,還。 嘗燕張國明等, 忽日:「我乃不忠不 ·孝之人。」 衆日:

六月,全資准安牛馬驓趙五嘯合亡命,雜北軍分往盱眙略牛馬。

九月,

全往漣、

海視

戦艦

也。 報復,不孝。二月二十五日事,吾之罪也。 全密遣軍掠高郵、寶應、天長之間,知高郵軍葉秀發遣宗雄武領民兵捍禦,為賊所敗。 十一月十三日事,誰之罪耶?」蓋指與與夏全

國明稟議,全以寶玉資其行,賓從所過,揚言:「李相公英略絕倫,其射五百步,朝廷莫若裂 使朝廷失鹽利。」全欲朝廷不爲備,且雖反而難遽絕錢糧,乃挾大元李、宋二宣差恫疑虛喝 先據揚州以渡江,分兵徇通、康以趨海。 地王之,與增錢糧,使當邊境。」徧餽要津,求主其說。 而使國明達諸朝,而大元實未嘗資全兵。 且伏姦于外,謀入爲亂,以不得入而止。 三年二月壬寅,御前軍器庫火。得縱火者,楚州軍穆椿也。 有識李宣差者,曰:「此青州賣藥人也。」七月,召 於是先朝兵甲盡喪。 諸將皆曰:「通、泰,鹽場在焉,莫若先取爲家計,且 旣見廟堂,以百口保全不叛。 |椿臨刑笑曰:「事濟矣。」全欲 全欲銷宋兵備,故使椿行,

將陳益、樓強皆遁,全入城據之。 稱遣兵捕盜過 王節入鹽城,懇全退師;又遣吏曾玠、李易入山陽,求楊氏裏言之助,皆不答。 會全糴麥舟過鹽城縣,朝宗嗾尉兵奪之。全怒,以捕盜爲名,庚午,水陸數萬徑擣鹽城,戍 兵扼境。 八月,全將閱舟師,風不順,焚香禱曰:「使全有天命,當反風。」語畢風反。 大閱數日 鹽城, 全留鄭祥、董友守鹽城,提兵往楚。 令自棄城遁去,慮軍民驚擾,未免入城安衆。 知縣陳遇踰城走,公私鹽貨皆沒於全。朝宗倉皇遣幹官 整與遇麾軍道左,擊柝聲諾。 乃加全兩鎭節,令釋兵, 朝宗乃遣卞 全言于朝,

列

第

__

百三

十六

叛臣下

謀再用紹雲, 命制置司幹官耶律均往諭之。全日:「朝廷待我如小兒,啼則與果。」不受。 紹雲辭以官卑不 ·能制; 命鄭損,損辭。 通判揚州趙璥夫暫攝 朝廷爲罷朝宗, 事

米,即自轉輸淮海入鹽城以贍其衆。他軍士見者曰:「朝廷惟恐賊不飽,我曹何力殺賊! 水手。 全 |造舟益急,至發冢取煔板,鍊鐵錢爲釘鞠〔1〕,熬人脂擣油灰,列炬繼晷,招沿海 又給|璥夫以大元為詞,邀增五千人錢糧, 求誓書鐵券。 朝廷猶遣餉不絕。 全得

陽湖人至有「養北賊戕淮民」之語,聞者太息。

大丞相力主安靖之說,深有覆護之恩,奈何趙制置、 岳總管、二趙兄弟人自爲政, 使全難 能 以滅全,高官重祿任彼取之;倘不能滅,方表全心。」善湘見之甚憤,范亦請關兵。 全欲决定去就,親往 、壽河,引淮船入湖,爲攻撓水砦計。復言於制置司云:「全復歸三年,淮甸寧息, 王十五附全,全又遣人以金牌誘脅周安民等,造浮梁于踰口,以便鹽城來往,又開馬 1鹽城存箚。若有疾全者、疑全者,如趙知府之輩,便可提兵决戰 雖荷

湘煥章閣學士、江淮制置大使,范直徽猷閣、知揚州、淮東安撫副使,葵直寶章閣、淮東提點 有 清之深憂之,密與樞密<u>袁韶、尚書范楷議,二人所見合。</u>清之乃約韶見帝,韶歷言全狀,帝 **漫色**。 時 斓 ,清之卽力贊討全,帝意决。清之退,以帝意告彌遠,彌遠意亦决。 遠多在告,執政無可否,舉朝率謂:「大丞相老於經綸,豈不善處。」獨參知政事鄭 乙巳,金字牌進善

刑 獄兼知滁州,俱節制軍馬,全子才軍器監簿、制置司參議官。 下詔曰:

當車, 秩 官倒 虔劉 心,誕行天罰 攘於鹽 肆陸梁。 茲李全,儕於異類,蜂屯蟻聚,初無橫草之功;人面獸心,曷勝擢髮之罪! m 念山東之歸附,即淮甸以綏來。 了停給錢糧。 我民,輸掠其衆。 示以寵榮,坐而食者踰十年,惠而養之如一日,此更生之恩也,何負汝而反耶? 君臣,天地之常經; 滅亡可待。 邑,繼掩襲於海陵,用怨酬恩,稔惡恣暴。 因餽餉之富,以嘯集儔徒;挾品位之崇,以脅制官吏。 敷江、淮制臣、整諸軍而討伐; 故神人之共憤, 豈覆載之所容! 狐假威以爲畏己,犬吠主旁若無人。 刑賞,軍國之大枋。 視爾遺黎,本吾赤子,故給資糧而脫之餓殍,賜 順斯柔撫, 因朝野僉議,堅一意以勦除。 爲封豕以洊食,貪婪無厭; 舍是: , 弗圖, 逆則誅夷。 姑務包含,愈滋猖獗,遽奪 孰 凌蔑帥閩,殺逐邊 不可忍 惟我朝廷兼愛南 ļ 繆爲恭順,公 李全可 怒螳 蔽自殿 削 螂 奪

州 功名。 斬到全者,賞節度使,錢二十萬,銀絹 除防禦使,縣, 肆予衆士,久銜激憤之懷; 凡日脅從,舉宜效順,當察情 除團練使; 暨爾邊氓, 將佐官民以次推賞。 而宥過,庸加 二萬匹; 期洗沈寃之痛。 同謀 惠以褒忠。爱飭邦條,式孚羣聽 人次第擢賞。 逆全頭目兵卒皆我遺黎,豈甘從 益勉 思於奮厲, 能取 奪見占城壓者, 以共赴於 應擒

列

傳

心; 害, 降, 德、 叛 通古今, 俱加 如能 國安用雖與逆全管兵, 當各推恩。 諒 由 **曾典,追封立** 相率來歸,當與赦 宜曉逆順, 劫制,必非本心。 **時**青以忠守境,屢立駿功; 如率衆來降,當加 廟。 罪。 然屢效忠款,乃心本朝;馮垍、于世珍雖爲逆全信用,然俱 所宜去逆來降,並與原罪;若能立功效者,更加異賞。 海州、漣水軍、東海縣等處有爲逆全守城壁者, 羅用。 彭義斌以忠拓境, 四方士人流落准甸, 大展皇略,亦為逆全謀 時 陷賊, 舉城來 實 非本

詞,清之所代 噫,以 威 也。 報虐,旣有辭於苗民; 促荆襄、淮西諸軍赴援。 惟斷乃成,斯克平於准、一際。 布告中外, 咸使聞知。

詔

人尤謂不急。 豪,人皆苦之,翟朝宗亦以爲笑。旣浚,勝决新塘水注焉。 趙勝屯西城,見濠淺,每日:「設有寇至, 自堡砦提勁弩赴大城注射,全稍退。 壬子,全兵突至灣頭,璥夫恐,欲走,副都統丁勝劫闍者止之。 全至,勝開水門納賈舟千餘艘,活者數千人,糧貨不與焉。 全遣劉全奄至堡砦西城下,欲奪之以 未圍大城,先襲堡砦,何可不備?」盛暑中督軍浚 及是、劉全不能進。勝又沒市河 全攻城南門,) 瞰大城。 都統趙勝 先是,

千人糧,勸全歸楚州。 時朝廷雖下詔討全,而猶有內圖戰守、外用調停之說。 歌夫亟遣劉易卽全壘授全。全笑曰:「丞相勸我歸,丁都統與我戰, 是日,敬夫得彌遠書,許增萬五

之爲數截, 列 绑 第 二百三十六 叛 F 下

非相紿耶?」擲書不受,惟留省箚。璥夫始知全紿已,亟發牌印迓范。 有,何假汝獻爲!」乃含濟僉判廳,入郡堂,盡收子女貨幣。 如全壘,全以增糧省檄示之,尉復出,獻錢二百萬以降。 吏出迎。 于邦傑、宗雄武通全,戒守者無得發矢,俟薄城而蹙之,全得距堙。 全入坐郡治,濟發帑出所獻錢,全曰:「獻者,獻汝私藏耶?若泰州府庫, 乙卯,邦傑、雄武開門導全, 宋濟恐,令縣尉某 癸丑,全寨泰州城 濟帥僚 則 我固

范、葵親出堡塞西門,列陳待之,全不敢動,避等乃入城。庚午,全晨率步騎五千餘攻堡塞 卯,全攻城東門不利,贼將張友呼城東請見湊,全隔濠立馬相勞苦,葵切責之, 衆宜陵。丙寅,至灣頭立砦,據運河戶三之衝。使胡義將先鋒騎駐平山堂,伺三城機便。丁 揚州矣,江其可渡耶?」莫敢對。旣而曰:「今惟有徑擣揚州耳。」甲子,全配兵守泰州,悉出 東向 西門,趙勝出兵,戰不利,范、葵以兵益之。 全兵亦增,葵擊却之。 辛未,賊引兵三萬沿州城 矢向葵而去。戊辰,張雖、戴友龍、王銓、張青以天長制勇三軍至,阻全不得前,遣人請援。 走之。襄兵萬人至眞州上垻,統制張達、監軍張大連不設備,魚貫而行。 西門,李虎、趙必勝、張璡、崔福力戰,自巳至申,全乃沿東門以歸,丁勝、王鑑、于俊擊 庚申,全聞范、葵旣入,鞭衍德曰:「我計先取揚州渡江,爾曹勸我先取通、康,今二趙入 殲者五千, 達、大連死之;淮西援兵至, 亦遇全統領桑青力戰, 城中俱不知也。 全哨馬帥田四擊 全彎弓抽

引輕 襄 玠 兵 等 騎 敗, 距 犯 准 州 凶 安 城 焰 十里,焚全砦栅,全將劉 南門,且欲破堰泄濠水,統制陳達率勁弩射之,范、葵出 益 振, 每日 一「我不要准上州縣,渡江浮海,徑至蘇、杭, 全 出 一戰,玠軍不利,退屯寶應 孰能當我!」甲戌,復 軍迎擊,乃去。 是日

門以) 等 圍, 絕。 殆 以持 范、 輕 全志 破 兵奉 全將 築長 久困官 葵命三城諸門各出兵劫砦, 舉火爲 吞三城,而兵每不得傅城下, 制,親 張友于都倉,獲粮船數 圍,三城自困。」乙亥,全悉衆及驅 軍,不 帥 將士出堡砦西, 復 **薄城。** 戊寅, 十艘。 全分路鏖戰,自辰至未,殺傷相當。 全張蓋 宗雄武獻全計曰:「城中素無薪,且儲蓄爲總所支借 甲申,葵出戰,賊 期, 奏樂平山堂,布置築圍,指揮閒暇。 鄉農合數十萬 夜半縱兵衝擊, 殲賊甚衆。 大 敗。 .列砦圍三城,制司 庚辰,范出 自 是賊 '總所糧援 范、 師大戰, 葵令諸 一意 俱 長

勝遣統 引去。 處,范、 甚 出 |**葵** 日 几 葵提 年 制 乙未 是 陸昌 日 正 「賊俟我收兵而出爾。」乃伏騎破垣門,收步卒誘之。 李虎 月辛 兵策應, |玠 孫舉 破 jp 全將鄭祥,獲粮 出 立 全步 |全 |兵 南 FJ, 橋 堡岩于 、浚圍城塹,范、葵遣 騎 楊義 數千 出 出 北門,贼 東門, 百 戰, 艘。 諸 王鑑出 甲午, 步騎 軍 奮 諸 分道 擊, 將出 全兵千餘 西 門,崔 俘馘甚衆。 來戰, 城 東 勝 犯 門掩擊,全走土城,官 福 州 擊退之。 出 北 城 夜,贼 門, 東門,城 賊兵數千果趨豪側 各徑扼 范 復 合所 陳 中 于 出 贼 開 西門, 城閉 兵 圍 城 軍 應之, ·躡之,蹂溺 開 Ţ 土城 酉, |全 壨 虎 趙 數 卽

第二百三十六 叛臣下

戰,城上矢石 乍退,以誘揚州兵,復驅壯丁增濠面,培鹿角。 范、葵遣騎將出,夾城東西牽制之,親出州城 横衝之,三道夾擊,用范所制長槍,果大利,賊敗走。 翼日,全遣步卒三百餘向城西門,乍進 **迭陳以待之,自巳至未,賊與大戰;別遣虎、顯廣、必勝、義以馬步五百出賊背,而|葵帥輕兵** 西門,分三道以進,賊望風潰,乃募勇力齎薪砲,焚其樓櫓十餘。 賊自平山堂麾騎下救,道 雨注,賊退。有頃,賊別隊自東北馳至,范、葵揮步騎夾浮橋、吊橋並出,爲三

贊之,謂激作愈甚,朝廷愈畏,則錢糧愈增,又許身任調停之責。 故全兵將舉而張國明先 我手否?」人皆怪之。 削全官爵,罷支錢糧,攻城不得,欲戰不利,全始自悔,忽忽不樂。或令左右抱其臂曰:「是 召,全之託詞陳遇棄城,及歸過三趙圖己,蓋成謀也。及三趙用,宋師集,諸闆易,國明沮, 始,全反計雖成,然多顧忌,且懼其黨不皆從逆。 邊陲好進喜事者,欲挾賊爲重,或陰

遇于俊軍而歸。

肆。是晚,燕大元宣差,宣差激全日:「相公服飾器用多南方物,乃心終在南耳!」全乃取誥 朝服南向,歷述平生梗概,再拜褫服,焚之,歎曰:「國明誤我。」 淚下如雨, 抆淚就坐彊 有胸山于道土者,老矣,全迎致之,初見全即歎曰:「我業債合在此償耶?」占事多驗, 時正月望,城中放燈張樂,姑示整暇。全見之,亦往海陵載妓女,張燈平山堂,矯情自

撫、提刑討逆,然爲逆者,節度使也。 盜固安撫、提刑所得捕,不死何爲!」入見全曰:「相公明日出帳門必死。」全怒以爲厭己,斬 尊爲軍師。 及見全焚誥命,謂人曰:「相公死明日,我死今日矣!」人問之,曰:「朝廷以安 賊爾

之,至曰:「無殺我,我乃頭目。」先是,令諸陣上,衆獲頭目無得爭以爲獻,故羣卒碎其尸,而 李虎軍已塞其甕門。全窘,從數十騎北走,葵率諸將以制勇、寧淮軍蹙之,賊趨新塘。 分其鞍馬器甲,丼殺三十餘人,類非卒伍,俱不暇問 自決水後,淖深數尺,會久晴,浮戰塵如燥壤,全騎陷淖不能拔。 前,亦不知其爲全也。 軍素爲賊所易者,張其旗幟以易之。全望見,喜謂宣差曰:「看我掃南軍。」官軍見賊突鬥而 其所易而圖之,必勝。不如出堡塞西門。」壬寅,全置酒高會平山堂,有堡塞候卒識其槍 雙排爲號,以報,范喜謂獎曰:「此賊勇而輕,若果出,必成擒矣。」乃悉精銳數千而西,取官 范、葵夜議詰朝所向,葵曰:「東向利,不如出東門。」范曰:「西出嘗不利,賊必見易,因 范麾軍並進,葵親搏戰,諸軍爭奮。 賊始疑非前日軍,欲走入土城, 制勇軍奮長槍三十餘亂刺 亚

人爲首,以竟其逆,莫肯相下,欲還淮安奉楊氏主之。范夜上捷書制置司,議翼日追賊。 甲辰,賊軍全椒人周海請降,報全已殺,餘黨議潰去。未幾,聞安用歎恨飮泣,初議推一 Z

第二百三十六 叛臣下

列

傳

乎?」城中應曰:「汝李全已爲戮,汝何不降?」賊不應,諸將欲追賊,范懼有伏兵,先分兵燒 新塘骸骨,得左掌無一指,蓋全支解也。先是,全乞靈茅司徒廟無應,全怒,斷神像左臂。 明,奏追及賊于灣頭,一戰又破之,俘斬及奪回糧畜蔽野。 圍城樓櫓,夜半火光燭天,命東南諸門皆出兵,范、葵繼提精兵進。 或夢神告曰:「全傷我,全死亦當如我。」 至是果然。 安用引五百騎徑南門趨灣頭, 范伏弩射之, 賊呼曰:「爾襄陽援兵已敗走, 別將追至大儀,不及。葵使人瘞 四鼓,賊大潰。丙午黎 汝知之

就平,謝止之。甲寅,善湘來犒師。二月,命胡穎部所獲賊會二十人獻俘于朝,且定奇功二 十有九人及其餘,促行賞,又遣趙楷往禀廟算。 有資遊士吳大理等助煽之。及泰州凱奏繼上,浮言始定。 揚州平,善湘以露布上,帝驚喜,太后舉手加額。 國明輩懼禍及己,唱論云全未死,至 朝中皆擬隨表入賀,彌遠以小寇

破賊于崔溝。己酉、范、葵分兵進至平河橋,剿賊甚多。壬子,玠、整敗賊將王國興于岡門,斬 首千級。 擊却之。 角取鹽城。 三月庚寅,禡祭,有梟鳴于牙,占之吉,別遣全子才〔三率王旻等將萬五千人,與于玠掎 癸卯,造總轄韓亮、戚永昇率多槳船及民船四百入射陽湖,擊賊于踰口。丁未,亮 四月丁巳,敗賊于十里亭,賊兵爭門,墜濠如蟻。庚申,別將范勝、趙興破賊砦于壽 癸巳,步騎十萬發揚州,留勝權守。 庚子,鹽城賊董友、王海以兵圍下整砦,玠

河,拔農民脅從者萬家。

准北賊歸赴援,舟師又剿擊,焚其水栅,夷五城餘址,賊始懼。己亥,子才率趙必勝、王旻 爲賊虐,至是洩憤,無老幼皆殺之,燒砦栅萬餘家,腥焰蔽天。餘寇爭橋入大城,重濠皆滿。 軍移砦西門,道遇賊大戰,至夜不解。子才爲銳陣左右救,乃勝。 繼至,自丑至未,五城俱破,斬首數千級,生擒數百人。 兵士有故隸楚州左右軍者,家屬數 月丙戌朔,天大霧,官兵攻上城,賊守者尙臥,倉皇起鬥。官軍互踏肩爲梯,前者或墜,後者 子才自他道進攻,賊將董友拒之,大戰于港口,敗之。庚辰,舟師過漣水,戰勝,逹淮安。 壬戌,范、葵遣諸軍薄淮安城下,賊大敗,死者萬餘,焚二千家,城中哭聲振天。

朝旨,是堅賊志,不如陽許以誤之,我自爲必討之計。」乃遣范用吉入城諭賊曰:「朝廷已許 絕准而去。賊黨即遣僞計議馮垍、潘于款于軍門,范等密聞于朝,朝論不可,范曰:「若明論 朝廷,本欲圖我來降,爲我所覺,已驅之過淮矣。以此請降可乎?」衆曰:「諾。」翼日,楊氏 者,以我在故爾。殺我而降,汝必不忍。若不圖我,人誰納降?今我欲歸老漣水,汝等宜告 納降,但令安撫交過北軍。」的德等遣潘于隨用吉報謝,許獻玉帶、犒軍黃金四千兩。范曰: 我欲款賊,賊更來款我。」于歸,鄭衍德等自知降亦不免,始送款于金。至是,金遣共副統 楊氏諭鄭衍德等曰:「二十年梨花槍,天下無敵手,今事勢已去,撑拄不行。 汝等未降

軍許奕、萬戶兀林答以其京東元帥牒來言曰:「此賊不降,能爲兩國患,請與大國夾攻之,各

勿受降。」范怪其來無故,而難於陰絕,遣王貴報之,不從其請。

降金。繼得探報云:宋師遲一宿攻城,淮安亦爲金有矣。於是全所據州悉平。楊氏竄歸山 斬之不能禁,反有起殺頭目者。 六月己未,大戰于河西三砦,賊大敗,楊氏歸漣水。壬戌,賊先遣妻孥過准,軍爭欲往, 甲子,復大戰,淮安遂平。 議乘勝復准陰,兵未行,准陰

全之寇泰州,官屬十有九人皆迎降,獨教授高夢月不汙,詔贈三官。

全子壇質。

東,又數年而後斃。

校勘記

[1] 鍊鐵錢爲釘鞠 「鞠」,宋會要食貨五〇之二作「剱」。

(三) 運河 原作「連河」,薛應旂宋元通鑑卷一〇五作「運河」,是。

[三] 全子才 「全」原作「余」,據上文改。

(图) 全子擅 「擅」,本書卷四五理宗紀、元史卷二〇六叛臣傳、新元史卷二二二李寶傳均作「璮」。

